




6. 3. 36.
No. ~~10-6-2~~

BOSTON
MEDICAL LIBRARY
ASSOCIATION,
19 BOYLSTON PLACE,

Received.....

By Gift of *E. H. Clarke M.D.*





2.

~~S. Sweden. Fr.~~

~~Paris. 1845.~~

E. H. Clarke



A. C. CELSI
DE RE MEDICA
LIBRI OCTO.

EX TYPIS FIRMINI DIDOT,

IN VIA DICTA JACOB, N^o 24.

A. C. CELSI
DE RE MEDICA
LIBRI OCTO.

EDITIO NOVA,

CURANTIBUS

P. FOUQUIER IN SAL. PAR. FACULTATE PROFESSORE,
ET F. S. RATIER. D. M. P.



PARISIIS,
APUD J. B. BAILLIÈRE, BIBLIOPOLAM,
IN VIA DICTA DE L'ÉCOLE DE MÉDECINE, N° 14.



MDCCCXXIII.



PRÆFATIO EDITORUM.

JAM DUDUM ab omnibus medicis suo pretio æstimata sunt A. C. Celsi opera; quæ, quanti sint nominis ex eo facile patet, quòd plurimis hactenùs editionibus typis mandata sint. Itaque in nostro auctore sermonis elegantiam, doctrinæ varietatem simul et hippocraticam præceptorum prudentiam, laudare supervacaneum est, sed de hâc quam lectori offerimus editione breve aliquid monendum.

Insudaverunt primi editores et præsertim Leon. Targa, ut manuscriptorum codicum, editionumque variarum sedulâ et indefessâ collatione, nobis mandarent accuratissimè emendatum opus: his tamen laboribus quamlibet immensis aliquid addere licuit, constantemque dedimus operam, ut hancce nostram, plerisque potiolem, optimis æquam, editionem præstaremus.

Quod ad propria auctoris vocabula spectat, Targam ut potè emendatissimum ferè semper secuti sumus, sed in interpunctione

6. PRÆFATIO EDITORUM.

doctoris Pariset editionem anteponere consultius visum est : hunc autem imitandum minimè censuimus, cùm verba non solum mutare, addere, subtrahere, sed integros etiam paragraphos transponere, editori fas esse non dubitavit.

In numerosa capita et sectiones opus dispartire, et singulo libro argumentum, sicut in quibusdam editionibus præfigere, in hâc nequaquàm utile fuit, cùm in fine index reperiatur ex ordine litterarum quam latissimè explicitus.

A. CORNELII CELSI

DE RE MEDICA

LIBER PRIMUS.

UT alimenta sanis corporibus agricultura, sic sanitatem ægris medicina promittit. Hæc quidem nusquam non est; siquidem etiam imperitissimæ gentes herbās, aliaque prompta in auxilium vulnerum morborumque, noverunt. Verùm tamen apud Græcos aliquantò magis quàm in cæteris nationibus, exculta est: ac ne apud hos quidem à primâ origine, sed paucis ante nos seculis; ut pote quùm vetustissimus auctor Æsculapius celebretur: qui, quoniam adhuc rudem et vulgarem hanc scientiam paulò subtiliùs excoluit, in deorum numerum receptus est. Hujus deindè duo filii, Podalirius et Machaon, bello Trojano ducem Agamemnonem secuti, non mediocrem opem commilitonibus suis attulerunt: quos tamen Homerus non in pestilentia, neque in variis generibus morborum aliquid attulisse auxilii, sed vulneribus tantummodò, ferro et medicamentis, mederi solitos esse proposuit. Ex quo apparet, has partes medicinæ solas ab his esse tentatas, easque esse vetustissimas. Eodem quoque auctore disci potest, morbos tùm ad iram deorum immortalium relatos esse; et ab iisdem opem posci solitam: verique simile est, inter non multa auxilia adversæ valetudinis, plerùmque tamen eam bonam contigisse ob bonos mores, quos neque desidia neque luxuria vitiant: siquidem hæc duo corpora priùs in Græciâ,

deindé apud nos, affligerunt. Ideòque multiplex ista medicina, neque olim, neque apud alias gentes necessaria, vix aliquot ex nobis ad senectutis principia perducit.

Ergò etiam post eos de quibus retuli, nonnulli clari viri medicinam exercuerunt, donec majore studio litterarum disciplina agitari cœpit; quæ ut animo præcipuè omnium necessaria, sic corpori inimica est. Primòque medendi scientia sapientiæ pars habebatur, ut et morborum curatio, et rerum naturæ contemplatio sub iisdem auctoribus nata sit: scilicet his hanc maximè requirentibus, qui corporum sanorum robor, inquietâ cogitatione nocturnaque vigiliâ, minuerant. Ideòque multos ex sapientiæ professoribus peritos ejus fuisse accepimus: clarissimos verò ex his Pythagoram, et Empedoclem, et Democritum. Hujus autem, ut quidam crediderunt, discipulus Hippocrates Cous: primus quidem ex omnibus memoriâ dignis ab studio sapientiæ disciplinam hanc separavit, vir et arte et facundiâ insignis. Post quem Diocles Carystius, deindè Praxagoras et Chrisippus, tùm Herophilus et Erasistratus, sic artem hanc exercuerunt, ut etiam in diversas curandi vias processerint.

Iisdem temporibus in tres partes medicina diducta est; ut una esset quæ victu, altera quæ medicamentis, tertia quæ manu mederetur. Primam *διαιτητικὴν*, secundam *φαρμακευτικὴν*, tertiam *χειρουργικὴν*, Græci nominaverunt. Ejus autem quæ victu morbos curat, longè clarissimi auctores etiam altiùs quædam agitare conati, rerum quoque naturæ sibi cognitionem vindicaverunt, tanquàm sine eâ trunca et debilis medicina esset. Post quos Serapion primus omnium, nihil hanc rationalem disciplinam pertinere ad medicinam professus, in usu tantùm et experimentis eam posuit. Quem Apollonius et Glaucias, et aliquantò post Heraclides Tarentinus, et alii quoque non mediocres viri secuti,

ex ipsâ professione se Εμπειρικους appellaverunt. Sic in duas partes ea quoque quæ victu curat, medicina divisa est: aliis rationalem artem, aliis usum tantum sibi vindicantibus: nullo verò quicquam, post eos qui suprâ comprehensi sunt, agitante, nisi quod acceperat: donec Asclepiades medendi rationem ex magnâ parte mutavit: ex cujus successoribus Themison nuper ipse quoque quædam in senectute deflexit. Et per hos quidem maximè viros salutaris ista nobis professio increvit.

Quoniam autem ex tribus medicinæ partibus, ut difficillima, sic etiam clarissima est ea quæ morbis medetur, ante omnia de hac dicendum est. Et quia prima in eâ dissensio est, quòd alii sibi experimentorum tantummodò notitiam necessariam esse contendunt; alii, nisi corporum rerumque naturalium ratione compertâ, non satis potentem usum esse proponunt; indicandum est, quæ maximè ex utrâque parte dicantur, quò faciliùs nostra quoque opinio interponi possit.

Igitur hi qui rationalem medicinam profitentur, hæc necessaria esse proponunt; abditarum et morbos continentium causarum notitiam, deindè evidentium, post hæc etiam naturalium actionum, novissimè partium interiorum.

Abditas causas vocant in quibus requiritur, ex quibus principiis nostra corpora sint, quid secundam, quid adversam valetudinem faciat. Neque enim credunt posse eum scire, quomodò morbos curare conveniat, qui undè hi sint ignoret: neque esse dubium quin aliâ curatione opus sit, si ex quatuor principiis vel superans aliquid vel deficiens adversam valetudinem creat, ut quidam ex sapientiæ professoribus dixerunt; aliâ, si in humidis omne vitium est, ut Herophilo visum est; aliâ, si in spiritu, ut Hippocrati; aliâ, si sanguis in eas venas quæ spiritui accommodatæ sunt, transfunditur, et inflammationem

quam φλεγμονῇν nominant, excitat, eaque inflammatio talem motum efficit qualis in febre est, ut Erasistrato placuit; aliâ, si manantia corpuscula per invisibilia foramina subsistendo iter claudunt, ut Asclepiades contendit: eum verò rectè curaturum, quem prima origo causæ non fefellerit. Neque verò inficiantur experimenta quoque esse necessaria, sed ne ad hæc quidem aditum fieri potuisse, nisi ab aliquâ ratione, contendunt: non enim quidlibet antiquiores viros ægris inculcasse, sed cogitasse quid maximè conveniret; et id usu explorasse, ad quod antè conjectura aliqua duxisset: neque interesse an initio pleraque explorata sint, si à consilio tamen cœperunt; et id quidem in multis ita se habere: sæpè verò etiam nova incidere genera morborum, in quibus nihil adhuc usus ostenderit; ut ideò necessarium sit animadvertere, undè ea cœperint; sine quo nemo mortalium reperire possit cur hoc quàm illo potiùs utatur. Et ob hæc quidem in obscuro positas causas persequuntur.

Evidentes verò has appellant, in quibus quærunt, initium morbi calor attulerit an frigus, fames an satietas, et quæ similia sunt: occurrurum enim citiùs ducunt eum qui originem non ignorarit.

Naturales verò corporis actiones appellant, per quas spiritum trahimus et emittimus, cibum potionemque assumimus et concoquimus, itemque per quas eadem hæc in omnes membrorum partes digeruntur. Tum requirunt etiam, quare venæ nostræ modò submittant sese, modò attollant: quæ ratio somni, quæ vigiliæ sit: sine quorum notitiâ neminem putant vel occurrere, vel mederi morbis inter hæc nascentibus, posse. Ex quibus quia quàm maximè pertinere ad rem concoctio videtur, huic potissimùm insistent, et duce alii Erasistrato, atteri cibum in ventre contendunt; alii, Plisto-

nico Praxagoræ discipulo, putrescere : alii credunt Hippocrati per calorem cibos concoqui : acceduntque Asclepiadis æmuli, qui omnia ista vana et supervacua esse proponunt : nihil enim concoqui, sed crudam materiam, sicut assumpta est, in corpus omne diduci. Et hæc quidem inter eos parùm constant : illud verò convenit, alium dandum cibum laborantibus, si hoc; alium, si illud verum est : nam si teritur intùs, eum quærendum esse qui facillimè teri possit; si putrescit, eum in quo hoc expeditissimum est; si calor concoquit, eum qui maximè calorem foveat : at nihil ex his esse quærendum, si nihil concoquitur; ea verò sumenda quæ maximè manent, qualia assumpta sunt. Eâdemque ratione; quùm spiritus gravis est, quùm somnus aut vigilia urget, eum mederi posse arbitrantur, qui priùs illa ipsa, qualiter eveniant, præceperit.

Præter hæc, quùm in interioribus partibus, et dolores et morborum varia genera nascentur, neminem putant his adhibere posse remedia, quæ ipse ignoret. Necessarium ergò esse incidere corpora mortuorum, eorumque viscera atque intestina scrutari : longèque optimè fecisse Herophilum et Erasistratum, qui nocentes homines à regibus ex carcere acceptos, vivos inciderint, considerarentque, etiamnùm spiritu remanente, ea quæ natura antè clausisset, eorumque posituram, colorem, figuram, magnitudinem, ordinem, duritiem, molliem, lævorem, contactum; processus deindè singulorum et recessus, sive quid inseritur alteri, sive quid partem alterius in se recipit : neque enim, quùm dolor intùs incidit, scire quid doleat eum, qui, quâ parte quodque viscus intestinumve sit, non cognoverit : neque curari id quod ægrum est posse ab eo, qui, quid sit, ignoret : et, quùm per vulnus alicujus viscera patefacta sunt, eum qui sanæ cujusque colorem

partis ignoret, nescire, quid integrum, quid corruptum sit: ita nec succurrere quidem posse corruptis, aptiusque extrinsecus imponi remedia, compertis interiorum et sedibus et figuris, cognitâque eorum magnitudine: similesque omnia quæ proposita sunt, rationes habere: neque esse crudele, sicut plerique proponunt, hominum nocentium, et horum quoque paucorum, suppliciiis, remedia populis innocentibus seculorum omnium quæri.

Contrâ hi qui se ἐμπειρικὸς ab experientiâ nominant, evidentes quidem causas ut necessarias amplectuntur: obscurarum verò causarum et naturalium actionum quæstionem ideò supervacuam esse contendunt, quoniam non comprehensibilis natura sit. Non posse verò comprehendere, patere ex eorum qui de his disputarunt discordiâ; quum de istâ re, neque inter sapientiæ professores, neque inter ipsos medicos, conveniat. Cur enim potius aliquis Hippocrati credat, quàm Herophilo? cur huic potius quàm Asclepiadi? Si rationes sequi velis, omnium posse videri non improbabiles; si curationes, ab omnibus his ægros perductos esse ad sanitatem. Ita neque disputationi, neque auctoritati cujusquam fidem derogari oportuisse: etiam sapientiæ studiosos maximos medicos esse, si ratiocinatio hoc faceret; nunc illis verba superesse, deesse medend scientiam. Differre quoque pro naturâ locorum genera medicinæ; et aliud opus esse Romæ, aliud in Ægypto, aliud in Galliâ. Quòd si morbos hæ causæ facerent, quæ ubique eadem essent, remedia quoque ubique eadem esse debuisse: sæpè etiam causas apparere, ut puta lippitudinis, vulneris; neque ex his patere medicinam. Quòd si scientiam hanc non subjiciat evidens causa, multò minùs eam posse subicere quæ in dubio est. Quum igitur illa incerta incomprehensibilisque sit, à certis potius et exploratis petendum esse præsidium; id est, iis quæ ex-

perientia in ipsis curationibus docuerit, sicut in cæteris omnibus artibus : nam ne agricolam quidem aut gubernatorem disputatione, sed usu fieri. Ac nihil istas cogitationes ad medicinam pertinere, eo quoque disci, quòd qui diversa de his senserint, ad eandem tamen sanitatem homines perduxerint : id enim fecisse, quia non ab obscuris causis, neque à naturalibus actionibus quæ apud eos diversæ erant, sed ab experimentis, prout cuique responderant, medendi vias traxerint. Ne inter initia quidem ab istis quæstionibus deductam esse medicinam, sed ab experimentis : ægrorum enim qui sine medicis erant, alios propter aviditatem primis diebus protinùs cibum assumpsisse, alios propter fastidium abstinuisse, levatumque magis eorum morbum fuisse qui abstinerant. Itemque alios in ipsâ febre aliquid edisse, alios paulò ante eam, alios post remissionem ejus; optimè deindè his cecisse qui post finem febris id fecerant : eademque ratione alios inter principia protinùs usos esse cibo pleniore, alios exiguo; gravioresque eos factos qui se implérant. Hæc similiaque quùm quotidie inciderent, diligentes homines notasse, quæ plerùmque meliùs responderent : deinde ægrotantibus ea præcipere cœpisse. Sic medicinam ortam, subindè aliorum salute, aliorum interitu, perniciosa discernentem à salutaribus. Repertis deindè jam remediis, homines de rationibus eorum disserere cœpisse : nec post rationem medicinam esse inventam; sed post inventam medicinam, rationem esse quæsitam. Requiritur etiam, si ratio idem doceat quod experientia, an aliud : si idem, supervacuum esse; si aliud, etiam contrariam. Primò tamen remedia exploranda summâ curâ fuisse, nunc verò illa explorata esse : neque ulla aut nova genera morborum reperiri, aut novam desiderari medicinam. Quòd si jam incidat mali

genus aliquod ignotum, non ideò tamen fore medico de rebus cogitandum obscuris; sed eum protinùs visurum, cui morbo id proximum sit; tentaturumque remedia similia illis, quæ vicino malo sæpè succurrerint; et per ejus similitudinem opem reperturum. Neque enim se dicere consilio medicum non egere, et irrationabile animal hanc artem posse præstare; sed has latentium rerum conjecturas ad rem non pertinere, quia non intersit, quid morbum faciat, sed qui tollat; neque ad rem pertinere, quomodò, sed quid optimè digeratur; sive hæc de causâ concoctio intercidat, sive de illâ; et sive concoctio sit illa, sive tantùm digestio. Neque quærendum esse quomodò spiremus, sed quid gravem tardumque spiritum expediat; neque quid venas moveat, sed quid quæque motûs genera significant. Hæc autem cognosci experimentis; et in omnibus ejusmodi cogitationibus, in utramque partem disseri posse: itaque ingenium et facundiam vincere; morbos autem non eloquentiâ, sed remediis, curari. Quæ si quis elinguis usu discreta benè nôrit, hunc aliquantò majorem medicum futurum, quàm si sine usu linguam suam excoluerit. Atque ea quidem de quibus est dictum, supervacuum esse tantummodò: id verò quod restat, etiam crudele, vivorum hominum alvum atque præcordia incidi; et salutis humanæ præsidem artem, non solùm pestem alicui, sed hanc etiam atrocissimam inferre: quùm præsertim ex his quæ tantâ violentiâ quærantur, alia non possint omninò cognosci, alia possint etiam sine scelere. Nam colorem, lævorem, mollitiem, duritiem, similiaque omnia non esse talia, inciso corpore, qualia integro fuerint: quia quùm, corporibus inviolatis, hæc tamen metu, dolore, inediâ, cruditate, lassitudine et mille aliis mediocribus affectibus, sæpè mutantur; multò magis veri simile est interiora, quibus major mollities et lux ipsa nova sit, sub

gravissimis vulneribus et ipsâ scrutatione ¹ mutari. Neque quicquam esse stultius, quàm quale quidque vivo homine est, tale existimare esse moriente, immò jam mortuo. Nam ne utrum quidem, quo minùs ad rem pertineat, spirante homine, posse diduci: simul atque verò ferrum ad præcordia accessit, et discissum transversum septum est, quod membranâ quâdam superiores partes ab inferioribus diducit, διάφραγμα Græci vocant, hominem protinùs animam amittere: ita demum mortui præcordia et viscus omne in conspectum lancinantis ² medici dari necesse est tale, quale mortui sit, non quale vivi fuit. Itaque consequi medicum, ut hominem crudeliter jugulet, non ut sciat qualia vivi viscera habeamus. Si quid tamen sit quod, adhuc spirante homine, conspectui subjiciatur, id sæpè casum offerre curantibus. Interdum enim gladiatorem in arenâ, vel militem in acie, vel viatorem à latronibus exceptum sic vulnerari, ut ejus interior aliqua pars aperiatur, et in alio alia; ita sedem, positum, ordinem, figuram, similiaque cognoscere prudentem medicum, non cædem, sed sanitatem molientem; idque per misericordiam discere, quod alii dirâ crudelitate cognoverint. Ob hæc, ne mortuorum quidem lacerationem necessariam esse: quæ etsi non crudelis, tamen fœda sit; quùm aliter pleraque in mortuis se habeant: quantum verò in vivis cognosci potest, ipsa curatio ostendat.

Quùm hæc per multa volumina, perque magnæ contentionis disputationes à medicis sæpè tractata sint atque tractentur, subjiciendum est, quæ proxima vero videri possint. Ea neque addicta alterutri opinioni sunt, neque ab utrâque nimium abhorrentia, sed media quodam modo inter diversas sententias: quod in plurimis conten-

¹ Lindenius et Targa scribunt *trucidatione*.

² Iidem editores scribunt *lancinantis*.

tionibus deprehendere licet sine ambitione verum scrutantibus, perindè ut in hâc ipsâ re. Nam quæ demùm causæ vel secundam valetudinem præstent, vel morbos excitent; quo modo vel trahatur spiritus vel cibus digeratur, ne sapientiæ quidem professores scientiâ comprehendunt, sed conjecturâ persequuntur. Cujus autem rei non est certa notitia, ejus opinio certum reperire remedium non potest, verumque est ad ipsam curationem nihil plus conferre, quàm experientiam. Quamquam igitur multa sint ad ipsas artes propriè non pertinentia, tamen eas adjuvant excitando artificis ingenium: itaque ista quoque naturæ rerum contemplatio, quamvis non faciat medicum, aptiorem tamen medicinæ reddit. Profectò veri simile est et Hippocratem et Erasistratum, et quicumque alii non contenti febres et ulcera agitare, rerum quoque naturam ex aliquâ parte scrutati sunt, non ideò quidem medicos fuisse, verùm ideò quoque majores medicos exstitisse. Ratione verò opus est ipsi medicinæ, et si non semper inter obscuras causas, neque inter naturales actiones, tamen sæpè. Est enim hæc ars conjecturalis: neque respondet ei plerùmque non solùm conjectura, sed etiam experientia: et interdum non febris, non cibus, non somnus subsequitur, sicut assuevit. Rariùs, sed aliquandò tamen, morbus quoque ipse novus est: quem non incidere manifestè falsum est; quum ætate nostrâ quædam, ex naturalibus partibus carne prolapsâ et arente, intra paucas horas expiraverit, sic ut nobilissimi medici neque genus mali neque remedium invenient. Quos ego nihil tentasse judico, quia nemo in splendidâ personâ periclitari conjecturâ suâ voluerit, ne occidis, nisi servasset, videretur. Veri tamen simile est potuisse aliquid excogitari, detractâ tali verecundiâ; et fortasse responsurum fuisse id quod aliquis esset expertus. Ad quod medicinæ genus, neque semper similitudo aliquid

confert; et si quandò confert, tamen id ipsum rationale est, inter multa similia genera et morborum et remedium, cogitare, quo potissimum medicamento sit utendum. Quùm igitur talis res incidit, medicus aliquid oportet inveniat, quod non ubique fortassè, sed sæpiùs tamen etiam respondeat. Petet autem novum quoque consilium, non ab rebus latentibus, istæ enim dubiæ et incertæ sunt, sed ab his quæ explorari possunt; id est, evidentibus causis. Interest enim, fatigatio morbum an vigilia, an sitis an fames, an frigus an calor fecerit, an cibi vinique abundantia, an intemperantia libidinis. Neque ignorare hunc oportet, quæ sit ægri natura: humidum magis an magis siccum corpus ejus sit, validi nervi an infirmi, frequens adversa valetudo an rara, eaque, quùm est, vehemens esse soleat an levis, brevis an longa: quod is vitæ genus sit secutus; laboriosum an quietum, cum luxu an cum frugalitate: ex his enim similibusque, sæpè curandi nova ratio ducenda est.

Quamvis ne hæc quidem sic præteriri debent, quasi nullam controversiam recipiant; nam et Erasistratus non ex his fieri morbos dixit; quoniam et alii et iidem aliàs post ista non febricitarint. Et quidam medici seculi nostri, sub auctore, ut ipsi videri volunt, Themisone, contendunt, nullius causæ notitiam quicquam ad curationes pertinere: satisque esse quædam communia morborum intueri: siquidem horum tria genera esse, unum adstrictum, alterum fluens, tertium mixtum. Nam modò parùm excernere ægros, modò nimium; modò alià parte parùm, alià nimium: hæc autem genera morborum modò acuta esse, modò longa; et modò increscere, modò consistere, modò minui. Cognito igitur eo quod ex his est, si corpus adstrictum est, digerendum esse; si profluvio laborat, continendum; si mixtum vitium habet, occurrendum subindè vehementiori malo. Et aliter acutis morbis meden-

dum, aliter vetustis; aliter incrementibus, aliter subsistentibus, aliter jam ad sanitatem inclinantibus. Horum observationem medicinam esse: quam ita finiunt, ut quasi viam quamdam, quam *μεθοδόν* Græci nominant, eorumque quæ in morbis communia sunt, contemplatricem esse contendunt. Ac neque rationalibus se, neque experimenta tantum spectantibus annumerari volunt: quum ab illis eo nomine dissentiant, quod in conjecturarum latentium nolunt esse medicinam; ab his eo quod parum artis esse in observatione experimentorum credunt.

Quod ad Erasistratum pertinet, primum ipsa evidentia ejus opinioni repugnat; quia raro nisi post horum aliquid morbus venit: deinde non sequitur, ut quod alium non afficit, aut eundem alias, id ne alteri quidem, aut eidem tempore alio noceat. Possunt enim quædam subesse corpori, vel ex infirmitate ejus, vel ex aliquo affectu, quæ vel in alio non sunt, vel in hoc alias non fuerunt; eaque per se non tanta, ut concitent morbum, tamen obnoxium magis aliis injuriis corpus efficiant. Quod si contemplationem rerum naturæ, quam non temerè medici sibi vindicant, satis comprehendisset; etiam illud scisset, nihil omnino ob unam causam fieri, sed id pro causâ apprehendi, quod contulisse plurimum videtur. Potest autem id, dum solum est, non movere, quod junctum aliis maximè movet. Accedit ad hæc quod ne ipse quidem Erasistratus, qui, transfuso in arterias sanguine, febrem fieri dicit, idque nimis repleto corpore incidere, reperit, cur ex duobus æquè repletis, alter in morbum inciderit, alter omni periculo vacarit; quod quotidie fieri apparet. Ex quo disci potest, ut vera sit illa transfusio, tamen illam non per se, quum plenum corpus est, fieri, sed quum horum aliquid accesserit.

Themisonis verò æmuli, si perpetua quæ promittunt,

habent, magis etiam quàm ulli rationales sunt. Neque enim, si quis non omnia tenet, quæ rationalis alius probat, protinùs alio novo nomine artis indiget; si modò quod primum est, non memoriæ soli, sed rationi quoque insistit. Sin, quod vero propiùs est, vix ulla perpetua præcepta medicinalis ars recipit, iidem sunt quod ii, quos experimenta sola sustinent, eò magis quoniam, si compresserit aliquem morbus aut fuderit, quilibet etiam imperitissimus videt: quid autem compressum corpus resolvat, quid solutum teneat, si à ratione tractum est, rationalis est medicus: sin, ut ei qui se rationalem negat, confiteri necesse est, ab experientià, empiricus est. Ità apud eum morbi cognitio extra artem, medicina intra usum est: neque adjectum quicquam empiricorum professioni, sed demptum est; quoniam illi multa circumspiciunt, hi tantùm facillima, et non plus quàm vulgaria. Nam et hi qui pecoribus ac jumentis medentur, quùm propria cujusque ex mutis animalibus nosse non possint, communibus tantummodò insistunt: et exteræ gentes, quùm subtilem medicinæ rationem non noverint, communia tantùm vident: et qui ampla valetudinaria nutriunt, quia singulis summâ curâ consulere non sustinent, ad communia ista confugiunt. Neque hercules istud antiqui medici nescierunt, sed his contenti non fuerunt: ergo etiam vetustissimus auctor Hippocrates, dixit mederi oportere et communia et propria intuentem.

Ac ne isti quidem ipsi intrà suam professionem consistere ullo modo possunt. Siquidem et compressorum et fluentium morborum genera diversa sunt; faciliùsque id in his quæ fluunt, inspicere potest. Aliud est enim sanguinem, aliud bilem, aliud cibum vomere: aliud dejectionibus, aliud torminibus laborare: aliud sudore digeri; aliud tabe consumi. Atque in partes quoque humor erumpit, ut in oculos auresque; quo periculo nullum

humanum membrum vacat : nihil autem horum sic ut aliud curatur. Ità protinùs in his à communi fluentis morbi contemplatione, ad propriam medicina descendit. Atque in hâc quoque rursus alia proprietatis notitia sæpè necessaria est : quia non eadem omnibus, etiam in similibus casibus, opitulantur : siquidem certæ quædam res sunt, quæ in pluribus ventrem aut adstringunt, aut resolvunt. Inveniuntur tamen in quibus aliter atque in cæteris, idem eveniat : in his ergo communium inspectio contraria est, propriorum tantùm salutaris. Et causæ quoque æstimatio sæpè morbum solvit. Ergo etiam ingeniosissimus seculi nostri medicus, quem nuper vidimus, Cassius, febricitanti cuidam et magnâ siti affecto, quùm post ebrietatem eum premi cœpisse cognosset, aquam frigidam ingessit : quâ ille epotâ quùm vini vim miscendo fregisset, protinùs febrem somno et sudore discussit. Quod auxilium medicus opportunè providit non ex eo quod aut adstrictum corpus erat aut fluebat, sed ex eâ causâ quæ ante præcesserat. Estque etiam proprium aliud et loci et temporis, istis quoque auctoribus, qui, quùm disputant quemadmodum sanis hominibus agendum sit, præcipiunt ut gravibus aut locis aut temporibus magis vitetur frigus, æstus, satietas, labor, libido ; magisque ut conquiescat iisdem aut locis aut temporibus, si quis gravitatem corporis sensit ; ac neque vomitu stomachum, neque purgatione alvum sollicitet. Quæ vera quidem sunt ; à communibus tamen ad quædam propria descendunt ; nisi persuadere nobis volunt, sanis quidem considerandum esse, quod cælum, quod tempus anni sit ; ægris verò non esse : quibus tantò magis obnoxia offensis infirmitas est. Quinetiam morborum in iisdem hominibus aliæ atque aliæ proprietates sunt : et, qui secundis aliquandò frustrâ curatus est, contrariis sæpè restituitur.

Plurima quoque in dando cibo discrimina reperientur : ex quibus contentus uno ero. Nam famem facilius adolescens quàm puer ; facilius in tenui cœlo quàm in denso ; facilius æstate quàm hieme ; facilius uno cibo quàm prandio quoque assuetus ; facilius inexercitatus quàm exercitatus homo sustinet : sæpè autem in eo magis necessaria cibi festinatio est , qui minùs inediam tolerat. Ob quæ competit , eum qui propria non novit , communia tantùm intueri debere ; eumque qui nosse propria potest , illa quidem non oportere negligere , sed his quoque insistere : ideòque , quùm par scientia sit , utiliorem tamen medicum esse amicum quàm extraneum.

Igitur , ut ad propositum meum redeam , rationalem quidem puto medicinam esse debere ; instrui verò ab evidentibus causis , obscuris omnibus non à cogitatione artificis , sed ab ipsâ arte , rejectis. Incidere autem vivorum corpora , et crudele et supervacuum est ; mortuorum verò , discentibus necessarium : nam positum et ordinem nosse debent , quæ cadaver melius quàm vivus et vulneratus homo , repræsentant : sed et cætera quæ cognosci in vivis modò possunt , in ipsis curationibus vulneratorum paulò tardiùs , sed aliquantò mitiùs usus ipse monstrabit.

His propositis , primùm dicam , quemadmodum sanos agere conveniat , tùm ad ea transibo quæ ad morbos et curationes eorum pertinebunt.

SECT. I. Sanus homo, qui et benè valet, et suæ spon-
tis est, nullis obligare se legibus debet; ac neque medico
neque iatraliptà egere. Hunc oportet varium habere
vitæ genus; modò ruri esse, modò in urbe, sæpiùsque
in agro; navigare, venari, quiescere interdum, sed fre-
quentiùs se exercere, siquidem ignavia corpus hebetat,
labor firmat: illa maturam senectutem, is longam
adolescentiam reddit. Prodest etiam interdum balneo,
interdum aquis frigidis uti; modò ungi, modò id ipsum
negligere; nullum cibi genus fugere quo populus uta-
tur; interdum in convivio esse, interdum ab eo se re-
trahere; modò plus justo, modò non ampliùs assumere;
bis die potius quàm semel cibum capere; et semper
quàm plurimum, dummodò hunc concoquat. Sed ut
hujus generis exercitationes cibique necessarij sunt, sic
athletici supervacui: nam et intermissus propter aliquas
civiles necessitates ordo exercitationis corpus affligit; et
ea corpora quæ more eorum repleta sunt, celerrimè et
senescunt et ægrotant. Concubitus verò neque nimis con-
cupiscendus, neque nimis pertimescendus est. Rarus
corpus excitat; frequens, solvit. Quùm autem frequens,
non numero sit, sed naturâ, ratione ætatis et corporis,
scire licet eum non inutilem esse, quem corporis neque
languor neque dolor sequitur. Idem interdum pejor, tu-
tior noctù: ità tamen, si neque illum cibus, neque hunc
cum vigiliâ labor statim sequitur. Hæc firmis servanda
sunt, cavendumque ne in secundâ valetudine adversæ
præsidia consumantur.

SECT. II. At imbecillis, quo in numero magna pars
urbanorum, omnesque pene cupidi litterarum sunt, ob-
servatio major necessaria est; ut, quod vel corporis vel
loci vel studij ratio detrahit, cura restituat.

Ex his igitur qui benè concoxit, manè tutò surget:

qui parùm, quiescere debet; et, si manè surgendi necessitas fuerit, redormire: qui non concoxit ex toto, conquiescere; ac neque labori se, neque exercitationi neque negotiis, credere. Qui crudum sine præcordiorum dolore ructat, is ex intervallo aquam frigidam bibere; et se nihilo minùs continere. Habitare verò ædificio lucido, perflatum æstivum, hibernum solem habente, cavere meridianum solem, matutinum et vespertinum frigus; itemque auras fluminum atque stagnorum; minimèque, nubilo cœlo, soli aperienti se committere; ne modò frigus modò calor noceat: quæ res maximè gravedines destillationesque concitat. Magis verò gravibus locis ista servanda sunt, in quibus etiam pestilentiam faciunt. Scire autem licet integrum corpus esse, quùm quotidie mane urina alba, dein rufa est: illud concoquere, hoc concoxisse significat. Ubi experrectus est aliquis, paulùm intermittere; deindè, nisi hiems est, fovere os multâ aquâ frigidâ debet: longis diebus meridiari potiùs ante cibum; sin minùs, post eum. Per hiemem potissimùm totis noctibus conquiescere: sin lucubrandum est, non post cibum id facere, sed post concoctionem. Quem interdum vel domestica vel civilia officia tenuerunt, huic tempus aliquod servandum curationi corporis sui est. Prima autem ejus curatio exercitatio est, quæ semper antecedere cibum debet: in eo qui minùs laboravit et benè concoxit, amplior; in eo qui fatigatus est, et minùs concoxit, remissior. Commodè verò exercent, clara lectio, arma, pila, cursus, ambulatio; atque hæc non ubique plana commodior est; siquidem meliùs ascensus quoque et descensus cum quâdam varietate corpus moveat, nisi tamen id perquàm imbecillum est: melior autem est sub divo quàm in porticu: melior, si caput patitur, in sole quàm in umbrâ: melior in umbrâ quam parietes aut viridaria efficiunt, quàm quæ tecto subest;

melior recta quàm flexuosa. Exercitationis autem plerumque finis esse debet sudor, aut certè lassitudo quæ citrà fatigationem sit: idque ipsum modò minùs, modò magis faciendum est. Ac ne his quidem, athletarum exemplo, certa esse lex vel immodicus esse labor debet. Exercitationem rectè sequitur modò unctio, vel in sole vel ad ignem; modò balneum, sed in conclavi quàm maximè et alto et lucido et spatioso. Ex his verò neutrum sæpè fieri oportet, sed sæpiùs alterutrum, pro corporis naturâ. Post hæc paulùm conquiescere opus est. Ubi ad cibum ventum est, nunquàm utilis est nimia satietas; sæpè inutilis nimia abstinentia; sed, si qua intemperantia subest, tutior est in potione quàm in escâ. Cibus à salsamentis, oleribus, similibusque rebus meliùs incipit: tum caro assumenda est, quæ assa optima aut elixa est. Condita omnia duabus de causis inutilia sunt, quoniam et plus propter dulcedinem assumitur, et quod modò par est, id tamen ægriùs concoquitur. Secunda mensa bono stomacho nihil nocet; in imbecillo coacescit. Si quis itaque hoc parùm valet, palmulas pomaque et similia meliùs primo cibo assumit. Post multas potiones, quæ aliquantùm sitim excesserunt, nihil edendum est: post satietatem, nihil agendum. Ubi expletus est aliquis, faciliùs concoquit, si quicquid assumpsit, potione aquæ frigidæ includit: tùm paulisper invigilet, deindè benè dormit. Si quis interdù se implevit, post cibum neque frigori neque æstui, neque labori, se debet committere: neque enim tam facilè hæc inani corpore quàm repleto nocent. Si quibus de causis futura inedia est, labor omnis vitandus est.

SECT. III. Atque hæc quidem penè perpetua sunt: quasdam tamen observationes desiderant, et novæ res, et corporum genera, et sexus, et ætates, et tempora anni. Nam neque ex salubri loco in gravem, neque ex gravi in salu-

brem transitus satis tutus est. Ex salubri in gravem primâ hieme; ex gravi in eum qui salubris est, primâ ætate transire melius est. Neque verò ex multâ fame nimia satietas, neque ex nimîâ satietate fames idonea est. Periclitatur quoque et qui semel, et qui bis die cibum continenter¹ contra consuetudinem assumit. Item neque ex nimio labore subitum otium, neque ex nimio otio subitus labor sine gravi noxâ est. Ergo, quùm quis mutare aliquid volet, paulatim debebit assuescere. Omnem etiam laborem faciliùs vel puer vel senex quàm insuetus homo sustinet. Atque ideò quoque nimis otiosa vita utilis non est, quia potest incidere laboris necessitas. Si quandò tamen insuetus aliquis laboravit, aut multò plus quàm solet etiam is qui assuevit, huic jejuno dormiendum est: multò magis, si etiam os amarum est, vel oculi caligant, aut venter perturbatur: tùm enim non dormiendum tantummòdò jejuno est, sed etiam in posterum diem ita permanendum, nisi citò id quies sustulit. Quod si factum est, surgere oportet, et lentè paululùm ambulare. At si somni necessitas non fuit, quia modicè magis aliquis laboravit, tamen ingredi aliquantùm eodem modo debet. Communia deindè omnibus sunt post fatigationem cibum sumpturis, ubi paulùm ambulaverunt, si balneum non est, calido loco vel in sole vel ad ignem ungi atque sudare: si est, ante omnia in tepidario sedere; deindè, ubi paulùm conquieverunt, intrare et descendere in solium; tùm multo oleo ungi leniterque perfricari: iterùm in solium descendere: post hæc os aquâ calidâ fovere, deindè frigidâ. Balneum his fervens idoneum non est. Ergo si nimium alicui fatigato penè febris est, huic abundè est loco tepido demittere se inguinibus tenùs in

¹ Lindenius et Targa scribunt *incontinenter*; nobis rationi magis conveniens visum est dicere *continenter*.

aquam calidam, cui paulum olei adjectum sit : deinde totum quidem corpus, maximè tamen eas partes quæ in aquâ fuerunt, leniter perficere ex oleo, cui vinum et paulum contriti salis sit adjectum. Post hæc omnibus fatigatis aptum est cibum sumere, eoque humido uti; aquâ, vel certè dilutâ potione esse contentos, maximèque eâ quæ moveat urinam. Illud quoque nosse oportet, quòd ex labore sudanti frigida potio perniciosissima est : atque etiam, quum sudor se remisit, itinere fatigatis inutilis. A balneo quoque venientibus Asclepiades inutilem eam judicavit : quod in his verum est, quibus alvus facilè nec tutò resolvitur, quique facilè inhorrescunt : perpetuum in omnibus non est, quum potiùs naturale sit potione æstuantem stomachum refrigerari. Quod ita præcipio, ut tamen fatear, ne ex hac quidem causâ sudanti adhuc frigidam bibendum esse. Solet etiam prodesset, post varium cibum frequentesque dilutas potiones, vomitus, et postero die longa quies, deinde modica exercitatio. Si assidua fatigatio urget, in vicem modò aqua, modò vinum bibendum est, raroque balneo utendum. Levat quoque lassitudinem etiam laboris mutatio : eumque quem novum genus cujusdam laboris pressit, id quod in consuetudine est, reficit. Fatigato quotidianum cubile tutissimum est, lassat enim quod contra consuetudinem, seu molle seu durum est. Propriè quædam ad eum pertinent, qui ambulando fatigatur. Hunc reficit in ipso quoque itinere frequens frictio : post iter primum sedile, deinde unctio; tùm calidâ aquâ in balneo magis superiores partes, quàm inferiores foveat. Si quis verò exustus in sole est, huic in balneum protinùs eundum est, perfundendumque oleo corpus et caput : deinde in solum benè calidum descendendum est; tùm multa aqua per caput infundenda, priùs calida, deinde frigida. At ei qui perfrixit, opus est in balneo primum involuto sedere

donec insudet, tùm ungi, deindè lavari : cibum modicum, potiones meracas, assumere. Is verò qui navigavit, et nausèâ pressus est, si multam bilem evomit, vel abstinere cibo debet, vel paulùm aliquid assumere. Si pituitam acidam effudit, utique sumere cibum, sed assueto leviorè : si sine vomitu nausea fuit, vel abstinere, vel post cibum vomere. Qui verò toto die, vel in vehiculo, vel in spectaculis sedit, huic nihil currendum, sed lentè ambulandum est. Lenta quoque in balneo mora, dein cœna exigua prodesse consueverunt. Si quis in balneo æstuat, reficit hunc ore exceptum, et in eo retentum, acetum : si id non est, eodem modo frigida aqua assumpta. Ante omnia autem nôrit quisque naturam sui corporis, quoniam alii graciles, alii obesi sunt; alii calidi, alii frigidiores; alii humidi, alii sicciores; alios adstricta, alios resoluta alvus exercet. Rarò quisquam non aliquam partem corporis imbecillam habet. Tenuis verò homo implere se debet, plenus extenuare, calidus refrigerare, frigidus calefacere, madens siccare, siccus madefacere : itemque alvum firmare is cui fusa; solvere is cui adstricta est : succurrendumque semper parti maximè laboranti est.

Implet autem corpus modica exercitatio, frequentior quies, unctio, et, si post prandium est, balneum, contracta alvus, modicum frigus hieme, somnus et plenus et non nimis longus, molle cubile, animi securitas, assumpta per cibos et potiones maximè dulcia et pingua, cibus et frequentior, et quantum plenissimè potest concoqui ¹. Extenuat corpus aqua calida, si quis in eam descendit, magisque, si salsa est : in jejuno balneum, inurens sol, et omnis calor, cura, vigilia, somnus nimium vel brevis vel longus : lectus per æstatem

¹ Lindenium hîc secuti sumus, quamvis apud Targam legatur *quantus plenissimus*.

terra, hieme durum cubile: cursus, multa ambulatio, omnisque vehemens exercitatio, vomitus, dejectio, acidæ res et austeræ, et semel die assumptæ, et vini non perfrigidi potio jejuno in consuetudinem adducta.

Quùm verò inter extenuantia posuerim vomitum et dejectionem, de his quoque propriè quædam dicenda sunt. Rejectum esse ab Asclepiade vomitum in eo volumine, quod *de tuendâ sanitate* composuit, video: neque reprehendo, si offensus eorum est consuetudine, qui quotidie ejiciendo vorandi facultatem moliantur. Paulò etiam longiùs processit, idem purgationes quoque eodem volumine expulit: et sunt hæc perniciosæ, si nimis valentibus medicamentis fiunt: sed hæc tamen submovenda esse non est perpetuum: quia corporum temporumque ratio potest ea facere necessaria, dùm et modo, et non nisi quùm opus est, adhibeantur. Ergo ille quoque ipse, siquid jam corruptum esset, expelli debere confessus est: ita non ex toto res condemnanda est. Sed esse ejus etiam plures causæ possunt: estque in eâ quædam paulò subtilior observatio adhibenda. Vomitus utilior est hieme quàm æstate: nam tùm et pituitæ plus, et capitalis gravitas major subest. Inutilis est gracilibus et imbecillum stomachum habentibus: utilis verò est plenis et biliosis omnibus, si vel nimum se replerunt, vel parùm concoxerunt. Nam, sive quis plus est quàm quod concoquere possit, periclitari ne corrumpatur non oportet: sive jam corruptum est, nihil commodius est quàm id, quâ viâ primùm expelli potest, ejicere. Itaque ubi amari ructus cum dolore et gravitate præcordiorum sunt, ad hunc protinùs confugiendum est. Idem prodest ei cui pectus æstuat et frequens saliva vel nausea est, aut sonant aures, aut madent oculi, aut os amarum est: similiterque ei qui vel cælum vel locum mutat; iisque quibus, si per plures dies

non vomuerunt, dolor præcordia infestat. Neque ignoro inter hæc præcipi quietem, quæ non semper contingere potest agenda necessitatem habentibus, nec in omnibus idem facit. Itaque istud luxuriæ causâ fieri non oporteat confiteor: interdum valetudinis causâ rectè fieri experimentis credo. Comamoneo tamen, ne quis qui valere et senescere volet, hoc quotidianum habeat. Qui vomere post cibum volet, si ex facili facit, aquam tantum tepidam antè debet assumere; si difficilius, aquæ vel salis vel mellis paulum adjicere. At qui manè vomiturus est, antè bibere mulsum, vel hyssopum, aut esse radiculam, debet; deindè aquam tepidam, ut suprâ scriptum est, bibere. Cætera quæ antiqui medici præceperunt, stomachum omnia infestant. Post vomitum, si stomachus infirmus est, paulum cibi, sed hujus idonei, gustandum; et aquæ frigidæ cyathi tres bibendi sunt; nisi tamen vomitus fauces exasperavit. Qui vomuit, si manè id fecit, ambulare debet, tum ungi, deindè cœnare; si post cœnam, postero die lavari, et in balneo sudare. Huic proximus cibus mediocris utilior est: isque esse debet cum pane hesterno, vino austero meraco, et carne assâ cibusque omnibus quàm siccissimis. Qui vomere bis in mense vult, melius consulat, si biduò continuârit, quàm si post quintum decimum diem vomuerit; nisi hæc mora gravitatem pectori faciet.

Dejectio autem à medicamento quoque petenda est, ubi venter suppressus parum reddit, ex eoque inflationes, caligines, capitis dolores, aliaque superioris partis mala increscunt. Quid enim inter hæc adjuvare possunt quies et inedia, per quas illa maximè eveniunt? Qui dejectere volet, primum cibus vinisque utatur his quæ hoc præsent: dein, si parum illa proficient, aloën sumat. Sed purgationes quoque, ut interdum necessariæ sunt, sic, ubi frequentes sunt, periculum afferunt: assuescit enim

non ali corpus; quàm omnibus morbis obnoxia maximè infirmitas sit.

Calefacit autem unctio, aqua salsa, magisque si calida est, omnia salsa, amara, carnosa; si post cibum est, balneum, vinum austerum. Refrigerat in jejuniis et balneum et somnus, nisi nimis longus est, et omnia acida; aqua quàm frigidissima; oleum, si aquâ misceatur.

Humidum autem corpus efficit labor minor quàm ex consuetudine, frequens balneum, cibus plenior, multa potio; post hanc ambulatio et vigilia: per se quoque ambulatio multa et vehemens, et matutinæ exercitationi non protinùs cibus adjectus; ea genera escæ quæ veniunt ex locis frigidis, et pluviis, et irriguis. Contrà siccatur immodica exercitatio, fames, unctio sine aquâ, calor, sol modicus, frigida aqua, cibus exercitationi statim subjectus, et is ipse ex siccis et æstuosus veniens.

Alvum adstringit labor, sedile, creta figularis corpori illita, cibus imminutus, et is ipse semel die assumptus ab eo qui bis solet; exigua potio, neque adhibita, nisi quàm cibi quis quantum assumpturus est, cepit: post cibum quies. Contrà solvit aucta ambulatio atque esca, motus qui post cibum est, subindè potiones cibo immistæ. Illud quoque scire oportet, quod ventrem vomitus solutum comprimit, compressum solvit: itemque comprimit is vomitus qui statim post cibum est; solvit is qui tardè supervenit. Quod ad ætates verò pertinet, inediam facillimè sustinent mediæ ætates, minùs juvenes, minimè pueri et senectute confecti. Quò minùs fert facilè quisque, eò sæpiùs debet cibum assumere; maximèque eo eget qui increscit. Calida lavatio et pueris et senibus apta est. Vinum dilutius pueris, senibus meracius: neutri ætati, quæ inflationes movent. Juvenum minùs quæ assumant, et quomodò curentur, interest. Quibus juvenibus fluxit alvus, plerùmque in senectute contrahitur:

quibus in adolescentiâ fuit adstricta, sæpè in senectutè solvitur. Melior est autem in juvene fusior, in seue adstrictior. Tempus quoque anni considerare oportet. Hieme plus esse convenit, minùs sed meraciùs bibere; multo pane uti, carne potiùs elixâ, modicè oleribus; semel die cibum capere, nisi si nimis venter adstrictus est. Si prandet aliquis, utilius est exiguum aliquid, et ipsum siccum sine carne, sine potione sumere. Eo tempore anni calidis omnibus potiùs utendum est, vel calorem moventibus. Venus tùm non æquè perniciosa est. At vere, paulùm cibo demendum, adjiciendumque potioni; sed dilutiùs tamen bibendum est: magis carne utendum, magis oleribus; transeundum paulatim ab elixis ad assa. Venus eo tempore anni tutissima est. Æstate verò, et potione et cibo eget sæpiùs corpus; ideò prandere quoque commodum est. Eo tempore aptissima sunt et caro et olus; potio quàm dilutissima, ut et sitim tollat, nec corpus incendat; frigida lavatio, caro assa, frigidi cibi vel qui refrigerent. Ut sæpiùs autem cibo utendum, sic exiguo est. Per autumnum verò, propter cœli varietatem, periculum maximum est. Itaque neque sine veste, neque sine calceamentis prodire oportet, præcipuèque diebus frigidioribus, neque sub divo nocte dormire, aut certè benè operiri. Cibo verò jam paulò pleniore uti licet, minùs sed meraciùs bibere. Poma nocere quidam putant, quæ immodicè toto die plerùmque sic assumuntur, ut ne quid ex densiore cibo remittatur. Ita non hæc, sed consummatio omnium nocet: ex quibus in nullo tamen minùs, quàm in his noxæ est: sed his uti non sæpiùs quàm alio cibo convenit. Denique aliquid densiori cibo, quàm hic accedit, necessarium est demi. Neque æstate verò, neque autumnò utilis Venus est; tolerabitur tamen per autumnum: æstate in totum, si fieri potest, abstinendum.

SECT. IV. Proximum est, ut de iis dicam, qui partes aliquas corporis imbecillas habent. Cui caput infirmum est, is si benè concoxerit, leniter perfricare id manè manibus suis debet; nunquàm id, si fieri potest, veste velare; ad cutem tonderi: utile quoque lunam vitare, maximèque ante ipsum lunæ solisque concursus; sed nusquàm post cibum progredi. Si cui capilli sunt, eos quotidie pectere, multum ambulare; sed, si licet, neque sub tecto, neque in sole: ubique autem vitare solis ardorem, maximèque post cibum et vinum: potiùs ungi quàm lavari; nunquàm ad flammam ungi; interdum ad prunam. Si in balneum venit, sub veste primùm paulum in tepidario insudare; ibi ungi, tùm transire in calidarium: ubi sudarit, in solium non descendere, sed multà calidà aquà per caput se totum perfundere, tùm tepidà, dein frigidà diutiùsque eà caput quàm cæteras partes perfundere; deindè id aliquamdiù perfricare, novissimè detergere et ungere. Capiti nihil æquè prodest atque aqua frigida: itaque is cui hoc infirmum est, per æstatem id benè largo canali quotidie debet aliquamdiù subjicere. Semper autem, etiam si sine balneo unctus est, neque totum corpus refrigerare sustinet, caput tamen aquà frigidà perfundere: sed quum cæteras partes attingi nolit, demittere id, ne ad cervices aqua descendat; eamque, ne quid oculis aliisve partibus noceat, defluentem subindè manibus ad hoc regerere. Huic modicus cibus necessarius est, quem facile concoquat; isque, si jejunio caput læditur, assumendus etiam medio die est: si non læditur, semel potiùs. Bibere huic assiduè vinum dilutum, lene, quàm aquam magis expedit; ut quum caput gravius esse cœperit, sit quò confugiat: eique ex toto neque vinum neque aqua semper utilia sunt: medicamentum utrumque est, quum in vicem assumitur. Scribere, legere, voce contendere, huic opus non est, utique post

cœnam : post quam nec cogitatio quidem ei satis tuta est, maximè tamen vomitus alienus est.

SECT. V. Neque verò his solis, quos capitis imbecillitas torquet, usus aquæ frigidaë prodest; sed iis etiam quos assiduæ lippitudines, gravedines, destillationes, tonsillæque malè habent. His autem non caput tantùm quotidie perfundendum est sed os quoque multa frigida aquâ fovendum est : præcipuèque omnibus quibus hoc utile auxilium est, eo utendum est, ubi gravius cœlum auri reddiderunt. Quùmque omnibus inutilis sit post cibum aut contentio aut agitatio animi, tùm his præcipuè qui vel capitis vel arteriæ dolores habere consuerunt, vel quoslibet alios oris affectus. Vitari etiam gravedines destillationesque possunt, si quàm minimè is qui his opportunus est, aerem vel loca aquasque mutat; si caput in sole protegit, ne incendatur, neve subito ex repentino nubilo frigus id moveat; si post concoctionem jejunos caput radit; si post cibum neque legit, neque scribit.

SECT. VI. Quem verò frequenter cita alvus exercet, huic opus est pilâ similibusque superiores partes exercere; dùm jejunos est, ambulare; vitare solis nimium ardorem, continua balnea; ungi citrà sudorem : non uti cibis variis, minimèque jurulentis, leguminibus oleribusque his quæ celeriter descendunt; omnia denique sumere quæ tardè concoquuntur. Venatio, durique pisces, et ex domesticis animalibus assa caro maximè juvant. Numquàm vinum salsum bibere expedit, ne tenue quidem aut dulce; sed austerum et plenius, neque id ipsum pervetus. Si mulso uti volet, id ex decocto melle faciendum est. Si frigidaë potiones ventrem ejus non turbant, his utendum potissimùm est. Si quid offensæ in cœnâ sensit, vomere debet; idque postero quoque die facere : tertio, modici ponderis panem ex vino esse, aut ova fricta ex oleo vel

ex defruto similibusque aliis : deindè ad consuetudinem redire. Semper autem post cibum conquiescere, ac neque intendere animun, neque ambulatione quamvis leni dimoveri.

SECT. VII. At si laxius intestinum dolere consuevit, quod *κόλον* nominant, quùm id nihil nisi genus inflationis sit, id agendum est, ut concoquat aliquis; ut lectione et aliis generibus exerceatur; utatur balneo calido, cibis quoque et potionibus calidis; denique omni modo frigus evitet; item dulcia omnia leguminaque, et quicquid inflare consuevit.

SECT. VIII. Si quis verò stomacho laborat, legere clarè debet, post lectionem ambulare: tùm pilâ vel armis aliove quo genere, quo superior pars movetur, exerceri: non aquam, sed vinum calidum bibere jejunos: cibum bis die assumere, sic tamen ut facilè concoquat: uti vino tenui et austero, et post cibum frigidis potionibus potiùs. Stomachum autem infirmum indicant pallor, macies, præcordiorum dolor, nausea, et nolentium vomitus, in jejuno dolor capitis: quæ in quo non sunt, is firmi stomachi est. Neque credendum utique nostris est, qui, quùm in adversâ valetudine vinum aut frigidam aquam conenpicerunt, deliciarum patrociniun accusationem non merentis stomachi habent. At, qui tardè concoquunt, et quorum ideò præcordia inflantur, quive propter ardorem aliquem noctu sitire consuerunt, antequàm conquiescant, duos tresve cyathos per tenuem fistulam bibant. Prodest etiam adversum tardam concoctionem clarè legere, deindè ambulare, tùm vel ungi vel lavari; assiduè vinum frigidum bibere; et post cibum, magnam potionem, sed, ut ut suprâ dixi, per siphonem: deindè omnes potiones aquâ frigidâ includere. Cui verò cibus acescit, is ante eum bibere aquam egelidam debet, et vomere: at si cui ex hoc frequens dejectio in-

cidit, quoties alvus ei constiterit, frigidâ potione potissimum utatur.

SECT. IX. Si cui verò dolere nervi solent, quod in podagrâ chiragrâve esse consuevit, huic, quantum fieri potest, exercendum id est quod affectum est, objiciendumque labori et frigori: nisi quum dolor increvit, sub quo quies optima est. Venus ei semper inimica est. Concoctio, sicuti in omnibus corporis affectibus, necessaria est: cruditas enim id maximè lædit, et quoties offensum corpus est, vitiosa pars maximè sentit.

Ut concoctio autem omnibus vitiis occurrit, sic rursus aliis frigus, aliis calor: quæ sequi quisque pro habitu corporis sui debet. Frigus inimicum est seni, tenui, vulneri, præcordiis, intestinis, vesicæ, auribus, coxis, scapulis, naturalibus, ossibus, dentibus, nervis, vulvæ, cerebro. Idem summam cutem facit pallidam, aridam, duram, nigram: ex hoc horrores tremoresque nascuntur. At prodest juvenibus, et omnibus plenis: erectiorque mens est, et melius concoquitur, ubi frigus quidem est, sed cavetur. Aqua verò frigida infusa, præterquam capiti, etiam stomacho prodest: item articulis doloribusque qui sunt sine ulceribus: item rubicundis nimis hominibus, si dolore vacant. Calor autem adjuvat omnia quæ frigus infestat, item lippientes, si nec dolor nec lacrymæ sunt; nervos quoque qui contrahuntur, præcipuèque ea ulcera quæ ex frigore sunt. Idem corporis colorem bonum facit, urinam movet. Si nimius est, corpus effeminat, nervos emollit, stomachum solvit. Minimè verò aut frigus aut calor tuta sunt ubi subita insuetis sunt: nam frigus, lateris dolores, aliaque vitia; frigida aqua strumas excitat. Calor concoctionem prohibet, sonnum aufert, sudorem digerit, obnoxium morbis pestilentibus corpus efficit.

SECT. X. Est etiam observatio necessaria, quâ quis in

pestilentia utatur adhuc integer, quum tamen securus esse non possit. Tum igitur oportet peregrinari, navigare. Ubi id non licet, gestari, ambulare sub divo ante aestum leniter; eodemque modo ungi: et, ut supra comprehensum est, vitare fatigationem, cruditatem, frigus, calorem, libidinem; multoque magis se continere, si qua gravitas in corpore est. Tum neque manè surgendum, neque pedibus nudis ambulandum est, minimeque post cibum aut balneum: neque jejuno, neque coenato vomendum est: neque movenda alvus; atque etiam, si per se mota est, comprimenda est. Abstinendum potius, si plenius corpus est: itemque vitandum balneum, sudor, meridianus somnus, utique si cibus quoque antecessit: qui tamen semel die tunc commodius assumitur; insuper etiam modicus, ne cruditatem moveat. Alternis diebus invicem, modò aqua, modò vinum bibendum est. Quibus servatis, ex reliqua victus consuetudine quam minimùm mutari debet. Quum verò hæc in omni pestilentia facienda sunt, tum in eâ maximè quam austri excitârint. Atque etiam peregrinantibus eadem necessaria sunt, ubi gravi tempore anni discesserunt ex suis sedibus, vel ubi in graves regiones venerunt. Ac si cætera res aliqua prohibebit, utique abstinere debet: atque ita ab vino ad aquam, ab hac ad vinum, eo qui supra positus est modo, transitus ei esse.

LIBER SECUNDUS.

INSTANTIS autem adversæ valetudinis signa complura sunt : in quibus explicandis non dubitabo auctoritate antiquorum virorum uti, maximèque Hippocratis, quùm recentiores quoque medici, quamvis in curationibus quædam mutârint, tamen hæc illum optimè præ sagisse fateantur. Sed antequam dico, quibus præcedentibus morborum timor subsit; non alienum videtur exponere, quæ tempora anni, quæ tempestatum genera, quæ partes ætatis, qualia corpora maximè tuta, vel periculis opportuna sint, quod genus adversæ valetudinis in quoque timeri maximè possit. Non quod non omni tempore, in omni tempestatum genere, omnis ætatis, omnis habitûs homines, per omnia genera morborum et ægrotent et moriantur; sed quod fræquentiùs tamen quædam eveniant : ideòque utile est scire unumquemque, quid et quando maximè caveat.

SECT. I. Igitur saluberrimum ver est : proxima deindè ab hoc hiems : periculosior æstas, autumnus longè periculosissimus. Ex tempestatibus verò optimæ æquales sunt, sive frigidæ, sive calidæ : pessimæ, quæ maximè variant, quo fit ut autumnus plurimos opprimat. Nam ferè meridianis temporibus calor; nocturnis atque matutinis, simulque etiam vespertinis, frigus est. Corpus ergò, et æstate, et subindè meridianis coloribus relaxatum, subito frigore excipitur. Sed, ut eo tempore id maximè fit, sic, quandocùmque evenit, noxium est. Ubi æqualitas

autem est, tamen saluberrimi sunt sereni dies; meliores pluviū quàm tantum nebulosi, nubilive: optimique hieme, qui omni vento vacant; æstate quibus favonii perflant. Si genus aliud ventorum est, salubriores septentrionales quàm subsolani, vel austri sunt: sic tamen hæc, ut interdum regionum sorte mutantur. Nam ferè ventus ubique à mediterraneis regionibus veniens, salubris; à mari gravis est. Neque solum in bono tempestatum habitu certior valetudo est; sed priores quoque morbi, si qui inciderunt, leviores sunt, et promptiùs finiuntur. Pessimum ægro cælum est, quod ægrum facit, adeò ut in id quoque genus, quod naturâ pejus est, in hoc statu salubris mutatio sit. At ætas media tutissima est, quæ neque juventæ calore, neque senectutis frigore infestatur. Longis morbis senectus, acutis adolescentia magis patet. Corpus autem habilissimum quadratum est, neque gracile neque obesum. Nam longa statura, ut in juventâ decora est, sic matura senectute conficitur; gracile corpus infirmum, obesum hebes est. Vere autem maximè, quæcumque humoris motu novantur, in metu esse consuêrunt. Ergo tùm lippitudines, pustulæ, profusio sanguinis, abscessus corporis quæ ἀποσήματα Græci nominant, bilis atra quam μελαγχολίαν appellant, insania, morbus comitialis, angina, gravedines, destillationes oriri solent. Hi quoque morbi, qui in articulis nervisque modò urgent, modò quiescunt, tùm maximè et incoherentur et repetunt. At ætas non quidem vacat plerisque ab his morbis; sed adjicit febres vel continuas vel ardentes, vel tertianas, vomitus, alvi dejectiones, auricularum dolores, ulcera oris, caneros quùm in cæteris quidem partibus, tùm maximè obscœnis; et quicquid sudorè hominem resolvit. Vix quicquam ex his in autumnum non incidit: sed oriuntur eo quoque tempore febres incertæ, lienis dolor, aqua inter cutem,

tabes quam Græci φθίσιν nominant, urinæ difficultas quam στραγγουρίαν appellant, tenuioris intestini morbus quem εἰλεδὼν nominant. Fit item lævitas intestinorum quæ λειεντερία vocatur; coxæ dolores, morbi comitiales. Idem quoque tempus et diutinis malis fatigatos, et ab æstate tantum proximâ pressos, interimit, et aliis novis morbis conficit; et quosdam longissimis implicat, maximèque quartanis quæ per hiemem quoque exerceant. Neque aliud magis tempus pestilentiae patet, cujuscumque ea generis est. Hiems autem, quamvis variis rationibus nocet, capitis dolores, tussim, et quicquid in faucibus, in lateribus, in visceribus mali contrahitur, irritat. Ex tempestatibus Aquilo tussim movet, fauces exasperat, ventrem adstringit, urinam supprimit, horrores excitat, item dolores lateris et pectoris. Sanum tamen corpus spissat, et mobilius atque expeditius reddit. Auster aures hebetat, sensus tardat, capitis dolores movet, alvum solvit, totum corpus efficit hebes, humidum, languidum. Cæteri venti, quò vel huic vel illi propiores sunt, eò magis vicinos his illisve affectus faciunt. Denique omnis calor et jecur et lienem inflamat, mentem hebetat, et ut anima deficiat, ut sanguis prorumpat, efficit. Frigus modò nervorum distensionem, modò rigorem infert; illud σπασμὸς, hoc τέτανος græcè nominatur: nigritiem in ulceribus, horrorem in febribus excitat. In siccitatibus acutæ febres, lippitudines, tormina, urinæ difficultas, articulorum dolores oriuntur. Per imbres longæ febres, alvi dejectiones, angina, canceri, morbi comitiales, resolutio nervorum quam παράλυσιν Græci nominant. Neque solùm interest, quales dies sint, sed etiam quales antè præcesserint. Si hiems sicca septentrionales ventos habuit, ver autem austros et pluvias exhibet, ferè subeunt lippitudines, tormina, febres, maximèque in mollioribus corporibus, ideòque præcipuè in

muliebribus. Si verò austri pluviaeque hiemem occupârunt, ver autem frigidum et siccum est, gravidæ quidem feminæ quibus tûm adest partus, abortu periclitantur; hæ verò quæ gignunt, imbecillos vixque vitales edunt. Cæteros lippitudo arida, et, si seniores sunt, gravedines atque destillationes malè habent. At si à primâ hieme austri ad ultimum ver continuârunt, laterum dolores, et insania febricitantium quam *φρένησιν* appellant, quàm celerrimè rapiunt. Ubi verò calor à primo vere orsus æstatem quoque similem exhibet, necesse est multum sudorem in febribus subsequi. At si sicca æstas aquilones habuit, autumno verò imbres austrique sunt, totâ hieme quæ proxima est, tussis, destillatio, raucitas; in quibusdam etiam tabes oriuntur. Sin autem autumnus quoque æquè siccus iisdem aquilonibus perflatur, omnibus quidem mollioribus corporibus, inter quæ muliebria esse proposui, secunda valetudo contingit; durioribus verò instare possunt et aridæ lippitudines, et febres partim acutæ partim longæ, et hi morbi qui ex atrâ bile nascuntur.

Quod ad ætates verò pertinet, pueri proximique his vere optimè valent, et æstate primâ tutissimi sunt: senes æstate et autumnî primâ parte: juvenes hieme, quique inter juventam senectutemque sunt.

Inimicior senibus hiems, æstas adolescentibus est. Tûm si qua imbecillitas oritur, proximum est, ut infantes tenerosque adhuc pueros serpentia ulcera oris quæ *ἄφθας* Græci nominant, vomitus, nocturnæ vigiliæ, aurium humor, circâ umbilicam inflammationes exerceant. Propria etiam dentientium: gingivarum exulcerationes, distentiones nervorum, febriculæ, alvi dejectiones, maximèque caninis dentibus orientibus, malè habent: quæ pericula plenissimi cujusque sunt, et cui maximè venter adstrictus est. At ubi ætas paulùm processit, glandulæ

et vertebrarum quæ in spinâ sunt, aliquæ inclinationes, strumæ, verrucarum quædam genera dolentia, ἀκροχόρδονας Græci appellant, et plura alia tubercula oriuntur. Incipiente verò jam pube, ex iisdem multa, et longæ febres, et sanguinis ex naribus cursus. Maximè quoque omnis pueritia, primùm circà quadragesimum diem, deindè septimo mense, tùm septimo anno, postea circà pubertatem periclitatur. Si qua etiam genera morborum in infantem inciderunt, ac neque pubertate, neque primis coïtibus, neque in feminâ primis menstruis finita sunt, ferè longa sunt : sæpiùs tamen his morbi pueriles qui diutiùs manserunt, terminantur. Adolescentia morbis acutis, item comitialibus tabique maximè objecta est: ferèque juvenes sunt qui sanguinem exspuunt. Post hanc ætatem laterum et pulmonis dolores, lethargus, cholera, insania, sanguinis per quædam etiam velut ora venarum, αἱμορροΐδας Græci appellant, profusio. In senectute, spiritus et urinæ difficultas, gravedo, articulorum et renum dolores, nervorum resolutiones, malus corporis habitus, καχεξίαν Græci appellant, nocturnæ vigiliæ, vitia longiora aurium, oculorum, etiam urinarum; præcipuèque soluta alvus, et, quæ sequuntur hanc, tormina, vel lævitas intestinorum cæteraque fusi ventris mala. Præter hæc graciles, tabes, dejectiones, destillationes, item viscerum et laterum dolores, fatigant. Obesi plerùmque acutis morbis et difficultate spirandi strangulantur, subitoque sæpè moriuntur : quod in corpore tenuiore vix evenit.

SECT. II. Antè adversam autem valetudinem, ut suprà dixi, quædam notæ oriuntur, quarum omnium commune est, aliter se corpus habere atque consuevit; neque in pectus tantùm, sed etiam in melius. Ergò si plenior aliquis, et speciosior, et coloratior factus est, suspecta habere

bona sua debet : quæ, quia neque in eodem habitu subsistere, neque ultrà progredi possunt, ferè retrò quasi ruinà quâdam revolvuntur. Pejus tamen signum est, ubi aliquis contrà consuetudinem emacuit, et colorem decoremque amisit : quoniam in his quæ superant, est quod morbus demat; in his quæ desunt, non est quod ipsum morbum ferat. Præter hæc protinùs timeri debet, si graviora membra sunt, si crebra ulcera oriuntur, si corpus suprà consuetudinem incaluit, si gravior somnus pressit, si tumultuosa somnia fuerunt, si sæpiùs expergiscitur aliquis quàm assuevit, deindè iterùm soporatur; si corpus dormientis circà partes aliquas contrà consuetudinem insudat, maximèque si circà pectus aut cervices, aut crura vel genua vel coxas : item si marcet animus, si loqui et moveri piget, si corpus torpet; si dolor præcordiorum est, aut totius pectoris, aut, qui in plurimis evenit, capitis; si salivæ plenum est os, si oculi cum dolore vertuntur, si tempora adstricta sunt, si membra inhorrescunt, si spiritus gravior est; si circà frontem intentæ venæ moventur, si frequentes oscitationes; si genua quasi fatigata sunt, totumve corpus lassitudinem sentit. Ex quibus sæpè plura, nunquàm non aliqua, febrem antecedunt. In primis tamen illud considerandum est, num cui sæpiùs horum aliquid eveniat, neque ideò corporis ulla difficultas subsequatur. Sunt enim quædam proprietates hominum, sine quarum notitiâ, non facilè quicquam in futurum præsagiri potest. Facilè itaque securus est in his aliquis, quæ sæpè sine periculo evasit : ille sollicitari debet, cui hæc nova sunt; aut qui ista nunquàm sine custodiâ sui tuta habuit.

SECT. III. Ubi verò febris aliquem occupat, scire licet non periclitari, si in latus aut dextrum aut sinistrum, ut ipsi visum est, cubat, cruribus paulùm reductis; qui

ferè sani quoque jacentis habitus est; si facilè convertitur, si noctù dormit, si interdù vigilat, si ex facili spirat, si non conflictatur; si circà umbilicum et pubem cutis plana est; si præcordia ejus sine ullo sensu doloris æqualiter mollia in utrâque parte sunt : quod si paulò tumidiora sunt, sed tamen digitis cedunt et non dolent, hæc valetudo, ut spatium aliquod habebit, sic tuta erit. Corpus quoque, quod æqualiter molle et calidum est, quodque æqualiter totum insudat, et cujus febricula eo sudore finitur, securitatem pollicetur. Sternutamentum etiam inter bona indicia est, et cupiditas cibi vel à primo servata, vel etiam post fastidium orta. Nequè terrere debet ea febris quæ eodem die finita est; ac ne ea quidem, quæ, quamvis longiore tempore tenuit, tamen ante alteram accessionem ex toto quievit, sic ut corpus integrum, quod εἰλικρινές Græci vocant, fieret. Si quis autem incidit vomitus, mixtus esse ex bile et pituitâ debet, et in urinâ subsidere album, læve, æquale; sic ut etiam, si quæ quasi nubeculæ innatârint, in imum deferantur; ac venter ei qui à periculò tutus est, reddere mollia, figurata, atque eodem ferè tempore quo secundâ valetudine assuevit, modo convenientia his quæ assumuntur. Pejor cita alvus est : sed ne hæc quidem terrere protinùs debet, si matutinis temporibus contracta magis est, aut si, procedente tempore, paulatim contrahitur et rufa est, neque fœditate odoris similem alvum sani hominis excedit. Ac lumbricos quoque aliquos sub finem morbi descendisse nihil nocet. Si inflatio sine inflammatione in superioribus partibus dolorem tumoremque fecit, bonum signum est sonitus ventris indè ad inferiores partes evolutus; magisque etiam si sine difficultate cum stercore excessit.

SECT. IV. Contrà gravis morbi periculum est, ubi supinus æger jacet, porrectis manibus et cruribus : ubi residere

vult in ipso acuti morbi impetu, præcipuèque pulmonibus laborantibus: ubi nocturnâ vigiliâ premitur, etiam si interdiù somnus accedit; ex quo tamen peior est qui inter quartam horam et noctem, quàm qui à matutino tempore ad quartam. Pessimum tamen est, si somnus neque noctù neque interdiù accedit: id enim ferè sine continuo dolore esse non potest. Æquè verò signum malum est, etiam somno ultrà debitum urgeri: pejusque, quò magis sopor interdiù, noctùque continuat. Mali etiam morbi testimonium est, vehementer et crebrò spirare, à sexto die cœpisse inhorrescere, pus exspuere, vix exscreare, dolorem habere continuum, difficulter ferre morbum, jactare brachia et crura, sine voluntate lacrymare; habere humorem glutinosum dentibus inhærentem, cutem circà umbilicum et pubem macram; præcordia inflammata, dolentia, dura, tumida, intenta, magisque, si hæc dextrâ parte quàm sinistrâ sunt: periculosissimum tamen est, si venæ quoque ibi vehementer agitantur. Mali etiam morbi signum est, nimis celeriter emacrescere: caput et pedes manusque frigidas habere, ventre et lateribus caléntibus; aut frigidas extremas partes, acuto morbo urgente; aut post sudorem inhorrescere; aut post vomitum singultum esse, vel rubere oculos: aut post cupiditatem cibi, postve longas febres hunc fastidire; aut multùm sudare, maximèque frigido sudore; aut habere sudores non per totum corpùs æquales, quique febrem non finiant, et eas febres, quæ quotidie tempore eodem revertantur; quæve semper pares accessiones habeant, neque tertio quoque die levantur; quæve sic continuant, ut per accessiones increscant, per decessiones tantùm molliantur, nec unquàm integrum corpus dimittant. Pessimum est, si ne levatur quidem febris, sed æquè concitata continuat. Periculosum est etiam, post arquatam morbum febrem oriri; utique

si præcordia dextrâ parte dura manserunt, aut dolentibus iis læva. Nulla acuta febris leviter terrere nos debet : neque unquàm in acutâ febre aut à somno non est terribilis nervorum distensio. Timere etiam ex somno mali morbi est : itemque in primâ febre protinùs mentem esse turbatam, membrumve aliquod esse resolutum : ex quo casu, quamvis vita redditur, tamen id ferè membrum debilitatur. Vomitus etiam periculosus est sinceræ pituitæ vel bilis; pejorque, si viridis aut niger est. At mala urina est, in quâ subsidunt rubra aut lævia : deterior, in quâ quasi folia quædam tenuia atque alba : pessima ex his, si tanquàm ex furfuribus factas nubeculas repræsentat. Diluta quoque atque alba vitiosa est, sed in phreneticis maximè. Alvus autem mala est ex toto suppressa : periculosa etiam, quæ inter febres fluens conquiescere hominem in cubili non patitur; utique, si quod descendit, est perliquidum, aut albidum, aut pallidum, aut spumans. Præter hæc periculum ostendit id quod excernitur, si est exiguum, glutinosum, læve, album, idemque subpallidum : vel si est aut lividum, aut biliosum, aut cruentum, aut pejoris odoris quàm ex consuetudine. Malum est etiam, quod post febres longas sincerum est.

SECT. V. Post hæc indicia votum est longum morbum fieri; sic enim necesse est, nisi occidit. Neque vitæ alias spes in malis magnis est, quàm ut impetum morbi trahendo aliquis effugiat, porrigaturque in id tempus, quod curationi locum præstet. Protinùs tamen signa quædam sunt, ex quibus colligere possumus, morbum, et si non interemerit, longius tamen tempus habiturum. Ubi frigidus sudor inter febres non acutas circà caput tantùm et cervices oritur; aut ubi, febre non quiescente, corpus insudat; aut ubi corpus modò calidum est, et color alius ex alio fit; aut ubi, quod inter febres aliquâ parte

abscessit, ad sanitatem non pervenit; aut ubi æger pro spatio parum emacrescit : item, si urina modò liquida et pura est, modò habet quædam subsidentia; si lævia atque alba rubrave sunt, quæ in eâ subsidunt; aut si quasdam quasi miculas repræsentat; aut si bullulas excitat.

SECT. VI. Sed inter hæc quidem, proposito metu, spes tamen superest : ad ultima verò jam ventum esse testantur nares acutæ, collapsa tempora, oculi concavi, frigida languidaque aures et imis partibus leniter versæ, cutis circà frontem dura et intenta, color aut niger aut perpallidus; multoque magis, si ità hæc sunt, ut neque vigilia præcesserit, neque ventris resolutio, neque inedia. Ex quibus causis interdum hæc species oritur, sed uno die finitur : itaque diutius durans mortis index est. Si verò in morbo vetere jam triduo talis est, in propinquo mors est : magisque, si præter hæc oculi quoque lumen refugiunt et illacrymant; quæque in iis alba esse debent, rubescunt; atque in iisdem venulæ pallent, pituitaque in iis innatans novissimè angulis inhærescit; alterque ex his minor est : iique aut vehementer subsederunt, aut facti tumidiores sunt; perque somnum palpebræ non committuntur, sed inter has ex albo oculorum aliquid apparet, neque id fluens alvus expressit : eademque palpebræ pallent, et idem pallor labra et nares decolorat : eademque labra et nares, oculique et palpebræ, et supercilia, aliquave ex his pervertuntur; isque propter imbecillitatem jam non audit, aut non videt. Eadem mors denunciatur, ubi æger supinus cubat, eique genua contracta sunt : ubi deorsum ad pedes subindè delabitur : ubi brachia et crura nudat et inæquabiliter dispergit, neque iis calor subest : ubi hiat : ubi assiduè dormit : ubi is qui mentis suæ non est, neque id facere sanus solet, dentibus stridet : ubi ulcus,

quod aut antè aut in ipso morbo natum est, aridum, et aut pallidum aut lividum factum est. Illa quoque mortis indicia sunt, ungues digitique pallidi, frigidus spiritus; aut si manibus quis in febre et acuto morbo, vel insaniâ pulmonisve dolore vel capitis, in veste floccos legit, simbriasve diducit; vel in adjuncto pariete, si quæ minuta eminent, carpit. Dolores etiam circà coxas et inferiores partes orti, si ad viscera transierunt, subitoque desierunt, mortem subesse testantur; magisque, si alia quoque signa accesserunt. Neque is servari potest, qui sine ullo tumore febricitans, subito strangulatur, aut devorare salivam suam non potest: cuive in eodem febris corporisque habitu cervix convertitur sic, ut devorare æquè nihil possit: aut cui simul et continua febris et ultima corporis infirmitas est: aut cui, febre non quiescente, exterior pars friget, interior sic calet ut etiam sitim faciat: aut qui, febre æquè non quiescente, simul et delirio et spirandi difficultate vexatur: aut qui, epoto veratro, exceptus distensione nervorum est: aut qui ebrius obmutuit. Is enim ferè nervorum distensione consumitur, nisi aut febris accessit, aut eo tempore quo ebrietas solvi debet, loqui cœpit. Mulier quoque gravida acuto morbo facilè consumitur; et is cui somnus dolorem auget; et cui protinùs in recenti morbo bilis atra vel infrà vel suprà se ostendit; cuive alterutro modo se prompsit, quùm jam longo morbo corpus ejus esset extenuatum et affectum. Sputum etiam biliosum et purulentum, sive separatim ista sive mixta proveniunt, interitùs periculum ostendunt. Ac si circà septimum diem tale esse cœpit, proximum est, ut is circà quartum decimum diem decedat; nisi alia signa meliora pejorave accesserint: quæ quò leviora graviorave subsecuta sunt, eò vel seriore mortem vel maturiorem denunciant. Sudor quoque frigidus in acutâ febre pestiferus est:

atque in omni morbo vomitus, qui varius et multorum colorum est; præcipuèque si malus in hoc odor est. Ac sanguinem quoque in febre vomuisse pestiferum est. Urina verò fulva et tenuis in magnâ cruditate esse consuevit; et sæpè, antequàm spatio maturescat, hominem rapit: itaque si talis diutiùs permanet, periculum mortis ostendit. Pessima tamen est præcipuèque mortifera, nigra, crassa, mali odoris: atque in viris quidem et mulieribus talis deterrima est: in pueris verò, quæ tenuis et diluta est. Alvus quoque varia pestifera est; et quæ strigmentum, sanguinem, bilem, viride aliquid, modò diversis temporibus, modò simul, et in mixturâ quâdam, discreta tamen repræsentat. Sed hæc quidem potest paulò diutiùs trahere: in præcipiti verò jam esse denunciat, quæ liquida eademque vel nigra, vel pallida vel pinguis est; utique, si magna fœditas odoris accessit. Illud interrogari me posse ab aliquo scio; si certa futuræ mortis incidia sunt, quo modo interdum deserti à medicis conualescant, quosdamque fama prodiderit in ipsis funeribus revixisse? Quin etiam vir jure magni nominis Democritus, ne finitæ quidem vitæ satis certas notas esse proposuit, quibus medici credidissent: adeò illud non reliquit, ut certa aliqua signa futuræ mortis essent. Adversùs quos ne illud quidem dicam, quod in vicino sæpè quædam notæ positæ, non bonos, sed imperitos medicos decipiunt; quod Asclepiades sciens, funeri obviùs intellexit eum vivere qui efferebatur: nec protinùs crimen artis esse, si quod professoris sit. Illa tamen moderatiùs subjiciam: conjecturalem artem esse medicinam; rationemque conjecturæ talem esse, ut, quùm sæpiùs aliquid responderit, interdum tamen fallat. Non itaque, si quid vix millesimo in corpore aliquem decipit, id fidem non habet, quùm per innumerabiles homines respondeat. Idque non in his tantum quæ pes-

tifera sunt, dico; sed in his quoque quæ salutaria : siquidem etiam spes interdum frustratur, et moritur aliquis, de quo medicus securus primò fuit : quæque mendendi causâ reperta sunt, non nunquam in pejus aliquid convertunt : neque id evitare humana imbecillitas in tantâ varietate corporum potest. Sed est tamen medicinæ fides, quæ multò sæpius, perque multò plures ægros prodest : neque tamen ignorare oportet, in acutis morbis fallaces magis notas esse et salutis et mortis.

SECT. VII. Sed quum proposuerim signa, quæ in omni adversâ valetudine communia esse consueverunt; ad ea quoque transibo, ut, quas aliquis in singulis morborum generibus habere possit notas, indicem. Quædam autem sunt quæ ante febres, quædam quæ inter eas, quid aut intus sit, aut venturum sit, ostendunt. Ante febres, si caput grave est, aut ex somno oculi caligant, aut frequentia sternutamenta sunt, circa caput aliquis pituitæ impetus timeri potest. Si sanguis aut calor abundat, proximum est, ut aliquâ parte profluvium sanguinis fiat. Si sine causâ quis emacrescit, ne in malum habitum corpus ejus recidat, metus est. Si præcordia dolent, aut inflatio gravis est, aut toto die non concocta fertur urina, cruditatem esse manifestum est. Quibus diù color sine morbo regio malus est, hi vel capitis doloribus conflictantur, vel terram edunt. Qui diù habent faciem pallidam et tumidam, aut capite, aut visceribus aut alvo laborant. Si in continuâ febre puero venter nihil reddit, mutaturque ei color, nec somnus accedit, ploratque is assidue, metuenda nervorum distensio est. Frequens autem destillatio in corpore tenui longoque, tabem timendam esse testatur. Ubi pluribus diebus non descendit alvus, docet aut subitam dejectionem aut febriculam instare. Ubi pedes turgent, longæ dejectiones sunt : ubi dolor in imo ventre et coxis est, aqua inter

cutem instat : sed hoc morbi genus ab ilibus oriri solet. Idem propositum periculum est his, quibus, quùm voluntas desidendi est, venter nihil reddit nisi et ægrè et durum. Quùm tumor in pedibus est, idemque modò dextrâ, modò sinistrâ parte ventris in vicem oritur atque finitur, à jecinore id malum proficisci videtur. Ejusdem morbi nota est, ubi circà umbilicum intestina torquentur, *σπρόφους* Græci nominant, coxæque dolores manent, qui neque tempore neque remediis solvuntur. Dolor autem articulorum, prout in pedibus manibusve aut aliâ quâlibet parte sic est, ut eo loco nervi contrahantur; aut si in membrum ex levi causâ fatigatum, æquè frigido calidoque offenditur, podagram chiragramve vel ejus articuli in quo id sentitur, morbum futurum esse denunciat. Quibus in pueritiâ sanguis ex naribus fluxit, dein fluere desiit, hi vel capitis doloribus conflictentur necesse est, vel in articulis aliquas exulcerationes graves habeant, vel aliquo morbo etiam debilitentur. Quibus feminis menstrua non proveniunt, necesse est capitis acerbissimi dolores sint, vel quælibet alia pars morbo infestetur. Eademque his pericula sunt, quibus articulorum vitia, ut dolores tumoresque, sine podagrâ similibusque morbis oriuntur et desinunt : utique, si sæpè tempora iisdem dolent noctûque corpora insudant; si frons prurit, lippitudinis metus est. Si mulier à partu vehementes dolores habet, neque alia prætereà signa mala sunt, circà vicesimum diem aut sanguis per nares erumpet, aut inferioribus partibus aliquid abscedet. Quicumque etiam dolorem ingentem circà tempora et frontem habebit, is alterutrâ ratione eum finiet, magisque, si juvenis erit, per sanguinis profusionem; si senior, per suppurationem. Febris autem quæ subito sine ratione, sine bonis signis finita est, ferè revertitur. Cui fauces sanguine et interdî et noctî replentur sic,

ut neque capitis dolores neque præcordiorum, neque tussis, neque vomitus, neque febricula præcesserit, hujus aut in naribus aut in faucibus ulcus reperietur. Si mulieri inguen et febricula orta est, neque causa apparet, ulcus in vulvâ est. Urina autem crassa, ex quâ quod desidat, album est, significat circâ articulos aut circâ viscera dolorem metumque morbi esse. Eadem viridis, aut viscerum dolorem tumoremque cum aliquo periculo subesse, aut corpus certè integrum non esse, testatur: ac si sanguis aut pus in urinâ est, vel vesica vel renes exulcerati sunt. Si hæc crassa carunculas quasdam exiguas quasi capillos habet, aut si bullat et malè olet, et interdùm quasi arenam, interdùm quasi sanguinem trahit; dolent autem coxæ, quæque inter has superque pubem sunt; et accedunt frequentes ructus, interdùm vomitus biliosus; extremæque partes frigescent, urinæ crebra cupiditas, sed magna difficultas est; et quod indè excretum est, aquæ simile, vel rufum vel pallidum est, paulùm tamen in eo levamenti est; alvus verò cum multo spiritu redditur; utique in renibus vitium est. At si paulatim destillat, vel si sanguis per hanc editur, et in eo quædam cruenta concreta sunt, idque ipsum cum difficultate redditur, et circâ pubem interiores partes dolent, in eâdem vesicâ vitium est. Calculosi verò his indiciis cognoscuntur. Difficulter urina redditur paulatimque; interdùm etiam sine voluntate destillat: eadem arenosa est: non nunquam aut sanguis, aut cruentum, aut purulentum aliquid cum eâ excernitur: eamque quidam promptiùs recti, quidam resupinati, maximèque hi qui grandes calculos habent; quidam etiam inclinati reddunt, colemque extendendo dolorem levant. Gravitatis quoque cujusdam in eâ parte sensus est; atque ea cursu omni motu augetur. Quidam etiam, quùm torquentur, pedes inter se, subindè mu-

tatis vicibus, implicant. Feminae verò oras naturalium suorum manibus admotis scabere crebrò coguntur: non nunquam, si digitum admovent, ubi vesicae cervicem is urget, calculum sentiunt. At qui spumantem sanguinem exscreant, iis in pulmone vitium est. Mulieri gravidæ sine modo fusa alvus elidere partum potest. Eidem si lac ex mammis profluit, imbecillum est quod intus gerit: duræ mammæ sanum illud esse testantur. Frequens singultus, et præter consuetudinem continuus, jecur inflammatum esse significat. Si tumores super ulcera subito esse desierunt, idque à tergo incidit, vel distensio nervorum, vel rigor timeri potest: ac si à priorè parte id evenit, vel lateris acutus dolor, vel insania expectanda est. Interdum etiam hujusmodi casum, quæ tutissima inter hæc est, profusio alvi sequitur. Si ora venarum, sanguinem solita fundere, subito suppressa sunt, aut aqua inter cutem, aut tabes sequitur. Eadem tabes subit, si in lateris dolore orta suppuratione intra quadraginta dies purgari non potuit. At si longa tristitia cum longo timore et vigiliâ est, atræ bilis morbus subest. Quibus sæpè ex naribus fluit sanguis, iis aut lienis tumet, aut capitis dolores sunt, quos sequitur, ut quædam antè oculos tanquam imagines obversentur. At quibus magni lienēs sunt, iis gingivæ malæ sunt, et os olet, aut sanguis aliquâ parte prorumpit: quorum si nihil evenit, necesse est in cruribus mala ulcera, et ex his nigræ cicatrices fiant. Quibus causa doloris, neque sensus ejus est, iis mens labat. Si in ventrem sanguis confluit, ibi in pus vertitur. Si à coxis et ab inferioribus partibus dolor in pectus transit, neque ullum signum malum accessit, suppurationis eo loco periculum est. Quibus siue febre aliquâ ex parte dolor aut prurigo cum rubore aut calore est, ibi aliquid suppurat. Urina quoque, quæ in homine parum sano liquida est, circa

aures futuram aliquam suppurationem esse denunciat.

Hæc verò, quùm sine febre quoque vel latentium vel futurarum rerum notas habeant, multò certiora sunt, ubi febris accessit; atque etiam aliorum morborum tùm signa nascuntur. Ergò protinùs insania timenda est, ubi expeditior alicujus, quàm sani fuit, sermo est, subitaque loquacitas orta est, et hæc ipsa solito audacior: aut ubi rarò quis et vehementer spirat, venasque concitatas habet, præcordiis duris et tumentibus. Oculorum quoque frequens motus; et in capitis dolore offusæ oculis tenebræ: vel, nullo dolore substante, somnus ereptus, continuataque nocte et die vigilia, vel prostratum contrà consuetudinem corpus in ventrem, sic ut ipsius alvi dolor id non coegerit; item robusto adhuc corpore, insolitus dentium stridor, insanix signa sunt. Si quid etiam abscessit, et antequàm suppurat, manente adhuc in corpore solitâ febre, subsedit, periculum affert primùm furoris, deindè interitûs. Auris quoque dolor acutus cum febre continuâ vehementique, sæpè mentem turbat: et ex eo casu juniores interdùm intrâ septimum diem moriuntur; seniores tardiùs, quoniam neque æquè magnas febres experiuntur, neque æquè insaniunt: ità sustinent, dùm is affectus in pus vertatur. Suffusæ quoque sanguine mulieris mammæ furorem venturum esse testantur. Quibus autem longæ febres sunt, iis aut abscessus aliqui, aut articulorum dolores erunt. Quorum faucibus in febre illiditur spiritus, instat iis nervorum distensio. Si angina subito finita est, in pulmonem id malum transit; idque sæpè intrâ septimum diem occidit. Quod nisi incidat, sequitur, ut aliquâ parte suppuret. Deniquè post alvi longam resolutionem tormina, post hæc intestinorum lævitas oritur. Post nimias destillationes, tabes: post lateris dolorem, vitia pulmonum: post hæc, insania: post magnos fer-

vires corporis, nervorum rigor aut distensio. Ubi caput vulneratum est, delirium : ubi vigilia torsit, nervorum distensio : ubi vehementer venæ suprâ ulcera moventur, sanguinis profluvium erit. Suppuratio verò pluribus modis excitatur : nam si longæ febres sine dolore, sine manifestâ causâ remanent, in aliquam partem id malum incumbit, sed in junioribus tantum : nam in senioribus ex ejusmodi morbo quartana ferè nascitur. Eadem suppuratio fit, si præcordia dura et dolentia ante diem vicesimum hominem non sustulerunt, neque sanguis ex naribus fluxit, maximèque in adolescentibus; utique, si inter principia aut oculorum caligo aut capitis dolores fuerunt : sed tùm in inferioribus partibus aliquid abscedit. At si præcordia tumorem mollem habent, neque habere intrâ sexaginta dies desinunt, hæretque per omne id tempus febris, tùm in superioribus partibus fit abscessus : ac, si inter ipsa viscera non fit, circâ aures erumpit. Quùmque omnis longus tumor ad suppurationem ferè spectet, magis eò tendit is qui in præcordiis, quàm is qui in ventre est; et is qui suprâ umbilicum, quàm is qui infrâ est. Si lassitudinis etiam sensus in febre est, vel in maxillis vel in articulis aliquid abscedit. Interdùm quoque urina tenuis et cruda sic diù fertur, ut alia salutaria signa sint, exque eo casu plerumquè infrâ transversum septum, quod *διάφραγμα* Græci vocant, fit abscessus. Dolor autem pulmonis, si neque per sputa, neque per sanguinis detractionem, neque per victûs rationem finitus est, vomicas aliquas interdùm excitat aut circâ vicesimum diem, aut circâ tricesimum, aut circâ quadragesimum, non nunquàm etiam circâ sexagesimum. Numerabimus autem ab eo die quo primùm febricitavit aliquis, aut inhorruit, aut gravitatem ejus partis sensit. Sed hæ vomicæ modò à costarum parte nascuntur : quod suppurat, ab eâ parte

quam afficit, dolorem inflammationemque concitat: ipsum calidius est: et si in partem sanam aliquis decubuit, onerare eam ex pondere aliquo videtur. Omnis etiam suppuratio, quæ nondum oculis patet, sic apprehendi potest; si febris non dimittit, eaque interdum levior est, nocturnum increscit; multus sudor oritur; cupiditas tussendi est, et penè nihil in tussi excreatur; oculi cavi sunt, malæ rubent, venæ sub linguâ inalbescunt, in manibus fiunt adunci ungues, digiti maximèque summi pallent; in pedibus tumores sunt, spiritus difficilius trahitur, cibi fastidium est, pustulæ toto corpore oriuntur. Quod si protinus initio dolor et tussis fuit, et spiritus difficultas; vomica vel antè vel circà vicesimum diem erumpet: si seriùs ista cœperint, necesse est quidem increscant, sed quò minùs citò affecerint, eò tardiùs solvantur. Solent etiam in gravi morbo pedes cum digitis unguibusque nigrescere: quod si non est mors consecuta, et reliquum corpus invaluit, pedes tamen decidunt.

SECT. VIII. Sequitur, ut in quoque morbi genere proprias notas explicem, quæ vel spem vel periculum ostendant. Ex vesicâ dolente, si purulenta urina processit, inque eâ læve et album subsedit, metum detrahit. In pulmonis morbo, si sputo ipso levatur dolor, quamvis id purulentum est, tamen si æger facilè spirat, facilè excreat, si morbum ipsum non difficulter fert, potest ei secunda valetudo contingere. Neque inter initia terreri convenit, si protinus sputum mixtum est rufo quodam et sanguine, dummodò statim edatur. Laterum dolores, suppuratione factâ, deindè intrâ quadagesimum diem purgatâ, finiuntur. Si in jecinore vomica est, et ex eâ fertur pus purum et album, salus ei facilis: id enim malum in tunicâ est. Ex suppurationibus verò hæc tolerabiles sunt, quæ in exteriorem partem feruntur, et acuantur. At ex

his quæ intrò procedunt, hæ leviores, quæ contrà secutem non afficiunt, eamque et sine dolore et ejusdem coloris, cujus reliquæ partes sunt, sinunt esse. Pus quoque, quâcumque parte erumpit, si est læve, album et unius coloris, sine ullo metu est; et, quo effuso, febris protinùs conquievit, desieruntque urgere cibi fastidium et potionis desiderium. Si quandò etiam suppuratio descendit in crura, sputumque ejusdem factum pro rufo purulentum est, periculi minùs est. At in tabe ejus qui salvus futurus est, sputum esse debet album, æquale totum, ejusdemque coloris, sine pituitâ: eique etiam simile esse oportet, si quid in nares à capite destillat. Longè optimum est febrem omninò non esse: secundum est tantillam esse, ut neque cibum impediat, neque crebram sitim faciat. Alvus in hac valetudine ea tuta est, quæ quotidie coacta, eaque convenientia his quæ assumuntur, reddit: corpus id quod minimè tenue, maximèque lati pectoris atque setosi est, cujusque cartilago exigua et carnosa est. Super tabem si mulieri quoque suppressa menstrua fuerunt, et circa pectus atque scapulas dolor mansit, subitoque sanguis erupit, leviori morbus solet: nam et tussis minuitur, et sitis atque febriculæ desinunt: sed iisdem ferè, nisi redit sanguis, vomica erumpit: quæ quò cruentior, eò melior est. Aqua autem inter cutem minimè terribilis est, quæ, nullo antecedente morbo, cœpit: deindè, quæ longo morbo supervenit; utique, si firma viscera sunt, si spiritus facilis, si nullus dolor, si sine calore corpus est, æqualiterque in extremis partibus macrum; si venter mollis, si nulla tussis, nulla sitis; si lingua ne per somnum quidem inarescit; si cibi cupiditas est; si venter medicamentis movetur; si per se excernit mollia et figurata; si extenuatur; si urina et vini mutatione, et epotis aliquibus medicamentis, mutatur; si corpus sine

lassitudine est, et motum facillè sustinet : si quidem in quo omnia hæc sunt, is ex toto tutus est : in quo plura ex his sunt, is in bonâ spe est. Articulorum verò vitia, ut podagræ chiragræque, si juvenes tentârunt, neque callum induxerunt, solvi possunt : maximèque torminibus leniuntur, et quocumque modo venter fluit. Item morbus comitalis ante pubertatem ortus, non ægrè finitur; et in quo ab unâ parte corporis, venientis accessionis sensus incipit. Optimum est à manibus pedibusve initium fieri, deindè à lateribus : pessimum inter hæc à capite. Atque in his quoque ea maximè prosunt, quæ per dejectiones excernuntur. Ipsa autem dejectio sine ullâ noxâ est, quæ sine febre est; si celeriter desinit; si, contrectato ventre, nullus motus ejus sentitur; si extremam alvum spiritus sequitur. Ac ne tormina quidem periculosa sunt, si sanguis et strigmenta descendunt, dùm febris cæteræque accessiones hujus morbi absint : adeò ut etiam gravida mulier, non solùm reservari possit, sed etiam partum reservare : prodestque in hoc morbo, si jam ætate aliquis processit. Contrà intestinorum lævitas faciliùs à teneris ætatibus depellitur : utique, si ferri urina, et ali cibo corpus, incipit. Eadem ætas prodest et in coxæ dolore et humerorum, et in omni resolutione nervorum : ex quibus coxa, si sine torpore est, si leviter friget, quamvis magnos dolores habet, tamen et facillè et maturè sanatur : resolutumque membrum, si nihilominùs alitur, fieri sanum potest. Oris resolutio etiam alvo citâ finitur : omnisque dejectio lippienti prodest. At varix ortus, vel per ora venarum subita profusio sanguinis, vel tormina, insaniam tollunt. Humerorum dolores, qui ad scapulas vel manus tendunt, vomitu atræ bilis solvuntur : et quisquis dolor deorsum tendit, sanabilior est. Singultus ster-nutamento finitur. Longas dejectiones suppressit vomitus.

Mulier sanguinem vomens, profusis menstruis, liberatur. Quæ menstruis non purgatur, si sanguinem ex naribus fudit, omni periculo vacat. Quæ locis laborat, aut difficulter partum edit, sternutamento levatur. Æstiva quartana ferè brevis est. Cui calor et tremor est, saluti delirium est. Lienosis bono tormina sunt. Deniquè, ipsa febris, quod maximè mirum videri potest, sæpè præsidio est. Nam et præcordiorum dolores, si sine inflammatione sunt, finit; et in jecinoris dolore succurrit: et nervorum distensionem rigoremque, si postea cœpit, ex toto tollit; et ex difficultate urinæ morbum tenuioris intestini ortum, si urinam per calorem movet, levat. At dolores capitis, quibus oculorum caligo et ruber cum quâdam frontis prurigne accedunt, sanguinis profusione vel fortuitâ vel etiam petità, submoventur. Si capitis ac frontis dolores ex vento, vel frigore aut æstu sunt, gravedine et sternutamentis finiuntur. Febrem autem ardentem, quam Græci καυσώδη vocant, subitus horror exsolvit. Si in febre aures obtusæ sunt, si sanguis è naribus fluxit, aut venter resolutus est, illud malum desinit ex toto. Nihil plus adversus surditatem, quàm biliosa alvus, prodest. Quibus in fistulâ urinæ minuti abscessus, quos ρύματα Græci vocant, esse cœperunt, iis, ubi pus eâ parte profluxit, sanitas redditur. Ex quibus quùm pleraque per se proveniant, scire licet, inter ea quoque quæ ars adhibet, naturam plurimùm posse.

Contrà, si caput in febre continenti dolet, neque quicquam remittit, malum atque mortiferum est: maximèque id periculum est pueris à septimo anno ad quartum decimum. In pulmonis morbo, si sputum primis diebus non fuit, deindè à septimo die cœpit, et ultrà septimum mansit, periculosum est: quantòque magis mixtos neque inter se diductos colores habet, tantò de-

terius. Et tamen nihil pejus est quàm sincerum id edi, sive rufum est, sive cruentum, sive album, sive glutinosum, sive pallidum, sive spumans: nigrum tamen pessimum est. In eodem morbo periculosa sunt, tussis, destillatio; etiam, quod aliàs salutare habetur, sternutamentum: periculosissimumque est, si hæc secuta subita dejectio est. Ferè verò quæ in pulmonis, eadem in lateris doloribus et mitiora signa, et asperiora esse consueverunt. Ex jecinore si pus cruentum exit, mortiferum est. At ex suppurationibus hæc pessimæ sunt, quæ intus tendunt, sic ut exteriorem quoque cutem decolorent: ex his deindè, quæ in exteriorem partem prorumpunt; quæ maximæ, quæque planissimæ sunt. Quod si, ne ruptâ quidem vomicâ, vel pure extrinsecus emisso, febris quievit, aut quamvis quieverit, tamen repetit; item si sitis est, si cibi fastidium, si venter liquidus, si pus est lividum et pallidum, si nihil æger excreat nisi pituitam spumantem, periculum certum est. Atque ex his quidem suppurationibus, quas pulmonum morbi concitârunt, ferè senes moriuntur: ex cæteris, juniores. At in tabe sputum mixtum, purulentum, febris assidua, quæ et cibi tempora eripit, et siti affligit, in corpore tenui periculum subesse testatur. Si quis etiam in eo morbo diutiùs traxit; ubi capilli fluunt, ubi urina quædam araneis similia supersidentia ostendit; atque in sputis odor fœdus est; maximèque ubi post hæc orta dejectio est, protinùs moritur utique si tempus autumnus est, quo ferè, qui cæterâ parte anni traxerunt, resolvuntur. Item pus exspuisse in hoc morbo, deindè ex toto spueri desiisse, mortiferum est. Solet etiam in adolescentibus is morbus ex vomicâ fistulâve oriri: qui non facillè sanescunt, nisi si multa signa bonæ valetudinis subsequuta sunt. Ex reliquis verò minimè facillè sanantur virgines, aut eæ mulieres quibus super tabem menstrua suppressa

sunt. Cui verò sano subitus dolor capitis ortus est, dein somnus oppressit, sic ut stertat, neque expergiscatur, intrà septimum diem pereundum est: magis si, quàm alvus cita non antecesserit, palpebræ dormientis non coeunt, sed album oculorum apparet. Quos tamen ita mors sequitur, si id malum non est febre discussum. Aqua inter cutem, si ex acuto morbo cœpit, ad sanitatem rarò perducitur; utique, si contraria his quæ suprâ posita sunt, subsequuntur. Æquè in ea quoque tussis spem tollit: item, si sanguis sursùm deorsùmve erupit, et aqua medium corpus implevit. Quibusdam etiam in hoc morbo tumores oriuntur, deindè desinunt, deindè rursùs assurgunt: hi quidem tutiores sunt, quàm qui suprâ comprehensi sunt, si attenduntur: sed ferè fiducia secundæ valetudinis opprimuntur. Illud jure aliquis mirabitur, quomodò quædam simul et affligant nostra corpora, et parte aliquâ tueantur: nam sive aqua inter cutem quem implevit, sive in magno abscessu multum puris coïit, simul id omne effudisse æquè mortiferum est, ac si quis sani corporis vulnere factus exsanguis est. Articuli verò qui sic dolent; ut super eos ex callo quædam tubercula innata sint, nunquàm liberantur: quæque eorum vitia, vel in senectute cœperunt, vel in senectutem ab adolescentiâ pervenerunt, ut aliquandò leniri possunt, sic nunquàm ex toto finiuntur.

Morbus quoque comitalis post annum quintum et vicesimum ortus ægrè curatur: multòque ægrius is qui post quadragesimum annum cœpit; adeò ut in eâ ætate aliquid in naturâ spei, vix quidquam in medicinâ sit. In eodem morbo, si simul totum corpus afficitur, neque antè in partibus aliquis venientis mali sensus est, sed homo ex improvise concidit, cujuscumque is ætatis est, vix sanescit: si verò aut mens læsa est, aut nervorum facta resolutio, medicinæ locus non est. Dejectio-

nibus quoque si febris accessit; si inflammatio jecinoris, aut præcordiorum aut ventris; si immodica sitis; si longius tempus; si alvus varia, si cum dolore est; etiam mortis periculum subest: maximèque, si inter hæc tormina vetera esse cœperunt: isque morbus maximè pueros absumit usquè ad annum decimum: cæteræ ætates faciliùs sustinent. Mulier quoque gravida ejusmodi casu rapi potest; atque, etiam si ipsa cōvaluit, partum tamen perdit. Quin etiam tormina ab atrâ bile orsa mortifera sunt: aut si sub his, extenuato jam corpore, subito nigra alvus profluxit.

At intestinorum lævitas periculosior est, si frequens dejectio est, si venter omnibus horis et cum sono et sine hoc profluit, si similiter noctù et interdiù, si quod excernitur, aut crudum est aut nigrum, et præter id, etiam læve et mali odoris; si sitis urget, si post potionem urina non redditur (quod evenit, quia tunc liquor omnis non in vesicam, sed in intestina descendit); si os exulceratur, si rubet facies et quasi maculis quibusdam colorum omnium distinguitur; si venter est quasi fermentatus, pinguis atque rugosus; si et cibi cupiditas non est: inter quæ quàm evidens mors sit, multò evidentior est, si jam longinquum quoque id vitium est: maximè etiam, si in corpore senili est. Si verò in tenuiore intestino morbus est, vomitus, singultus, nervorum distensio, delirium, mala sunt. At in morbo arquato durum fieri jecur, perniciosissimum est. Quos lienis malè habet, si tormina prehenderunt, deindè conversa sunt vel in aquam inter cutem, vel in intestinorum lævitatē; vix ulla medicina periculo subtrahit. Morbus intestini tenuioris, nisi febre resolutus est, intrà septimum diem occidit. Mulier ex partu, si cum febre vehementibus etiam et assiduis capitis doloribus premitur, in periculo mortis est. Si dolor atque inflammatio est in his

partibus, quibus viscera continentur, frequenter spirare signum malum est. Si sine causâ longus dolor capitis est, et in cervices ac scapulas transit, rursusque in caput revertitur, aut à capite ad cervices scapulasque pervenit, perniciosus est: nisi vomitam aliquam excitavit, sic ut pus extussiat; aut nisi sanguis ex aliquâ parte prorupit; aut nisi in capite multa prurigo, totove corpore pustulæ ortæ sunt. Æquè magnum malum est, ubi torpor atque prurigo pervagantur, modò per totum caput, modò in parte; aut sensus alicujus ibi quasi frigoris est, eaque ad summam quoque linguam perveniunt. Et, quùm in iisdem ex abscessibus auxilium sit, eò difficilior sanitas est, quò minùs sæpè sub his malis illi subsequuntur. In coxæ verò doloribus, si vehemens torpor est, frigescitque crus et coxa, alvusque nisi coacta non reddit, idque quod excernitur, mucosum est, jamque ætas ejus hominis quadragesimum annum excessit, is morbus erit longissimus minimùmque annuus; neque finiri poterit nisi aut vere aut autumno. Difficilis æquè curatio est in eâdem ætate, ubi humerorum dolor vel ad manus pervenit, vel ad scapulas tendit, torporemque et dolorem creat, neque bilis vomitu levatur. Quâcunque verò parte corporis membrum aliquod resolutum est, si neque movetur et emacrescit, in pristinum habitum non revertitur; eòque minùs, quò vetustius id vitium est, et quò magis in corpore senili est: omni resolutioni nervorum ad medicinam non idonea tempora sunt hiems et autumnus: aliquid sperari potest vere et æstate: isque morbus mediocris vix sanatur, vehemens sanari non potest. Omnis etiam dolor minùs medicinæ patet, qui sursùm procedit. Mulieri gravidæ si subito mammæ emacruerunt, abortûs periculum est. Quæ neque peperit, neque gravis est, si lac habet, à mens-
truis defecta est. Quartana, autumnalis ferè longa est

maximèque quæ cœpit hieme appropinquante. Si sanguis profluxit, deindè secuta est dementia cum distensione nervorum, periculum mortis est : itemque, si medicamentis purgatum et adhuc inanem nervorum distensio oppressit; aut si in magno dolore extremæ partes frigent. Neque is ad vitam redit, qui ex suspendio, spumante ore, detractus est. Alvus nigra, sanguini atro similis, repentina, sive cum febre sive etiam sine hâc est, perniciosa est.

SECT. IX. Cognitis indicîis quæ nos vel spe consolentur, vel metu terreant, ad curationes morborum transeundum est. Ex his quædam communes sunt, quædam propriæ. Communes, quæ pluribus morbis opitulantur; propriæ, quæ singulis. Antè de communibus dicam : ex quibus tamen quædam non ægros solùm, sed sanos quoque sustinent, quædam in adversâ tantùm valetudine adhibentur. Omne verò auxilium corporis, aut demit aliquam materiam, aut adjicit; aut evocat, aut reprimat; aut refrigerat, aut calefacit; simulque aut durat, aut mollit : quædam non uno modo tantùm, sed etiam duobus inter se non contrariis coadjuvant. Demitur materia sanguinis detractio, cucurbitulâ, dejectione, vomitu, frictione, gestatione, omnique exercitatione corporis, abstinentiâ, sudore : de quibus protinùs dicam.

SECT. X. Sanguinem, incisâ venâ, mitti novum non est : sed nullum penè morbum esse, in quo non mittatur, novum est. Item mitti junioribus et feminis uterum non gerentibus, vetus est : in pueris verò idem experiri, et in senioribus, et in gravidis quoque mulieribus, vetus non est. Si quidem antiqui primam ultimamque ætatem sustinere non posse hoc auxilii genus judicabant; persuaserantque sibi mulierem gravidam, quæ ità curata esset, abortum esse facturam. Postea verò usus ostendit nihil ex his esse perpetuum, aliasque potiores observa-

tiones adhibendas esse, ad quas dirigi curantis consilium debeat. Interest enim, non quæ ætas sit, neque quid in corpore intus geratur, sed quæ vires sint. Ergò, si juvenis imbecillus est, aut si mulier quæ grvida non est, parum valet, malè sanguis mittitur : emoritur enim vis, si quæ his supererat, hoc modo erepta. At firmus puer, et robustus senex, et grvida mulier valens, tulò sic curantur. Maximè tamen in his medicus imperitus falli potest, quia ferè minùs roboris illis ætatibus subest : mulierique præguanti, post curationem quoque, viribus opus est, non tantum ad se, sed etiam ad partum sustinendum. Non quicquid aut intentionem animi aut prudentiam exigit, protinus ejiciendum est; quum præcipua in hoc ars sit, quæ non annos numeret, neque conceptionem solam videat, sed vires æstimet, et ex eo colligat, possit necne superesse, quod vel puerum, vel senem, vel in unâ muliere duo corpora simul sustineat. Interest etiam inter valeus corpus et obesum, inter tenue et infirmum : tenuioribus magis sanguis, plenioribus magis caro abundat. Faciliùs itaque illi detractorem ejus modi sustinent; celeriusque eâ, qui nimium est pinguis, affligitur : ideòque vis corporis meliùs ex venis quàm ex ipsâ specie æstimatur. Neque solum hæc consideranda sunt, sed etiam morbi genus quod sit : utrum superans an deficiens materia læserit; corruptum corpus sit, an integrum. Nam si materia vel deest, vel integra est, illud alienum est : at si vel copiâ sui malè habet, vel corrupta est, nullo modo meliùs succurritur. Ergò vehemens febris, ubi rubet corpus, plenæque venæ tument, sanguinis detractorem requirit : item viscerum morbi, nervorumque resolutio, et rigor, et distensio; quicquid denique fauces difficultate spiritus strangulat, quidquid subito suppressit vocem, quisquis intolerabilis dolor est, et quacumque de causâ ruptum aliquid intus

atque collisum est : item malus corporis habitus, omnesque acuti morbi qui modò, ut suprà dixi, non infirmitate, sed onere nocent. Fieri tamen potest, ut morbus quidem id desideret, corpus autem vix pati posse videatur : sed si nullum tamen appareat aliud auxilium, periturusque sit qui laborat, nisi temerariâ quoque viâ fuerit adjutus, in hoc statu boni medici est ostendere, quàm nulla spes sine sanguinis detractio sit ; faterique, quantus in hâc ipsâ re metus sit : et tùm demùm, si exigatur, sanguinem mittere. De quo dubitare in ejus modi re non oportet : satius est enim anceps auxilium experiri, quàm nullum : idque maximè fieri debet, ubi nervi resoluti sunt ; ubi subito aliquis obmutuit ; ubi anginâ strangulatur ; ubi prioris febris accessio penè confecit, paremque subsequi verisimile est, neque eam videntur sustinere ægri vires posse. Quùm sit autem minimè crudo sanguis mittendus, tamen ne id quidem perpetuum est : neque enim semper concoctionem res exspectat. Ergò si ex superiore parte aliquis decedit, si contusus est, si ex aliquo subito casu sanguinem vomit, quamvis paulò antè sumpsit cibum, tamen protinùs ei demenda materia est, ne, si ea subsederit, corpus affligat : idemque etiam in aliis casibus repentinis qui strangulabunt, dictum erit. At si morbi ratio patiatur, tùm demùm, nullâ cruditatis suspitione remanente, id fiet : ideòque ei rei videtur aptissimus adversæ valetudinis dies secundus, aut tertius. Sed ut aliquandò etiam primo die sanguinem mittere necesse est, sic nunquàm utile post diem quartum est, quùm jam spatio ipso materia vel exhausta est, vel corpus corruptum ; ut detractio imbecillum id facere possit, non possit integrum. Quod si vehemens febris urget, in ipso impetu ejus sanguinem mittere, hominem jugulare est : exspectanda ergò remissio est : si non decrescit, sed crescere desiit ; si neque

remissio speratur, tunc quoque, quamvis pejor, sola tamen occasio non omittenda est. Ferè etiam ista medicina, ubi necessaria est, in biduum dividenda est: satius est enim, primùm levare ægrum, deindè perpur-gare, quàm simul omni vi effusâ fortassè præcipitare. Quod si in pure quoque aquâque quæ inter cutem est, ita respondet, quantò magis necesse est in sanguine respondeat! Mitti verò is debet, si totius corporis causâ fit, ex brachio; si partis alicujus, ex eâ ipsâ parte, aut certè quàm proximâ, quia non ubique mitti potest, sed in temporibus, in brachiis, juxtà talos. Neque ignoro quosdam dicere, quàm longissimè sanguinem indè ubi lædit, esse mittendum; sic enim averti materiæ cûrsus; at illo modo in id ipsum quod gravatur, evocari. Sed id ipsum falsum est: proximum enim locum primò exhaurit; ex ulterioribus autem eatenus sanguis sequitur, quatenus emittitur: ubi is suppressus est, quia non trahitur, ne venit quidem. Videtur tamen usus ipse docuisse, si caput fractum est, ex brachio potius sanguinem mittendum esse: si quod in humero vitium est, ex altero brachio: credo quia, si quid parùm cesserit, opportuniore hæ partes injuriæ sunt, quæ jam malè habent. Avertitur quoque interdum sanguis, ubi aliâ parte prorumpens, aliâ emittitur. Desinit enim fluere quâ nolumus, indè objectis quæ prohibeant, alio dato itinere. Mittere autem sanguinem quum sit expeditissimum usum habenti, tamen ignaro difficillimum est: juncta enim est vena arteriis, his nervi. Ità, si nervum scalpellus attingit, sequitur nervorum distensio, eaque hominem crudeliter consumit. At arteria incisa neque coit, neque sanescit: interdum etiam ut sanguis vehementer erumpat, efficit. Ipsius quoque venæ, si fortè præcisa est, capita comprimuntur, neque sanguinem emittunt. At si timidè scalpellus demittitur, summam

eutem lacerat, neque venam incidit : nonnunquam etiam ea latet, neque faciliè reperitur. Ita multæ res id difficile inscio faciunt, quod perito facillimum est. Incidenda ad medium vena est. Ex quâ quùm sanguis erumpit, colorem ejus habitumque oportet attendere. Nam si is crassus et niger est, vitiosus est, ideòque utiliter effunditur : si rubet et pellucet, integer est; eaque missio sanguinis adeò non prodest, ut etiam noceat : protinùsque is suppressendus est. Sed id evenire non potest sub eo medico, qui scit ex quali corpore sanguis mittendus sit. Illud magis fieri solet, ut æquè niger assidue ac primo die profluat : quod quamvis ita est, tamen si jam satis fluxit, suppressendus est : semperque antè finis faciendus est, quàm anima deficiat : deligandumque brachium superimposito expresso ex aquâ frigidâ penicillo ; et postero die, adverso medio digito vena fricanda, ut recens coïtus ejus resolvatur, iterùmque sanguinem fundat. Sive autem primo sive secundo die sanguis, qui crassus et niger initio fluxerat, et rubere pellucere cœpit, satis materiæ detractum est, atque quod superest, sincerum est : ideòque protinùs brachium deligandum habendumque ita est, donec valens cicatrix sit; quæ celerrimè in venâ confirmatur.

SECT. XI. Cucurbitularum verò duo genera sunt, æneum et corneum. Ænea alterâ parte patet, alterâ clausa est : cornea alterâ parte æquè patet, alterâ foramen habet exiguum. In æneam linamentum ardens conjicitur, ac sic os ejus corpori aptatur imprimiturque, donec inhæreat. Cornea per se corpori imponitur; deindè, ubi ab eâ parte quâ exiguum foramen est, ore spiritus adductus est, superque cerâ cavum id clausum est, æque inhærescit. Utraque non ex his tantùm materiæ generibus, sed etiam ex quolibet alio rectè fit : ac si cætera defecerunt, caliculus quoque, aut pultarius oris com-

pressioris, ei rei commodè aptatur. Ubi inhæsit, si concisa antè scalpello cutis est, sanguinem extrahit; si integra est, spiritum. Ergò ubi materia quæ intus est, lædit, illo modo; ubi inflatio, hoc imponi solet. Usus autem cucurbitulæ præcipuus est, ubi non in toto corpore, sed in parte aliquâ vitium est, quam exhauriri ad confirmandam valetudinem satis est. Idque ipsum testimonium est, etiam scalpello sanguinem, ubi membro succurritur, ab eâ potissimum parte quæ jam læsa est, esse mittendum; quod nemo cucurbitulam diversæ parti imponit, nisi quum profusionem sanguinis eò avertit; sed ei ipsi quæ dolet, quæque liberanda est. Opus etiam esse cucurbitulâ potest in morbis longis, quamvis et iis jam spatium aliquod accessit, sive corruptâ materiâ, sive spiritu malè habente. In acutis quoque quibusdam, si et levare corpus debet, et ex venâ sanguinem mitti vires non patiuntur: idque auxilium ut minus vehemens, ita magis tutum; neque unquam periculosum est: etiam si in medio febris impetu, etiam si in cruditate adhibetur. Ideòque ubi sanguinem mitti opus est, si, incisâ venâ, præceps periculum est, aut si in parte corporis etiam vitium est, huc potius confugiendum est: cum eo tamen ut sciamus hinc ut nullum periculum, ita levius præsidium esse; nec posse vehementi malo nisi æquè vehemens auxilium succurrere.

SECT. XII. 1. Dejectionem autem antiqui variis medicamentis crebrâque alvi ductione, in omnibus ferè morbis, moliebantur: dabantque aut nigrum veratrum, aut filiculam, aut squamam æris quam λεπίδα χαλκοῦ Græci vocant, aut lactucæ marinæ lac, cujus gutta pani adjecta abundè purgat; aut lac vel asininum vel bubulum vel caprinum, eique salis paulum adjiciebant, decoquebantque id, et sublatis his quæ coierant, quod quasi serum supererat, bibere cgebant. Sed medicamenta stoma-

chum ferè lædunt : Alvus si vehementiùs fluit aut sæpiùs ducitur, hominem infirmit. Ergò nunquàm in adversà valetudine medicamentum ejus rei causà rectè datur, nisi ubi is morbus sine febre est : ut, quùm veratrum nigrum aut atrà bile vexatis aut cum tristitià insanientibus, aut iis quorum nervi parte aliquà resoluti sunt, datur. At, ubi febres sunt, satius est ejus rei causà cibos potionisque assumere, qui simul et alant, et ventrem molliant : suntque valetudinis genera, quibus ex lacte purgatio convenit.

2. Plerumque verò alvus lotionibus ducenda est : quod ab Asclepiade quoque sic vituperatum, ut tamen servatum sit, video plerùmque seculo nostro præteriri. Est autem ea moderatio, quam is secutus videtur, apertissima, ut neque sæpè ea medicina tentetur, et tamen semel vel summum bis non omittatur, si caput grave est, si oculi caligant, si morbus majoris intestini est quod Græci *κῶλον* nominant, si in imo ventre aut in coxâ dolores sunt; si in stomachum quædam biliosa concurrent, vel etiam pituita eò se humorve aliquis aquæ similis confert; si spiritus difficiliùs redditur; si nihil per se venter excernit, utique si juxtà quoque stercus est, et intùs remanet, aut si stercoris odorem, nihil deiciens, æger ex spiritu suo sentit; aut si corruptum est quod excernitur; aut si prima inedia febrem non sustulit : aut si sanguinem mitti, quùm opus sit, vires non patiuntur, tempusve ejus rei præteriit; aut si multùm ante morbum aliquis potavit; aut si is qui sæpè, vel sponte vel casu, purgatus est, subito habet alvum suppressam. Servanda verò illa sunt, ne ante diem tertium ducatur, ne ullà cruditate substantive; ne in corpore infirmo, diùque in adversà valetudine exhausto; neve in eo cui satis alvus reddit quotidie, quive eam liquidam habebit; ne in ipso accessionis impetu, quia, quod tunc

infusum est, alvo continetur, regestumque in caput, multò gravius periculum efficit. Pridiè verò abstinere debet æger, ut aptus tali curationi sit : eodem die antè aliquot horas aquam calidam bibere, ut superiores ejus partes madescant : tùm injicienda in alvum est, si leni medicinâ contenti sumus, pura aqua ; si paulò valentiori, mulsa ; si leni, ex aquâ in quâ fœnum græcum, vel ptisana, vel malva decocta sit : si reprimendi causâ, ex verbenis. Acris autem est, marinâ aquâ, vel alia sale adjecto ; at utraque decocta commodior est : acrior fit, adjecto vel oleo vel nitro vel melle quoque. Si acrior est, eò plus extrahit, sed minùs facile sustinetur. Id quod infunditur, neque frigidum esse oportet neque calidum, ne alterutro modo lædat. Quùm infusum est, quantum fieri potest, continere se in lectulo debet æger, nec primæ cupiditati dejectionis protinùs cedere : ubi necesse est, tùm demùm, desiderare. Ferèque eo modo dempta materia, superioribus partibus levatis, morbum ipsum mollit. Quùm verò, quoties res coëgit, desidendo aliquis se exhausit, paulisper debet conquiescere ; et ne vires deficient, utique eo die cibum assumere : qui plenior an exiguus sit dandus, ex ratione ejus accessioni squæ expectabitur, aut in metu non erit, æstimari oportebit.

SECT. XIII. At vomitus, ut in secundâ quoque valetudine sæpè necessarius biliosis est, sic etiam in his morbis quos bilis concitavit. Ergò omnibus qui antè febres horrore et tremore vexantur, omnibus qui cholera laborant, omnibus etiam cum quâdam hilaritate insanientibus, et comitali quoque morbo oppressis, necessarius est. Sed si acutus morbus est sicut in cholera, si febris est, inter horrores asperioribus medicamentis opus non est, sicut in dejectionibus quoque suprâ dictum est : satisque est ea vomitûs causâ sumi, quæ sanis quoque

secunda esse proposui. At ubi longi valentesque morbi sine febre sunt, ut comitalis, ut insania, veratro quoque albo utendum est. Id neque hieme neque æstate rectè datur; optimè vere, tolerabiliter autumnò. Quisquis daturus erit, id agere antè debet, ut accepturi corpus humidius sit. Illud scire oportet, omne ejusmodi medicamentum, quod potui datur, non semper ægris prodesse, sanis nocere.

SECT. XIV. De frictione verò et gestatione adeò multa Asclepiades, tanquàm inventor ejus, posuit in eo volumine quod *communium auxiliorum* inscripsit, ut, quùm trium tantùm faceret mentionem, hujus et vini et gestationis, tamen maximam partem in hoc consumpserit. Oportet autem neque recentiores viros in his fraudare, quæ vel reppererunt vel rectè secuti sunt; et tamen ea quæ apud antiquiores aliquos posita sunt, auctoribus suis reddere. Neque dubitari potest, quin latiùs quidem et dilucidiùs, ubi et quomodò frictione utendum esset, Asclepiades præceperit; nihil tamen reperit, quod non à vetustissimo auctore Hippocrate paucis verbis comprehensum sit: qui dixit, « Frictione, si vehemens sit, durari corpus; si lenis, molliri; si multa, minui: si modica, impleri. » Sequitur ergò, ut tùm utendum sit, quùm aut adstringendum corpus sit quod hebes est; aut molliendum quod induruit; aut digerendum in eo id quod copiâ nocet; aut alendum id quod tenue et infirmum est. Quas tamen species si quis curiosiùs æstimet, quod jam ad medicum non pertinet, facilè intelliget omnes ex unâ causâ pendere, quæ demit. Nam et adstringitur aliquid, eo dempto quod interpositum, ut id laxaretur, effecerat; et mollitur, eo detracto quod duritiem creabat; et impletur non ipsâ frictione, sed cibo qui postea usquè ad cutem digestionem quâdam relaxatam penetrat. Diversarum verò rerum in modo causa est. Inter unc-

tionem autem et frictionem multum interest. Ungi enim leniterque pertractari corpus, etiam in acutis et recentibus morbis oportet; in remissione tamen et ante cibum. Longa verò frictione uti, neque in acutis morbis, neque in increscentibus convenit, præter quàm quum phreneticis somnus eà quæritur. Amat autem hoc auxilium valetudo longa, et jam à primo impetu inclinata. Neque ignoro quosdam dicere, omne auxilium necessarium esse increscentibus morbis, non quum jam per se finiuntur. Quod non ita se habet. Potest enim morbus, etiam qui per se finem habiturus est, citius tamen adhibito auxilio tolli. Quod duabus de causis necessarium est: et ut quamprimum bona valetudo contingat; et ne morbus qui remanet, iterum, quamvis levi de causâ, exasperetur. Potest enim morbus minus gravis esse quàm fuerit, neque ideò tamen solvi; sed reliquiis quibusdam inhærere, quas admotum aliquod auxilium discutit. Sed ut, levatâ quoque adversâ valetudine, rectè frictio adhibetur; sic nunquàm adhibenda est, febre increscente: verum, si fieri poterit, quum ex toto corpus eà vacabit; sin minus certè quum ea remiserit. Eadem autem modò in totis corporibus esse debet, ut quum infirmus aliquis implendus est; modò in partibus, aut quia ipsa ejus membri imbecillitas id requirit, aut quia alterius. Nam et capitis longos dolores ipsius frictio levat, non in impetu tamen doloris; et membrum aliquod resolutum ipsius frictione confirmatur. Longè tamen sæpius aliud perfricandum est, quum aliud dolet: maximèque quum à summis aut à mediis partibus corporis evocare materiam volumus; ideòque extremas partes perfricamus. Neque audiendi sunt qui numero finiunt, quoties aliquis perfricandus sit: id enim ex viribus hominis colligendum est; ut, si quis perinfirmus est, potest satis esse quinquagies; si robus-

tior, potest ducenties esse faciendum: inter utrumque deinde, prout vires sunt. Quò fit ut etiam minùs sæpè in muliere quàm in viro, minùs sæpè in puero vel sene quàm in juvene manus dimovendæ sint. Deniquè si certa membra perfricantur, multâ valentique frictione opus est: nam neque totum corpus infirmari citò per partem potest, et opus est quamplurimùm materiæ digeri, sive id ipsum membrum, sive per id aliud levamus. At ubi totius corporis imbecillitas hanc curationem per totum id exigit, brevior esse debet et lenior; ut tantummodò summam cutem emolliat, quò faciliùs capax ex recenti cibo novæ materiæ fiat. In malis jam ægrum esse testatur, ubi exterior pars corporis friget, interior cùm siti calet, ut suprà posui. Sed tunc quoque unicum in frictione praesidium est: quæ, si calorem in cutem evocavit, potest alicui medicinæ locum facere.

SECT. XV. Gestatio quoque longis et jam inclinatis morbis aptissima est: utilisque est et his corporibus quæ jam ex toto febre carent, sed adhuc exerceri per se non possunt; et his quibus lentæ morborum reliquæ remanent, neque aliter eliduntur. Asclepiades etiam, in recenti vehementique febre præcipuèque ardente, ad discutendam eam, gestatione dixit utendum esse. Sed id periculose fit; meliùsque quiete ejusmodi impetus sustinetur. Si quis tamen experiri volet, sic experiatur, si lingua non erit aspera; si nullus tumor, nulla durities, nullus dolor visceribus aut capiti aut præcordiis suberit. Et ex toto, nunquàm gestari corpus dolens debet, sive id in toto, sive in parte est; nisi tamen solis nervis dolentibus: neque unquàm crescente febre, sed in remissione ejus. Genera autem gestationis plura sunt: quæ adhibenda sunt et pro viribus cujusque, et pro opibus; ne aut imbecillum hominem nimis digerant, aut humili desint. Gestationum lenissima est navi, vel in portu, vel

in flumine; vehementior in alto mari nave, vel lecticâ etiamnùm acrior vehiculo : atque hæc ipsa et intendi et leniri possunt. Si nihil horum est, suspendi lectus debet et moveri : si ne id quidem est, at certè uni pedi lecti fulcimentum subjiciendum est, atque ità lectus hùc et illùc manu impellendus. Et levia quidem genera exercitationis infirmissimis conveniunt; valentior verò his qui jàm pluribus diebus febre liberati sunt, aut his qui gravium morborum initia sic sentiunt, ut adhuc febre vacent, quod et in tabe et in stòmachi vitiis, et quùm aqua cutem subiit, et interdùm in morbo regio fit : aut ubi quidam morbi, qualis comitialis, qualis, insania est, sine febre quamvis diù manent. In quibus affectibus ea quoque genera exercitationum necessaria sunt, quæ comprehendimus eo loco, quo, quemadmodùm sani, neque firmi, homines se gererent, præcepimus.

SECT. XVI. Abstinentiæ verò duo genera sunt : alterum ubi nihil assumit æger, alterum ubi non nisi quod oportet. Initia morborum primùm famen sitimque desiderant; ipsi deindè morbi moderationem, ut neque aliud quàm expedit, neque ejus ipsius nimium sumatur : neque enim convenit juxtà inediam protinùs satietatem esse. Quod si sanis quoque corporibus inutile est, ubi aliqua necessitas famem fecit; quantò inutilius est in corpore etiam ægro? Neque ulla res magis adjuvat laborantem, quàm tempestiva abstinencia. Intemperantes homines apud nos sibi cibi tempora, modum curantibus dant : rursus alii, tempora medicis pro dono remittunt, sibi ipsis modum vindicant. Liberaliter agere se credunt, qui cætera illorum arbitrio relinquunt, in genere cibi liberi sunt : quasi quærat quid medico liceat, non quid ægro salutare sit, cui vehementer nocet, quoties in ejus quod assumitur, vel tempore, vel modo, vel genere peccatur.

SECT. XVII. Sudor etiam duobus modis elicitur, aut sicco calore, aut balneo. Siccus calor est et arenæ calidæ, et laconici, et clibani, et quarundam naturalium sudationum, ubi è terrâ profusus calidus vapor ædificio includitur, sicut super Baias in myrtetis habemus. Præter hæc sole quoque et exercitatione is movetur : utiliaque hæc genera sunt, quoties humor intus nocet, isque digerendus est : ac nervorum quoque quædam vitia sic optimè curantur. Sed cætera infirmis possunt convenire : solet exercitatio tantum robustioribus ; qui tamen sine febre vel initio morbi, vel etiam non gravibus morbis tenentur. Cavendum autem est, ne quid horum, vel in febre, vel in cruditate tentetur. At balnei duplex usus est : nam modò, discussis febribus, initium cibi plenioris vinique firmiter valetudini facit ; modò febre ipsam tollit : ferèque adhibetur, ubi summam cutem relaxari, evocarique corruptum humorem, et habitum corporis mutari, expedit. Antiqui timidiùs eo utebantur, Asclepiades audaciùs. Neque terrere autem ea res, si tempestiva est, debet ; at antè tempus nocet. Quisquis febre liberatus est, simul atque ea uno die non accessit, eo qui proximus est, post tempus accessionis tutò lavari potest. At si circuitum habere ea febris solita est, sic ut tertio quartove die revertatur, quodocunquè non accessit, balneum tutum est. Manentibus verò adhuc febribus, si hæ sunt lentæ, lienesque jamdiù malè habent, rectè medicina ista tentatur ; cum eo tamen, ne præcordia dura sint, neve ea tumeant, neve lingua aspera sit, aut in medio corpore, aut capite dolor ullus sit, neve tùm febris increseat. At in his quidem febribus quæ certum circuitum habent, duo balnei tempora sunt ; alterum antè horrorem, alterum febre finitâ : in his verò qui lentis febriculis diù detinentur, quum aut ex toto recessit accessio ; aut si id non solet, certè lenita est ; jamque corpus tam integrum est, quàm

maximè esse in eo genere valetudinis solet. Imbecillus homo iturus in balneum vitare debet, ne antè frigus aliquod experiatur. Ubi in balneum venit, paulisper residere experiri que, nùm tempora adstringantur, et an sudor aliquis oriatur : illud si incidit, hoc non secutum est, inutile eo die balneum est : et perungendus est is leniter, et referendus, vitandumque omni modo frigus, et abinentiâ utendum. At si temporibus integris, primum ibi, deindè alibi sudor incipit, fovendum os aquâ calidâ ; tùm in solio desidendum est : atque ibi quoque videndum, nùm sub primo contactu aquæ calidæ summa cutis inhorrescat, quod vix tamen fieri potest, si priora rectè accesserunt : certum autem id signum inutilis balnei est. Ante verò quàm in aquam calidam se demittat, an postea aliquis perungi debeat, ex ratione valetudinis suæ cognoscat. Ferè tamen, nisi ubi nominatim, ut postea fiat, id præcipietur, moto sudore, leniter corpus perungendum ; deindè in aquam calidam demittendum est. Atque hìc quoque habenda virium ratio est ; neque committendum, ut per æstum anima deficiat ; sed maturiùs is auferendus est, curiosèque vestimentis involvendus ; ut neque ad eum frigus adspiret ; et ibi quoque, antequàm aliquid assumat, insudet. Fomenta quoque calida sunt milium, sal, arena : quodlibet eorum calefactum, et in linteum coniectum : si minore vi opus est, etiam solum linteum ; at si majore, extincti titiones involutique panniculis, et sic circumdati. Quin etiam calido oleo replentur utriculi, et in vasa fictilia (quas à similitudine lenticulas vocant) aqua conjicitur ; et sal sicco linteo excipitur, demittiturque in aquam benè calidam, tùm super id membrum quod fovendum est, collocatur : juxtàque ignem ferramenta duo sunt, capitibus paulò latioribus : alterum ex his demittitur in eum salem, et aqua super leviter adspergitur : ubi frigere cœpit, ad ignem refer-

tur : idem et in altero fit, deinde in vicem in utroque : inter quæ descendit salsus et calidus succus, qui contractis aliquo morbo nervis opitulatur. His omnibus commune est, digerere id quod vel præcordia onerat, vel fauces strangulat : vel in aliquo membro nocet. Quando autem quoque utendum sit, in ipsis morborum generibus dicitur.

SECT. XVIII. Quùm de his dictum sit quæ detrahendo juvant, ad ea veniendum est quæ nos alunt, id est, cibum et potionem. Hæc autem non omnium tantùm morborum, sed etiam secundæ valetudinis communia præsidia sunt : pertinetque ad rem omnium proprietates nosse ; primùm ut sani sciant quo modo his utantur ; deinde ut exsequentibus nobis morborum curationes, liceat species rerum quæ assiduè necessariae erunt, subjicere : neque necesse sit subindè singulas eas nominare. Scire igitur oportet omnia legumina, quæque ex frumentis panificia sunt, generis valentissimi esse. Id valentissimum voco, in quo plurimùm alimenti est : item omne animal quadrupes domi natum, omnem grandem feram, quales sunt capra, cervus, aper, onager, omnem grandem avem, quales sunt anser et pavo et grus ; omnes belluas marinas, ex quibus cetus est, quæque his pares sunt : item mel et caseum. Quò minùs mirum est opus pistorium valentissimum esse, quod ex frumento, adipe, melle, caseo constat. In medià verò materiâ numerari ex oleribus debere ea quorum radices vel bulbos assumimus ; ex quadrupedibus leporem ; aves omnes à minimis ad phœnicopterum ; item pisces omnes qui salem non patiuntur, solidive saliantur. Imbecillissimam verò materiam esse omnem caulem oleris et quicquid in caule nascitur, qualis est cucurbita et cucumis et capparitis : omnia poma, oleas, cochleas, itemque conchyliis. Sed quamvis hæc ita discreta sunt, tamen etiam quæ sub

eâdem specie sunt, magna discrimina recipiunt; aliaque res aliâ vel valentior est vel infirmior: siquidem plûs alimenti est in carne quàm in ullo alio, firmitus est triticum quàm milium: id ipsum quàm hordeum: et ex tritico firmissima siligo, deindè simila, deindè cui nihil ademptum est, quod ἀντόπυρον Græci vocant: infirmior est ex polline: infirmissimus cibarius panis. Ex leguminibus verò valentior faba vel lenticula, quàm pisum. Ex oleribus valentior rapa napique et omnes bulbi, in quibus cepam quoque et allium numero, quàm pastinaca vel quæ specialiter radícula appellatur. Item firmior brassica, et beta, et porrum, quàm lactuca vel cucurbita vel asparagus. At ex fructibus surculorum valentiores uvæ, ficus, nuces, palmulæ, quàm quæ poma propriè nominantur: atque ex his ipsis firmiora quæ succosa, quàm quæ fragilia sunt. Item ex his avibus quæ in mediâ specie sunt, valentior ea quæ pedibus, quàm quæ volatu magis nititur: et ex his quæ volatu fidunt, firmiores sunt quæ grandiores aves, quàm quæ minutæ, ut ficedula et turdus. Atque eæ quoque quæ in aquâ degunt, leviolem cibum prestant, quàm quæ natandi scientiam non habent. Inter domesticas verò quadrupedes, levisima suilla est; gravissima bubula. Itemque ex feris, quò majus quodque animal, eò robustior ex eo cibus est. Piscium quoque eorum qui ex mediâ materiâ sunt, quibusque maximè utimur, tamen gravissimi sunt, ex quibus salsamenta quoque fieri possunt, qualis lacertus est; deindè hi qui, quamvis teneriores, tamen duri sunt, ut aurata, corvus, scarus, oculata; tùm plani: post quos etiam leviores sunt lupi mulque; et post hos omnes saxatiles. Neque verò in generibus rerum tantummodò discrimen est, sed etiam in ipsis: quod et ætate fit, et membro, et solo, et cœlo, et habitu.

Nam quadrupes animal omne, si lactens est, minùs

alimenti præstat; itemque quò tenerior pullus cohortalis est: in piscibus quoque media ætas, quæque nondum summam magnitudinem implevit. Deindè ex eodem sue, ungulæ, rostrum, aures, cerebellum; ex agno hædove cum petiolis totum caput aliquantò quàm cætera membra, leviora sunt; adeò ut in mediâ materiâ poni possint. Ex avibus colla alæve rectè infirmis annumerantur. Quod ad solum verò pertinet, frumentum quoque valentius est collinum quàm campestre: levior piscis inter saxa editus quàm in arenâ; levior in arenâ quàm in limo. Quo fit, ut ex stagno, vel lacu, vel flumine, eadem genera graviora sint: leviorque qui in alto quàm qui in vado vixit. Omne etiam ferum animal domestico levius; et quodcumque humido cœlo, quàm quod sicco natum est. Deindè eadem omnia pingua quàm macra, recentia quàm salsa, nova quàm vetusta, plùs alimenti habent. Tùm res eadem magis alit jurulenta, quàm assa, magis assa quàm frixa. Ovum durum valentissimæ materiæ est, molle vel sorbile imbecillissimæ. Quùmque panificia omnia firmissima sint, elota tamen quædam genera frumenti, ut alica, oryza, ptisana, vel ex iisdem facta sorbitio vel pulticula, et aquâ quoque madens panis, imbecillissimis annumerari potest.

Ex potionibus verò, quæcumque ex frumento facta est, itemque lac, mulsum, defructum, passum, vinum, aut dulce, aut vehemens, aut mustum, aut magnæ vetustatis, valentissimi generis est. At acetum, et id vinum quod paucorum annorum, vel austerum vel lene est, in mediâ materiâ est: ideòque infirmis nunquàm generis alterius dari debet. Aqua omnium imbecillissima est: firmiorque ex frumento potio est, quò firmitus fuit ipsum frumentum: firmior ex eo vino quod bono solo, quàm quod tenui; quodque temperato cœlo quàm quod aut nimis humido, aut nimis sicco, nimiùmque aut frigido aut calido na-

tum est. Mulsum, quò plus mellis habet; defrutum, quò magis incoctum; passum, quò ex sicciore uvâ est, eò valentius est. Aqua levissima pluvialis est; deindè fontana, tùm ex flumine, tum est puteo; post hæc ex nive aut glacie; gravior his ex lacu, gravissima ex palude. Facilis etiam et necessaria cognitio est naturam ejus requirentibus. Nam levis pondere apparet, et ex his quæ pondere pares sunt, eò melior quæque est, quò celerius et calefit et frigescit; quòque celerius ex eâ legumina percoquuntur. Ferè verò sequitur, ut, quò valentior quæque materia est, eò minùs facilè concoquatur: sed, si concocta est, plus alat. Itaque utendum est materiæ genere pro viribus: modusque omnibus pro genere sumendus. Ergò imbecillis hominibus rebus infirmissimis opus est: mediocriter firmos media materia optimè sustinet; et robustis apta validissima est. Plus deindè aliquis assumere ex levioribus potest: in his magis, quæ valentissima sunt, temperare sibi debet.

SECT. XIX. Neque hæc sola discrimina sunt; sed etiam aliæ res boni succi, aliæ mali sunt; quæ εὐχύλους et κακοχύλους Græci vocant: aliæ leues, aliæ acres: aliæ crassiorem pituitam in nobis faciunt, aliæ tenuiorem: aliæ idoneæ sunt stomacho, aliæ alienæ: itemque aliæ inflant, aliæ ab hoc absunt: aliæ calefaciunt, aliæ refrigerant: aliæ facilè in stomacho acescunt, aliæ non facilè intùs corrumpuntur: aliæ movent alvum, aliæ supprimunt: aliæ ci-tant urinam, aliæ tardant: quædam somnum movent, quædam sensus excitant. Quæ omnia ideo noscenda sunt, quoniam aliud alii vel corpori vel valetudini convenit.

SECT. XX. Boni succi sunt triticum, siligo, alica, oryza, amyllum, tragus, ptisana, lac, caseus mollis, omnis venatio, omnes aves quæ ex mediâ materiâ sunt; ex majoribus quoque hæc qua suprâ nominavimus: medii inter teneros durosque pisces, ut mullus et lupo: verna

lactuca, urtica, malva, cucumis, cucurbita, portulaca, cochleæ, palmulæ: ex pomis quodcumque neque acerbum neque acidum est: vinum dulce vel lene, passum, defrutum; oleæ quæ ex his duobus in alterutro servatæ sunt: vulvæ, rostra, trunculique suum; in summâ omnis pinguis caro, omnis glutinosa, omne jecur.

SECT. XXI. Mali verò succi sunt, milium, panicum, hordeum, legumina: caro domestica permacra, omnisque salsa, omne salsamentum, garum, vetus caseus: siser, radícula, rapa, napi, bulbi, brassica magisque etiam cyma ejus, asparagus, beta, cucumis, porrum, eruca, nasturtium, thymum, nepeta, satureia, hyssopum, ruta, anethum, feniculum, cuminum, anisum, lapathum, sinapi, allium, cepa: lienes, renes, intestina: pomum quodcumque acidum vel acerbum est; acetum, omnia acria, acida, acerba, oleum, pisces quoque saxatiles, itemque omnes qui ex tenerrimo genere sunt, aut hi qui rursus nimium duri virosique sunt, ut ferè quos stagna, lacus limosique rivi ferunt, quique in nimiam magnitudinem excesserunt.

SECT. XXII. Lenes autem sunt, sorbitio, pulticula, laganum, amyllum, ptisana, pinguis caro et quæcumque glutinosa est: quod ferè quidem in omni, quæ domestica, fit; præcipuè tamen in ungulis trunculisque suum, in petiolis capitulisque hædorum et vitulorum et agnorum, omnibusque cerebellis: item qui propriè bulbi nominantur: lac, defrutum, passum, nuclei pinei. Acria sunt omnia nimis austera, omnia acida, omnia salsa; et mel quidem, quò mellius est, eò magis. Item alium, cepa, eruca, ruta, nasturtium, cucumis, beta, brassica, asparagus, sinapi, radícula, intubus, ocimum lactuca, maximeque olerum pars.

SECT. XXIII. Crassiorem autem pituitam faciunt, ova sorbilia, alica, oriza, amyllum, ptisana, lac, bulbi, om-

niaque ferè glutinosa. Extenuant eamdem, omnia salsa, atque acria et acida.

SECT. XXIV. Stomacho autem aptissima sunt, quæcumque austera sunt; etiam quæ acida, quæque contacta sale modico: item panis sine fermento, et elota alica, vel oryza, vel ptisana: omnis avis, omnis venatio; atque utraque, vel assa vel elixa: ex domesticis animalibus, bubula: si quid ex cæteris sumitur, macrum potiùs quàm pingue; ex sue, ungulæ, rostra, aures, vulvæque steriles: ex oleribus, intubus, lactuca, pastinaca, cucurbita elixa, siler: ex pomis, cerasum, morum, sorbum, pirum fragile, quale Crustuminum vel Nævianum est: item pira, quæ reponuntur, Tarentina atque Signina: malum orbiculatum, aut Scandianum, vel Amerinum, vel cotoneum, vel Punicum; uvæ ex ollâ, molle ovum, palmulæ, nuclei pinei, oleæ albæ ex durâ muriâ, eadem aceto intinctæ, vel nigræ quæ in arbore benè permaturuerunt, vel quæ in passo defrutove servatæ sunt: vinum austereum, licet jam asperum sit, item resinatum: duri ex mediâ materiâ pisces, ostrea, pectines, murices, purpuræ, cochleæ, cibi potionesque frigidæ vel ferventes, absinthium.

SECT. XXV. Aliena verò stomacho sunt, omnia tepida, omnia salsa, omnia jurulenta, omnia prædulcia, omnia pingua, sorbitio, panis fermentatus, idemque vel ex milio, vel ex hordeo, oleum, radices olerum, et quodcumque olus ex oleo garove estur, mel, mulsum, defrutum, passum, lac, omnis caseus, uva recens, ficus, et virides, et aridæ, legumina omnia, quæque inflare consueverunt: item thymum, nepeta, satureia, hyssopum, nasturtium, lapathum, lampsana, juglandes. Ex his autem intelligi potest, non, quicquid boni succi est, protinùs stomacho convenire; neque quicquid stomacho convenit, protinùs boni succi esse.

SECT. XXVI. Infant autem omnia ferè legumina, omnia

pinguia, omnia dulcia, omnia jurulenta, mustum, atque etiam id vinum cui nihil adhuc ætatis accessit: ex ole-
ribus allium, cepa, brassica, omnesque radices, excepto
sisere et pastinacâ: bulbi, ficus etiam aridæ, sed magis
virides, uvæ recentes, nuces omnes, exceptis nucleis
pineis, lac, omnisque caseus; quicquid deindè suberu-
dum aliquis assumpsit. Minima inflatio fit ex venatione,
aucupio, piscibus, pomis, oleis, conchyliis, ovis vel mol-
libus vel sorbilibus, vino vetere. Feniculum verò et ane-
thum inflationes etiam levant.

SECT. XXVII. At calefaciunt piper, sal, caro omnis ju-
rulenta, allium, cepa, ficus aridæ, salsamentum, vinum,
et quò meracius est, eò magis. Refrigerant olera, quo-
rum crudi caules assumuntur, ut intubus et lactuca;
itemque coriandrum, cucumis, elixa cucurbita, beta,
mora, cerasa, mala austera, pira fragilia, caro elixa;
præcipuèque acetum, sive cibus ex eo, sive potio assu-
mitur.

SECT. XXVIII. Facile autem intus corrumpuntur, pa-
nis fermentatus, et quisquis alius quàm ex tritico est, et
omne pistorium opus; lac, mel: ideoque etiam lactentia,
atque teneri pisces, ostrea, olera, caseus et recens et
vetus, crassa vel tenera caro, vinum dulce, mulsum,
defrutum, passum: deindè quicquid vel jurulentum est,
vel nimis dulce, vel nimis tenue. At minimè intus vitian-
tur, panis sine fermento, aves, et eæ potiùs duriores,
durati pisces, neque solùm aurata pura aut scarus, sed
etiam lolligo, locusta, polypus: item bubula, omnisque
dura caro; eademque aptior est, si macra, si salsa est;
omniaque salsamenta: cochleæ, murices, purpuræ: vi-
num austereum vel resinatum.

SECT. XXIX. At alvum movent panis fermentatus, ma-
gisque si cibarius vel hordeaceus est; brassica, si subcruda
est, lactuca, anethum, nasturtium, ocimum, urtica, por-

tulaca, radícula, capparis, allium, cepa, malva, lapathum, beta, asparagus, cucurbita, cerasa, mora, poma omnia mitia, ficus etiam aridæ, sed magis virides; uvæ recentes pingues, minutæ aves, cochleæ, garum, salsamenta, ostrea, pelorides, echini, musculi, et omnes ferè conchulæ, maximèque jus earum; saxatiles et omnes teneri pisces; sepiarum atramentum: si qua caro assumitur, pinguis, eadem vel jurulenta vel elixa; aves quæ natant; mel crudum, lac, lactentia omnia, mulsum, vinum dulce vel salsum; aqua: tenera omnia, tepida, dulcia, pingua, elixa, jurulenta, salsa, vel diluta.

SECT. XXX. Contrà adstringunt, panis ex siligine vel ex similâ; magis, si sine fermento est; magis etiam si ustus est; intenditurque vis ejus etiam, si bis coctus est: pulicula vel ex alicâ, vel ex panico, vel ex milio; itemque ex iisdem sorbitio, et magis si hæc antè fricta sunt: lenticula cui vel beta vel intubus, vel ambubeia, vel plantago adjecta est; magisque etiam si illa antè fricta est: per se etiam intubus, vel ex plantagine vel ambubeiâ fricta; minuta olera, brassica bis decocta, dura ova; magisque si assa sunt: minutæ aves, merula, palumbus, magisque si in poscâ decoctus est: grus, omnes aves quæ magis currunt quàm volant; lepus, caprea; jecur ex his quæ sebum habent, maximèque bubulum, ac sebum ipsum: caseus qui vehementior vetustate fit, vel eâ mutatione quam in caseo transmarino videmus; aut si recens est, ex melle mulsove decoctus: item mel coctum, pira immatura, sorba, magisque ea quæ torminalia vocantur, mala Cydonia et Punica, oleæ vel albæ vel præmaturæ, myrta, palmulæ, purpuræ, murices, vinum resinatum vel asperum, item meracum, acetum, mulsum quod inferbuit, asperum item defrutum, passum; aqua vel tepida vel præfrigida, dura, id est, ea quæ tardè putrescit, ideòque pluvia potissimùm; omnia dura, macra, auste-

ra, aspera, tosta, et in eâdem carne, assa potius quam elixa.

SECT. XXXI. Urinam autem movent, quæcumque in horto nascentia boni odoris sunt, ut apium, ruta, anethum, ocimum, mentha, hyssopum, anisum, coriandrum, nasturtium, eruca, feniculum: præter hæc asparagus, capparis, nepeta, thymum, satureia, lapsanum, pastinaca, magisque agrestis; radícula, siser, cepa: ex venatione maximè lepus; vinum tenue, piper et rotundum et longum, sinapi, absinthium, nuclei pinei.

SECT. XXXII. Somno verò aptum est papaver, lactuca, maximèque æstiva, cujus cauliculus jam lacte repletus est, morum, porrus. Sensus excitant, nepeta, thymum, satureia, hyssopum, præcipuè pulegium, ruta, et cepa.

SECT. XXXIII. Evocare verò materiam multa admodum possunt: sed ea quum ex peregrinis medicamentis maximè constent, aliisque magis quàm quibus ratione victus succurritur, opitulentur; in præsentia differam: ponam verò ea quæ prompta, et his morbis de quibus protinus dicturus sum, apta, corpus erodunt, et sic ex eo quod mali est, extrahunt. Habent autem hanc facultatem semina erucæ, nasturtii, radiculae; præcipuè tamen omnium, sinapi. Salis quoque et fici eadem vis est.

Leniter verò simul et reprimunt et molliunt, lana succida ex aceto vel vino, cui oleum adjectum est; contritæ palmulae, furfures in salsa aqua vel aceto decocti. At simul reprimunt et refrigerant, herba muralis (*παρθένιον* vel *περδίκιον* appellant), serpillum, pulegium, ocimum, herba sanguinalis quam Græci *πολύγονον* vocant, portulaca, papaveris, folia capreolique vitium, coriandri folia, hyoscyamum, muscus, siser, apium, solanum (quam *σρύγγιον* Græci vocant), brassicæ folia, intubus, plantago, feniculi semen, contrita pira vel mala,

præcipuèque Cydonia, lenticula, aqua frigida, maximèque pluvialis, vinum, acetum, et ex horum aliquo madens, vel panis, vel farina, vel spongia, vel lacinia, vel lana succida, vel etiam linteolum, creta Cimolia, gypsum, melinum, myrteum, rosa, acerbum oleum, verbenarum contusa cum teneris caulibus folia; cujus generis sunt olea, cupressus, myrtus, lentiscus, tamarix, ligustrum, rosa, rubus, laurus, edera, punicum malum. Sine frigore autem reprimunt, cocta mala Cydonia, malicorium, aqua calida in quâ verbenæ coctæ sunt quas suprâ proposui, pulvis vel ex fæce vini vel ex myrti foliis, amaræ nuces.

SECT. XXXIV. Calefacit verò ex quâlibet farinâ cataplasma sive ex tritici, sive ex farris, sive hordei, sive ervi, vel lolii, vel milii, vel panici, vel lenticulæ, vel fabæ, vel lupini, vel lini, vel fœni græci, ubi ea deferbuit, calidaque imposita est. Valentior tamen ad id omnis farina est ex mulso quàm ex aquâ coctâ. Præterea cyprinum, irinum, medulla, adeps ex fele, oleum, magisque si id vetus est, junctaque oleo sal, nitrum, gith, piper, quinquefolium. Ferèque, quæ vehementer et reprimunt et refrigerant, durant: quæ autem calefaciunt et digerunt, ea emolliunt: præcipuèque ad emolliendum prodest cataplasma ex lini vel fœni græci semine. His autem omnibus, et simplicibus, et permixtis, variè medici utuntur: ut magis, quid quisque persuaserit sibi, appareat, quàm quid evidentèr compererit.

LIBER TERTIUS.

I. **P**ROVISIS omnibus quæ pertinent ad universa genera morborum, ad singulorum curationes veniam. Hos autem in duas species Græci diviserunt, aliosque ex his acutos, alios longos esse dixerunt: ideòque, quoniam non semper eodem modo respondebant, eosdem alii inter acutos, alii inter longos retulerunt: ex quo plura eorum genera esse manifestum est. Quidam enim breves acutique sunt, qui citò vel tollunt hominem, vel ipsi citò finiuntur: quidam longi, sub quibus neque sanitas in propinquo, neque exitium est: tertium genus eorum est qui modò acuti, modò longi sunt; idque non in febribus tantummodò, in quibus frequentissimum est, sed in aliis quoque fit. Atque etiam præter hos quartum est, quod neque acutum dici potest, quia non perimit; neque utique longum, quia, si occurritur, facilè sanatur. Ego, quùm de singulis dicam, cujus quisque generis sit, indicabo. Dividam autem omnes in eos qui in totis corporibus consistere videntur, et eos qui oriuntur in partibus. Incipiam à prioribus, pauca de omnibus præfatus. In nullo quidem morbo plus fortuna sibi vindicare quàm ars, potest: utpote quùm, repugnante naturâ, nihil medicina proficiat. Magis tamen ignoscendum medico est parùm proficienti in acutis morbis quàm in longis: hìc enim breve spatium est, intrà quod, si quod auxilium non profuit, æger extinguitur: ibi et deliberationi et mutationi remediorum tempus patet; adeò ut rarò, si inter initia medicus accessit, obsequens æger sine illius vitio

pereat. Longus tamen morbus quùm penitùs insedit, quod ad difficultatem pertinet, acuto par est. Et acutus quidem, quò vetustior est; longus autem, quò recentior, eò faciliùs curatur. Alterum illud ignorari non oportet; quòd non omnibus ægris eadem auxilia conveniunt. Ex quo incidit, ut alia atque alia summi auctores, quasi sola, venditaverint, prout cuique cesserant. Oportet itaque, ubi aliquid non respondet, non tanti putare auctorem quanti ægrum, et experiri aliud atque aliud: sic tamen ut in acutis morbis citò mutetur quod nihil prodest; in longis, quos tempus ut facit sic etiam solvit, non statim condemnnetur, si quid non statim profuit; minùs verò removeatur, si quid paulùm saltem juvat, quia profectus tempore expletur.

SECT. II. Protinùs autem inter initia scire facile est, quis acutus morbus, quis longus sit; non in his solùm in quibus semper ità se habet, sed in his quoque in quibus variat. Nam ubi sine intermissionibus accessiones et dolores graves urgent, acutus morbus est: ubi lenti dolores lentæve febres sunt, et spatia inter accessiones porriguntur, acceduntque ea signa quæ in superiore volumine exposita sunt, longum hunc futurum esse manifestum est. Videndum etiam est, morbus an increseat, an consistat, an minuat; quia quædam remedia incrementibus morbis, plura inclinantibus conveniunt: eaque quæ decrementibus apta sunt, ubi acutus increscens urget, in remissionibus potiùs experienda sunt. Increscit autem morbus, dùm graviores dolores accessionesque veniunt, hæque et antè, quàm proximæ, revertuntur, et posteriùs desinunt. Atque in longis quoque morbis etiam tales notas non habentibus, scire licet; increscere, si somnus incertus est, si deterior concoctio, si fœdiores dejectiones, si tardior sensus, si pigrior mens, si percurrit corpus frigus aut calor,

si idem magis pallet. Ea verò quæ contraria his sunt, decidentis ejus notæ sunt. Præter hæc in acutis morbis seriùs æger alendus est, nec nisi jam his inclinat; ut primò dempta materia impetum frangat: in longis maturiùs, ut sustinere spatium afflecturi mali possit. Ac si quandò id non in toto corpore, sed in parte est, magis tamen ad rem pertinet vim totius corporis moliri, quàm per eam partes ægræ sanentur. Multùm etiam interest, ab initio quis rectè curatus sit, an perperàm; quia curatio minùs his prodest, in quibus assiduè frustrà fuit. Si quis temerè habitus, adhuc integris viribus vivit, ad motà curatione, momento restituitur. Sed quùm ab his cœperim, quæ notas quasdam futuræ adversæ valetudinis exhibent, curationum quoque principium ab animadversione ejusdem temporis faciam. Igitur si quid ex his quæ proposita sunt, incidit, omnium optima sunt quies et abstinencia: si quid bibendum, aqua; idque interdùm uno die fieri satis est: interdùm, si terrentia manent biduo; proximèque abstinentiam sumendus est cibus exiguus, bibenda aqua, postero die etiam vinum, deindè in vicem alternis diebus, modò aqua, modò vinum, donec omnis causa metùs finiatur. Per hæc enim sæpè instans gravis morbus discutitur. Plurimi falluntur, dùm se primo die protinùs sublaturus languorem, aut exercitatione, aut balneo, aut coactà dejectione, aut vomitu, aut sudationibus, aut vino sperant: non quod interdùm id incidat, aut non decipiat, sed sæpiùs fallat, solâque abstinentiâ sine ullo periculo medeatur: quùm præsertim etiam pro modo terroris moderari liceat; et, si leviora indicia fuerunt, satis sit à vino tantùm abstinere, quod subtrac-tum plus quàm si cibo quid dematur, adjuvat: si paulò graviora, facile sit non aquam tantùm bibere, sed etiam cibo carnem subtrahere: interdùm panis quoque minùs quàm pro consuetudine assumere, humidoque cibo esse

contentum, et olere potissimum : satisque sit ex toto à cibo, à vino, ab omni motu corporis abstinere, quum vehementes notæ terruerunt. Neque dubium est quin vix quisquam, qui non dissimulavit, sed per hæc maturè morbo occurrit, ægrotet.

SECT. III. Atque hæc quidem sanis facienda sunt, tantum causam metuentibus : sequitur verò curatio febrium, quod et in toto corpore, et vulgare maximè morbi genus est. Ex his una quotidiana, altera tertiana, tertia quartana est : interdum etiam longiore circuitu quædam redeunt, sed id rarò evenit. In prioribus et morbi sunt, et medicina. Ac quartanæ quidem simpliciores sunt. Incipiunt ferè ab horrore, deindè calor erumpit, finitæque febre, biduum integrum est : ita quarto die revertitur. Tertianarum verò duo genera sunt. Alterum eodem modo, quo quartana, et incipiens et desinens, illo tantum interposito discrimine, quod unum diem prestat integrum, tertio redit. Alterum longè perniciosius, quod tertio quidem die revertitur ; ex octo autem et quadraginta horis ferè sex et triginta per accessionem occupat (interdum etiam vel minus vel plus), neque ex toto in remissione desistit, sed tantum levius est. Id genus plerique medici *ἡμικριταίων* appellant. Quotidianæ verò variæ sunt et multiplices. Aliæ enim protinùs à calore incipiunt, aliæ è frigore, aliæ ab horrore. Frigus voco, ubi extremæ partes membrorum inalgescunt ; horrorem, ubi totum corpus intremat. Rursum aliæ sic desinunt, ut ex toto sequatur integritas ; aliæ sic, ut aliquantum quidem minuatur ex febre, nihilo minus tamen quædam reliquiæ remaneant, donec altera accessio accedat : ac sæpè aliæ vix quicquam aut nihil remittant, sed ita ut cœpere, continuent. Deindè aliæ fervorem ingentem habent, aliæ tolerabilem : aliæ quotidie pares sunt, aliæ impares, atque in vicem altero die

leniores, altero vehementiores: aliæ tempore eodem postridiè revertuntur, aliæ vel seriùs vel celeriùs: aliæ diem noctemque accessione et decessione implent, aliæ minùs, aliæ plùs: aliæ quùm decedunt, sudorem movent, aliæ non movent; atque aliàs persudorem ad integritatem venit, aliàs corpus tantùm imbecillius redditur. Accessiones etiam modò singulæ singulis diebus fiunt, modò binæ pluresve concurrunt. Ex quo sæpè evenit, ut quotidie plures accessiones remissionesque sint; sic tamen ut una quæque alicui priori respondeat. Interdùm verò accessiones quoque confunduntur, sic ut notari neque tempora earum, neque spatia possint. Neque verum est, quod dicitur à quibusdam, nullam febrem inordinatam esse, nisi aut ex vomica, aut ex inflammatione, aut ex ulcere: facilius enim semper curatio foret, si hoc verum esset; sed, quod evidentes causæ faciunt, facere etiam abditæ possunt. Neque de re, sed de verbo controversiam movent, qui, quùm aliter aliterque in eodem morbo febres accedant, non easdem inordinatè redire, sed alias aliasque subindè oriri dicunt: quod tamen ad curandi rationem nihil pertineret, etiam si verè diceretur. Tempora quoque remissionum modò vix ulla sunt.

SECT. IV. Et febrium quidem ratio maximè talis est: curationum verò diversa genera sunt, prout auctores aliquos habent. Asclepiades officium esse medici dicit, ut tutò, ut celeriter, ut jucundè curet. Id notum est, sed ferè periculosa esse nimia et festinatio et voluptas solet. Quà verò moderatione utendum sit, ut, quantum fieri potest, omnia ista contingant, primà semper habità salute, in ipsis partibus curationum considerandum erit. Et antè omnia quæritur, primis diebus æger quâ ratione continendus sit. Antiqui medicamentis quibusdam datis concoctionem moliebantur, eo quòd cruditatem maximè horrebant: deindè eam materiam quæ

lædere videbatur, ducendo sæpiùs alvum subtrahebant. Asclepiades medicamenta sustulit: alvum non toties, sed ferè tamen in omni morbo subduxit: febre^rverò ipsâ præcipuè se ad ejus remedium uti professus est: convellendas enim vires ægri putavit, luce, vigiliâ, siti ingenti, sic ut ne os quidem primis diebus elui sineret. Quo magis falluntur, qui per omnia jucundam ejus disciplinam esse contendunt: is enim ulterioribus quidem diebus cubantis etiam luxuriæ subscripsit, primis verò tortoris vicem exhibuit. Ego autem medicamentorum dari potiones, et alvum duci, non nisi rarò debere, concedo: et id non ideò tamen agendum, ut ægri vires convellantur, existimo; quoniam ex imbecillitate summum periculum est. Minui ergò tantam materiam superantem oportet, quæ naturaliter digeritur, ubi nihil novi accedit. Itaque abstinendus à cibo primis diebus est, in luce habendus æger nisi infirmus, interdium est, quoniam corpus ista quoque digerit, isque cubare quàm maximo conclavit debet. Quod ad sitim verò somnumque pertinet, moderandum est, ut interdium vigilet; noctu, si fieri potest, conquiescat: ac neque potet, neque nimium siti crucietur. Os etiam ejus elui potest, ubi et siccum est, et ipsi foetet: quamvis id tempus aptum potioni non est: commodèquè Erasistratus dixit, sæpè inferiore parte humorem non requirente, os et fauces requirere, neque ad rem, malè haberi ægrum, pertinere. Ac primò quidem sic tenendus est. Optimum verò medicamentum est opportunè cibus datus; qui quandò primum dari debeat, quæritur. Plerique ex antiquis tardè dabant, sæpè quinto die, sæpè sexto: et id fortasse vel in Asiâ, vel in Ægypto, cœli ratio patitur. Asclepiades ubi ægrum triduo per omnia fatigârat, quarto die cibo destinabat: at Themison nuper, non quandò cœpisset febris, sed quandò desiisset, aut certè levata esset,

considerabat; et ab illo tempore, exspectato die tertio, si non accesserat febris; si accesserat, ubi ea vel desierat, vel si assidue inhærebat, certè si se inclinaverat, cibum dabat. Nihil autem horum utique perpetuum est. Nam potest primo die primus cibus dandus esse; potest secundo, potest tertio, potest non nisi quarto aut quinto, potest post unam accessionem, potest post duas, potest post plures. Refert enim qualis morbus sit, quale corpus, quale cœlum, quæ ætas, quod tempus anni: minimèque in rebus multum inter se differentibus perpetuum esse præceptum temporis potest. In morbo qui plus virium aufert, celerius cibus dandus est, itemque eo cœlo quod magis digerit. Ob quam causam in Africâ, nullo die æger abstineri rectè videtur. Maturiùs etiam puero quàm juveni, æstate quàm hieme, dari debet. Unum illud est quod semper, quod ubique servandum est, ut ægri vires subindè assidens medicus inspiciat, et, quandiu supere-runt, abstinentiâ pugnet; si imbecillitatem vereri cœperit, cibo subveniat. Id enim ejus officium est, ut ægrum neque supervacuâ materiâ oneret, neque imbecillitatem fame perdat. Idque apud Erasistratem quoque invenio, qui, quamvis parum docuit, quandò venter, quandò corpus ipsum exinaniretur, dicendo tamen hæc esse vi-senda, et tùm cibum dandum, quùm corpori deberetur, satis ostendit, dùm vires superessent, dari non oportere, ne deficerent, consulendum esse. Ex his autem intelligi potest ab uno medico multos non posse curari, eumque, si artifex est, idoneum esse, qui non multum ab ægro recedit. Sed qui quæstui serviunt, quoniam is major ex populo est, libenter amplectuntur ea præcepta, quæ sedulitatem non exigunt, ut in hac ipsâ re. Facile est enim dies vel accessiones numerare his quoque qui ægrum rarò vident: ille assideat necesse est, qui, quod solum opus est, visurus est, quandò nimis imbecillus fu-

turus sit, nisi cibum acceperit. In pluribus tamen ad initium cibi dies quartus aptissimus esse consuevit.

Est autem alia etiam de diebus ipsis dubitatio, quoniam antiqui potissimum impares sequebantur, eosque, tanquam tunc de ægris judicaretur, *χρισίμους* nominabant. Hi erant dies tertius, quintus, septimus, nonus, undecimus, quartus-decimus, unus et vicesimus, ita ut summa potentia septimo; deinde quarto-decimo, deinde uni et vigesimo daretur. Igitur sic ægros nutriebant, ut dierum imparium accessiones exspectarent, deinde postea cibum, quasi levioribus accessionibus instantibus, darent, adeo ut Hippocrates, si alio die febris desiisset, recidivam timere sit solitus. Id Asclepiades jure ut vanum repudiavit, neque in ullo die, quia par imparve esset, iis vel majus vel minus periculum esse dixit. Interdum enim peiores dies pares fiunt, et opportuniùs post eorum accessiones cibus datur. Nonnunquam etiam in ipso morbo dierum ratio mutatur, fitque gravior, qui remissior esse consueverat: atque ipse quartus decimus par est, in quo esse magnam vim antiqui fatebantur. Qui quum octavum primi naturam habere contendere, ut ab eo secundus septenarius numerus inciperet, ipsi sibi repugnabant non octavum, neque decimum, neque duodecimum diem sumendo quasi potentiolem; plus enim tribuebant nono et undecimo. Quod quum fecissent sine ullà probabili ratione, ab undecimo non ad tertium decimum, sed ad quartum decimum transibant. Est etiam apud Hippocratem, ei quem septimus dies liberaturus sit, quartum esse gravissimum. Ità, illo quoque auctore, in die pari et gravior febris esse potest, et certa futuri nota. Atque idem alio loco quartum quemque diem, ut in utrumque efficacissimum, apprehendit, id est, quartum, septimum, undecimum, quartum decimum, decimum septimum, in quo et ab impari

ad paris rationem transit : et ne hoc quidem propositum conservavit, quùm à septimo die undecimus, non quartus, sed quintus sit : adeò apparet, quâcumque ratione ad numerum respexerimus, nihil rationis sub illo quidem auctore reperiri. Verùm in his quidem antiquos tunc celebres admodùm Pythagorici numeri fefellerunt, quùm hìc quoque medicus non numerare dies debeat, sed ipsas accessiones intueri, et ex his conjectare, quandò dandus cibus sit. Illud autem magis ad rem pertinet scire, tùm cibum oporteat dari, quùm jam benè venæ conquieverunt, an etiamnùm manentibus reliquiis febris : antiqui enim quàm integerrimis corporibus alimentum offerebant : Asclepiades, inclinâtâ quidem febre, sed adhuc tamen inhærente. In quo vanam rationem secutus est : non quòd non sit interdùm maturiùs cibus dandus, si maturè timetur altera accessio ; sed quòd scilicet quàm sanissimo, dari debeat : minùs enim corrumpitur quod integro corpori infertur. Neque tamen verum est, quod Themisoni videbatur, si duabus horis integer futurus esset æger, satius esse tunc dare, ut ab integro corpore potissimùm diduceretur : nam si diduci tam celeriter posset, id esset optimum : sed quùm id breve tempus non præstet, satius est principia cibi à decedente febre, quàm reliquias ab incipiente excipi. Ità, si longius tempus secundum est, quàm integerrimo dandus est ; si breve, etiam antequàm ex toto integer fiat. Quo loco verò integritas est, eodem est remissio, quæ maxima in febre continuâ potest esse.

At hoc quoque quæritur, utrùm tot horæ expectandæ sint, quot febrem habuerunt ; an satis sit primam partem earum præteriri, ut ægris jucundiùs insidat, quibus interdùm non vacat. Tutissimum est autem ante totius accessionis tempus præterire : quamvis ubi longa febris fuit, potest indulgeri ægro maturiùs, dum tamen antè

minimum pars dimidia prætereatur. Idque non in eâ solâ febre, de quâ proximè dictum est, sed id omnibus ità servandum est.

SECT. V. Hæc magis per omnia genera febrium perpetuasunt: nunc ad singulas earum species descendam. Igitur si semel tantum accessit, deindè desiit, eaque vel ex inguine, vel ex lassitudine, vel ex æstu, aliâve simili re fuit, sic ut interior nulla causa metum fecerit, postero die, quum tempus accessionis ità transiit ut nihil move-rit, cibus dari potest. At si ex alto calor venit, et gravitas vel capitis vel præcordiorum secuta est, neque apparet quid corpus confuderit, quamvis unam accessionem secuta integritas est, tamen quia tertiana timeri potest, exspectandus est dies tertius: et ubi accessionis tempus præteriit, cibus dandus est, sed exiguus, quia quartana quoque timeri potest: et die quarto demum, si corpus integrum est, eo cum fiduciâ utendum. Si verò postero, tertiove, aut quarto die secuta febris est, scire licet morbum esse. Sed tertianarum quartanarumque, quarum et certus circuitus est, et finis integer, et quia liberaliter quæta tempora sunt, expeditior ratio est: de quibus suo loco dicam. Nunc verò eas explicabo, quæ quotidie urgent. Igitur tertio quoque die cibus ægro commodissimè datur, ut alter febrem minuat, alter viribus subveniat. Sed is dari debet, si quotidiana febris est quæ ex toto desinat, simul atque corpus integrum factum est: sin, quamvis non accessiones, febres tamen junguntur, et quotidie quidem increscunt, sed sine integritate tamen remittunt, quum corpus ità se habet, ut major remissio non exspectetur: si altero die gravior, altero levior accessio est, post gravio-rem. Ferè verò gravio-rem accessionem levior nox sequitur: quò fit, ut gravio-rem accessionem nox quoque tristior antecedit. At si continuatur febris, neque levior unquam fit, et

dari cibum necesse est; quandò dari debeat, magna quidem dissentio est. Quidam, quia ferè remissius matutinum tempus ægris est, tunc putant dandum. Quod si respondet, non quia manè est, sed quia remissio est ægris, dari debet. Si verò ne tunc quidem ulla requies ægris est, hoc ipso pejus id tempus est, quòd, quùm suâ naturâ melius esse debeat, morbi vitio non est, simulque insequitur tempus meridianum, à quò quùm omnis æger ferè pejor fiat, timeri potest, ne ille magis etiam quàm ex consuetudine urgeatur. Igitur alii vespere tali ægro cibum dant: sed quùm eo tempore ferè pessimi sint qui ægrotant, verendum est, ne si quid tunc moverimus, fiat aliquid asperius. Ob hæc ad mediam noctem decurro, id est, finito jam gravissimo tempore, eodemque longissimè distante, secuturis verò anteluca- nis horis, quibus omnes ferè maximè dormiunt; deindè matutino tempore, quod naturâ suâ levissimum est. Si verò febres vagæ sunt, quia verendum est ne cibum statim subsequantur, quandòcumque quis ex accessione levatus est, tunc debet assumere. At si plures accessiones eodem die veniunt, considerare oportet, paresne per omnia sint, quod vix fieri potest, an impares. Si per omnia pares sunt, post eam potiùs accessionem cibus dari debet, quæ non inter meridiem et vesperam desinit. Si impares sunt, considerandum est, quò distent: nam si altera gravior, altera levior est, post gravio- rem dari debet, si altera longior, altera brevior, post longio- rem: si altera gravior, altera longior est, considerandum est, utra magis affligat, illâ vi, an hæc tempore; et post eam dandus est. Sed planè plurimùm interest, quantæ qualesque inter eas remissiones sint: nam si post alteram febrem motio manet, post alteram integrum corpus est, integro corpore, cibo tempus aptius est. Si semper febricula manet, sed alterum tamen longius

tempus remissionis est, id potius eligendum est; adeo ut, ubi accessiones continuantur, protinus, inclinata priore, dandus cibus sit. Etenim perpetuum est, ad quod omne consilium dirigi potest, cibum quam maxime semper ab accessione futura reducere; et hoc salvo, dare quam integerrimo corpori. Quod non inter duas tantum, sed etiam inter plures accessiones servabitur. Sed quum sit aptissimum tertio quoque die cibum dare, tamen si corpus infirmum est, quotidie dandus est; multoque magis si continentes febres sine remissione sunt, quanto magis corpus affligunt, aut si duae pluresve accessiones eodem die veniunt. Quae res efficit, ut et a primo die protinus cibus dari quotidie debeat, si protinus venae conciderunt; et saepius eodem die, si inter plures accessiones subinde vis corpori deest. Illud tamen in his servandum est, ut post eas febres minus cibi detur, post quas, si per corpus liceret, omnino non daretur. Quum vero febris instet, incipiat, augeatur, consistat, decedat, deinde in decessione consistat aut finiatur; scire licet optimum cibo tempus esse, febre finita: deinde quum decessio ejus consistit: tertium, si necesse est, quando-cumque decedit; caetera omnia periculosa esse. Si tamen propter infirmitatem necessitas urget, satius esse, consistente jam incremento febris aliquid offerre, quam incrementa: satius esse instante, quam incipiente: cum eo tamen ut nullo tempore, is qui deficit, non sit sustinendus. Neque Hercule satis est, ipsas tantum febres medicum intueri, sed etiam totius corporis habitum, et ad eum dirigere curationem, seu supersunt vires, seu desunt, seu quidam alii affectus interveniunt. Quum vero semper aegros securos agere conveniat, ut corpore tantum, non etiam animo laborent, tum praecipue, ubi cibum sumpserunt. Itaque si qua sunt, quae exasperatura eorum animos sunt, optimum est ea, dum aegro-

tant, eorum notitiæ subtrahere : si id fieri non potest, sustinere tamen post cibum usquè somni tempus, et quùm expectecti sunt, tùm exponere.

SECT. VI. Sed de cibo facilius quidem cum ægris ratio est, quorum sæpè stomachus hunc respuit, etiam si mens concupiscit : de potionibus verò ingens pugna est, eoque magis, quò major febris est. Hæc enim sitim accendit, et tùm maximè aquam exigit, quùm illa periculosissima est. Sed docendus æger est, ubi febris conquieverit, protinùs sitim quoque quieturam, longioremque accessionem fore, si quod ei datum fuerit alimentum : ità celerius eum desinere sitire, qui non bibit. Necesse est tamen, quantò facilius etiam sani famem quàm sitim sustinent, tantò magis ægris in potionibus quàm in cibo indulgere. Sed primo quidem die nullus humor dari debet, nisi subito sic venæ conciderunt, ut cibus quoque dari debeat, secundo verò, cæterisque etiam quibus cibus non dabitur, tamen si magna sitis urgebit, potio dari potest. Ac ne illud quidem ab Heraclite Tarentino dictum ratione caret. Ubi aut bilis ægrum, aut cruditas malè habet, expedire quoque per modicas potiones misceri novam materiam corruptæ. Illud videndum est, ut qualia tempora cibo leguntur, talia potionibus quoque; ubi sine illo datur, deligantur, aut quùm ægrum dormire cupiemus; quod ferè sitis prohibet. Satis autem convenit, quùm omnibus febricitantibus nimis humor alienus sit, tùm præcipuè esse feminis quæ ex partu in febres inciderunt.

Sed quùm tempora cibo potionique febris et remissionis ratio det, non est expeditissimum scire, quandò æger febricitet, quandò melior sit, quandò deficiat : sine quibus dispensari illa non possunt. Venis enim maximè credimus, fallacissimæ rei; quia sæpè istæ leniores celerioresve sunt, et ætate, et sexu, et corporum naturâ. Et plerumquè satis sano corpore, si stomachus

infirmus est, eæ nonnunquàm etiam incipiente febre, subeunt et quiescunt : ut imbecillus is videri possit, cui facilè laturo gravis instat accessio. Contrà sæpè eas concitat et resolvit sol, et balneum, et exercitatio, et metus, et ira, et quilibet alius animi affectus. Adeò, ut, quùm primùm medicus venit, sollicitudo ægri dubitantis, quomodò illi se habere videatur, eas moveat. Ob quam causam periti medici est, non protinùs ut venit, apprehendere manu brachium; sed primùm residere hilari vultu, percunctarique, quemadmodùm se habeat; et, si quis ejus metus est, eum probabili sermone lenire; tùm deindè ejus corpori manum admove. Quas autem venas conspectus medici movet, quam facilè mille res turbant! Altera res est cui credimus, calor æquè fallax. Nam hic quoque excitatur æstu, labore, somno, metu, sollicitudine. Igitur intueri quidem etiam ista oportet, sed his non omnia credere. Ac protinùs quidem scire, non febricitare eum, cujus venæ naturaliter ordinatæ sunt, teporque talis est qualis esse sanis solet : non protinùs autem sub calore motuque febrem esse concipere : sed ità, si summa quoque arida inæqualiter cutis est; si calor et in fronte est, et ex imis præcordiis oritur; si spiritus ex naribus cum fervore prorumpit; si color aut rubore, aut pallore novo mutatus est; si oculi graves, et aut persicci aut subhumidi sunt; si sudor quùm fit, inæqualis est; si venæ non æquis intervallis moventur. Ob quam causam medicus neque in tenebris, neque à capite ægri debet residere; sed illustri loco adversus eum, ut omnes notas ex vultu quoque cubantis perspiciat. Ubi verò febris fuit atque decrevit, spectare oportet, nùm tempora partesve corporis aliæ paulùm madescant, quæ sudorem venturum esse testentur. Ac si qua nota est, tunc demùm dare potui calidam aquam, cujus salubris effectus est, si sudorem per omnia membra diffundit.

Hujus autem rei causâ, continere æger sub veste satis multâ manus debet; eâdemque crura pedesque contingere: quâ mole plerique ægros in ipso impetu febris, potissimèque ubi ardens ea est, malè habent. Si sudare corpus cœpit, linteum tepefacere oportet, paulatimque eo singula membra detergere. At ubi sudor omnis finitus est, aut si is non venit, æger, ubi quàm maximè tepuit, idoneus esse cibo videtur, sub veste leniter ungendus est, tùm detergendus, deindè ei cibus dandus.

Is autem febricitantibus humidus est aptissimus, aut humori certè quàm proximus; utique ex materiâ quàm levissimâ, maximèque sorbitio: eaque, si magnæ febres fuerunt, quàm tenuissima esse debet. Mel quoque despumatum huic rectè adjicitur, quo corpus magis nutriatur: sed id si stomachum offendit, supervacuum est, sicut ipsa quoque sorbitio. Dari verò in vicem ejus potest vel intrita ex aquâ calidâ, vel alicâ elotâ; si firmus est stomachus et compressa alvus, ex aquâ mulsâ; si vel ille languet vel hæc profluit, ex poscâ. Et primo quidem cibo id satis est: secundo verò aliquid adjici potest, ex eodem tamen genere materiæ, vel olus, vel conchylium, vel pomum. Ac, dùm febres quidem increscunt, hic solus idoneus cibus est: ubi verò aut desinunt, aut levantur, semper quidem incipiendum est ab aliquo ex materiâ levissimâ, adjiciendum verò aliquid ex mediâ, ratione habitâ subindè et virium hominis et morbi. Ponendi verò ægro varii cibi, sicut Asclepiades præcepit, tùm demùm sunt, ubi fastidio urgetur, neque satis vires sufficiunt: ut paulùm ex singulis degustando famem vitet. At si neque vis, neque cupiditas deest, nullâ varietate sollicitandus æger est, ne plus assumat quàm concoquat. Neque verum est, quod ab eo dicitur, faciliùs concoqui cibos varios: eduntur quidem faciliùs; ad concoctionem autem materiæ genus et modus pertinent.

Neque inter magnos dolores, ut neque, increscente morbo, tutum est ægrum cibo impleri; sed ubi inclinata jàm in melius valetudo est.

Sunt aliæ quoque observationes in febribus necessariae; atque id quidem videndum est, quod quidam solum præcipiunt, an adstrictum corpus sit, an profluat: quorum alterum strangulat, alterum digerit. Nam si adstrictum est, movenda urina, eliciendus omni modo sudor. In hoc genere morborum sanguinem etiam misisse, concussisse vehementibus gestationibus corpus, in lumine habuisse, imperasse famem, sitim, vigiliam prodest. Utile est etiam ducere in balneum, prius demittere in solium, tum ungere, iterum ad solium redire, multaque aquâ fovere inguina; interdum etiam oleum in solio cum aquâ calidâ miscere; uti cibo rariùs et seriùs, tenui, simplici, molli, calido, exiguo, maximeque oleribus, qualia sunt lapathum, urtica, malva; vel jure etiam concharum musculorumve, aut locustarum: neque danda caro nisi elixa est. At potio esse debet magis liberalis, et antè cibum, et post hunc, et cum hoc, ultrà quàm sitis coget. Poterit quoque à balneo etiam pinguius, aut dulcius dari vinum: poterit semel, aut bis interponi Græcum salsum. Contrà verò, si corpus profluet, sudor coercendus, quies adhibenda erit: tenebris somnoque, quandocumque volet, utendum; non nisi levi gestatione corpus agitandum, et pro genere mali subveniendum. Nam si venter fluit, aut si stomachus non continet, ubi febris decrevit, liberaliter oportet aquam tepidam potui dare, et vomere cogere; nisi aut fauces, aut præcordia, aut latus dolet, aut vetus morbus est. Si verò sudor exercet, duranda cutis est vel nitro vel sale; quæ cum oleo miscentur. At si levius id vitium est, oleo corpus ungendum est: si vehementius, rosà vel melino, vel myrteo, cui vinum austerum sit ad-

jectum. Quisquis autem fluore æger est, quùm venit in balneum, priùs unguendus, deindè in solium demittendus est. Si in cute vitium est, frigidâ quoque quàm calidâ aquâ meliùs utetur. Ubi ad cibum ventum est, dari debet is valens, frigidus, siccus, simplex, qui quàm minimè corrumpi possit, panis tostus, caro assa, vinum austereum vel certè subaustereum; at si venter profluit, calidum: si sudores nocent vomitusve sunt, frigidum.

SECT. VII. 1. Desiderat etiam propriam animadversionem in febribus pestilentiae casus. In hac minimè utile est aut fame aut medicamentis uti, aut ducere alvum. Si vires sinunt, sanguinem mittere optimum est; præcipuè si cum dolore febris est. Si id parùm tutum est, ubi febris tenuata est, vomitu pectus purgare. Sed in hoc maturiùs, quàm in aliis morbis, ducere in balneum opus est; vinum calidum et meracius dare, et omnia glutinosa: inter quæ quoque carnem quoque generis ejusdem. Nam quò celeriùs ejusmodi tempestates corripiunt, eò maturiùs auxilia, etiam cum quâdam temeritate, rapienda sunt. Quod si puer est qui laborat, neque tantum robur ejus est, ut sanguis mitti possit, cucurbitulis ei utendum est; ducenda alvus vel aquâ vel ptisanæ cremore; tùm demùm is levibus cibis nutriendus. Et ex toto non sic pueri, ut viri, curari debent. Ergò, ut in alio quoque genere morborum, parciùs in his agendum est: non faciliè sanguinem mittere, non faciliè ducere alvum, non cruciare vigiliâ fameve, aut nimiâ siti, non vino curare satis convenit. Vomitus post febrem eliciendus est: deindè dandus cibus ex levissimis; tùm is dormiat: postero quoque die, si febris manet, abstinence æger: tertio, ad similem cibum redeat. Danda quoque opera est, quantum fieri potest, ut inter opportunam abstinentiam cibo opportuno, omissis cæteris, nutriatur.

2. Si verò ardens febris extorret, nulla medicamenti

danda potio est; sed in ipsis accessionibus oleo et aquâ refrigerandus est; quæ miscenda manu sunt, donec albescant. Eo conclavi tenendus, quò multum et purum aerem trahere possit; neque multis vestimentis strangulandus, sed admodum levibus tantum velandus est. Possunt etiam super stomachum imponi folia vitis in aquâ tincta. Ac ne siti quidem nimia vexandus est: alendus maturius est, id est à die tertio, et antè cibum iisdem perungendus. Si pituita in stomacho coit, inclinâtâ jam accessione, vomere cogendus est; et tunc dandum frigidum olus, aut pomum ex his quæ stomacho conveniunt. Si siccus manet stomachus, protinus vel alicæ vel orizæ cremor dandus est, cum quo recens adeps cocta sit. Quùm verò in summo incremento morbus est, utique non antè diem quartum, magnâ siti antecedente, frigida aqua copiosè præstanda est, ut bibat etiam ultrâ satietatem; et, quùm jam venter et præcordia ultrâ modum repleta satisque refrigerata sunt, vomere debet. Quidam ne vomitum quidem exigunt; sed ipsâ aquâ frigidâ tantum ad satietatem datâ pro medicamento utuntur. Ubi utrumlibet factum est, multâ veste operiendus est, et collocandus ut dormiat: ferèque post longam sitim et vigiliam, post multam satietatem, post infractum calorem, plenus somnus venit; per quem ingens sudor effunditur, idque præsentissimum auxilium est: sed in his tamen, in quibus præter ardorem, nulli dolores, nullus præcordiorum tumor; nihil prohibens vel in thorace, vel in pulmone, vel in faucibus; non ulcus, non defectio, non profluvium alvi fuit. Si quis autem in huiusmodi febre leniter tussit, is neque vehementi siti conflictatur, neque bibere aquam frigidam debet; sed eo modo curandus est, quo in cæteris febribus præcipitur.

SECT. VIII. At ubi id genus tertianæ est, quod ἡμικ-

τρίτατον medici appellant, magnâ curâ opus est, ne id fallat: habet enim plerùmque frequentiores accessiones decessionesque, ut aliud morbi genus videri possit; porrigiturque febris inter horas viginti quatuor et triginta sex; ut, quod idem est, non idem esse videatur. Et magnoperè necessarium est, neque dari cibum nisi in eâ remissione quæ vera est; et ubi ea venit, protinùs dari: plurimique sub alterutro curantis errore subito moriuntur: ac, nisi magnoperè aliqua res prohibet, inter initia sanguis mitti debet; tùm dari cibus, qui neque incitet febrem, et tamen longum ejus spatium sustineat.

SECT. IX. Nonnunquàm etiam lentæ febressine ullâ remissione corpus tenent; ac neque cibo neque ulli remedio locus est. In hoc casu medici cura esse debet, ut morbum mutet: fortassè enim curationi opportunior fiet. Sæpè igitur ex aquâ frigidâ cui oleum sit adjectum, corpus ejus pertractandum est, quoniam interdùm sic evenit, ut horror oriatur, et fiat initium quoddam novi motûs; exque eo, quùm magis corpus incaluit, sequatur etiam remissio. In his frictio quoque ex oleo et sale salubris videtur. At si diù frigus est, et torpor, et jactatio corporis, non alienum est in ipsâ febre dare mulsi tres aut quatuor cyathos, vel cum cibo vinum benè dilutum. Intenditur enim sæpè ex eo febris; et major ortus calor simul et priora mala tollit, et spem remissionis, inque eâ curationis ostendit. Neque herculè ista curatio nova est, quâ nunc quidam traditos sibi ægros, qui cautioribus medicis trahebantur, interdùm contrariis remediis sanant. Si quidem apud antiquos quoque antè Herophilum et Erasistratum, maximeque post Hippocratem fuit Petro quidam, qui febricitantem hominem ubi acceperat, multis vestimentis operiebat, ut simul calorem ingentem sitimque excitaret. Deindè, ubi pau-

lùm remitti cœperat febris, aquam frigidam potui dabat; ac si moverat sudorem, explicuisse se ægrum judicabat: si non moverat, plùs etiam aquæ frigidæ ingerebat, et tùm vomere cogebat. Si alterutro modo febre liberaverat, protinùs suillam assam et vinum homini dabat: si non liberaverat, decoquebat aquam sale adjecto, eamque bibere cogebat, ut vomendo ventrem purgaret. Et intrà hæc omnis ejus medicina erat: eaque non minùs grata fuit his quos Hippocratis successores non refecerant, quàm nunc est his quos Herophili vel Erasistrati æmuli diù tractos non expedierunt. Neque ideò tamen non est temeraria ista medicina; quia plures, si protinùs à principiis excipit, interimit. Sed, quùm eadem omnibus convenire non possint, ferè, quos ratio non restituit, temeritas adjuvat: ideòque ejusmodi medici meliùs alienos ægros quàm suos nutriunt. Sed est circumspecti quoque hominis et novare interdùm, et augere morbum, et febres accendere; quia curationem ubi id quod est, non recipit, potest recipere id quod futurum est.

SECT. X. Considerandum etiam est, febresne solæ sint, an alia his quoque mala accedant; id est, nùm caput doleat, nùm lingua aspera, nùm præcordia intenta sint. Si capitis dolores sunt, rosam cum aceto miscere oportet, et in id ingerere: deindè habere duo pittacia, quæ latitudinem frontis longitudinemque æquent: ex his invicem alterum in aceto et rosâ habere, alterum in fronte; aut intinctam iisdem lanam succidam imponere. Si acetum offendit, purâ rosâ utendum est: si rosa ipsa lædit, oleo acerbo. Si ista parùm juvant, teri potest vel iris arida, vel nuces amaræ, vel quælibet herba ex refrigerantibus: quorum quidlibet ex aceto impositum, dolorem minuit; sed magis aliud in alio. Juvat etiam panis cum papavere injectus, vel cum rosâ, cerussâ,

spumâve argenti. Olfacere quoque vel serpillum, vel anethum, non alienum est. At si in præcordiis inflammatio et dolor est, primò superimponenda sunt cataplasmata reprimentia; ne, si calidiora fuerint, plùs eò materiæ concurrat: deindè ubi prima inflammatio se remisit, tunc demùm ad calida et humida veniendum est; ut ea quæ remanserint, discutiant. Notæ verò inflammationis sunt quatuor, rubor et tumor cum calore et dolore: quo magis erravit Erasistratus, qui febrem nullam sine hâc esse dixit. Ergò si sine inflammatione dolor est, nihil imponendum est: hunc enim statim ipsa febris solvit. At si neque inflammatio neque febris, sed tantùm præcordiorum dolor est, protinùs calidis et siccis fomentis uti licet. Si verò lingua sicca est et scabra, detergenda primùm penicillo est ex aquâ calidâ: deindè ungenda mixtis inter se rosâ et melle. Mel purgat, rosa reprimat, simulque siccescere non sinit. At si scabra non est, sed arida, ubi penicillo deteresa est, ungi rosâ debet, cui ceræ sit paulùm adjectum.

SECT. XI. Solet etiam ante febres esse frigus; idque vel molestissimum morbi genus est. Ubi id exspectatur, omni potione prohibendus æger est; hæc enim paulò antè data multùm malo adjicit: item maturiùs veste multâ tegendus est: admovenda partibus his pro quibus metuimus, sicca et calida fomenta, sic ut ne statim vehementissimi calores incipiant, sed paulatim increscant. Perfricandæ quoque eæ partes manibus unctis ex vetere oleo sunt, eique adjiciendum aliquid ex calefacientibus. Contenti medici quidam unâ frictione, etiam ex quolibet oleo, sunt. In harum febrium remissionibus non nulli tres aut quatuor sorbitionis cyathos, etiam nunc manente febre, dant: deindè, eâ benè finitâ, reficiunt stomachum cibo frigido et levi. Ego tùm hoc puto tantandum, quùm parùm cibûs semel et post febrem da-

tus prodest. Sed curiosè prospiciendum est, ne tempus remissionis decipiat : sæpè enim in hoc quoque genere valetudinis jam minui febris videtur, et rursùs intenditur. Itaque ei remissioni credendum est, quæ etiam immoratur, et jactationem fetoremque quemdam oris, quem ὄζην Græci vocant, minuit. Illud satis convenit, si quotidie pares accessiones sunt, quotidie parvum cibum dandum : si impares, post graviores, cibum; post leviores, aquam mulsam.

SECT. XII. Horror autem eas ferè febres antecedit, quæ certum habent circuitum, et ex toto remittuntur; ideòque tutissimæ sunt, maximèque curationes admittunt. Nam ubi incerta tempora sunt, neque alvi ductio, neque balneum; neque vinum, neque medicamentum aliud rectè datur : incertum est enim quandò febris ventura sit : ità fieri potest, ut, si subito venerit, summa in eo pernicies sit quod auxilii causâ fuit inventum : nihilque aliud fieri potest, quàm ut primis diebus benè abstineatur æger : deindè, sub decessu febris ejus quæ gravissima est, cibum sumat. At ubi certus circuitus est, faciliùs omnia illa tentatur; quia faciliùs proponere nobis et accessionum et decessionum vices possumus. In his autem, quùm inveteraverunt, utilis fames non est : primis tantummodò diebus eâ pugnandum est : deindè dividenda curatio est, et antè horror, tùm febris discutienda. Igitur quùm primùm aliquis inhorruit, et ex horrore incaluit, dare ei oportet potui tepidam aquam subsalsam, et vomere eum cogere : nam ferè talis horror ab his oritur quæ biliosa in stomacho resederunt. Idem faciendum est, si proximo quoque circuitu æquè cessit; sæpè enim sic discutitur : jamque, quod genus febris sit, scire licet. Itaque sub exspectatione proximæ accessionis, quæ instare tertia potest, deducendus in balneum est; dandaque opera, ut per tempus horroris in solio sit.

Si ibi quoque senserit, nihilominus idem sub expectatione accessionis quartæ faciat : si quidem eo quoque modo sæpè is discutitur. Si nec balneum quidem profuit, antè accessionem allium edat, aut bibat calidam aquam cum pipere : si quidem ea quoque assumpta calorem movent, qui horrorem non admittit. Deindè eodem modo, quo in frigore præceptum est, antequàm inhorrescere possit, operiatur, fomentisque protinùs calidioribus totum corpus circumdare convenit, maximèque involutis extinctis testis et titionibus. Si nihilominus horror perruperit, multo oleo calefacto inter ipsa vestimenta perfundatur; cui æquè ex calefacientibus aliquid sit adjectum : adhibeaturque frictio, quantam is sustinere poterit maximam, maximèque in manibus et pedibus : et spiritum ipse contineat. Neque desistendum est, etiam si horror redit : sæpè enim pertinacia juvenis malum corporis vincit. Si quid evomuit, danda aqua tepida, iterùmque vomere cogendus est; utendumque eisdem est, donec horror finiatur. Sed præter hæc duccenda alvus est, si tardiùs horror quiescet : siquidem id quoque exonerato corpori prodest. Ultima post hæc auxilia sunt, gestatio et frictio. Cibus autem in ejusmodi morbis maximè dandus est, qui mollem alvum præstet : caro glutinosa : vinum, quùm dabitur, austerum.

SECT. XIII. Hæc ad omnes circuitus febrium pertinent : discernendæ tamen singulæ sunt, sicut rationem habent dissimilem. Si quotidiana est, triduo primo magnoperè abstinere oportet; tùm cibus altero quoque die uti. Si res inveteraverit, post febrem experiri balneum et vinum; magisque, si horrore sublato hæc superest. Si verò tertiana, quæ ex toto intermittit, aut quartana est, mediis diebus, et ambulationibus uti oportet aliisque exercitationibus et unctionibus. Quidam ex anti-

quioribus medicis, Cleophantus, in hoc genere morborum, multò antè accessionem, per caput ægrum multâ calidâ aquâ perfundebat, deindè vinum dabat. Quod, quamvis pleraque ejus viri præcepta secutus est Asclepiades, rectè tamen præteriit: est enim anceps.

SECT. XIV. Ipse, si tertiana febris est, tertio die post accessionem dicit alvum duci oportere: quinto, post horrorem, vomitum elicere; deindè post febrem, sicut illi mos erat, adhuc calidis dare cibum et vinum: sexto die in lectulo detineri: sic enim fore, ne septimo die febris accedat. Id sæpè fieri posse verisimile est: tutius tamen est, hoc ipso ordine utamur, tria remedia, vomitûs, alvi ductionis, vini, per triduum, id est die tertio et quinto et septimo, tentare: nec vinum, nisi post accessionem diei septimi, bibere. Si verò primis diebus discussus morbus non est, inciditque in vetustatem, quo die febris expectabitur, in lectulo se contineat; post febrem perfricetur; tùm, cibo assumpto, bibat aquam: postero die, qui vacat ab exercitatione unctioneque, aquâ tantùm contentus, conquiescat. Et id quidem optimum est: si verò imbecillitas urgebit, et post febrem vinum, et medio die paulùm cibi debebit assumere.

SECT. XV. Eadem in quartanâ facienda sunt: sed quùm hæc tardè admodùm finiatur, nisi primis diebus discussa est, diligentius ab initio præcipiendum est, quid in eâ debeat fieri.

Igitur si cui cum horrore febris accessit, eaque desiit, eodem die et postero tertioque continere se debet, et aquam tantummodò calidam primo die post febrem sumere; biduo proximo, quantum fieri potest, ne hanc quidem: si quarto die cum horrore febris revertitur, vomere, sicut antè præceptum est: deindè post febrem modicum cibum sumere, vini quadrantem. Postero tertioque die abstinere; aquâ tantummodò calidâ, si sitis

est, assumptâ. Septimo die balneo frigus prævenire, si febris redierit, ducere alvum: ubi ex eo corpus conquieverit, in unctione vehementer perfricari, eodem modo sumere cibum et vinum: biduo proximo se abstinere, frictione servatâ. Decimo tertio die rursus balneum experiri: et, si postea febris accessit, æquè perfricari, vinum copiosius bibere. Ac sic proximum est ut quies tot dierum et abstinencia cum cæteris quæ præcipiuntur, febrem tollant. Si verò nihilominus remanet, aliud ex toto sequendum est curationis genus; idque agendum, ut, quod diù sustinendum est, corpus facile sustineat. Quò minùs etiam curatio probari Heraclidis Tarentini debet, qui primis diebus ducendam alvum, deindè abstinendum in septimum diem dixit. Quod ut sustinere aliquis possit, tamen etiam febre liberatus vix refectiõni valebit: adeò, si febris sæpiùs accesserit, concidet. Igitur, si tertio decimo die morbus manebit, balneum neque ante febrem, neque post eam tentandum erit; nisi interdum jam horrore discusso. Horror ipse per eadem quæ suprâ scripta sunt expugnandus: deindè post febrem oportebit ungi, et vehementer perfricari; cibum et validum et fortiter assumere; vino uti, quantum libebit: postero die, quum satis quieverit, ambulare, exerceri, ungi, perfricari fortiter; cibum capere sine vino, tertio die abstinere. Quo die verò febrem expectabit, antè surgere et exerceri, dareque operam, ut in ipsam exercitationem tempus febris incurrat: sic enim sæpè illa discutitur: at, si in opere occupavit, tùm demùm se recipere. In ejusmodi valetudine medicamenta sunt oleum, frictio, exercitatio, sibus, vinum. Si venter adstrictus est, solvendus est. Sed hæc faciliè validiores faciunt: sin imbecillitas occupavit, pro exercitatione gestatio est: si ne hanc quidem sustinet, adhibenda tamen frictio est. Si hæc quoque

vehemens onerat, intrâ quietem et unctionem et cibum sistendum est: dandaque opera est, ne qua cruditas in quotidianum id malum vertat. Nam quartana neminem jugulat: sed, si ex eâ facta quotidiana est, in malis æger est: quod tamen, nisi culpâ vel ægri vel curantis, nunquàm fit.

SECT. XVI. At si duæ quartanæ sunt, neque hæ quas proposui, exercitationes adhiberi possunt; aut ex toto quiescere opus est, aut, si id difficile est, leniter ambulare; considerare, diligenter involutis pedibus et capite; quoties febris accessit et desiit, cibum modicum sumere et vinum; reliquo tempore, nisi imbecillitas urget, abstinere. At si duæ febres penè junguntur, post utramque cibum sumere: deindè vacuo tempore et moveri aliquid et post unctionem cibo uti. Quùm verò vetus quartana rarò nisi vere solvatur; utique eo tempore attendendum est, ne quid fiat, quod valetudinem impediat. Prodest quoque in vetere quartanâ, mutare subindè victûs genus, à vino ad aquam, ab aquâ ad vinum, à lenibus cibis ad acres, ab acribus ad lenes transire: esse radicem, deindè vomere, jureve pulli gallinacei ventrem resolvere: oleo ad frictiones adjicere calefacientia, ante accessionem sorbere vel aceti cyathos duos, vel unum sinapis, cum tribus Græci vini salsi, vel mixta paribus portionibus, et in aquâ diluta, piper, castoreum, laser, myrrham. Per hæc enim similiaque corpus agitandum est, ut moveatur ex eo statu quo detinetur. Si febris quievit, diù meminisse ejus diei convenit: eoque vitare frigus, calorem, cruditatem, lassitudinem: facilè enim revertitur, nisi à sano quoque aliquamdiù timetur.

SECT. XVII. At si ex quartanâ quotidiana facta est, quùm id vitio inciderit, per biduum abstinere oportet, et frictione uti, aquam tantummodò vespere potui dare: tertio die sæpè fit, ne febris accedat. Sed sive id fit, sive

non fit, cibus post accessionis tempus est dandus: et si manet, per biduum abstinentiâ, quanta maxima imperari corpori potest, et frictione quotidie utendum est.

SECT. XVIII. Et febrium quidem curatio exposita est; supersunt verò alii corporis affectus qui huic superveniunt, ex quibus eos qui certis partibus assignari non possunt, protinus jungam. Incipiam ab insaniâ, primamque hujus ipsius partem aggrediar, quæ et acuta et cum febre est: Græci φρένησιν appellant. Illud antè omnia scire oportet, interdum in accessione ægros desipere et loqui aliena. Quod non leve quidem est, neque incidere potest nisi in febre vehementi: non tamen æquè pestiferum est; nam plerumque breve esse consuevit, levatoque accessionis impetu, protinus mens redit. Neque id genus morbi remedium aliud desiderat, quàm quod in curandâ febre præceptum est. Phrenesis verò tum demum est, quum continua dementia esse incipit; aut quum æger, quamvis adhuc sapiat, tamen quasdam vanas imagines accipit: perfecta est ubi mens illis imaginibus addicta est. Ejus autem plura genera sunt: siquidem ex phreniticis alii hilares, alii tristes sunt: alii facilius continentur et intra verba desipiunt, alii consurgunt et violenter quædam manu faciunt; atque ex his ipsis alii nihil nisi impetu peccant, alii etiam artes adhibent; summamque speciem sanitatis in captandis malorum operum occasionibus præbent; sed exitu deprehenduntur. Ex his autem eos qui intra verba desipiunt, aut leviter etiam manu peccant, onerare asperioribus coercitionibus supervacuum est: eos verò qui violentius se gerunt, vincire convenit; ne vel sibi vel alteri noceant. Neque credendum est, si vinctus aliquis, dum levare vinculis cupit, quamvis prudenter et miserabiliter loquitur; quoniam is dolus insanientis est.

Ferè verò antiqui tales ægros in tenebris habebant,

eo quod illis contrarium esset exterreri; et ad quietem animi tenebras ipsas conferre aliquid judicabant: at Asclepiades, tanquàm ipsis tenebris terrentibus, in lumine habendos eos dixit. Neutrum tamen perpetuum est: alium enim lux, alium tenebræ magis turbant; reperiunturque, in quibus nullum discrimen deprehendi vel hoc vel illo modo possit. Optimum itaque est utrumque experiri; et habere eum qui tenebras horret, in luce; eum qui lucem, in tenebris. At ubi nullum tale discrimen est, æger, si vires habet, loco lucido; si non habet, obscuro continendus est. Remedia verò adhibere, ubi maximè furor urget, supervacuum est; simul enim febris quoque increscit: tùm itaque nihil nisi continendus æger est: ubi verò res patitur, festinanter subveniendum est. Asclepiades perindè esse dixit his sanguinem mitti, ac si trucidentur: hanc rationem secutus, quod neque iusania esset, nisi febre intentâ; neque sanguis nisi in remissione ejus rectè mitteretur. Ipse in his somnum multâ frictione quæsivit; sed quùm et intentio febris somnum impediat, et frictio non nisi in remissione ejus utilis sit; hoc quoque auxilium debuit præterire. Quid igitur est? Multa in præcipiti periculo rectè fiunt, aliàs omittenda. Et continua quoque febris habet tempora quibus, etsi non remittit, non tamen crescit, estque hoc, ut non optimum, sic tamen secundum remediis tempus. Quod si vires ægri patiuntur, sanguis quoque mitti debet. Nec minùs deliberari potest an alvus ducenda sit. Tùm, interposito die, convenit caput ad cutem tondere, deindè aquâ fovere in quâ verbenæ aliquæ decoctæ sint ex reprimentibus; aut priùs fovere, deindè tondere, et iterum fovere; ac novissimè rosâ caput naresque implere, offerre etiam naribus rutam ex aceto contritam, et movere sternutamenta medicamentis ad id efficacibus. Quæ tamen facienda sunt in his

quibus vires non desunt : si verò imbecillitas est , rosâ tantum caput , adjecto serpyllo similive aliquo , mædificandum est. Utiles etiam in quibuscumque viribus herbæ duæ sunt , solanum et muralis , si simul ex utrâque succo expresso , caput impletur. Quum se febris remiserit , frictione utendum est , parcius tamen in his qui nimis hilares , quàm in his qui nimis tristes sunt. Adversus omnium autem sic insanientium animos gerere se pro cuiusque naturâ necessarium est. Quorundam enim vani metus levandi sunt ; sicut in homine prædivate famem timente incidit , cui subindè falsæ hereditates nunciabantur. Quorundam audacia coercenda est ; sicut in his fit , in quibus continendis plagæ quoque adhibentur. Quorundam etiam intempestivus risus objurgatione et minis finiendus est : quorundam discutiendæ tristes cogitationes : ad quod symphonîæ et cymbala strepitusque proficiunt. Sæpius tamen assentiendum quàm repugnandum est : paulatimque et non evidenter , ab his quæ stultè dicuntur , ad meliora mens adducenda. Interdum etiam elicienda ipsius attentio , ut fit in hominibus studiosis literarum , quibus liber legitur , aut rectè , si delectantur , aut perperam , si id ipsum eos offendit : emendando enim convertere animum incipiunt. Quin etiam recitare , si qua meminerunt , cogendi sunt. Ad cibum quoque quosdam non desiderantes reduxerunt hi , qui inter epulantes eos collocaverunt. Omnibus verò sic affectis somnus et difficilis et præcipuè necessarius est : sub hoc enim plerique sanescunt. Prodest ad id , atque etiam ad mentem ipsam componendam , crocinum unguentum cum irino in caput datum. Si nihilominus vigilant , quidam somnum moliantur potui dando aquam , in quâ papaver aut hyoscyamus decocta sit : alii mandragoræ mala pulvino subjiciunt , alii vel amomum vel sycamini lacrymam fronti inducunt.

Hoc nomen apud medicos reperio. Sed quum Græci morum *συχάμινον* appellant, mori verò nulla lacryma est, sic significatur lacryma arboris in Ægypto nascentis, quam ibi *μυρόσυχον* appellant. Plurimi decoctis papaveris corticibus, ex eâ aquâ cum spongiâ os et caput subindè foveant. Asclepiades ea supervacua esse dixit, quoniam in lethargum sæpè converterent: præcepit autem ut primo die à cibo, potione, somno abstineretur: vespere ei daretur potui aqua; tùm frictio admoveretur lenis, ut ne manum quidem, qui fricaret, vehementer imprimeret: postero deindè die, iisdem omnibus factis, vespere ei daretur sorbitio et aqua, rursusque frictio adhiberetur: per hanc enim nos consecuturos, ut somnus accedat. Id interdum fit, et quidem adeò ut, illo confitente, nimia frictio etiam lethargi periculum afferat. Sed si sic somnus non accessit, tùm demùm illis medicamentis arcessendus est; habitâ scilicet eâdem moderatione quæ hîc quoque necessaria est; ne quem obdormire volumus, excitare postea non possimus. Confert etiam aliquid ad somnum silanus juxtâ cadens, vel gestatio post cibum et noctu, maximèque lecti suspensi motus. Neque alienum est, si neque sanguis antè missus est, neque mens constat, neque somnus accedit, occipitio inciso cucurbitulam admovere; quæ quia levat morbum, potest etiam somnum facere. Moderatio autem in cibo quoque adhibenda est: nam neque implendus æger est, ne insaniat; neque jejunio utique vexandus est, ne imbecillitate in cardiacum incidat. Opus est cibo infirmo, maximèque sorbitione, potione aquæ mulsæ, cujus ternos cyathos hieme, æstate verò quatuor dedisse satis est.

Alterum insanix genus est quod spatium longius recipit, quia ferè sine febre incipit, leves deindè febri-culas excitat: ea consistit in tristitiâ quam videtur bilis

atra contrahere. In hâc utilis detractio sanguinis est : si quid hanc prohibet, prima est abstinencia, secunda per album veratrum vomitumque purgatio : post utrumlibet adhibenda his die frictio est : si magis valet, frequens etiam exercitatio : in jejuno vomitus. Cibus sine vino dandus ex mediâ materiâ est : quam quoties posuero, scire licet etiam ex infirmissimâ dari posse, dum ne eâ solâ quis utatur : valentissima tantummodò esse removenda. Præter hæc, servanda alvus est quàm tenerima : removendi terrores, et potius bona spes afferenda : quærenda delectatio ex fabulis ludisque, quibus maximè capi sanus assueverat : laudanda, si qua sunt, ipsius opera, et ante oculos ejus ponenda : leviter objurganda vana tristitia : subindè admonendus, in his ipsis rebus quæ sollicitant, cur non potius lætitiæ quàm sollicitudinis causa sit. Si febris quoque accessit, ea sicut aliæ febres curanda est.

Tertium insanientiæ genus ex his longissimum ; adeò ut vitam ipsam non impediat : quod robusti corporis esse consuevit. Hujus autem species duæ sunt : nam quidam imaginibus, non mente falluntur ; quales insanientem Aiacei vel Orestem percepisse poëtarum fabulæ ferunt : quidam animo desipiunt. Si imagines fallunt, ante omnia videndum est, tristes an hilares sint. In tristitiâ nigrum veratrum dejectionis causâ, in hilaritate album ad vomitum excitandum, dari debet : idque, si in portione non accipit, pani adjiciendum est, quò faciliùs fallat : nam si benè se purgaverit, ex magnâ parte morbum levabit. Ergo, etiam si semel datum veratrum parùm profecerit, interposito tempore, iterum dari debet. Neque ignorare oportet, leviorē esse morbum cum risu quàm seriò insanientium. Illud quoque perpetuum est in omnibus morbis, ubi ab inferiore parte purgandus aliquis est, ventrem ejus antè solvendum esse ; ubi

à superiore, comprimendum. Si verò consilium insanientem fallit, tormentis quibusdam optimè curatur. Ubi perperàm aliquid dixit aut fecit, fame, vinctis, plagis coercendus est. Cogendus est, et attendere, et ediscere aliquid, et meminisse: sic enim fiet, ut paulatim metu cogatur considerare quid faciat. Subitò etiam terri et expavescere in hoc morbo prodest; et ferè quicquid animum vehementer perturbat. Potest enim quædam fieri mutatio, quum ab eo statu mens in quo fuerat, abducta est. Interest etiam, is ipse sine causâ subindè rideat, an mœstus demissusque sit: nam dementis hilaritas terroribus his de quibus suprâ dixi, meliùs curatur. Si nimia tristitia est, prodest lenis, sed multa, bis die frictio: item per caput aqua frigida infusa, demissumque corpus in aquam et oleum. Illa communia sunt, iusanientes vehementer exerceri debere; multâ frictione uti; neque pinguem carnem neque vinum assumere; cibis uti post purgationem, ex mediâ materiâ quàm levissimis; non oportere esse vel solos, vel inter ignotòs, vel inter eos quos aut contemnant aut negligant; mutare debere regiones, et, si mens redit, annuâ peregrinatione esse jactandos.

Rarò, sed aliquandò tamen, ex metu delirium nascitur. Quod genus insanientium, specie simile, simili vinctis genere curandum est: præter quàm quòd in hoc insanie genere solo, rectè vinum datur.

SECT. XIX. His morbis præcipuè contrarium est id genus, quod *καρδιακόν* à Græcis nominatur; quamvis sæpè ad eum phrenitici transeunt: si quidem mens in illis labat, in hoc verò constat. Id autem nihil aliud est, quàm nimia imbecillitas corporis, quod, stomacho languente, immodico sudore digeritur: licetque protinùs scire id esse, ubi venarum exigui imbecillique pulsus sunt; sudor autem supra consuetudinem, et modo, et tempore,

ex toto thorace et cervicibus, atque etiam ex capite prorumpit, pedibus tantummodò et cruribus siccioribus atque frigentibus; acutique morbi genus est. Curatio prima est, suprà præcordia imponere quæ reprimant, cataplasmata: secunda sudorem cohibere. Id præstat acerbum oleum, vel rosa, vel melinum vel myrteum: quorum aliquo corpus leniter perungendum; ceratumque ex aliquo horum tùm imponendum est. Si sudor vincit, delinendus homo est vel gypso, vel argenti spumâ, vel Cymoliâ cretâ; vel etiam subindè horum pulvere respergendus. Idem præstat pulvis ex contritis aridis myrti vel rubi foliis, aut ex austeri et boni vini aridâ fæce: pluraque similia sunt, quæ si desunt, satis utilis est quilibet ex viâ pulvis injectus. Super hæc verò, quominus corpus insudet, levi veste debet esse contactus, loco non calido, fenestris patentibus, sic ut perflatus quoque aliquis accedat. Tertium auxilium est imbecillitati jacentis cibo vinoque succurrere. Cibus non multus quidem, sed sæpè tamen nocte ac die dandus est; ut nutriat, neque oneret. Is esse debet ex infirmissimâ materiâ, et stomacho aptus. Nisi si necesse est, ad vinum festinare non oportet. Si verendum est ne æger deficiat, tùm et intrita ex hoc, et hoc ipsum austerum quidem, sed tamen tenue, meraculum, egelidum, subindè et liberaliter dandùm est; adjectâ polentâ, si modò is æger parùm cibi assumit: idque vinum esse debet neque nullarum virium, neque ingentium: rectèque totâ die ac nocte vel tres heminas æger bibet; si vastius corpus est, vel plus etiam: si cibum non accipit, perunctum perfundere aquâ frigidâ antè convenit, et tùm dare. Quod si stomachus resolutus parùm continet, et ante cibum et post eum sponte vomere oportet; rursumque post vomitum cibum sumere. Si ne id quidem manserit, sorbere vini cyathum, interpositâque horâ,

sumere alterum. Si id quoque stomachus reddiderit, totum corpus bulbis contritis superillinendum est; qui, ubi inaruerunt, efficiunt ut vinum in stomacho contineatur, exque eo toti corpori calor, venisque vis redeat. Ultimum auxilium est, in alvum ptisanæ vel alicæ cremorem ex inferioribus partibus indere, siquidem id quoque vires tuetur. Neque alienum est naribus quoque æstuantis admoveere quod reficiat, ut est rosa et vinum: et, si qua in extremis partibus frigent, unctis et calidis manibus fovere: per quæ si consequi potuerimus ut et sudoris impetus minuatur, et vita prorogetur; incipit jam tempus ipsum esse præsidio. Ubi is esse in tuto videtur, verendum tamen est, ne in eandem imbecillitatem citò recidat: itaque, vino tantùm remoto, quotidie validiorem cibum debet assumere, donec satis virium corpori redeat.

SECT. XX. Alter quoque morbus est aliter phrenitico contrarius. In illo difficilius somnus, prompta ad omnem audaciam mens est; in hoc marcor et inexpugnabilis penè dormiendi necessitas: λήθαργον Græci nominant. Atque id quoque genus acutum est, et, nisi succurritur, celeriter jugulat. Hos ægros quidam subindè excitare nituntur, admotis iis per quæ sternutamenta evocantur, et iis quæ odore fædo movent, qualis est pix cruda, lana succida, piper, veratrum, castoreum, acetum, allium, cepa. Juxta etiam galbanum incendunt, pilos aut cornu cervinum: si non est, quodlibet aliud: hæc enim quùm comburuntur, odorem fædum movent. Tharrias verò quidam accessionis esse id malum dixit, levæque, quùm ea decessit: itaque eos, qui subindè excitantur, sine usu malè habere. Interest autem, in decensione expergiscatur æger, an, quùm febris non levetur, aut levatâ quoque eâ, somnus urgeat. Nam si expergiscitur, adhibere ei ut sopito, supervacuum est: neque

enim vigilando melior fit ; sed per se, si melior est, vigilat. Si verò continens ei somnus est, utique excitandus est; sed his temporibus quibus febris levissima est, ut excernat aliquid et sumat : excitat autem validissimè repentè aqua frigida infusa. Post remissionem itaque, perunctum oleo multo corpus, tribus aut quatuor amphoris totum per caput perfundendum est. Sed hoc utemur, si æqualis ægro spiritus erit, si mollia præcordia : sin aliter hæc erunt, ea potiora quæ suprâ comprehensa sunt. Et, quod ad somnum quidem pertinet, commodissima hæc ratio est. Medendi autem causâ caput radendum; deindè poscâ fovendum est, in quâ laurus aut ruta decocta sit. Altero die imponendum castoreum, aut ruta ex aceto contrita, aut lauri baccæ, aut edera cum rosâ et aceto : præcipuèque proficit, et ad excitandum hominem, naribus admotum, et ad morbum ipsum depellendum, capiti frontive impositum sinapi. Gestatio etiam in hoc morbo prodest : maximèque opportunè cibus datus, id est, in remissione, quanta maxima inveniri poterit. Aptissima autem sorbitio est, donec morbus decrescere incipiat : sic, ut si quotidie gravis accessio est, hæc quotidie detur : si alternis, post graviolem, sorbitio ; post leviolem mulsa aqua. Vinum quoque cum tempestivo cibo datum non mediocriter adjuvat. Quod si post longas febres ejusmodi torpor accessit, cætera eadem servanda sunt : ante accessionem autem tribus quatuorve horis, si venter adstrictus est, dandum est castoreum cum scammoniâ; si non est, per se ipsum cum aquâ dandum est. Si præcordia mollia sunt, cibus utendum est plenioribus; si dura, in iisdem sorbitionibus subsistendum ; imponendumque præcordiis quod simul et reprimat et emolliat.

SECT. XXI. Sed hic quidem acutus est morbus : longus verò fieri potest eorum quos aqua inter cutem malè

habet, nisi primis diebus discussus est: ὕδρωπα Græci vocant. Atque ejus tres species sunt. Nam modò, ventre vehementer intento, creber intùs ex motu spiritùs sonus est: modò corpus inæquale est, tumoribus aliter aliterque per totum id orientibus: modò intùs in uterum aqua contrahitur; et, moto corpore, ita movetur, ut impetus ejus conspici possit. Primum τυμπανίτην: secundum λευκοφλεγματίαν vel ὑποσάρκα; tertium ἀσπίτην Græci nominarunt. Communis tamen omnium est humoris nimia abundantia, ob quam ne ulcera quidem in his ægris facilè sanescunt. Sæpè verò hoc malum per se incipit: sæpè alteri vetusto morbo maximèque quartanæ supervenit. Faciliùs in servis quàm in liberis tollitur: quia, quùm desideret famem, sitim, mille alia tædia longamque patientiam, promptiùs iis succurritur qui facilè coguntur, quàm quibus inutilis libertas est. Sed hi quidem qui sub alio sunt, si ex toto sibi temperare non possunt, ad salutem perducuntur. Ideòque non ignobilis medicus, Chrysippi discipulus, apud Antigonom regem, amicum quemdam ejus, notæ intemperantiæ, mediocriter eo morbo implicitum, negavit posse sanari: quùmque alter medicus Epirotes Philippus se sanaturum polliceretur, respondit illum ad morbum ægri respicere, se ad animum. Neque eum res fefellit. Ille enim quùm summâ diligentiam non medici tantummodò, sed etiam regis custodiretur, tamen malagmata sua devorando, bibendoque suam urinam, in exitium sese præcipitavit. Inter initia tamen non difficillima curatio est, si imperata sunt corpori quies, sitis, inedia: at si malum inveteraverit, non sine magnâ mole discutitur. Metrodorum tamen Epicuri discipulum referunt, quùm hoc morbo tentaretur, neque æquo animo sustineret necessariam sitim, ubi diù abstinuerat, solitum bibere, deindè evomere. Quod si redditur

quicquid receptum est, multum tædio demit : si à stomacho retentum est, morbum auget; ideòque in quolibet tentandum non est. Sed si febris quoque est, hæc imprimis submovenda est per eas rationes, per quas huic succurri posse propositum est. Si sine febre æger est, tùm demùm ad ea veniendum est, quæ ipsi morbo mederi solent. Atque hìc quoque, quæcumque species est, si nondum nimis occupavit, iisdem auxiliis opus est. Multum ambulandum, currendum aliquid est, et superiores maximè partes sic perfricandæ, ut spiritum ipse contineat. Evocandus est sudor non per exercitationem tantum, sed etiam in arenà calidà vel laconico, vel clibano similibusque aliis : maximè quoque utiles sunt naturales et siccæ sudationes, quales super Baias habemus in myrtetis. Balneum atque omnis humor alienus est. Jejuno rectè catapotia dantur, facta ex duabus absinthii, myrrhæ tertià parte. Cibus esse debet ex medià quidem materià, sed tamen generis durioris : potio non ultrà danda est, quàm ut vitam sustineat; optimaque est quæ urinam movet : sed id ipsum moliri cibo melius est quàm medicamento. Si tamen res coget, ex his aliquid quæ id præstent, erit decoquendum; eaque aqua potui danda. Videntur autem hanc facultatem habere, iris, nardum, crocum, cinnamum amomum, casia, myrrha, balsamum, galbanum, ladanum, œnanthe, panaces, cardamomum, ebenus, cupressi semen, uva taminia, σταφίδα ἀγρίαν Græci nominant, abrotonum, rosæ folia, acorum, amaræ nuces, tragoriganum, styrax, costum, junci quadrati et rotundi flos; illum κύπελλον, hunc σχῆνον Græci vocant : quæ quoties posuero, non quæ hìc nascuntur, sed quæ inter aromata afferuntur, significabo. Primò tamen quæ levissima ex his sunt, id est, rosæ folia vel nardī spica, tentanda sunt. Vinum quoque utile est et lene, et austerum, sed

quàm tenuissimum. Commodum est etiam lino quotidie ventrem metiri, et, quàm comprehendit alvum, notam imponere: posteroque die videre, plenius corpus sit an extenuetur; id enim quod extenuatur medicinam sentit. Neque alienum est metiri et potionem ejus, et urinam: nam si plus humoris excernitur quàm assumitur, ita demùm secundæ valetudinis spes est. Asclepiades in eo qui ex quartanâ in hydropa deciderat, se abinentiâ bidui et frictione usum; tertio die, jam et febre et aquâ liberato cibum et vinum dedisse, memoriæ prodidit.

Hactenûs communiter de omni specie præcipi potest: si vehementius malum est, diducenda ratio curandi est. Ergo si inflatio, et ex eâ dolor creber est, utilis quotidianus, aut altero quoque die post cibum, vomitus est: fomentis siccis calidisque utendum est. Si per hæc dolor non finitur, necessariæ sunt sine ferro cucurbitulæ: si ne per has quidem tormentum tollitur, incidenda cutis est, et tùm his utendum. Ultimum auxilium est, si cucurbitulæ nihil profuerunt, per alvum infundere copiosam aquam calidam, eamque recipere. Quin etiam ter quotidie quaterque opus est uti frictione vehementi, cum oleo et quibusdam calefacientibus: sed in hac frictione à ventre abstinendum est: imponendum verò in eum crebrius sinapi, donec cutem erodat; ferramentisque candentibus pluribus locis venter exulcerandus est, et servanda ulcera diutiùs. Utiliter etiam scilla cocta delingitur; sed diù post has inflationes abstinendum est ab omnibus inflantibus. At si id vitium est, cui λευκοφλεγματία nomen est, eas partes quæ tument, subicere soli oportet; sed non nimium, ne febriculam incendat: si is vehementior est, caput velandum est, utendumque frictione, madefactis tantùm manibus aquâ cui sal et nitrum et olei paulum sit adjectum; sic ut aut pueriles aut muliebres manus adhibeantur, quò

mollior earum tactus sit : idque , si vires patiuntur, antè meridiem totâ horâ , post meridiem semihorâ , fieri oportet. Utilia sunt etiam cataplasmata quæ reprimunt; maximèque, si corpora teneriora sunt. Incidendum quoque super talum, quatuor ferè digitis, ex parte interiore est, quâ per aliquot dies frequens humor feratur, atque ipsos tumores incidere altis plagis oportet; concutendum quoque corpus est multâ gestatione, atque ubi inductæ vulneribus cicatrices sunt, adjiciendum exercitationibus et cibis, donec corpus ad pristinum habitum revertatur. Cibus valens esse debet et glutinosus, maximèque caro. Vinum, si per stomachum licet, dulcius : sed ita ut in vicem biduo triduoque, modò aqua, modò id bibatur. Prodest etiam lactucæ marinæ, quæ grandis juxta mare nascitur, semen cum aquâ potui datum. Si valens est qui id accipit, ei scilla cocta simul super ventrem delinitur : auctoresque multi sunt, inflatis vesicis pulsandos tumores esse.

Si verò id morbi genus est, quo in uterum multa aqua contrahitur, ambulare, sed magis modicè, oportet; malagma quod digerat, impositum habere; idque ipsum, superimposito triplici panno, fasciâ, non nimium tamen vehementer, adstringere : quod à Tharriâ profectum, servatum esse à pluribus video. Si jecur aut lienem affectum esse manifestum est, ficum pinguem contusam, adjecto melle, superponere : si per talia auxilia venter non siccatur, sed humor nihilominus abundat, celeriore viâ succurrere, ut is per ventrem ipsum emittatur. Neque ignoro Erasistrato displicuisse hanc curandi viam; morbum enim hunc jecinoris putavit : ità illud esse sanandum; frustra que aquam emitti, quæ, vitiato illo, subindè nascatur. Sed primum non hujus visceris unius hoc vitium est : nam et liene affecto, et in totius corporis malo habitu fit : deindè, ut

indè cœperit, tamen aqua, nisi emittitur, quæ contrâ naturam ibi substitit, et jecinori et cæteris interioribus partibus nocet. Convenitque corpus nihilominus esse curandum: neque enim sanat emissus humor, sed medicinæ locum facit quam intus inclusus impedit. Ac ne illud quidem in controversiam venit, quin non omnes in hoc morbo sic curari possint; sed juvenes robusti, qui vel ex toto carent febre, vel certè satis liberales intermissiones habent. Nam quorum stomachus corruptus est, quive ex atrâ bile huc deciderunt, quive malum corporis habitum habent, idonei huic curationi non sunt. Cibus autem, quo die primùm humor emissus est, supervacuius est, nisi si vires desunt. Insequentibus diebus, et is et vinum meracius quidem, sed non ita multum dari debet: paulatimque evocandus æger est ad exercitationes, frictiones, solem, sudationes, fatigationes et idoneos cibos, donec ex toto convalescat. Balneum rarum res amat, et frequentationem in jejuno vomitum. Si æstas est, in mari natare commodum est. Ubi convaluit aliquis, diù tamen alienus ei veneris usus est.

SECT. XXII. Diutiùs sæpè et periculosiùs tabes eos malè habet quos invasit: atque hujus quoque plures species sunt. Una est, quâ corpus non alitur, et naturaliter semper aliquibus decedentibus, nullis verò in eorum locum subeuntibus, summa macies oritur; et nisi occurritur, tollit: ἀτροφίαν hanc Græci vocant. Ea duabus ferè de causis incidere consuevit: aut enim nimio timore aliquis cibi minùs, aut aviditate nimia plùs quàm debet, assumit: ità vel quod deest, infirmat; vel quod superat, corrumpitur. Altera species est quam Græci καχεξίαν appellant, ubi malus corporis habitus est; ideòque omnia alimenta corrumpuntur. Quòd ferè fit, quùm longo morbo vitiata corpora, etiam si illo

vacant, refectionem tamen non accipiunt; aut quum malis medicamentis corpus affectum est; aut quum diu necessaria defuerunt; aut quum inusitados et inutiles cibos aliquis assumpsit, aliquidve simile incidit. Huic, præter tabem, illud quoque nonnunquam accidere solet, ut per assiduas pustulas aut ulcera summa cutis exasperetur, vel aliquæ corporis partes intumescant. Tertia est longèque periculosissima species, quam Græci φθίσις nominaverunt. Oritur ferè à capite, indè in pulmonem destillat: huic exulceratio accedit, et febricula levis fit; quæ etiam quum quievit, tamen repetit. In eâ quoque frequens tussis est, pus exscreatur, interdum cruentum aliquid. Quicquid exscreatum est, si in ignem impositum est, mali odoris est: itaque qui de morbo dubitant, hâc notâ utuntur.

Quum hæc genera tabis sint, animadvertere primum oportet, quid sit in quo laboretur: deindè, si tantum non ali corpus apparet, causam ejus attendere; et si cibi minùs assumpsit aliquis quàm debuit, adjicere oportet; sed paulatim, ne si is corpus insuetum subitâ multitudine oneraverit, concoctionem impediat. Si verò plus justo quis assumere solitus est, abstinere uno die; deindè ab exiguo cibo incipere; quotidie adjicere, donec ad justum modum perveniat. Præter hæc convenit ambulare locis quàm minimè frigidis, sole vitato: per manus quoque exerceri. Si infirmior est, gestari, ungi, perfricari, si potest, maximè per se ipsum, sæpius eodem die, et antè cibum, et post eum; sic ut interdum oleo quædam adjiciantur calefacientia, donec insudet. Prodestque jejuno prehendere per multas partes cutem et attrahere, ut relaxetur; aut, impositâ resinâ et abductâ, subindè idem facere. Utile est etiam interdum balneum, sed post cibum exiguum. Atque in ipso solio rectè cibi aliquid assumitur: aut si sine hoc frictio fuit,

post eam protinùs. Cibi verò esse debent ex his qui faciliè concoquantur, maximèque alunt. Ergo vini quoque, sed austeri, necessarius usus est; movenda urina.

At si malus habitus corporis est, primùm abstinendum est; deindè alvus ducenda; tùm paulatim cibi dandi, adjectis exercitationibus, unctionibus, frictionibus. Utilius his frequens balneum est, sed jejunis; etiam usque sudorem. Cibus verò opus est copiosis, variis, boni succi, quique etiam minùs faciliè corrumpantur, vino austero. Si nihil reliqua proficiunt, sanguis mittendus est; sed paulatim, quotidieque pluribus diebus, cum eo ut cætera quoque eodem modo servantur.

Quod si mali plùs est, et vera phthisis est, inter initia protinùs occurrere necessarium est, neque enim faciliè hic morbus, quùm inveteraverit, evincitur. Opus est, si vires patiuntur, longà navigatione, cœli mutatione, sic ut densius quàm id est ex quo discedit æger, petatur: ideòque aptissimè Alexandriam ex Italiâ itur: ferèque id posse inter principia corpus pati debet, quum hic morbus ætate firmissimâ maximè oriatur, id est, ab anno duodevicesimo ad annum quintum et tricesimum. Si id imbecillitas non sinit, nave tamen non longè gestari commodissimum est. Si navigationem aliqua res prohibet, lecticâ vel alio modo corpus movendum est: tùm à negotiis abstinendum est, omnibusque rebus quæ sollicitare animum possunt: somno indulgendum: cavendæ destillationes, ne, si quid cura levarit, exasperent; et ob id vitanda cruditas, simulque et sol et frigus: os obtegendum; fauces velandæ; tussicula suis remediis finienda: et quandiù quidem febricula incursat, huic interdùm abinentiâ, interdùm etiam tempestivis cibis medendum; eoque tempore bibenda aqua. Lac quoque, quod in capitis doloribus et in acutis febribus, et per eas factâ nimîâ siti, ac, sive præcordia tument, sive

biliosa urina est, sive sanguis fluxit, pro veneno est; in phthisi tamen, sicut in omnibus longis difficilibusque febriculis, rectè dari potest. Quod si febris aut nondùm incursat, aut jam remisit, decurrendum est ad modicas exercitationes, maximèque ambulationes, item lenes frictiones. Balneum alienum est. Cibus esse debet primò acer, ut allium, porrum, idque ipsum ex aceto, vel eodem intubus, ocimum, lactuca: deindè lenis, ut sorbitio ex ptisanâ vel ex alicâ vel ex amylo, lacte adjecto. Oryza quoque, et, si nihil aliud est, far idem præstat. Tùm invicem modò his cibus, modò illis utendum est; adjiciendaque quædam ex mediâ materiâ, præcipuè verò ex primâ cerebellum vel pisciculus, et his similia. Farina etiam cum sevo ovillo caprinove mixta, deindè incocta, pro medicamento est. Vinum assumi debet leve, austerrum. Hactenùs non magnâ mole pugnatur. Si vehementior noxa est, ac neque febricula, neque tussis quiescit, tenuarique corpus apparet, validioribus auxiliis opus est. Exulcerandum est ferro candenti, uno loco sub mento, altero in gutture, duobus ad mammam utramque; item sub imis ossibus scapularum quas ὠμοπλάτας Græci vocant, sic ut ne sanescere sinamus ulcera, nisi tussi finitâ: cui per se quoque medendum esse manifestum est. Tunc ter quaterque die vehementer extremæ partes perfricandæ sunt: thorax leni manu pertractandus; post cibum intermittenda hora: et tùm perfricanda crura brachiaque. Interpositis denis diebus, demittendus æger in solium est, in quo sit aqua calida et oleum. Cæteris diebus bibenda aqua: tùm vinum, si tussis non est, potui frigidum dandum: si verò est, egelidum. Utile est etiam in remissionibus quotidie cibos dari: frictiones gestationesque similiter adhiberi: itemque acria quarto aut quinto die assumere, interdùm herbam sanguinalem ex aceto vel plantaginem esse.

Medicamentum est etiam vel plantaginis succus per se, vel marrubium ex melle incoctum; ita ut illius cyathus sorbeatur, hujus cochleare plenum paulatim delingatur, vel inter se mixta; et incocta resinæ terebinthinæ pars dimidia, butyri et mellis pars altera. Præcipua tamen ex his omnibus sunt victus, vehiculum, et navis, et sorbitio. Alvus cita utique vitanda est. Vomitus in hoc morbo frequens perniciosus est, maximèque sanguinis. Qui meliusculus esse cœpit, adjicere debet exercitationes, frictiones, cibos: deindè ipse se, suppresso spiritu, perfricare; diù abstinere à vino, balneo, venere.

SECT. XXIII. Inter notissimos morbos est etiam is qui comitialis vel major nominatur. Homo subito concidit, ex ore spumæ moventur; deindè, interposito tempore, ad se redit, et per se ipse consurgit. Id genus sæpiùs viros quàm feminas occupat; ac solet quidem etiam longum esse usque ad mortis diem, at vitæ non periculosum. Interdùm tamen quùm recens est, hominem consumit; et sæpè eum, si remedia non sustulerunt, in pueris veneris, in puellis menstruorum initium tollit. Modò cum distentione membrorum aut nervorum prolabitur aliquis; modò sine illâ. Quidam hos quoque iisdem quibus lethargicos, excitare conantur: quod admodum supervacuum est: et quia ne lethargicus quidem his sanatur; et quia, quùm possit ille nunquàm expergisci atque ita fame interire, hic ad se utique revertitur.

Ubi concidit aliquis, si nulla nervorum distentio accessit, utique sanguis mitti debet: si accessit, non utique mittendus est, nisi alia quoque hortantur. Necessarium autem est ducere alvum, vel nigro veratro purgare, vel utrumque facere, si vires patiuntur: tùm caput tondere; oleoque et aceto perungere; cibum post diem tertium, simul transit hora quâ concidit, dare.

Neque sorbitiones autem his aliique molles et faciles cibi, neque caro, minimèque suilla, convenit; sed mediæ materiæ: nam et viribus opus est, et cruditates cavendæ sunt: cum quibus fugere oportet solem, balneum, ignem, omniaque calefacientia: item, frigus, vinum, venerem, loci præcipitis conspectum omniumque terrentium, vomitum, lassitudinem, sollicitudines, negotia omnia. Ubi tertio die cibus datus est, intermittere quartum, et in vicem alterum quemque; eâdem horâ cibi servatâ, donec quatuordecim dies transeant. Quos ubi morbus excessit, acuti vim deposuit, ac si manet, curandus jam ut longus est. Quod si non, quo die primum id incidit, medicus accessit, sed is qui cadere consuevit, post ei traditus est; protinùs eo genere victûs habito qui suprâ comprehensus est, exspectandus est dies quo prolabatur; utendumque tûm vel sanguinis missione, vel ductione alvi, vel nigro veratro, sicut præceptum est. Insequentibus deindè diebus per eos cibos quos proposui, vitatis omnibus quæ cavenda dixi, nutriendus est.

Si per hæc morbus finitus non fuerit, confugiendum erit ad album veratrum; ac ter quoque aut quater eo utendum, non ita multis interpositis diebus; sic tamen ut ne iterûm unquàm sumat, nisi conciderit. Mediis autem diebus vires ejus erunt nutriendæ, quibusdam, præter ea quæ suprâ scripta sunt, adjectis. Ubi manè expectatus est, corpus ejus leniter ex oleo vetere, cum capite excepto ventre, permulceatur: tûm ambulatione quàm maximè longâ et rectâ utatur: post ambulationem loco tepido vehementer et diù, ac non minùs ducenties, nisi infirmus erit, perfricetur: deindè per caput multâ aquâ frigidâ perfundatur; paulûm cibi assumat; conquiescat; rursûs ante noctem ambulatione utatur; iterûm vehementer perfricetur, sic ut neque venter neque

caput contingatur: post hæc cœnet, interpositisque tribus aut quatuor diebus, uno aut altero acria assumat. Si ne per hæc quidem fuerit liberatus, caput radat; ungatur oleo vetere, adjecto aceto et nitro; perfundatur aquâ salsâ; bibat jejunos ex aquâ castoreum; nullâ aquâ nisi decoctâ, potionis causâ, utatur. Quidam, jugulati gladiatoris calido sanguine poto, tali morbo se liberarunt: apud quos miserum auxilium tolerabile malum miserius fecit. Quod ad medicum verò pertinet, ultimum est, juxta talum ex utroque crure paulum sanguinis mittere: occipitium incidere, et cucurbitulas admove: ferro candente in occipitio quoque et infrâ, quâ summa vertebra cum capite committitur, adurere duobus locis, ut per ea perniciosus humor evadat. Quibus si finitum malum non fuerit, propè est ut perpetuum sit. Ad levandum id, tantummodo utendum erit exercitatione, multâ frictione, cibisque his qui suprâ comprehensi sunt; præcipuèque vitanda omnia, quæ, ne fierent, excepimus.

SECT. XXIV. Æquè notus est morbus quem interdum arquatum, interdum regium nominant. Quem Hippocrates ait, si post septimum diem febricitante ægro supervenit, tutum esse, mollibus tantummodò præcordiis substantibus. Diocles ex toto, si post febrem oritur, etiam prodesse; si post hunc febris, occidere. Color autem eum morbum detegit, maximè oculorum, in quibus quod album esse debet, fit luteum. Solet quoque accedere et dolor capitis, et frequens singultus, et præcordiorum dextrâ parte durities; et, ubi corporis vehemens motus est, spiritûs difficultas membrorumque resolutio: atque ubi diutiùs manet morbus, totum corpus cum pallore quodam inalbescit. Primo die abstinere ægrum oportet, secundo, ducere alvum; tùm si febris est, eam victûs genere discutere; si non est, scammo-

niam potui dare, vel cum aquâ betam albam contritam, vel cum aquâ mulsâ nuces amaras, absinthium, anisum, sic ut pars hujus minima sit. Asclepiades aquam quoque salsam, et quidem per biduum, purgationis causâ, bibere cogebat, iis quæ urinam movent, rejectis. Quidam, superioribus omissis, per hæc et per eos cibos qui extenuant, idem se consequi dicunt. Ego utique, si satis virium est, validiora; si parum, imbecilliora auxilia præfero. Si purgatio fit, post eam triduo primo modicè cibum oportet assumere ex mediâ materiâ, et vinum bibere Græcum salsum, ut solutio ventris maneat: tùm altero triduo validiores cibos, et carnis quoque aliquid esse, intraque aquam manere: deindè ad superius genus victûs reverti, cum eo ut magis satietur; omisso Græco vino, bibere integrum austerum; atque ita per hæc variare ut interdum acres quoque cibos interponat, interdum ad salsum vinum redeat. Per omne verò tempus utendum est exercitatione, frictione, et, si hiems est, balneo; si æstas, frigidis natationibus: lecto etiam et conclavi cultiore, risu, joco, ludis, lasciiviâ, per quæ mens exhilaretur: ob quæ regius morbus dictus videtur. Malagma quoque quod digerat, super præcordia datum, prodest; vel arida ibi ficus imposita, si jecur aut lienis affectus est.

SECT. XXV. Ignotus autem penè in Italiâ, frequentissimus in quibusdam regionibus is morbus est quem *ἐλεφαντίασιν* Græci vocant; isque longis annumeratur: totum corpus afficitur, ita ut ossa quoque vitari dicantur. Summa pars corporis crebras maculas crebrosque tumores habet: rubor earum paulatim in atrum colorem convertitur. Summa cutis inæqualiter crassa, tenuis, dura mollisque, quasi squamis quibusdam exasperatur, corpus emacrescit, os, suræ, pedes intumescunt. Ubi vetus morbus est, et digiti in manibus pedibusque

sub tumore conduntur, febricula oritur, quæ faciliè tot malis obrutum hominem consumit. Protinùs ergo inter initia sanguis per biduum mitti debet, aut nigro veratro venter solvi. Adhibenda tùm, quanta sustineri potest, inedia est : paululùm deindè vires reficiendæ et ducenda alvus : post hæc ubi corpus levatum est, utendum est exercitatione præcipuèque cursu : sudor primùm labore ipsius corporis, deindè etiam siccis sudationibus evocandus : frictio adhibenda : moderandumque inter hæc ut vires conserventur. Balneum rarum esse debet : cibus sine pinguibus, sine glutinosis, sine inflantibus : vinum, præterquàm primis diebus, rectè datur. Corpus contrita plantago et illita optimè tueri videtur. Attonitos quoque rarò videmus : quorum et corpus et mens stupet. Fit interdùm ictu fulminis, interdùm morbo : hunc ἀποπληξίαν Græci appellant. His sanguis mittendus est : veratro quoque albo, vel alvi ductione utendum : tùm adhibendæ frictiones ; et ex mediâ materiâ minimè pingues cibi, quidam etiam acres ; et à vino abstinendum.

SECT. XXVI. 1. At resolutio nervorum frequens ubiquè morbus est : sed interdùm tota corpora, interdùm partes infestat. Veteres auctores illud ἀποπληξίαν, hoc παράλυσιν nominaverunt : nunc utrumque παράλυσιν appellari video. Solent autem, qui per omnia membra resoluti sunt, celeriter rapi, ac, si correpti non sunt, diutius quidem vivunt ; sed rarò tamen ad sanitatem perveniunt, et plerumquè miserum spiritum trahunt, memoriâ quoque amissâ. In partibus verò nunquàm acutus, sæpè longus, ferè sanabilis morbus est. Si omnia membra vehementer resoluta sunt, sanguinis detractio vel occidit, vel liberat. Aliud curationis genus vix unquàm sanitatem restituit ; sæpè mortem tantùm differt vitam interim infestat. Post sanguinis missionem, si non redit et motus et mens, nihil spei superest : si redit, sæ-

nitas quoque prospicitur. At ubi pars resoluta est, pro vi et malo corporis, vel sanguis mittendus est, vel alvus ducenda. Cætera eadem in utroque casu facienda sunt: siquidem vitare præcipuè convenit frigus; paulatimque ad exercitationes revertendum est, sic ut ingrediatur ipse protinus, si potest. Si id crurum imbecillitas prohibet, vel gestetur, vel motu lecti concutiat: tùm id membrum quod deficit, si potest, per se; sin minus, per alium moveatur, et vi quâdam ad consuetudinem suam redeat. Prodest etiam torpentis membri summam cutem exasperasse, vel urticis cæsam vel imposita sinapi, sic ut ubi rubere cœperit corpus, hæc removeantur. Scilla quoque contrita, bulbique contriti cum thure rectè imponuntur. Neque alienum est resinâ cutem tertio quoque die diutius vellere; pluribus etiam locis aliquandò sine ferro cucurbitulas admovere. Uctioni verò aptissimum est vetus oleum, vel nitrum aceto et oleo admixtum. Quin etiam fovere aquâ calidâ marinâ, vel si ea non est, tamen salsâ, magnoperè necessarium est. Ac si quo loco vel naturales vel etiam manufactæ natationes sunt, iis potissimum utendum est; præcipuèque in his agitanda membra quæ maximè deficiunt: si id non est, balneum tamen prodest. Cibus esse debet ex mediâ materiâ, maximèque ex venatione: potio sine vino aquæ calidæ. Si tamen vetus morbus est, interponi quarto vel quinto die, purgationis causâ, vinum Græcum salsum prodest. Post cœnam utilis vomitus est.

2. Interdum verò etiam nervorum dolor oriri solet. In hoc casu non vomere, non medicamentis urinam movere, non exercitatione sudorem, ut quidam præcipiunt, expedit. Bibenda aqua est bis die. In lectulo leniter satis diù corpus perfricandum est, deindè re-tento spiritu: in ipsâ exercitatione potius superiores

partes movendæ : balneo rarò utendum : mutandum subindè peregrinationibus cœlum. Si dolor est, ea ipsa pars sine oleo, nitro ex aquâ perungenda est, deindè involvenda, et subjicienda pruna lenis et sulfur; atque ita diù suffumigandum : idque aliquandiù faciendum, sed jejuno, quùm benè jam concoxerit. Cucurbitulæ quoque sæpè dolenti parti admovendæ sunt, pulsandusque leniter inflatis vesicis bubulis is locus est. Utile est etiam sevum mîscere cum hyoscyami et urticæ contritis seminibus, sic ut omnium par modus sit, idque imponere : fovere aquâ in quâ sulfur decoctum sit. Utriculi quoque rectè imponuntur aquâ calidâ repleti, aut bitumen cum hordeaceâ farinâ mixtum : atque in ipso potissimum dolore utendum gestatione vehementi est : quod in aliis doloribus pessimum est.

3. Tremor autem nervorum æquè vomitu medicamentisque urinam moventibus intenditur. Inimica etiam habet balnea, assasque sudationes. Bibenda aqua est : acri ambulatione utendum, item unctionibus frictionibusque, maximè per seipsum : pilâ similibusque superiores partes dimovendæ : cibo quolibet utendum, dummodò concoctioni utique studeatur. Secundùm cibum curis abstinendum : rarissimâ venere utendum est : si quandò quis in eam prolapsus est, tùm oleo leniter diùque in lectulo perfricari manibus puerilibus potiùs quàm virilibus debet.

4. Suppurationes autem, quæ in aliquâ interiore parte oriuntur, ubi notæ fuerint, primùm id agere oportet per ea cataplasmata quæ reprimunt, ne coitus inutilis materiæ fiat : deindè, si hæc victa sunt, ut per eâ malagmata quæ digerunt, dissipetur. Quod si consecuti non sumus, sequitur ut evocetur; deindè, ut maturescat : omnis tunc vomicæ finis est, ut rumpatur : iudiciumque est pus vel alvo vel ore redditum. Sed nihil

facere oportet, quo minùs, quicquid est puris, excedat. Utendum maximè sorbitionibus est, et aquâ calidâ. Ubi pus ferri desiit, transeundum ad faciles quidem, sed tamen validiores et frigidos cibos, frigidamque aquam, sic ut ab egelidis tamen initium fiat. Primòque cum melle quædam edenda, ut nuclei pinei, vel Græcæ nuces, vel avellanæ: postea submovendum id ipsum, quo maturiùs induci cicatrix possit. Medicamentum eo tempore ulceri est succus assumptus vel porri vel marrubii, et omni cibo porrum ipsum adjectum. Oportebit autem uti in his partibus quæ non afficiuntur, frictionibus, item ambulationibus lenibus: vitandumque erit, ne vel luctando, vel currendo, vel aliâ ratione, sanescientia ulcera exasperentur: in hoc enim morbo perniciosus, ideòque omni modo cavendus sanguinis vomitus est.

LIBER QUARTUS.

□□□□□

SECT. I. **H**ACTENUS reperiuntur ea genera morborum, quæ in totis corporibus ita sunt, ut iis certæ sedes assignari non possint; nunc de his dicam quæ sunt in partibus. Facilius autem omnium interiorum morbi curationesque in notitiam venient, si prius eorum sedes breviter ostendero. Caput igitur eaque quæ in ore sunt, non linguâ tantummodò palatoque terminantur, sed etiam quatenus oculis nostris exposita sunt. In dextrâ sinistrâque circa guttur venæ grandes quæ σφαγίτιδες nominantur; itemque arteriæ quas καρωτίδες vocant, sursùm procedentes ultra aures feruntur. At in ipsis cervicibus glandulæ positæ sunt, quæ interdum cum dolore intumescunt. Deindè duo itinera incipiunt: alterum asperam arteriam nominant, alterum stomachum. Arteria exterior ad pulmonem, stomachus interior ad ventriculum fertur: illa spiritum, hic cibum recipit. Quibus quum diversæ viæ sint, quâ coeunt, exigua in arteriâ sub ipsis faucibus lingula est, quæ, quum spiramus, attollitur; quum cibum potionemque assumimus, arteriam claudit.

Ipsa autem arteria dura et cartilaginosa: in gutture assurgit, cæteris partibus residit. Constat ex circulis quibusdam, compositis ad imaginem earum vertebrarum quæ in spinâ sunt, ita tamen ut ex parte exteriori aspera, ex interiori, stomachi modo, lævis sit: eaque descendens ad præcordia, cum pulmone committitur. Is spongiosus; idcòque spiritus capax, et à tergo spinæ

ipsi junctus : in duas fibras ungulæ bubulæ modo dividitur. Huic cor annexum est, naturâ musculosum, in pectore sub sinistrore mammâ situm; duosque quasi ventriculos habet. At sub corde atque pulmone transversum ex validâ membranâ septum est, quod à præcordiis utrum diducit, idque nervosum, multis etiam venis per id discurrentibus : à superiore parte non solum intestina, sed jecur quoque lienemque discernit. Hæc viscera proximè, sed infra tamen posita, dextrâ sinistrâque sunt.

Jecur à dextrâ parte sub præcordiis ab ipso septo orsum, intrinsecus cavum, extrinsecus gibbum est : quod prominens leviter ventriculo insidet, et in quatuor fibras dividitur : ex inferiore verò parte ei fel inhæret. At lienis in sinistrâ, non eidem septo, sed intestino in-nexus est : naturâ mollis et rarus, longitudinis crassitudinisque modicæ; isque paulum à costarum regione in utrum excedens, et maximâ parte sub his conditur : atque hæc quidem juncta sunt. Renes verò diversi, qui lumbis sub imis coxis inhærent, à parte earum rotundi, ab alterâ resimi; qui et venosi sunt, et ventriculos habent, et tunicis super conteguntur. Ac viscerum quidem hæc sedes sunt. Stomachus verò, qui intestinorum principium, est nervosus, à septimâ spinæ vertebrâ incipit, circa præcordia cum ventriculo committitur. Ventriculus autem qui receptaculum cibi est, constat ex duobus tergoribus : isque inter lienem et jecur positus est, utroque ex his paulum super eum ingrediente: suntque etiam membranulæ tenues, per quas inter se tria ista connectuntur, jungunturque ei septo quod transversum esse supra posui. Indè ima ventriculi pars paulum in dexteriores partem conversa, in summum intestinum coarctatur. Hanc juncturam *πυλωρὸν* Græci vocant, quoniam, portæ modo, in inferiores partes ea quæ excreturi sumus, emittit.

Ab eâ jejunum intestinum incipit, non ita implicitum : cui tale vocabulum est , quia nunquàm quod accipit, continet; sed protinùs in inferiores partes transmittit. Indè tenuius intestinum est, in sinus vehementer implicitum : orbes verò ejus per membranulas singuli cum inferioribus connectuntur; qui in dexteriores partes conversi, et è regione dexteroris coxæ finiti, superiores tamen partes magis complent. Deindè id intestinum cum crassiore altero transverso committitur; quod à dextrâ parte incipiens, in sinisteriorem pervium et longum est, in dexteriores non est; ideòque cæcum nominatur. At id quod pervium est, latè fustum atque sinuatum, minùsque quàm superiora intestina nervosum, ab utrâque parte huc atque illuc volutum, magis tamen sinisteriores inferioresque partes tenens, contingit jecur atque ventriculum : deindè cum quibusdam membranulis à sinistro rene venientibus jungitur; atque hinc in dextra recurvatum in imo dirigitur, quâ excernit : ideòque id ibi rectum intestinum nominatur. Contegit verò universa hæc omentum, ex inferiore parte læve et adstrictum, ex superiore mollius: cui adeps quoque innascitur, quæ sensu, sicut cerebrum quoque et medulla, caret. At à renibus singulæ venæ, colore albæ, ad vesicam feruntur; οὐρητιῆρας Græci vocant, quod per eas indè descendentem urinam in vesicam destillare concipiunt. Vesica autem in ipso sinu nervosa et duplex, cervice plena atque carnosa, jungitur per venas cum intestino eoque osse quod pubi subest. Ipsa soluta atque liberior est; aliter in viris atque in feminis posita : nam in viris juxta rectum intestinum est, potiùs in sinistram partem inclinata; in feminis super genitale earum posita est, suprâque lapsa ab ipsâ vulvâ sustinetur. Tùm in masculis iter urinæ spatiosius et compressius à cervice hujus descendit ad colem : in feminis brevius et plenius, super vulvæ cervicem se ostendit.

Vulva autem in virginibus quidem admodum exigua est: in mulieribus verò, nisi ubi gravidæ sunt, non multò major quàm ut manu comprehendatur. Ea, rectà continuatâque cervice quem canalem vocant, contra mediam alvum orsa, indè paulum ad dexteriores coxam convertitur; deindè super rectum intestinum progressa, iliis feminae latera sua innectit. Ipsa autem ilia inter coxas et pubem imo ventre posita sunt. A quibus ac pube abdomen sursum versum ad præcordia pervenit: ab exteriori parte evidenti cute, ab interiori levi membranâ inclusum, quæ omento jungitur; περιτόναιος autem à Græcis nominatur.

SECT. II. I. His veluti in conspectum quemdam, quatenus scire curanti necessarium est, adductis, remedia singularum laborantium partium exsequar, orsus à capite: sub quo nomine nunc significo eam partem, quæ capillis tegitur: nam oculorum, aurium, dentium dolor, et si quis similis est, aliàs erit explicandus.

In capite autem interdum acutus et pestifer morbus est, quam κεφαλαίαν Græci vocant: cujus notæ sunt horror validus, nervorum resolutio, oculorum caligo, mentis alienatio, vomitus, sic ut vox supprimatur, vel sanguinis ex naribus cursus, sic ut corpus frigescat, anima deficiat: præter hæc, dolor intolerabilis, maxime circa tempora vel occipitium. Interdum autem in capite longa imbecillitas, sed neque gravis, neque periculosa, per hominis ætatem est: interdum gravior dolor, sed brevis, neque tamen mortiferus; qui vel vino, vel cruditate, vel frigore, vel igne aut sole contrahitur. Hique omnes dolores modò cum febre, modò sine hæc sunt: modò in toto capite; interdum sic ut oris quoque proximam partem excrucient. Præter hæc etiam invenitur genus, quod potest longum esse: ubi humor cutem inflat, eaque intumescit, et prementi digito cedit:

ὁδροκέφαλον Græci appellant. Ex his id quod secundo loco positum est, dùm leve est, quâ sit ratione curandum, dixi, quùm persequeretur ea quæ sani homines in imbecillitate partis alicujus facere deberent. Quæ verò auxilia sint capitis, ubi cum febre dolor est, eo loco explicitum est, quo febrium curatio exposita est. Nunc de cæteris dicendum est. Ex quibus id quod acutum est, idque quod supra consuetudinem intenditur, idque quod ex subitâ causâ, etsi non pestiferum, tamen vehemens est, primam curationem habet, quâ sanguis mitigatur. Sed id, nisi intolerabilis est dolor, supervacuum est: satiusque est abstinere à cibo, si fieri potest, etiam à potione; si non potest, aquam bibere. Si postero die dolor remanet, alvum ducere, sternutamenta evocare, nihil assumere nisi aquam. Sæpè enim dies unus aut alter totum dolorem hâc ratione discutit, utique si ex vino vel cruditate origo est. Si verò in his auxilii parùm est, tonderi oportet ad cutem: deindè considerandum est, quæ causa dolorem excitavit. Si calor, aquâ frigidâ multâ perfundere caput expedit: spongiam concavam imponere, subindè in aquâ frigidâ expressam; ungere rosâ et aceto, vel potiùs his tinctam lanam succidam imponere, aliave refrigerantia cataplasmata. At si frigus nocuit, caput oportet perfundere aquâ calidâ marinâ, vel certè salsâ, aut in quâ laurus decocta sit; tùm caput vehementer perfricare; deindè calido oleo implere et veste velare. Quidam etiam id devinciunt: alii cervicalibus vestimentisque onerant, et sic levantur: alios calida cataplasmata adjuvant. Ergo etiam, ubi causa incognita est, videre oportet, refrigerantia magis an calefacientia leniant, et his uti quæ experimentum approbarit. At si parùm causa discernitur, perfundere caput, primùm aquâ calidâ, sicut suprâ præceptum est, vel salsâ, vel ex lauro decoctâ, tùm frigidâ poscâ. Illa

in omni vetusto capitis dolore communia sunt : sternutamenta excitare, inferiores partes vehementer perfricare, gargarizare iis quæ salivam movent : cucurbitulas temporibus et occipitio admovere, sanguinem ex naribus detrahere, resinâ subindè tempora pervellere, et imposito sinapi exulcerare ea quæ malè habent, antè linteolo subjecto, ne vehementer arrodant; candentibus ferramentis, ubi dolor est, ulcera excitare, cibum permodicum cum aquâ sumere : ubi levatus est dolor, in balneum ire : ibi multâ aquâ priùs calidâ, deindè frigidâ per caput perfundi. Si discussus ex toto dolor est, etiam ad vinum reverti; sed postea semper, antequam quicquam aliud, aquam bibere. Dissimile est id genus quod humorem in caput contrahit : in hoc tonderi ad cutem necessarium est : deindè imponere sinapi sic ut exulceret : si id parùm profuit, scalpello utendum est. Illa cum hydropicis communia sunt, ut exerceatur, insudet, vehementer perfricetur, cibus potionibusque utatur urinam præcipuè moventibus.

2. Circa faciem verò morbus innascitur, quem Græci *κυνικὸν πνεύμα* nominant. Is cum acutâ ferè febre oritur : os cum motu quodam pervertitur, idèoque nihil aliud est quàm distentiò oris. Accedit crebra coloris in facie totoque corpore mutatio : somnus in promptu est.

In hoc sanguinem mittere optimum est. Si finitum eo malum non est, ducere alvum : si ne sic quidem discussum est, albo veratro vomitum movere : præter hæc necessarium est vitare solem, lassitudinem, vinum. Si discussum his non est, utendum est cursu et frictione in eo quod læsum est, leni et multâ; in reliquis partibus breviori sed vehementi. Prodest etiam movere sternutamenta, caput radere, idque perfundere aquâ calidâ, vel marinâ, vel certè salsâ, sic ut ei quo-

que sulfur adjiciatur: post perfusionem iterum perfrire, sinapi manducare; eodemque tempore affectis oris partibus ceratum, integris item sinapi, donec arrodatur, imponere. Cibus aptissimus ex mediâ materiâ est.

3. At si lingua resoluta est, quod interdum ex morbo aliquo fit, sic ut sermo hominis non explicetur: oportet gargarizare ex aquâ in quâ vel thymum, vel hyssopum, vel nepeta decocta sit; aquam bibere; caput, et os, et ea quæ sub mento sunt, et cervicem vehementer perfricare; lasere linguam ipsam linere; manducare quæ sunt acerrima, id est, sinapi, allium, cepam; magnâ vi luctari, ut verba exprimantur; exerceri retento spiritu, caput sæpè aquâ frigidâ perfundere, nonnunquam multam esse radiculam, deinde vomere.

4. Destillat autem humor de capite interdum in nares, quod lene est; interdum in fauces, quod pejus est; interdum etiam in pulmonem, quod pessimum est. Si in nares destillaverit, tenuis per has pituita profluit, caput leniter dolet, gravitas in eo sentitur, frequentia sternutamenta sunt: si in fauces, has exasperat, tussiculam movet: si in pulmonem, præter sternutamenta et tussim, est etiam capitis gravitas, lassitudo, sitis, æstus, biliosa urina. Aliud autem, quamvis non multum distans, malum gravedo est. Hæc nares claudit, vocem obtundit, tussim siccam movet: sub eadem verò salsa est saliva, sonant aures, venæ moventur in capite, turbi daurina est. Hæc omnia *κορύζας* Hippocrates nominat: nunc video apud Græcos in gravedine hoc nomen servari: destillationem *κατασταγµὸν* appellari. Hæc autem brevia; sed, si neglecta sunt, longa esse consuerunt. Nihil pestiferum est, nisi quod pulmonem exulcerat. Ubi aliquid ejusmodi sentimus, protinus abstinere à sole, balneo, vino, venere debemus: inter quæ

unctione et assueto cibo nihilominus uti licet. Ambulatione tantum non acri, sed rectâ utendum est, et post eam caput atque os suprâ quinquagies perfricandum: raròque fit ut, si biduo vel certè triduo nobis temperavimus, id vitium non levetur. Quo levato, si in destillatione crassa facta pituita est, vel in gravedine nares magis patent, balneo utendum est, multâque aquâ prius calidâ, post egelidâ, fovendum os caputque; deindè cum cibo pleniore vinum bibendum. At si æquè tenuis die quarto pituita est, vel nares æquè clausæ videntur, assumendum est vinum Aminæum austerum; deindè rursus biduo aqua: post quæ ad balneum et ad consuetudinem revertendum est. Neque tamen illis ipsis diebus, quibus aliqua ex consuetis omittenda sunt, expedit tanquàm ægros agere; sed cætera omnia quasi sanis facienda sunt, præter quàm si diutiùs aliquem et vehementiùs ista sollicitare consuerunt: huic enim quædam curiosior observatio necessaria est. Igitur huic, si in nares vel in fauces destillavit, præter ea quæ suprâ retuli, protinùs primis diebus multum ambulandum est, perfricandæ vehementer inferiores partes, levior frictio adhibenda thoraci erit, levior capiti, demenda assueto cibo pars dimidia, sumenda ova, amyllum similiaque, quæ pituitam faciunt crassiorem: siti, quanta maxima sustineri potest, pugnandum. Ubi per hæc idoneus aliquis balneo factus, eoque usus est, adjiciendus est cibo pisciculus aut caro; sic tamen, ne protinùs justus modus cibi sumatur: vino meraco copiosiùs utendum est. At si in pulmonem quoque destillat, multò magis et ambulatione et frictione opus est, eademque adhibitâ ratione in cibis. Si non satis illa proficiunt, acrioribus utendum est, magis somno indulgendum, abstinendumque à negotiis omnibus: aliquandò, sed seriùs, balneum tentandum. In gravedine autem, primo die quiescere,

neque esse neque bibere, caput velare, fauces lanâ circumdare : postero die surgere, abstinere à potione, aut si res coegerit, non ultrâ heminam aquæ assumere : tertio die panis non itâ multum ex parte interiore cum pisciculo vel levi carne sumere, aquam bibere. Si quis sibi temperare non potuerit, quominus pleniore victu utatur, vomere : ubi in balneum ventum est, multâ aquâ calidâ caput et os fovere usque ad sudorem, tûm ad vinum redire. Post quæ vix fieri potest ut idem incommodum maneat : sed si manserit, utendum erit cibis frigidis, aridis, levibus, humore quàm minimo ; servatis frictionibus exercitationibusque, quæ in omni tali genere valetudinis necessariae sunt.

SECT. III. A capite transitus ad cervicem est, quæ gravibus admodum morbis obnoxia est.

1. Neque tamen alius importunior acutiorque morbus est, quàm is qui quodam rigore nervorum modò caput scapulis, modò mentum pectori adnectit, modò rectam et immobilem cervicem intendit. Primum Græci ὀπισθότονον, sequentem ἐμπροσθότονον, ultimum τέτανον, appellant : quamvis minùs subtiliter quidam indiscretis his nominibus utuntur. Ea sæpè intrâ quartum diem tollunt : si hunc evaserunt, sine periculo sunt. Eadem omnia ratione curantur ; idque convenit. Sed Asclepiades utique mittendum sanguinem credidit : quod quidam vitandum esse dixerunt, eo quod maximè tûm corpus calore egeret, isque esset in sanguine verum. Hoc quidem falsum est : neque enim natura sanguinis est ut utique caleat ; sed ex his quæ in homine sunt, hic celerrimè vel calescit vel refrigescit. Mitti verò necne debeat, ex his intelligi potest, quæ de sanguinis missione præcepta sunt. Utique autem rectè datur castoreum, et cum hoc piper vel laser : deindè opus est fomento humido et calido. Itaque plerique aquâ calidâ

multâ cervices subindè perfundunt. Id in præsentia levat; sed opportuniore nervos frigori reddit: quod utique vitandum est. Utilius igitur est, cerato liquido primum cervicem perungere; deindè admoveve vesicas bubulas vel utriculos oleo calido repletos, vel ex farinâ calidum cataplasma, vel piper rotundum cum ficu contusum. Utilissimum tamen est, humido sale fovere: quod quomodò fieret jam ostendi. Ubi eorum aliquid factum est, admoveve ad ignem, vel si æstas est, in sole ægrum oportet; maximèque oleo vetere, si id non est, Syriaco; si ne id quidem est, adipe quàm vetustissimâ cervicem et scapulas et spinam perfricare. Frictio quùm omnibus in homine vertebrais utilis sit, tùm iis præcipuè quæ in collo sunt. Ergò die nocteque, interpositis tamen quibusdam temporibus, hoc remedio utendum est. Dùm intermittitur, imponendum malagma aliquod ex calefacientibus. Cavendum verò est præcipuè frigus: ideòque in eo conclavi in quo cubabit æger, ignis continuus esse debet, maximusque tempore autelucano quo præcipuè frigus intenditur. Neque inutile erit caput attonsum habere, idque irino vel cyprino calido madefacere, et superimposito pileo velare; nonnunquàm etiam in calidum oleum totum descendere, vel in aquam calidam in quâ fenum græcum decoctum sit, et adjecta olei pars tertia. Alvus quoque ducta sæpè superiores partes resolvit. Si verò etiam vehementiùs dolor crevit, admovendæ cervicibus cucurbitulæ sunt, sic ut cutis incidatur: eadem aut ferramentis aut sinapi adurenda. Udi levatus est dolor moverique cervix cœpit, scire licet cedere remediis morbum: sed diù vitandus cibus, quisquis mandendus est. Sorbitionibus utendum, itemque ovis sorbilibus, aut mollibus; jus aliquod assumendum. Id si benè processerit, jamque ex toto rectè se habere cervices videbuntur, incipiendum erit à pul-

ticulâ vel intritâ benè madidâ. Celerius tamen etiam panis mandendus quàm vinum gustandum; siquidem hujus usus præcipuè periculosus, ideòque in longum tempus differendus est.

SECT. IV. 1. Ut hoc autem morbi genus circa totam cervicem, sic alterum æquè pestiferum acutumque in faucibus esse consuevit. Nostri anginam vocant: apud Græcos nomen prout species est: interdum enim nequè rubor, neque tumor ullus apparet; sed corpus aridum est, vix spiritus trahitur, membra solvuntur: id συνάγγην vocant. Interdum lingua faucesque cum rubore intumescunt, vox nihil significat, oculi vertuntur, facies pallet singultusque est: id χυνάγγη vocatur. Illa communia sunt; æger non cibum devorare, non potionem potest: spiritus ejus intercluditur. Levius est, ubi tumor tantummodò et rubor est, cætera non sequuntur: id παρασυνάγγην appellant. Quicquid est, si vires patiuntur, sanguis mittendus est, et si non abundat, secundum est, ducere alvum. Cucurbitula quoque rectè sub mento et circa fauces admoveatur, ut id quod strangulat, evoct. Opus est deindè fomentis humidis: nam sicca spiritum elidunt. Ergò admoveere spongiâs oportet, quæ melius in calidum oleum quàm in calidam aquam subindè demittuntur: efficacissimusque est hîc quoque salis calidi succus. Tùm commodum est, hyssopum, vel nepetam, vel thymum, vel absinthium, vel etiam furfures aut ficus aridas cum mulsâ aquâ decoquere, eâque gargarizare: post hæc palatum ungere vel felle taurino, vel eo medicamento quod ex moris est. Polline etiam piperis id rectè respergitur. Si per hæc parùm proficitur, ultimum est incidere satis altis plagis sub ipsis maxillis suprâ collum, vel in palato circâ uvam, vel eas venas quæ sub linguâ sunt, ut per ea vulnera morbus erumpat. Quibus si non fuerit æger adjutus, scire licet

malo victum esse. Si verò his morbus levatus est, jamque fauces et cibum et potum capiunt, facilis ad bonam valetudinem recursus est. Atque interdum natura quoque adjuvat, si ex angustiore sede vitium transit in latiore: itaque rubore et tumore in præcordiis orto, scire licet fauces liberari. Quicquid autem eas levarit, incipiendum est ab humidis, maximèque aquâ mulsâ decoctâ: deindè assumendi molles et non acres cibi sunt, donec fauces ad pristinum habitum revertantur. Vulgò audio, si quis pullum hirundinis ederit, anginâ toto anno non periclitari; servatumque eum ex sale, quum is morbus urget, comburi, carbonemque ejus contritum in aquam mulsam quæ potui detur, infriari et prodesse. Id quum idoneos auctores ex populo habeat, neque habere quicquam periculi possit, quamvis in monumentis medicorum non legerim, tamen inserendum huic operi meo credidi.

2. Est etiam circa fauces malum, quod apud Græcos aliud atque aliud nomen habet, prout se intendit. Omne in difficultate spirandi consistit: sed hæc dum modica est, neque ex toto strangulat, δύσπνοια appellatur; quum vehementior est, ut spirare æger sine sono et anhelatione non possit, ἄσθμα; quum accessit id quoque, ne nisi rectâ cervice spiritus trahatur, ὀρθόπνοια. Ex quibus id quod primum est, potest diutiùs trahi: duo insequentia acuta esse consuerunt. His communia sunt; quod propter angustias per quas spiritus evadit, sibilum edit: dolor in pectore præcordiisque est, interdum etiam in scapulis; isque modò decedit, modò revertitur: ad hæc tussicula accedit. Auxilium est, nisi aliquid prohibet, in sanguinis detractione. Neque id satis est, sed lacte quoque venter solvendus est: liquanda alvus, interdum etiam ducenda: quibus extenuatum corpus incipit spiritum trahere commodiùs. Caput au-

tem etiam in lecto sublime habendum est: thorax fomentis cataplasmatisque calidis aut siccis, aut etiam humidis, adjuvandus est; et postea malagma superimponendum, vel certe ceratum ex cyprino vel irino unguento. Sumenda deinde jejuno potui mulsa aqua cum qua vel hyssopus cocta vel contrita capparidis radix sit. Delingitur etiam utiliter aut nitrum, aut nasturtium album frictum; deinde contritum et cum melle mixtum: simulque coquantur mel, galbanum, resina terebinthina: ea autem ubi coierunt, ex his quod fabae magnitudinem habet, quotidie sub lingua liquatur: aut sulfuris ignem non experti pondo denarii sextans, abrotani pondo denarii in vini cyatho teruntur, idque tepefactum sorbetur. Est etiam non vana opinio vulpinum jecur, ubi siccum et aridum factum est, contundi oportere, polentamque ex eo potioni adspergi; vel ejusdem pulmonem quam recentissimum assum, sed sine ferro coctum, edendum esse. Præter hæc, sorbitionibus et leuibus cibis utendum est, interdum vino tenui austero, nonnumquam vomitu. Prosunt etiam, quæcumque urinam movent; sed nihil magis quam ambulatio lenta penè usque ad lassitudinem; frictio multa præcipuè inferiorum partium, vel in sole vel ad ignem, et per seipsum et per alios, usque ad sudorem.

3. In interiore verò faucium parte interdum exulceratio esse consuevit. In hac plerique extrinsecus cataplasmatibus calidis fomentisque humidis utuntur. Volunt etiam vaporem calidum ore recipi, per quæ molliores alii partes eas fieri dicunt, opportuniioresque vitio jam hærenti. Sed si benè sic vitari frigus potest, tuta illa præsidia; si metus ejus est, supervacua sunt. Utique autem perfricare fauces periculosum est; exulcerat enim: neque utilia sunt quæ urinæ movendæ sunt; quia possunt, dum transeunt, ibi quoque pituitam extenuare,

quam suppressi melius est. Asclepiades multarum rerum quas ipsi quoque secuti sumus, auctor bonus, accitum ait quàm acerrimum esse sorbendum; hoc enim sine ullâ noxâ comprimit ulcera. Sed id suppressere sanguinem potest, ulcera ipsa sanare non potest. Melius huic rei lycium est; quod idem quoque æquè probat: vel porri vel marrubii succus, vel nuces Græcæ cum tragacantho contritæ et cum passo mixtæ, vel lini semen contritum et cum dulci vino mixtum. Exercitatio quoque ambulandi currendique necessaria est: frictio à pectore vehemens toti inferiori parti adhibenda. Cibi verò esse debent neque nimium acres, neque asperi; mel, lenticula, tragus, lac, ptisana, pinguis caro, præcipuèque porrum et quicquid cum hoc mixtum est. Potionis quàm minimum esse convenit: aqua dari potest vel pura, vel in quâ malum cotoneum palmulæve decoctæ sunt. Gargarizationes quoque lenes: sin hæ parum proficiunt, reprimentes utiles sunt. Hoc genus neque acutum est, et potest esse non longum: curationem tamen maturam, ne vehementer et diù lædat, desiderat.

4. Tussis verò ferè propter faucium exulcerationem molesta est; quæ multis modis contrahitur. Itaque illis restitutis, ipsa finitur: solet tamen interdum per se quoque malè habere, et vix quùm vetus facta est, eliditur; ac modò arida est, modò pituitam citat. Oportet hyssopum altero quoque die bibere: spiritu retento currere, sed minimè in pulvere: ac lectione uti vehementi quæ primò impeditur à tussi, post eam vincit: tùm ambulare, deindè per manus quoque exerceri, et pectus diù perfricari, post hæc quàm pinguissimæ ficûs uncias tres super prunam incoctas esse. Præter hæc, si humida tussis est, prosunt frictiones validæ cum quibusdam calefacientibus, sic ut caput quoque simul vehementer per-

fricetur : item cucurbitulæ pectori admotæ, sinapi ex parte exteriori faucibus impositum , donec leviter exulceret ; potio ex menthâ nucibusque Græcis et amylo ; primòque assumptus panis aridus, deindè aliquis cibus lenis. At si sicca tussis est, quùm ea vehementissimè urget, adjuvat vini austeri cyathus assumptus; dùm ne ampliùs id, interposito tempore aliquo, quàm ter aut quater fiat : item laseris quàm optimi paulùm devorare opus est; porri vel marrubii succum assumere; scillam delingere; acetum ex eâ, vel certè acre sorbere, aut cum spicâ allii contriti duos vini cyathos. Utilis etiam in omni tussi est peregrinatio, navigatio longa, loca maritima, natationes : cibus interdùm mollis, ut malva, urtica; interdùm acer, ut lac cum allio coctum : sorbitiones quibus laser sit adjectum, aut in quibus porrum incoctum tabuerit. Ovum sorbile sulfure adjecto, sorbeatur, potui primùm aqua calida, deindè in vicem aliis diebus hæc, aliis verò vinum.

5. Magis terreri potest aliquis, quùm sanguinem expuit : sed id modò minùs, modò plus periculi habet. Exit modò ex gingivis, modò ex ore; et quidem ex hoc interdùm etiam copiosè, sed sine tussi, sine ulcere, sine gingivarum ullo vitio, ita ut nihil exscreetur. Verùm ut ex naribus, sic ex ore aliquandò prorumpit : atque interdùm profluit sanguis, interdùm simile aquæ quiddam in quâ caro recens lota est : nonnunquàm autem is à summis faucibus fertur, modò exulceratâ eâ parte, modò non exulceratâ; sed aut ore venæ alicujus adaperto, aut tuberculis quibusdam natis, ex hisque sanguine erumpente. Quod ubi incidit, neque lædit potio aut cibus, neque quicquam, ut ex ulcere exscreatur. Aliquandò verò, gutture et arteriis exulceratis, frequens tussis sanguinem quoque extrudit : interdùm etiam fieri solet, ut aut ex pulmone, aut ex pectore,

aut ex latere, aut ex jecinore feratur. Sæpè feminae quibus sanguis per menstrua non respondet, hunc expuunt: veteresque medici ferunt, vel exesâ parte aliquâ sanguinem exire, vel ruptâ, vel ore alicujus venæ patefacto. Primam διάβρωσιν, secundam ῥήξιν, tertiam ἀναστόμωσιν appellant. Ultima minimè nocet, prima gravissimè: ac sæpè quidem evenit ut sanguinem pus sequatur. Interdùm autem qui sanguinem ipsum suppressit, satis ad valetudinem profuit: sed si secuta ulcera sunt, si pus, si tussis est, prout sedes ipsa est, ita varia et periculosa genera morborum sunt. Si verò sanguis tantùm fluit, expeditius et remedium et finis est.

Neque ignorari oportet, eis quibus fluere sanguis solet, aut quibus spina dolet, coxæve, aut post cursum vehementem vel ambulationem, dùm febris absit, non esse inutile sanguinis mediocre profluvium; idque per urinam redditum ipsam quoque lassitudinem solvere: ac ne in eo quidem terribile esse, qui ex superiore loco decidit: si tamen in ejus urinâ nihil aliud novavit: neque vomitum hujus afferre periculum, etiam quùm repetit, si antè confirmare et implere corpus licuit: et ex toto nullum nocere, qui in corpore robusto neque nimius est, neque tussim aut calorem movet. Hæc pertinent ad universum: nunc ad ea loca quæ proposui, veniam. Si ex gingivis exit, portulacam manducasse satis est: si ex ore, continuisse eo merum vinum; si id parùm proficit, acetum. Si inter hæc quoque graviter erumpit, quia consumere hominem potest, commodissimum est impetum ejus, admotâ occipitio cucurbitulâ, sic ut cutis quoque incidatur, avertere. Si id mulieri cui menstrua non feruntur, evenit, eandem cucurbitulam, incisis inguinibus ejus, admovere. At si ex faucibus interioribusve partibus processit; et metus major est, et cura major adhibenda. Sanguis mittendus est:

et si nihilominus ex ore processit, iterum tertioque, et quotidie paulum aliquid: protinus autem debet sorbere vel acetum, vel etiam cum thure plantaginis aut porri succum, imponendaque extrinsecus supra id quod dolet, lana succida ex aceto est; et id spongiâ subinde refrigerandum. Erasistratus horum crura quoque et femora brachiaque pluribus locis deligabat: id Asclepiades adeo non prodesse, ut etiam inimicum esset, proposuit. Sed id sæpè commodè respondere experimenta testantur. Neque tamen pluribus locis deligari necesse est; sed sat est infra inguina et super talos, summosque humeros etiam brachia. Tùm si febris urget, danda est sorbitio; et potui aqua in quâ aliquid ex his quæ alvum adstringunt, decoctum sit. At si abest febris, vel elota alica, vel panis ex aquâ frigidâ, et molle quoque ovum dari potest: potui vel idem quod suprâ scriptum est, vel vinum dulce, vel aqua frigida: sed sic bibendum erit, ut sciamus huic morbo sitim prodesse. Præter hæc necessaria sunt quies, securitas, silentium. Caput hujus quoque cubantis sublime esse debet, rectèque tondetur: facies sæpè aquâ frigidâ fovenda est. At inimica sunt vinum, balneum, Venus, in cibo oleum, acriora omnia, item calida fomenta, conclave calidum et inclusum, multa vestimenta corpori injecta: etiam frictiones, nisi ubi benè sanguis jam conquievit. Tùm verò incipiendum est à brachiis cruribusque; à thorace abstinendum. In hoc casu per hiemem locis maritimis, per æstatem mediterraneis opus est.

SECT. V. Faucibus subest stomachus: in quo plura et longa vitia incidere consuerunt. Nam modò hunc ingens calor, modò inflatio, modò inflammatio, modò exulceratio afficit: interdum pituita, interdum bilis oritur, frequentissimumque est ejus malum, quo resolvitur: neque ullâ re magis aut afficitur aut corpus

afficit. Ut diversa autem vitia ejus, sic etiam remedia sunt. Ubi exæstuat, aceto cum rosâ extrinsecûs subindè fovendus est, imponendusque pulvis cum oleo, et ea cataplasmata quæ simul et reprimunt et molliunt. Potui, nisi quid obstat, egelida aqua præstanda. Si inflatio est, prosunt admotæ cucurbitulæ; neque incidere cutem necesse est: prosunt sicca et calida fomenta, sed non vehementissima. Interponenda abstinentia est: utilis in jejuno potio est absinthii aut hyssopi aut rutæ. Exercitatio primò lenis, deindè major adhibenda est; maximèque quæ superiores partes moveat: quod genus in omnibus stomachi vitiis aptissimum est. Post exercitationem opus est unctione, frictione, balneo quoque nonnunquàm, sed rariùs; interdùm alvi ductione. Cibis deindè calidis, neque inflantibus: eodemque modo calidis potionibus, primo aquæ, post, ubi resedit inflatio, vini austeri. Illud quoque in omnibus stomachi vitiis præcipiendum est, ut quo modo se quisque refecerit, eo sanus utatur: nam redit huic imbecillitas sua, nisi iisdem defenditur bona valetudo, quibus reddita est. At si inflammatio aliqua est quam ferè tumor et dolor sequitur, prima sunt quies et abstinentia, lana sulfurata circumdata, in jejuno absinthium. Si ardor stomachum urget, is aceto cum rosâ subindè fovendus est: deindè cibis quidem utendum est modicis; imponenda verò extrinsecûs quæ simul et reprimunt et molliunt: deindè, his detractis, utendum calidis ex farinâ cataplasomatis quæ reliquias digerant: interdùm alvus ducenda: adhibenda exercitatio et cibus plenior.

At si exulceratio stomachum infestat, eadem ferè facienda sunt quæ in faucibus exulceratis præcepta sunt. Exercitatio, frictio inferiorum partium adhibenda: adhibendi lenes et glutinosi cibi, sed citra satieta-

tem : omnia acria atque acida removenda. Vino, si febris non est, dulci, aut si id inflat, certè leni utendum: sed neque præfrigido neque nimis calido. Si verò pituitâ stomachus impletur, necessarius modò in jejuno, modò post cibum vomitus est: utilis exercitatio, gestatio, navigatio, frictio. Nihil edendum bibendumque, nisi calidum; vitatis tantùm his quæ pituitam contrahere consuerunt. Molestius est, si stomachus bile vitiosus est. Solent autem hi qui sic tentantur, interpositis quibusdam diebus, hanc, et quidem, quod pessimum est, atram vomere. His rectè alvus ducitur, potiones ex absinthio dantur; necessaria est gestatio, navigatio, et si fieri potest, ex nauseâ vomitus: vitanda cruditas, sumendi cibi faciles et stomacho non alieni, vinum austerum. Vulgatissimum verò pessimumque stomachi vitium est resolutio, id est, quùm cibi non tenax est, soletque desinere ali corpus, ac sic tabe consumi. Huic generi inutilissimum balneum est: lectiones exercitationesque superioris partis necessariae, item unctiones frictionesque: hinc perfundi frigidâ, atque in eâdem natâre, canalibus ejusdem subijcere stomachum ipsum, et magis etiam à scapulis id quod contra stomachum est: consistere in frigidis medicatisque fontibus, quales Cutiliarum Sumbruinarumque sunt, salutare est. Cibi quoque assumendi sunt frigidi, qui potius difficulter coquuntur, quàm facilè vitiantur. Ergò plerique qui nihil aliud concoquere possunt, bubulam coquunt. Ex quo colligi potest, neque venationem, neque piscem dari debere nisi generis durioris. Potui quidem aptissimum est vinum frigidum, vel certè benè calidum meracum, potissimùm Rheticum vel Allobrogicum aliudve, quod et austerum et resinâ conditum est: si id non est, quàm asperrimum, maximèque Signinum. Si cibus non continetur, danda aqua, et elicien-

duus plenior vomitus est; iterumque dandus cibus, et tunc admovendæ duobus infra stomachum digitis cucurbitulæ, ibique duabus aut tribus horis continendæ sunt. Si simul et vomitus et dolor est, imponenda supra stomachum est lana succida, vel spongia ex aceto, vel cataplasma quod refrigeret: perfricanda verò non diu sed vehementer brachia et crura, et calefacienda. Si plus doloris est, infra præcordia quatuor digitis cucurbitulâ utendum est, et protinus dandus panis ex poscâ frigidâ: si non continuit, post vomitum leve aliquid ex his quæ non aliena stomacho sint: si ne id quidem tenuit, singuli cyathi vini, singulis interpositis horis, donec stomachus consistat. Valens etiam medicamentum est radiculæ succus, valentiùs, acidi punici mali cum pari modo succi qui ex dulci punico malo est, adjecto etiam intubi succo et menthæ, sed hujus minimâ parte; quibus tantumdem quantum in his omnibus est, aquæ frigidæ quàm optimè miscetur: id enim plus quàm vinum ad comprimendum stomachum prodest. Supprimendus autem vomitus est qui per se venit, etsi nausea est. Aut si coacuit intus cibus aut computruit, quorum utrumlibet ructus ostendit, ejiciendus est; protinusque, cibis assumptis iisdem quos proximè posui, stomachus restituendus. Ubi sublatus est præsens metus, ad ea redeundum est quæ supra præcepta sunt.

SECT. VI. Stomachus lateribus cingitur, atque in his quoque vehementes dolores esse consueverunt. Eorum initium vel ex frigore, vel ex ictu, vel ex nimio cursu, vel ex morbo est. Sed interdum id malum intrâ dolorem est: isque modò tardè, modò celeriter solvitur: interdum ad perniciem quoque procedit, oriturque acutus morbus qui πλευριτικός à Græcis nominatur. Huic dolori lateris febris et tussis accedit; et per hanc

excreatur, si tolerabilis morbus est, pituita; si gravis, sanguis. Interdum etiam sicca tussis est, quæ nihil emolitur: idque vitio primo gravius, secundo tolerabilius est. Remedium verò est magni et recentis doloris sanguis missus: at sive levior, sive vetustior casus est, vel supervacuum, vel serum id auxilium est; confugiendumque ad cucurbitulas est, antè summâ cute incisâ. Rectè etiam sinapi ex aceto super pectus imponitur, donec ulcera pustulasque excitet; et tùm medicamentum, quod humorem illuc citet. Præter hæc, circumdare primùm oportet latus hapso lanæ sulfuratæ: deindè, quùm paululùm inflammatio se remisit, siccis et calidis fomentis uti. Ab his transitus ad malagmata est. Si vetustior dolor remanet, novissimè resinâ impositâ discutitur. Utendum cibus potionibusque calidis: vitandum frigus. Inter hæc tamen non alienum est extremas partes oleo et sulfure perfricare: si levata tussis est, leni lectione uti; jamque et acres cibos et vinum meracius assumere. Quæ ità à medicis præcipiuntur, ut tamen sine his rusticos nostros epota ex aquâ trixago satis adjuvet. Hæc in omni lateris dolore communia sunt: plus negotii est, si acutus quoque morbus his factus est. In hoc, præter ea quæ suprâ posita sunt, hæc animadvertenda sunt; ut cibus sit quàm maximè tenuis et lenis, præcipuèque sorbitio, eaque ex ptisanâ potissimùm, aut jus in quo porrus cum pullo gallinaceo coctus sit: idque non nisi tertio die detur, si tamen per vires licebit: potui verò aqua mulsa, in quâ hyssopum aut ruta decocta sit. Quæ quibus temporibus danda sint, ex ratione vel adauctæ vel levatæ febris apparebit; sic ut in remissione quàm maximâ dentur: cum eo tamen ut sciamus non esse ejus generis tussi aridas fauces committendas: sæpè enim, ubi nihil est quod excreetur, continuatur et strangulat. Ob quam cau-

sam dixi etiam pejus id genus esse fussis, quod nihil, quàm quod pituitam moveret. Sed hic vinum sorbere, ut suprà præcepimus, morbus ipse non patitur; in vicem ejus cremor ptisanæ sumendus est. Ut his autem in ipso morbi fervore sustinendus æger est, sic ubi paulum is se remisit, alimenta pleniora et vini quoque aliquid dari potest; dum nihil detur quod aut refrigeret corpus, aut fauces asperet. Si in refectione verò manserit tussis, intermittere oportebit uno die; posteroque, cum cibo vini paulò plus assumere. At invalescente quoque tussi, tum non erit alienum, ut suprà quoque positum est, vini cyathos sorbere; sed in hoc genere valetudinis, dulce vel certè lene commodius est. Si malum inveteravit, athletico victu corpus firmandum est.

SECT. VII. A compagine verò corporis ad viscera transeundum est, et in primis, ad pulmonem veniendum; ex quo vehemens et acutus morbus oritur, quem *περιπνευμονιχὸν* Græci vocant. Ejus hæc conditio est: pulmo totus afficitur; hunc casum ejus subsequitur tussis, bilem vel pus trahens, præcordiorum totiusque pectoris gravitas, spiritus difficultas, magnæ febres, continua vigilia, cibi fastidium, tabes. Id genus morbi plus periculi quàm doloris habet. Oportet, si satis validæ vires sunt, sanguinem mittere, sin minores, cucurbitulas sine ferro præcordiis admove. Tum si satis valet, gestando ægrum digerere; si parum, intra domum tantum dimovere: potionem autem hyssopi dare, cui ficus arida sit incocta; aut aquam mulsam in quâ vel hyssopum vel ruta decocta sit: frictione uti diutissimè in scapulis, proximè ab his in brachiis, et pedibus, et cruribus; leviter contra pulmonem, idque his quotidie facere. Quod ad cibum verò pertinet, huic nec salsis opus est, neque acribus, neque amaris, ne-

que alvum adstringentibus, sed paulò lenioribus. Ergo primis diebus danda est sorbitio ptisanæ vel alicæ vel orizæ, cum quâ recens adeps cocta sit; cum hâc sorbibile ovum, nuclei pinei ex melle, panis vel elota alica ex aquâ mulsâ; potui deindè non solùm pura aqua, sed etiam mulsa egelida; aut si æstas est, etiam frigida, nisi quid obstat. Hæc autem altero quoque die, crescente morbo, dare satis est. Ubi in incremento constitit, quantum res patitur, ab omnibus abstinendum est, præterquam aquâ egelidâ. Si vires desunt, adjuvandæ sunt aquâ mulsâ. Prosunt quoque adversus dolores imposita calida fomenta, vel ea quæ simul et reprimunt et emolliunt. Prodest impositus super pectus sal benè contritus cum cerato mixtus, quia leviter cutem erodit, eoque impetum materiæ, quâ pulmo vexatur, evocat. Utile etiam aliquod malagma est ex his quæ materiam trahunt. Neque alienum est, dum premit morbus, clausis fenestris ægrum continere: ubi paulum levatus est, ter aut quater die, fenestris aliquantum apertis, parvum aërem recipere. Deinde in refectioe pluribus diebus à vino abstinere; gestatione, frictione uti; sorbitionibus, et prioribus cibis adjicere ex oleribus porrum, ex carne ungulas et summa trunculorum, atque pisciculos, sic, ut diù nihil nisi molle et lene sumatur.

SECT. VIII. Alterius quoque visceris morbus, id est jecinoris, æquè modò longus, modò acutus esse consuevit : *ἡπατικὸν* Græci vocant. Dextrâ parte sub præcordiis vehemens dolor est; idemque ad latus dextrum et ad jugulum humerumque partis ejusdem pervenit: nonnunquam manus quoque dextra torquetur; horror validus est. Ubi malè est, bilis evomitur; interdum singultus propè strangulat. Et hæc quidem acuti morbi sunt: longioris verò, ubi suppuratio in jecinore est, dolorque modò finitur, modò intenditur,

dextrâ parte præcordia dura sunt et tument; post cibum major spiritûs difficultas est; accedit maxillarum quædam resolutio. Ubi inveteravit malum, venter et crura pedesque intumescunt; pectus atque humeri, circaque jugulum utrumque extenuatur. Initio sanguinem mittere optimum est: tùm venter solvendus est, si non potest aliter, per nigrum veratrum. Imponenda extrinsecûs cataplasmata; primùm quæ reprimant, deindè calida quæ diducant; quibus rectè iris vel absinthium adjicitur: post hæc malagma. Dandæ verò sorbitiones sunt, omnesque cibi et calidi, et qui non multum alant, et ferè qui pulmonis quoque dolori convenient; præterque eos qui urinam movent, potionesque ad id efficaces. Utilia in hoc morbo sunt thymum, satureia, hyssopum, nepeta, anisum, sesamum, amaracum, lauri baccæ, pini flos, herba sanguinalis, mentha, ex malo cotoneo medium, columbæ jecur recens et crudum. Ex quibus quædam per se esse, quædam adjicere vel sorbitioni vel potioni licet: sic tamen ut parcè assumantur. Neque alienum est, absinthium contritum ex melle et pipere, ejusque catapotium quotidie devorare. Abstinentum utique est ab omnibus frigidis: neque enim res ulla magis jecur lædit. Frictionibus utendum in extremis partibus: vitandus omnis labor, omnis vehementior motus: ne spiritus quidem diutiùs continendus est. Ira, trepidatio, pondus, jactus, cursus, inimica sunt. Perfusio corporis multâ prodest ex aquâ; si hiems est, calidâ; si æstas, tepidâ: itemque liberalis unctio, et in balneo sudor. Si verò jecur vomicâ laborat, eadem facienda sunt quæ in cæteris interioribus suppurationibus: quidam etiam ultra id scalpello aperiunt ipsam vomicam, vel adurunt.

SECT. IX. At lienis, ubi affectus est, intumescit, simulque cum eo pars sinistra eaque dura est, et pre-

menti renititur; venter quoque intentus est; aliquis etiam cruribus tumor est. Ulcera aut omnino non sanescunt, aut certe cicatricem vix recipiunt : in intentâ ambulatione, vel cursu, dolor et quædam difficultas est. Hoc vitium quies auget : itaque exercitatione et labore opus est; habitâ tamen ratione, ne febrem ista, si nimium processerint, excitent. Uctiones frictionesque et sudores necessarii sunt. Dulcia omnia inimica sunt, item lac et caseus : acida autem maximè conveniunt. Ergo acetum acre per se sorbere, et magis etiam quod scillâ conditum est, expedit. Edenda sunt salsamenta, vel oleæ ex muriâ durâ, lactuæ tinctæ in aceto, intubique, et betæ ex eodem; et sinapi, asparagus, armoracia, et pastinaca : de carnibus verò ungulæ, rostra, aves macræ, ejusdemque generis venatio. Potui verò jejuno dari debet absinthium incoctum : at post cibum aqua à ferrario fabro, in quâ candens ferrum subinde tinctum sit : hæc enim vel præcipuè lienem coërcet : quod animadversum est in his animalibus quæ apud hos fabros educata, exiguos lienes habent. Potest etiam dari vinum tenue, austerum; omniaque in cibis et potionibus quæ urinæ movendæ sunt : præcipuèque ad id valet vel trifolii semen, vel cuminum, vel apium, vel serpyllum, vel cytisus, vel portulaca, vel nepeta, vel thymum, vel hyssopum, vel satureia : hæc enim indè commodissimè videntur humorem educere. Lienis quoque bubulus utiliter esui datur : præcipuèque eruca et nasturtium lienem extenuant. Imponenda quoque extrinsecus sunt quæ levant. Fit ex unguento et palmulis, quod *μυροβάλανον* Græci vocant : fit ex lini et nasturtii semine, quo vinum et oleum adjicitur : fit ex cupresso viridi et aridâ ficu : fit ex sinapi cui sevi hircini à renibus quarta pars ponderis adjicitur, teriturque in sole et protinus imponitur. Multis quoque modis huic

rei capparî aptum est : nam et ipsum cum cibo assumere, et muriam ejus cum aceto sorbere commodum est. Quin etiam extrinsecùs radicem contritam, vel corticem ejus cum furfuribus, aut ipsum capparî cum melle contritum imponere expedit. Malagmata quoque huic rei aptantur.

SECT. X. At renes ubi affecti sunt, diù malè habent : pejùs est, si frequens biliosus vomitus accedit. Oportet conquiescere : cubare molliter : solvere alvum ; si aliter non respondet, etiam ducere : sæpè desiderare in aquâ calidâ : neque cibum neque potionem frigidam assumere ; abstinere ab omnibus salsis, acribus, acidis, pomis : bibere liberaliter : adjicere modò cibo, modò potioni piper, porrum, ferulam, album papaver : quæ maximè indè urînam movere consuerunt. Auxilio quoque his exulceratis sunt, si adhuc ulcera purganda sunt, cucumeris semina detractis corticibus sexaginta, nuclei ex pinu silvestri duodecim, anisi quod tribus digitis sumi possit, croci paulum : contrita et in duas mulsi potiones divisa. Si verò dolor tantum levandus est, ejusdem cucumeris semina triginta, iidem nuclei viginti, nuces Græcæ quinque, croci paululum, contrita et cum lacte potui data. Ac insuper quoque rectè quædam malagmata injiciuntur ; maximèque ea quæ humori extrahendo sunt.

SECT. XI. A visceribus ad intestina veniendum est, quæ sunt et acutis et longis morbis æquè obnoxia. Primo facienda mentio est cholerae ; quia commune id stomachi atque intestinorum vitium videri potest ; nam simul et dejectio et vomitus, præterque hæc inflatio est. Intestina torquentur, bilis suprâ infrâque erumpit, primum aquæ similis, deindè ut in eâ recens caro lota esse videatur, interdum alba, nonnunquam nigra vel varia. Ergò eo nomine morbum hunc χολέραν Græci

nominarunt. Præter ea verò quæ suprâ comprehensa sunt, sæpè etiam crura manusque contrahuntur, urget sitis, anima deficit : quibus concurrentibus, non mirum est si subitò quis moritur. Neque tamen ulli morbo minore momento succurritur. Protinùs ergò, ubi istà cœperunt, aquæ tepidæ quàm plurimùm bibere oportet et vomere. Vix unquàm non sic vomitus sequitur : sed etiamsi id non incidit, tamen corruptæ miscuisse novam materiam prodest ; parsque sanitatis est vomitum esse suppressum. Si id incidit, protinùs ab omni potione abstinendum est : si verò tormina sunt, oportet frigidis et humidis fomentis stomachum fovere ; vel si venter dolet, iisdem egelidis, sic ut venter ipse medicriter calentibus juvetur. Quod si vehementer et vomitus, et dejectio, et sitis vexant, et adhuc subcruda sunt quæ vomuntur, nondùm vino maturum tempus est : aqua, neque ea ipsa frigida, sed potiùs egelida danda est : admovendumque naribus est pulegium ex aceto, vel polenta vino aspersa, vel mentha, vel quod secundùm naturam est. At quùm discussa cruditas est, tùm magis verendum est ne anima deficiat : ergo tùm confugiendum est ad vinum. Id esse oportet tenue, odoratum, et cum aquâ frigidâ mixtum, vel polentâ adjectâ, vel infracto pane, quem ipsum quoque assumere expedit : quotiesque aliquid aut stomachus aut venter effudit, toties per hæc vires restituere. Erasistratus primò tribus vini guttis aut quinque aspergendam potionem esse dixit ; deindè paulatim merum adjiciendum. Is, si et ab initio vinum dedit et metum cruditatis secutus est, non sine causa fecit : si vehementem infirmitatem adjuvari posse tribus guttis putavit, erravit. At si inanis est homo, et crura ejus contrahuntur, interponenda potio absinthii est. Si extremæ partes corporis frigent, ungendæ sunt calido oleo, cui ceræ pau-

hum sit adjectum, calidisque fomentis nutriendæ. Si ne sub his quidem quies facta est, extrinsecus contra ventriculum ipsum cucurbitula admovenda est, aut sinapi superimponendum. Ubi is constitit, dormire oportet : postero die utique à potione abstinere : die tertio in balneum ire : paulatim se cibo reficere ; somno quisquis facilè acquiescit ; vitetque lassitudinem et frigora. Si post suppressam choleram febricula manet, alvum duci necessarium est, tum cibis vinoque utendum.

SECT. XII. Sed hic quidem morbus et acutus est, et inter intestina stomachumque versatur sic, ut cujus potissimum partis sit, non facile dici possit. In ipsius verò ventriculi portâ consistit is qui et longus esse consuevit, et κοιλιακός à Græci nominatur. Sub hoc venter indurescit, dolorque ejus est ; alvus nihil reddit, ac ne spiritum quidem transmittit ; extremæ partes frigescunt, difficulter spiritus redditur. Commodissimum est inter initia calida cataplasmata toti ventri imponere, ut dolorem leniant, post cibum vomere, atque ita ventrem exinanire : proximis deindè diebus cucurbitulas sine ferro ventri et coxis admovere : ventrem ipsum liquare, dato lacte et vino salso frigido ; si tempus anni patitur, etiam viridibus ficis ; sic tamen, ne quis aut cibus aut humor universus detur, sed paulatim. Ergo per intervalla temporis sat est cyathos binos ternosve sumere, et cibum pro portione hujus ; commodèque facit cyatholactis cyathus aquæ mixtus et sic datus : cibique inflantes et acres utiliores sunt ; adeò ut lacti quoque rectè contritum allium adjiciatur. Procedente verò tempore, opus est gestari, maximèque navigare ; perfricari ter aut quater die sic ut nitrum oleo adjiciatur ; perfundi aquâ calidâ post cibum ; deindè sinapi imponere per omnia membra, excepto capite, donec arrodantur et rubeant ; maximèque si corpus durum et virile est. Pau-

latim deindè faciendus est transitus ad ea quæ ventrem comprimunt. Assa caro danda valens, et quæ non faciliè corrumpatur: potui verò pluvialis aqua decocta: sed quæ per binos ternosve cyathos bibatur. Si vetus vitium est, oportet laser quàm optimum ad piperis magnitudinem devorare: altero quoque die vinum vel aquam bibere, interdum interposito cibo, singulos vini cyathos sorbere: ex inferiore parte infundere aquam pluvialem egelidam; maximèque si dolor in imis partibus remanet.

SECT. XIII. Intra ipsa verò intestina consistunt duo morbi; quorum unus in tenuiore, alter in pleniore est. Prior acutus est, insequens esse longus potest. Diocles Carystius tenuioris intestini morbum *χόρδαψον*, plenioris *εἰλεὼν* nominavit: à plerisque video nunc illum priorem *εἰλεὼν*, hunc *χωλικὸν* nominari. Sed prior modò suprà umbilicum, modò sub umbilico dolorem movet. Fit in alterutro loco inflammatio: nec alvus nec spiritus infrà transmittitur. Si superior pars affecta est, cibus; si inferior, stercus per os redditur: si utrumlibet, vetus est. Adjicitur periculo, si vomitus biliosus est, mali odoris, aut varius, aut niger est. Remedium est sanguinem mittere, vel cucurbitulas pluribus locis admove, non ubique cute incisâ; id enim duobus aut tribus locis satis est: ex cæteris spiritum evocare abundè est. Tùm animadvertere oportet quo loco malum sit: solet enim contra id tumere: et si suprà umbilicum est, alvi ductio utilis non est: si infra alvum, ducere interdum, ut Erasistrato placuit, optimum est, et sæpè id auxilii in his partibus magnum remedium est. Ducitur autem, percolato ptisanæ cremore cum oleo et melle, sic ut prætereà nihil adjiciatur. Si nihil tumet, duas manus imponere oportet suprà summum ventrem, paulatimque deducere: invenietur enim mali locus, qui

necesse est renitatur : et ex eo demùm deliberari poterit, ducenda necne alvus sit. Illa communia sunt : calida cataplasmata admovere, eaque imponere à mammis usque ad inguina et spinam, ac sæpè mutare ; brachia cruraque perfricare ; demittere totum hominem in calidum oleum : si dolor non quiescit, etiam in alvum ex parte inferiore tres aut quatuor cyathos calidi olei dare. Ubi per hæc consecuti sumus, ut ex inferiore parte spiritus transmittatur, offerre potui mulsum tepidum, non multum : nam antè magnâ curâ vitandum est ne quid bibat ; si id commodè cessit, adjicere sorbitionem. Ubi dolor et febricula quierunt, tùm demùm uti cibo pleniore ; sed neque inflante, neque duro, neque valido, ne intestina adhuc imbecilla lædantur : potui verò nihil præterquàm puram aquam offerre. Nam sive quid vinolentum, sive acidum est, id huic morbo alienum est. Ac postea quoque vitare oportet balneum, ambulationem, gestationem, cæterosque corporis motus : nam facile id malum redire consuevit : et, sive quùm frigus subit, sive aliqua jactatio, nisi benè jam confirmatis intestinis, revertitur.

SECT. XIV. Is autem morbus qui in intestino pleniore est, in eâ maximè parte est quâ cæcam esse proposui. Vehemens fit inflatio, vehementes dolores, dextrâ magis parte : intestinum quod verti videtur, propè spiritum elidit. In plerisque post frigora cruditatesque oritur, deindè quiescit ; et per ætatem sæpè repetens sic cruciat, ut vitæ spatio nihil demat. Ubi is dolor cœpit, admovere sicca et calida fomenta oportet ; sed primò lenia, deindè validiora ; simulque frictione ad extremas partes, id est crura brachiaque, materiam evocare. Is si discussus non est, quâ dolet, cucurbitulas sine ferro defigere. Est etiam medicamentum ejus rei causâ comparatum, quod *κωλιχόν* nominatur : id se reperisse Cas-

sus gloriabatur. Magis prodest potui datum : sed impositum quoque extrinsecus, digerendo spiritum, dolorem levat. Nisi finito verò tormento, rectè neque cibus, neque potio assumitur. Quo victu sit utendum iis qui hoc genere tentantur, jam mihi dictum est. Confectio medicamenti, quod *κωλικόν* nominatur, ex his constat. Costi, anisi, castorei, singulorum P.* III. petroselini P.* III. piperis et longi, et rotundi, singulorum P.* II. papaveris lacrymæ, junci rotundi, myrrhæ, nardi, singulorum P.* VI. quæ melle excipiuntur. Id autem et devorari potest, et ex aquâ calidâ sumi.

SECT. XV. Proxima his inter intestinorum mala tormina esse consueverunt : *δυσεντερία* Græcè vocatur. Intus intestina exulcerantur : ex his cruor manat ; isque modò cum stercore aliquo semper liquido, modò cum quibusdam quasi mucosis excernitur ; interdum simul quædam carnosæ descendunt : frequens dejiciendi cupiditas, dolorque in ano est. Cum eodem dolore exiguum aliquid emittitur, atque eo quoque tormentum intenditur ; idque post tempus aliquod levatur, exiguaque requies est : somnus interpellatur, febricula oritur, longoque tempore id malum quum inveteraverit, aut tollit hominem, aut etiamsi finitur, excruciat. Oportet in primis conquiescere ; siquidem omnis agitatio exulcerat : deinde jejunum sorbere vini cyathum, cui contrita radix quinquefolii sit adjecta : imponere cataplasmata super ventrem quæ reprimunt ; quod in superioribus ventris morbis non expedit : quotiesque desedit, subluere aquâ calidâ in quâ decoctæ verbenæ sint : portulacam vel coctam vel ex durâ muriâ edisse ; cibos potionesque eas assumere quæ adstringunt alvum. Si vetustior morbus est, ex inferioribus partibus tepidum infundere vel ptisanæ cremorem, vel lac, vel adipem liquatam, vel medullam cervinam, vel oleum, vel cum rosâ butyrum, vel cum eadem album crudum ex ovis, vel aquam in

quâ lini semen decoctum sit; vel, si somnus non accedit, vitellos cum aquâ in quâ rosæ floris folia cocta sint: levant enim dolorem hæc, et mitiora ulcera efficiunt; maximèque utilia sunt, si cibi quoque secutum fastidium est. Themison muriâ durâ quàm asperrimâ hîc utendum memoriæ prodidit. Cibi verò esse debent qui leniter ventrem adstringant: at ea quæ urinam moveant, si id consecuta sunt, in aliam partem humorem avertendo prosunt: si non sunt consecuta, noxam augent: itaque nisi in quibus promptè id facere consuerunt, non sunt adhibenda. Potui, si febricula est, aqua pura calida, vel ea quæ ipsa quoque adstringat, dari debet: si non est, vinum leve austerum. Si pluribus diebus nihil remedia alia juverunt, vetusque jam vitium est, aquæ benè frigidæ potio assumpta ulcera adstringit, et initium secundæ valetudinis facit. Sed ubi venter suppressus est, protinùs ad calidam potionem revertendum est. Solet autem interdùm etiam putris sanies pessimique odoris descendere: solet purus sanguis profluere. Si superius vitium est, alvus aquâ mulsâ delui debet; tùm deindè eadem infundi, quæ suprâ comprehensa sunt. Valensque est etiam adversùs ulcera intestinorum, minii gleba cum salis heminâ contritâ, si mixta his aqua in alvum datur. At, si sanguis profluit, cibi potionesque esse debent quæ adstringant.

SECT. XVI. Interdùm intestinorum levitas oritur, quâ continere nihil possunt, et quicquid assumptum est, imperfectum protinùs reddunt. Id interdùm ægros trahit, interdùm præcipitat. In hoc utique adhibere oportet comprimantia, quo faciliùs tenendi aliquid intestinis vis sit. Ergo et super pectus ponatur sinapi, exulceratâque cute, malagma quod humorem evocet: et ex verbenis decoctâ in aquâ desidat: et cibos potionesque assumat quæ alvum adstringunt; et frigidis utatur perfusionibus.

Oportet tamen prospicere ne, simul his omnibus admotis, vitium contrarium per immodicas inflationes oria-
tur: paulatim ergo firmari intestina debebunt, aliqui-
bus quotidie adjectis. Et quum in omni fluore ventris,
tum in hoc præcipue, necessarium est, non quoties li-
bet desiderare, sed quoties necesse est; ut hæc ipsa mora
in consuetudinem ferendi oneris intestina deducat. Alte-
rum quoque, quod æquè ad omnes similes affectus per-
tinet, in hoc maximè servandum est, ut, quum plera-
que utilia insuavia sint, qualis est plantago et rubi, et
quicquid malicorio mixtum est, ea potissimum ex his
dentur, quæ maximè æger volet. Deindè, si omnia ista
fastidiet, ad excitandam cibi cupiditatem, interponatur
aliquid minùs utile, sed magis gratum. Exercitationes
et frictiones huic quoque morbo necessariae sunt; et
cum his sol, ignis, balneum, vomitus, ut Hippocrati
visum est, etiam albo veratro, si cætera parùm profi-
cient, evocatus.

SECT. XVII. Nonnunquam autem lumbrici quoque
occupant alvum, idque modò ex inferioribus partibus,
modò fædiùs, ore redduntur: atque interdum latos
eos, qui pejores sunt, interdum teretes videmus. Si lati
sunt, aqua potui dari debet in quâ lupinum aut cortex
mori decoctus sit, aut cui adjectum sit contritum vel
hyssopum, vel piperis acetabulum, scammonæ pau-
lùm: vel etiam pridie, quum multum allium ederit,
vomat. Posteroque die mali punici tenues radículas col-
ligat, quantum manu comprehendet; eas contusas in
aquæ tribus sextariis decoquat, donec tertia pars su-
persit; huc adjiciat nitri paulum, et jejunos bibat. In-
terpositis deindè tribus horis, duas potiones sumat talis
aquæ, vel muriæ duræ huic adjectæ; ¹ tum desidat,

¹ Hic aliquid certè desideratur, nam nusquam reperimus lec-
tionem rationi artique magis congruentem.

subjectâ calidâ aquâ in pelve. Si verò teretes sunt, qui pueros maximè exercent, et eadem dari possunt, et quædam leviora; ut contritum semen urticæ aut brassicæ, aut cumini cum aquâ, vel mentha cum eâdem, vel absinthium decoctum, vel hyssopum ex aquâ mulsâ, vel nasturtii semen cum aceto contritum. Edisse etiam et lupinum et allium prodest, vel in alvum oleum subter dedisse.

SECT. XVIII. Est autem aliud levius omnibus proximis de quibus suprâ dictum est, quod τεινεσµὸν Græci vocant. Id neque acutis neque longis morbis annumerari debet, quùm et facilè tollatur, neque unquàm per se jugulet. In hoc æquè atque in torminibus frequens desidendi cupiditas est; æquè dolor in ano, ubi aliquid excernitur. Descendunt autem pituitæ mucisque similia; interdùm etiam leviter subcruenta; sed his interponuntur nonnunquàm ex cibo quoque rectè coacta. Desidere oportet in aquâ calidâ; sæpiùsque ipsum anum nutrire. Cui rei plura medicamenta idonea sunt: butyrum cum rosâ, acacia ex aceto liquata; emplastrum id quod τετραφάρμακον Græci vocant, rosâ liquatum; alumen lanæ circumdatum et intùs appositum: eadem quoque ex inferiore parte indita, quæ torminum auxilia sunt, eadem verbenæ decoctæ, ut inferiores partes foveantur. Alternis verò diebus aqua, alternis leve et austum vinum bibendum est. Potio esse debet egelida et frigidæ propior: ratio victûs talis qualem ad tormina suprâ præcepimus.

SECT. XIX. Levior etiam, dùm recens, dejectio est, ubi et liquida alvus et sæpiùs quàm ex consuetudine, fertur: in quâ interdùm tolerabilis dolor est, interdùm gravissimus; idque pejus est. Sed uno die fluere alvum sæpè pro valetudine est; atque etiam pluribus, dùm febris absit et intrâ septimum diem id conquiescat:

purgatur enim corpus, et quod intùs læsurum erat, utiliter effunditur. Verùm spatium periculosum est: interdùm enim tormina ac febriculas excitat, viresque consumit. Primo die quiescere satis est, neque impetum ventris prohibere. Si per se desiit, baluco uti, paulùm cibi capere; si mansit, abstinere non solum à cibo, sed etiam à potione. Postero die si nihilo minùs liquida alvus est, æquè conquiescere, paululùm adstringentis cibi sumere. Tertio die in balneum ire; vehementer omnia præter ventrem perfricare, ad ignem lumbos scapulasque admovere; cibus uti, sed ventrem contrahentibus; vino multo meraco. Si postero quoque die fluet, plus edisse, sed vomere: ex toto, donec conquiescat, contra siti, fame, vomitu niti: vix enim fieri potest, ut post hanc animadversionem alvus non contrahatur. Alia via est, ubi velis suppressere; cœnare, deindè vomere: postero die lecto conquiescere, vespere ungi, sed leniter: deindè panis circà selibram ex vino Ami-næo mero sumere, tùm assum aliquid, maximèque avem; et postea vinum idem libere aquà pluviali mixtum, idque usque quintum diem facere, iterùmque vomere. Frigidam autem assiduè potionem esse debere, contra priores auctores Asclepiades affirmavit, et quidem quàm frigidissimam. Ego experimentis quemque in se credere debere existimo, calidà potiùs, an frigidà utatur. Interdùm autem evenit, ut id pluribus diebus neglectum curari difficiliùs possit. A vomitu oportet incipere; deindè postero die vespere tepido loco ungi, cibum modicum assumere; vinum meracum quàm asperinum; impositam super ventrem habere cum cerato rutam. In hoc autem affectu corporis, neque ambulatione neque frictione opus est; vehiculo sedisse, vel magis etiam equo prodest: neque enim ulla res magis intestina confirmat. Si verò etiam medicamentis uten-

dum est, aptissimum est id quod ex pomis fit. Vinde-
miæ tempore in grande vas conjicienda sunt pira atque
mala silvestria : si ea non sunt, pira Tarentina viridia
vel Signina, mala Scandiana vel Amerina, myrapia :
hisque adjicienda sunt cotonea, et cum ipsis corticibus
suis punica, sorba, et, quibus magis utimur, etiam tor-
minalia, sic ut hæc tertiam ollæ partem teneant : tùm
ea musto implenda est, coquendumque id donec, quæ
indita sunt, liquata in unitatem quamdam coëant. Id
gustui non insuave est : et, quandocunquè opus est,
assumptum leniter, sine ullâ stomachi noxâ, ventrem
tenet. Duo aut tria cochlearia uno die sumpsisse satis est.
Alterum valentius genus : myrti baccas legere, ex his vi-
num exprimere, id decoquere ut decima pars remaneat,
ejusque cyathum sorbere. Tertium quod quandocum-
què fieri potest : malum punicum excavare, exemptisque
omnibus seminibus, membranas quæ inter ea fuerunt,
iterùm concidere : tùm infundere cruda ova, rudiculâ-
que miscere : deindè malum ipsum super prunam im-
ponere, quod, dùm humor intus est, non aduritur :
ubi siccum esse cœpit, remove oportet, extractumque
cochleari, quod intus est, edisse. Aliquibus adjectis,
majus momentum habet : itaque etiam in piperatum
conjicitur, misceturque cum sale et pipere, estque ex
his edendum. Pulticula etiam, cum quâ paulum ex favo
veteri coctum sit et lenticula cum malicorio cocta, ru-
bique cacumina in aquâ decocta, et ex oleo atque aceto
assumpta, efficacia sunt : atque ea aqua, in quâ vel pal-
mulæ, vel malum cotoneum, vel arida sorba, vel rubi
decocti sunt, potata. Quod genus significo, quoties potio-
nem dandam esse dico quæ adstringat. Tritici quoque
hemina in vino Aminæo austero decoquitur, idque triti-
cum jejuno ac sitienti datur ; superque id vinum sorbe-
tur : quod jure valentissimis medicamentis annumerari

potest. Atque etiam potui datur vinum Signinum, vel resinatum austerum, vel quodlibet austerum. Contunditur quoque cum corticibus seminibusque suis punicum malum, vinoque tali miscetur: idque vel merum sorbet aliquis vel bibit mixtum. Sed medicamentis uti, nisi in vehementibus malis, supervacuum est.

SECT. XX. I. Ex vulvâ quoque feminis vehemens malum nascitur; proximèque ab stomacho, vel afficitur hæc, vel corpus afficit. Interdum etiam sic exanimat, ut tanquam comitiali morbo prosternat. Distat tamen hic casus, eo quod neque oculi vertuntur, nec spumæ profluunt, nec nervi distenduntur: sopor tantum est. Id vitium quibusdam feminis crebrò revertens perpetuum est. Ubi incidit, si satis virium est, sanguis missus adjuvat: si parum est, cucurbitulæ tamen defigendæ sunt in inguinibus. Si diutiùs aut jacet aut alioqui jacere consuevit, admoveere oportet naribus extinctum ex lucernâ linamentum, vel aliud ex his quæ fœdioris esse odoris retuli, quod mulierem excitet. Idemque aquæ quoque frigidæ perfusio efficit. Adjuvat quoque ruta contrita cum melle, vel ex cyprino ceratum, vel quodlibet calidum et humidum cataplasma, naturalibus pube tenus impositum. Inter hæc etiam perfricare coxas et poplites oportet. Deindè, ubi ad se rediit, circumcidendum vinum ei est in totum annum, etiam si casus idem non revertitur. Frictione quotidie utendum totius quidem corporis, præcipuè verò ventris et poplitum. Cibus ex mediâ materiâ dandus: sinapi super inum ventrem tertio quoque aut quarto die imponendum, donec corpus rubeat. Si durities manet, mollire commodè videtur solanum in lac demissum, deindè contritum, et cera alba atque medulla cervina cum irino, aut sebum taurinum vel caprinum cum rosâ mistum. Dandum potui etiam vel castoreum est, vel gith, vel anethum. Si pa-

rùm pura est, purgatur junco quadrato. Si verò vulva exulcerata est, ceratum ex rosâ fiat: etiam recens suilla adeps et ex ovis album misceatur, idque apponatur; vel album ex ovo cum rosâ mixtum, adjecto, quò faciliùs consistat, contritæ rosæ pulvere. Dolens verò vulva sulfure suffumigari debet. At si purgatio nimia mulieri nocet, remedio sunt cucurbitulæ, cute incisâ, inguinibus vel etiam sub mammis admotæ. Si maligna purgatio est, subjicienda sunt (*desunt hîc plura*) coercentia. Id faciunt etiam albæ olivæ, nigrum papaver cum melle assumptum, et gummi cum trito semine apii liquatum, et cum cyatho passî datum. Præter hæc, in omnibus vesicæ doloribus, idoneæ potiones sunt quæ ex odoribus fiunt, id est, spicâ nardi, croco, cinnamomo, casiâ, similibusque. Idem etiam decocta lentiscus præstat. Si tamen intolerabilis dolor est, et sanguis profluit, etiam sanguinis detractio apta est, aut certè coxis admotæ cucurbitulæ, cute incisâ.

2. At quùm urina super potionum modum, et jam sine dolore profluens maciem et periculum facit; si tenuis est, opus est exercitatione et frictione, maximeque in sole vel ad ignem. Balneum rarum esse debet, neque longa in eo mora; cibus comprimens, vinum austerum meracum, per æstatem frigidum, per hiemem egelidum sed tantum, quantum minimum sit. Infima alvus quoque, vel ducenda, vel lacte purganda est. Si crassa urina est, vehementior esse debet et exercitatio, et frictio, longior in balneo mora: cibus opus est teneris: vinum idem. In utroque morbo vitanda omnia sunt quæ urinam movere consuerunt.

SECT. XXI. Est etiam circa naturalia vitium, nimia profusio seminis: quod sine venere, sine nocturnis imaginibus sic fertur, ut, interposito spatio, tabe hominem consumat. In hoc affectu salutare sunt vehementes

frictiones, perfusiones natationesque quàm frigidissimæ : neque cibi, nec potio, nisi frigida assumpta. Vitare autem oportet cruditates et omnia infantia; nihil ex his assumere quæ contrahere semen videntur; qualia sunt, siligo, simila, ova, alica, amyllum, omnis caro glutinosa, piper, eruca, bulbi, nuclei pinei. Neque alienum est fovere inferiores partes aquâ decoctâ ex verbenis comprimentibus, ex iisdem aliqua cataplasmata imo ventri inguinibusque circumdare, præcipuè ex acetorutam : vitare etiam ne supinus obdormiat.

SECT. XXII. Superest ut ad extremas partes corporis veniam, quæ articulis inter se conseruntur : initium à coxis faciam. Harum ingens dolor esse consuevit, isque hominem sæpè debilitat, et quosdam non dimittit : eoque id genus difficillimè curatur, quòd ferè post longos morbos vis pestifera huc se inclinat; quæ ut alias partes liberat, sic hanc ipsam quoque affectamprehendit. Fovendum primùm aliquâ calidâ est : deindè utendum calidis cataplasmatibus. Maximè prodesse videtur, aut cum hordeaceâ farinâ, aut cum ficu ex aquâ decoctâ mixtus capparis cortex concisus; vel lolii farina ex vino diluto cocta et mixta cum aridâ fæce : quæ quia refrigescunt, imponere noctu malagmata commodius est. Inulæ quoque radix contusa, et postea ex vino austero cocta, et latè super coxam imposita, inter valentissima auxilia est. Si ista non solverunt, sale calido et humido utendum est. Si ne sic quidem finitus dolor est, aut tumor ei accedit, incisâ cute, admovendæ sunt cucurbitulæ : movenda uriua : alvus, si compressa est, ducenda. Ultimum est, et in veteribus quoque morbis efficacissimum, tribus aut quatuor locis super coxam, cutem candentibus ferramentis exulcerare. Frictione quoque utendum est maximè in sole et eodem die sæpius : quo facilius ea quæ coeundo nocuerunt, digerantur : eaque, si nulla

exulceratio est; etiam ipsis coxis: si est, cæteris partibus adhibenda est. Quùm verò sæpè aliquid exulcerandum candenti ferramento sit, uti materia inutilis evocetur, illud perpetuum est, non, ut primùm fieri potest, hujus generis ulcera sanare; sed ea trahere donec id vitium cui per hæc opitulamur, conquiescat.

SECT. XXXIII. Coxis proxima genua sunt: in quibus ipsis nonnunquàm dolor esse consuevit. In iisdem autem cataplasmatibus cucurbitulisque præsidium est, sicut etiam quùm in humeris aliisque commissuris dolor aliquis exortus est. Equitare ei cui genua dolent, inimicissimum est. Omnes autem ejus modi dolores, ubi inveteraverunt, vix citra unctionem finiuntur.

SECT. XXIV. In manibus pedibusque articulorum vitia frequentiora longioraque sunt, quæ in podagris chiragrisve esse consuerunt; ea rarò vel castratos vel pueros ante feminæ coitum, vel mulieres, nisi quibus menstrua suppressa sunt, tentant. Ubi sentiri cœperunt, sanguis mittendus est: id enim inter initia statim factum, sæpè annuam, nonnunquàm perpetuam valetudinem bonam præstat. Quidam etiam, quùm asinino lacte epoto ex toto se eluissent, in perpetuum hoc malum evaserunt: quidam, quùm toto anno à vino, mulso, venere sibi temperassent, securitatem totius vitæ consecuti sunt: idque utique post primum dolorem servandum est, etiam si quievit. Quod si jam consuetudo ejus facta est, potest quidem aliquis esse securior his temporibus quibus dolor se remisit; majorem verò curam adhibere debent hi quibus id revertitur: quod ferè vere autumnove fieri solet. Quùm verò dolor non urget, manè gestari debet, deindè ferri, aut inambulatione levi se dimovere; et si podagra est, interpositis temporibus exiguis, in vicem modò sedere, modò ingredi; tùm antequàm cibum capiat, sine balneo loco calido leviter

perfricari, sudare; perfundi aquâ egelidâ : deindè cibum sumere ex mediâ materiâ, interpositis rebus urinam moventibus : quotiesque plenior est, evomere. Ubi dolor vehemens urget, interest sine tumore is sit, an tumor cum calore, an tumor jam etiam obcalluerit. Nam si tumor nullus est, calidis fomentis opus est. Aquam marinam vel muriam duram fervefacere oportet, deindè in pelvem conjicere, et, quùm jam homo pati potest, pedes eò demittere, superque pallam dare, et vestimento tegere : paulatim deindè juxta labrum ipsum ex eâdem aquâ leviter infundere, ne calor intùs destituat; ac deindè nocte cataplasmata calefacientia imponere, maximèque hibisci radicem ex vino coctam. Si verò tumor calorque est, utiliora sunt refrigerantia, rectèque in aquâ quàm frigidissimâ articuli continentur; sed neque quotidie, neque diù fit, ne nervi indurescant. Imponendum verò est cataplasma quod refrigeret: neque tamen in hoc ipso diù permanendum, sed ad ea trans-eundum, quæ sic reprimunt ut emolliant. Si major est dolor, papaveris cortices in vino coquendi, miscendique cum cerato sunt quod ex rosâ factum sit : vel ceræ et adipis suillæ tantumdem unâ liquandum, deindè his vinum miscendum, atque ubi quod ex eo impositum est incaluit, detrahendum et subindè imponendum aliud est. Si verò tumores etiam obcaluerunt et dolent, levat spongia imposita, duæ subindè ex oleo vel aceto vel aquâ frigidâ exprimitur; aut pari portione inter se mista, pix, cera, alumen. Sunt etiam plura idonea manibus pedibusque malagmata. Quod si nihil superimponi dolor patitur, id quod sine tumore est, fovere oportet spongiâ quæ in aquam calidam demittatur, in quâ vel papaveris cortices, vel cucumeris silvestris radix decocta sit; tùm inducere articulis crocum cum succo papaveris et ovillo lacte. At si tumor est, foveri quidem

debet aquâ egelidâ, in quâ lentiscus, verbena, aliave ex reprimentibus decocta sit: induci verò medicamentum ex nucibus amaris cum aceto tritis; aut cerussâ cui contritæ herbæ muralis succus sit adjectus. Lapis etiam qui carnem edit, quem *σαρχοφάγον* Græci vocant, excisus sic ut pedes capiat, demissos eos, quùm dolent, retentosque ibi levare consuevit. Ex quo in Asiâ lapidi Asio gratia est. Ubi dolor et inflammatio se remiserunt, quod intra dies quadraginta fit, nisi vitium hominis accessit, modicis exercitationibus, abstinentiâ, unctionibus lenibus utendum est, sic ut etiam cum acopo, vel liquido cerato cyprino articuli perfricentur. Equitare podagris quoque alienum est. Quibus verò articulorum dolor certis temporibus revertitur, hos antè et curioso victu cavere oportet, ne inutilis materia corpori supersit, et crebriore vomitu; et si quis ex corpore metus est, vel alvi ductione uti, vel lacte purgari. Quod Erasistratus in podagricis expulit; ne in inferiores partes factus cursus pedes replet: quùm evidens sit omni purgatione non superiora tantummodò, sed etiam inferiora exinaniri.

SECT. XXV. Ex quocumque autem morbo quis invalescit, si tardè confirmatur, vigilare primâ luce debet; nihilominùs in lecto conquiescere: circâ tertiam horam leviter unctis manibus corpus permulcere. Deindè delectationis causâ, quantum juvat, ambulare, circumcisâ omni negotiosâ actione: tùm gestari diù: multâ apricatione uti: loca, cœlum, cibos sæpè mutare. Ubi triduo quatrduove vinum bibît, uno aut etiam altero die interponere aquam. Per hæc enim fiet, ne in vitia tabem inferentia incidat, et ut maturè vires suas recipiat. Quùm verò ex toto convaluerit, periculosè vitæ genus subito mutabit et inordinatè aget. Paulatim ergò debet, omissis legibus, eò transire, ut arbitrio suo vivat.

LIBER QUINTUS.

DIXI de his malis corporis, quibus victus ratio maximè subvenit: nunc transeundum est ad eam Medicinæ partem, quæ magis medicamentis pugnat. His multum antiqui auctores tribuerunt, et Erasistratus, et hi qui se empiricos nominaverunt, præcipuè tamen Herophilus, deductique ab illo viri, adeò ut nullum morbi genus sine his curarent. Multaque etiam de facultatibus medicamentorum memoriæ prodiderunt, qualia sunt vel Zenonis, vel Andreæ, vel Apollonii, qui Mys cognominatus est. Horum autem usum ex magnâ parte Asclepiades non sine causâ sustulit: et quum omnia ferè medicamenta stomachum lædant, malique succi sint, ad ipsius victus rationem potius omnem curam suam transtulit. Verum ut illud in plerisque morbis utilius est, sic multa admodum corporibus nostris incidere consuerunt, quæ sine medicamentis ad sanitatem pervenire non possunt. Illud ante omnia scire convenit, quod omnes medicinæ partes ita innexæ sunt, ut ex toto separari non possint, sed ab eo nomen trahant à quo plurimum petunt. Ergò et illa quæ victu curat, aliquandò medicamentum adhibet, et illa quæ præcipuè medicamentis pugnat, adhibere etiam rationem victus debet, quæ multum admodum in omnibus malis corporis proficit. Sed quum omnia medicamenta proprias facultates habeant, ac sæpè simplicia opitulentur, sæpè mixta, non alienum videtur antè proponere et nomina, et vires, et mixturas eorum, quo minor ipsam curationem exsequentibus mora sit.

SECT. I. Sanguinem supprimunt, atramentum sutorium, quod Græci χάλκανθον appellant, chalcitis, acacia, et ex aquâ lycium, thus, aloë, gummi, plumbum combustum, porrum, herba sanguinalis, creta vel Cimolia vel figularis, misy, frigida aqua, vinum, acetum, alumen, melinum, squama et ferri et æris; atque hujus quoque duæ species sunt, alia tantum æris, alia rubri æris.

SECT. II. Glutinant vulnus, myrrha, thus, gummi, præcipuèque acanthinum, psyllium, tragacantha, cardamomon, bulbi, lini semen, nasturtium, ovi album, gluten, ichthyocolla alba, contusæ cum testis suis cochleæ, mel coctum, spongia vel ex aquâ frigidâ vel ex vino vel ex aceto expressa: ex iisdem lana succida, si levis plaga est, etiam aranea. Reprimunt alumen et scissile (quod σχιστὸν vocantur) et liquidum, melinum, auripigmentum, ærugo, chalcitis, atramentum sutorium.

SECT. III. Concoquunt et movent pus, nardum, myrrha, costus, balsaneum, galbanum, propolis, styrax, thuris et fuligo et cortex, bitumen, pix, sulfur, resina, sebum, adeps, oleum.

SECT. IV. Aperiant tanquàm ora in corporibus, quod ῥόμα Græcè dicitur, cinnamomum, balsamum, panaces, juncus quadratus, pulegium, flos albæ violæ, bdellium, galbanum, resina terebinthina et pinea, propolis, oleum vetus, piper, pyrethrum, chamæpitys, uva taminia, sulfur, alumen, rutæ semen.

SECT. V. Purgant, ærugo, auripigmentum quod ἀρσενικὸν à Græcis nominantur (huic autem et sandarachæ in omnia eadem vis, sed validior est) squama æris, pumex, iris, balsamum, styrax, thus, thuris cortex, resina et pinea et terebinthina liquida, cœnanthe, lacerti stercus, sanguis columbæ, et palumbi, et

hirundinis, ammoniacum, bdellium (quod in omnia idem quod ammoniacum potest, sed valentius est), abrotonum, ficus arida, coccum Gnidium, scobis eboris, omphacium, radícula, coagulum, sed maximè leporinum, (cui eadem quæ cæteris coagulis facultas, sed utique validior est,) fel taurinum, vitellus crudus, cornu cervinum, gluten taurinum, mel crudum, misy, chalcitis, crocum, uva taminia, spuma argenti, galla, squama æris, lapis hæmatites, minium, costum, sulfur, pix cruda, sebum, adeps, oleum, ruta, porrum, lenticula, ervum.

SECT. VI. Rodunt, alumen liquidum, sed magis rotundum, ærugo, chalcitis, misy, squama æris, sed magis rubri, æs combustum, sandaracha, minium Synopicum, galla, balsamum, myrrha, thuris cortex, galbanum, resina terebinthina humida, piper utrumque, sed rotundum magis, cardamomum, auripigmentum, calx, nitrum et spuma ejus, apii semen: narcissi radix, omphacium, alcyonium, oleum ex amaris nucibus; allium, mel crudum, vinum, lentiscus, squama ferri, fel taurinum, scamnonea, uva taminia, cinnamomum, styrax, cicutæ semen, resina, narcissi semen, sal, nuces amaræ oleumque earum, atramentum sutorium, chrysocolla, veratrum, cinis.

SECT. VII. Exedunt corpus, acaciæ succus, ebenus, ærugo, squama æris, chrysocolla, cinis Cyprius, nitrum, cadmia, spuma argenti, hypocistis, diphryges, sal, auripigmentum, sulfur, cicuta, sandaracha, salamandra, alcyonium, æris flos, chalcitis, atramentum sutorium, ochra, calx, galla, alumen, lac caprifici vel lactuæ marinæ quæ τῆρύμαλλος à Græcis nominatur, fel, thuris fuligo, spodium, lenticula, mel, oleæ folia, marrubium, lapis hæmatites et Phrygius, et Asius, et scissilis, misy, vinum, acetum.

SECT. VIII. Adurunt, auripigmentum, atramentum sutorium, chalcitis, misy, ærugo, calx, charta combusta, sal, squama æris, fæx combusta, myrrha, stercus et lacerti, et columbæ, et palumbi, et hirundinis, piper, coccum Gnidium, allium, diphryges, lac utrumque quod proximo capite suprâ comprehensum est, veratrum et album et nigrum, cantharides, corallium, pyrethrum, thus, salamandra, eruca, sandaracha, uva taminia, chrysocolla, ochra, alumen scissile, ovillum stercus, œnanthe.

SECT. IX. Eadem ferè crustas ulceribus tanquàm igne adustis inducunt, sed præcipuè chalcitis, utique si cocta est, flos æris, ærugo, auripigmentum, misy, et id, quò magis coctum.

SECT. X. Crustas verò has resolvit farina triticea cum rutâ vel porro, aut lenticula cui mellis aliquid adjectum est.

SECT. XI. Ad discutienda verò ea quæ in corporis parte aliquâ coierunt, maximè prosunt, abrotonum, helenium, amaracus, alba viola, mel, lilium, sampsucus Cyprius, lac, sertula campana, serpyllum, cupressus, cedrus, iris, viola purpurea, narcissus, rosa, crœcum, passum, juncus quadratus, nardum, cinnamomum, casia, ammoniacum, cera, resina, uva taminia, spuma argenti, styrax, ficus arida, tragoriganus, lini et narcissi semen, bitumen, sordes ex gymnasio, pyrites lapis, aut molaris, crudus vitellus, amaræ nuces, sulphur.

SECT. XII. Evocat et educit, ladanum, alumen rotundum, ebenus, lini semen, omphacium, fel, chalcitis, bdellium, resina terebinthina et pinea, propolis, ficus arida decocta, stercus columbæ, pumex, farina lolii, grossi in aquâ cocti, elaterium, lauri baccae, nitrum, sal.

SECT. XIII. Lævat id quod exasperatum est, spodium, ebenus, gummi, ovi album, lac, tragacanthum.

SECT. XIV. Carnem alit et ulcus implet, resina pinea, ochra Attice, vel asterace, cera, butyrum.

SECT. XV. Molliunt, æs combustum, terra Eretria, nitrum, papaveris lacryma, ammoniacum, bdellium, cera, sebum, adeps, oleum, ficus arida, sesamum, sertula campana, narcissi et radix et semen, rosæ folia, coagulum, vitellus crudus, amaræ nuces, medulla omnis, stibi, pix, cochlea cocta, cicutæ semen, plumbi recrementum, σκωρίαν μολύβδου Græci vocant, panaces, cardamomum, galbanum, resina, uva taminia, styrax, iris, balsamum, sordes ex gymnasio, sulphur, butyrum, ruta.

SECT. XVI. Cutem purgat mel, sed magis si est cum gallà vel ervo, vel lenticulà vel marrubio, vel iride vel rutà, vel nitro vel æruginè.

SECT. XVII. 1. Expositis simplicibus facultatibus, dicendum est quemadmodum misceantur quæque ex his fiant. Miscentur autem variè, neque hujus rei ullus modus est, quùm ex simplicibus alia demantur, alia adjiciantur, iisdemque servatis, ponderum ratio mutetur. Itaque quùm facultatum materia non ita multiplex sit, innumerabilia mixturarum genera sunt, quæ comprehendere si possent, tamen esset supervacuum. Nam et iidem effectus intrà paucas compositiones sunt, et mutare eas cuilibet, cognitis facultatibus, facile est. Itaque contentus his ero, quas accepi velut nobilissimas. In hoc autem volumine eas explicabo, quæ vel desiderari in prioribus potuerunt, vel ad eas curationes pertinent quas protinùs hìc comprehendam, sic tamen ut quæ magis communia sunt, simul jungam. Si qua singulis vel etiam paucis accommodata sunt, in ipsarum locum differam. Sed et antea sciri volo, in uncia pondus denariorum septem esse; unius deindè denarii pondus dividi à me in sex partes, id est sextantes, ut idem in sextante

denarii habeam, quod Græci habent in eo quem ὀβολὸν appellant. Id ad nostra pondera relatum, paulò plus dimidio scrupulo facit.

2. Malagmata verò atque emplastra, pastillique quos τροχίσκους Græci vocant, quòum plurima eadem habeant, differunt eo quòd malagmata maximè ex odoribus, eorumque etiam surculis, emplastra pastillique magis ex quibusdam metallicis fiunt. Deindè malagmata contusa abundè mollescunt: nam super integram cutem injiciuntur: laboriosè verò conteruntur ea ex quibus emplastra pastillique fiunt, ne lædant vulnera cùm imposita sunt. Inter emplastrum autem et pastillum hoc interest, quòd emplastrum utique liquati aliquid accipit; in pastillo tantum arida medicamenta cum aliquo humore junguntur. Tùm emplastrum hoc modo fit: arida medicamenta per se teruntur, deindè mixtis his instillatur aut acetum, aut si quis alius non pinguis humor accessurus est, et ea rursus ex eo teruntur. Ea verò quæ liquari possunt, ad ignem simul liquantur, et si quid olei misceri debet, tùm infunditur. Interdum etiam aridum aliquod ex oleo prius coquitur: ubi facta sunt quæ separatim fieri debuerunt, in unum omnia miscentur. At pastilli hæc ratio est: arida medicamenta contrita humore non pingui, ut vino vel aceto, coguntur, et rursus coacta inarescunt: atque ubi utendum est, ejusdem generis humore diluuntur. Tùm emplastrum imponitur, pastillus illinitur, aut alicui molliori, ut cerato, miscetur.

SECT. XVIII. 1. His cognitis, primum malagmata subjiciam, quæ ferè non sunt refrigerandi sed calefaciendi causâ reperta. Est autem quod refrigerare potest, ad calidas podagras aptum. Habet gallæ et immaturæ et alterius, coriandri seminis, cicutæ, lacrymæ aridæ, gummi, singulorum plenum acetabulum, cerati eloti, quod

πεπλυμένον Græci vocant, selibram. Reliqua ferè calefaciunt. Sed quædam digerunt materiam, quædam extrahunt, quæ ἐπισπαστικά vocantur, pleraque certis magis partibus membrorum accommodata sunt.

2. Si materia extrahenda est, ut in hydropico, in lateris dolore, in incipiente abscessu, in suppuratione quoque mediocri, aptum est id quod habet resinæ aridæ, nitri, ammoniaci, galbani, singulorum pondo, ceræ pondo. Aut in quo hæc sunt: æruginis rasæ, thuris, singulorum P. *II*.*. ammoniaci salis P. *VI*.*. squamæ æris, ceræ, singulorum P. *VIII*.*. resinæ aridæ P. *XII*.*. aceti cyathus. Idem præstat cumini farina cum struthio et melle.

3. Si jecur dolet, id in quo est balsami lacrymæ P. *XII*.*. costi, cinnamomi, casie corticis, myrrhæ, croci, junci rotundi, balsami, seminis iridis Illyricæ, cardamomi, amomi, nardi, singulorum P. *XVI*.*. Quibus adjicitur nardinum unguentum, donec cerati crassitudo sit: et hujus quidem recentis usus est. Si verò servandum est, resinæ terebinthinæ P. *XVI*.*. ceræ P. *X*.*. ex vino leni contunduntur, tùm eo miscentur.

4. At si lienis torquet, glandis, quam βάλανον μυσσεψικόν Græci vocant, cortex et nitrum paribus portionibus contunduntur, respergunturque aceto quàm acerrimo. Ubi cerati crassitudinem habet, linteo antea in aquâ frigidâ madefacto illinitur, et sic imponitur, suprâque farina hordeacea injicitur: sed manere ibi non ampliùs sex horis debet, ne lienem absumat: satiusque est id bis aut ter fieri.

5. Commune autem et jecinori, et lieni, et abscessibus, et strumæ, parotidibus, articulis, calcibus quoque suppurantibus aut aliter dolentibus, etiam concoctioni ventris, Lysias composuit ex hyssopi, panacis, styracis, galbani, resinæ, singulorum P. *II*.*. ammoniaci, bdel-

lii, ceræ, sevi taurini, iridis aridæ P. iv.*. cachryos acetabulo, piperis granis quadraginta: quæ contrita irino unguento temperantur.

6. Ad laterum autem dolores compositio est Apollopheanis, in quâ sunt resinæ terebinthinæ, thuris fuliginis, singulorum P. iv.*. bdellii, ammoniaci, iridis, sevi vitulini aut caprini à renibus, visci, singulorum P. iv.*. Hæc autem eadem omnem dolorem levant, dura emolliunt, mediocriter calefaciunt.

7. Ad idem Andreæ quoque malagma est, quod etiam resolvit, educit humorem, pus maturat; ubi id maturum est, cutem rumpit, ad cicatricem perducit, prodest impositum minutis majoribusque abscessibus, item articulis, ideòque et coxis et pedibus dolentibus: item si quid in corpore collisum est, reficit: præcordia quoque dura et inflata emollit, ossa extrahit, ad omnia denique valet quæ adjuvare calor potest. Id habet ceræ P. xi.*. visci, sycamini quam aliàs sycomorum vocant, lacrymæ, singulorum P. i.*. piperis et rotundi et longi, ammoniaci, thymiamatis, bdellii, iridis Illyricæ, cardamomi, amomi, xylobalsami, thuris masculi, myrrhæ, resinæ aridæ, singulorum P. x.*. pyrethri, cocci Gnidii, spumæ nitri, salis ammoniaci, aristolochiæ Creticæ, radicis ex cucumere agresti, resinæ terebinthinæ liquidæ, singulorum P. xx.*. Quibus adjicitur unguenti irini, quantum satis est ad ea mollienda atque cogenda.

8. Præcipuum verò est ad resolvenda quæ adstricta sunt, mollienda quæ dura sunt, digerenda quæ coeunt, id quod ad Polyarchum auctorem refertur. Habet junci quadrati, cardamomi, thuris fuliginis, amomi, ceræ, resinæ liquidæ, pares portiones.

9. Aliud ad eadem Nilei: crocomagmatis quod quasi recrementum ejus est, P. iv.*. ammoniaci, thymiana-

tis, ceræ, singulorum P. xx. *. ex quibus duo priora ex aceto teruntur, cera cum rosâ liquatur, et tùm omnia junguntur.

10. Propriè etiam dura emollit id quod Moschi esse dicitur. Habet galbani unciam, thuris fuliginis P. ceræ, ammoniaci, thymiamatis trientes, picis aridæ P. 11. aceti heminas tres.

11. Fertur etiam ad digerenda quæ coeunt sub auctore Medo, quod habet ceræ P. panacis P. *. semis, squamæ æris, aluminis rotundi, item scissilis, singulorum P. 1. *. plumbi combusti P. 1. *. et semis.

12. Ad eadem Panthemus utebatur, calcis P. semis, sinapis contriti, item feni Græci, aluminis, singulorum P. 1. *. sevi bubuli P. 11. *. et semis.

13. Ad strumam multa malagmata invenio. Credo autem, quò pejus id malum est, minùsque facilè discutitur, eò plura esse tentata quæ in personis variis variè responderunt. Andreas auctor est ut hæc misceantur, urticæ seminis P. 1. *. piperis rotundi, bdellii, galbani, ammoniaci, thymiamatis, resinæ aridæ, singulorum P. 11. *. resinæ liquidæ, ceræ, pyrethri, piperis longi, lactucæ marinæ seminis, sulfuris ignem non experti, quod ἄπυρον vocatur, pares portiones.

14. Hoc autem Miconis est. Fæcis aridæ, aceti, spumæ nitri, salis ammoniaci, sinapis, cardamomi, radicis cucumeris silvestris, singulorum P. 11. *. quæ ex leni vino contunduntur.

15. Expeditius ad idem fit quod habet visci seminis, stercoris, resinæ, sulfuris ignem non experti pares portiones; et in quo est sulfuris P. 1. *. lapidis quem πυρίτην vocant, P. 11. *. cumini acetabulum. Item in quo est lapidis ejusdem pars una, sulfuris duæ partes, resinæ terebinthinæ partes tres.

16. Arabis autem cujusdam est ad strumam et orien-

tia tubercula, quæ φύματα vocantur, quod hæc digerit. Habet myrrhæ, salis ammoniaci, thuris, resinæ liquidæ et aridæ, crocomaginis, ceræ, singulorum P. i. *. lapidis ejus quem πυρίτην vocant, P. iv. *. quibus quidam adjiciunt sulfuris P. ii. *.

17. Est etiam proficiens in strumâ, et in his tuberculis quæ difficiliter concoquuntur, et in his quæ καρκινώδη vocantur, quod ex his constat: sulfuris P. ii. *. nitri P. iv. *. myrrhæ, P. vi. *. fuliginis thuris P. *. semis, salis ammoniaci P. *. iiii. ceræ P. i. *.

18. Protarchus autem ad παρωτίδας, eaque tubercula quæ μελικηρία, id est, favi, vel φύματα nominantur, item mala ulcera, pumicis, resinæ pineæ liquidæ, thuris fuliginis, spumæ nitri, iridis, singulorum P. viii. *. cum ceræ P. ix. *. miscebat, hisque olei cyathum et dimidium adjiciebat.

19. At adversus panum, tùm primùm orientem, quod φύγεθλον Græci vocant, et omne tuberculum quod φῦμα nominatur, miscetur ochra quæ Attice nominatur, cum duabus partibus similæ, hisque dùm contunduntur, subinde mel instillatur, donec malagmatis crassitudo sit.

20. Discutit etiam omne tuberculum quod φῦμα vocatur, id quod habet calcis, nitri spumæ, piperis rotundi, singulor. P. i. *. galbani P. ii. *. salis P. iv. *. quæ excipiuntur cerato ex rosâ facto.

21. Supprimitque omne quod abscedit, id in quo est galbani, fabæ fressæ, singulorum P. i. *. myrrhæ, thuris, ex radice capparis corticis, singulorum P. iv. *. Satis quoque omnia abscedentia digerit murex combustus et benè contritus, aceto subindè adjecto.

22. At si satis sanguis subit, rectè imponitur quod adversus phymata quoque potest. Constax ex his, bdellii, styracis, ammoniaci, galbani, resinæ et aridæ et

liquidæ pineæ, item ex lentisco, thuris, iridis, singulorum P. II. *.

23. Καρχινώδη verò phymata commodè his leniuntur: galbani, visci, ammoniaci, resinæ terebinthinæ in singulis P. I. *. sevi taurini P. *. semis, fæcis combustæ quàm maximâ portione, dùm id siccius non faciat quàm esse malagma oportet.

24. Quod si, facie contusâ, livor subcruentus est, hæc compositio nocte et die imposita tollit: aristolochiæ, thapsiæ, singulorum P. II. *. bdellii, styracis, ammoniaci, thymiamatis, galbani, resinæ aridæ, et ex lentisco liquidæ, thuris masculi, iridis Illyricæ, ceræ singulorum P. IV. *. Idem faba quoque imposita proficit.

25. Sunt etiam quædam malagmata quæ σωματικά Græci vocant, quoniam aperiendi vim habent: quale est quod ex his constat: piperis longi, spumæ nitri, singulorum P. II. *. erysimi P. *. IV. quæ cum melle miscentur. Idoneaque etiam strumæ aperiendæ sunt: ejus generis vehementiusque ex his est id quod habet calcis P. IV. *. piperis grana sex, nitri, ceræ, singulorum P. X. *. mellis P. olei heminam.

26. Miconis quoque est quod resolvit, aperit, purgat. Habet alcyonium, sulfur, nitrum, pumicem, paribus portionibus, quibus tantum picis et ceræ adjicitur, ut fiat cerati crassitudo.

27. Ad ossa autem Aristogenis, fit ex his: sulfuris P. I. *. resinæ terebinthinæ, nitri spumæ et ex scillâ partis interioris, plumbi eloti, singulorum P. II. *. thuris fuliginis P. VIII. *, ficus aridæ quàm pinguissimæ, sevi taurini, singulorum P. VIII. *. ceræ P. VII. *. iridis Macedonicæ, P. VI. *. sesami fricti acetabulum.

28. Maximèque nervis et articulis malagma convenit. Igitur Euthylei est et ad articulos, et ad omnem dolorem, et ad vesicæ, et ad recenti cicatrice contractos articulos

quas ἀγκύλας Græci nominant, conveniens : quod habet fuliginis thuris acetabulum, resinæ tantumdem, galbani sine surculis sescunciam, ammoniaci, bdellii, singulorum P. *. ceræ P. S. semis. Aliud item fit, quod habet iridis, ammoniaci, galbani, nitri, singulorum P. XIV. *. resinæ liquidæ P. VI. *. ceræ P. XVI. *.

29. Ad dolores articulorum Sosagoræ : Plumbi combusti, papaveris lacrymæ, corticis hyoseyami, styracis, peucedani, sevi, resinæ, ceræ pares portiones.

30. Chrysippi : resinæ liquidæ, sandarachæ, piperis, singulorum P. XII. *. quibus ceræ paulum adjicitur.

31. Ctesiphontis : ceræ Creticæ, resinæ terebinthinæ, nitri quàm ruberrimi, singulorum P. *. semis, olei cyathi tres. Sed id nitrum antè per triduum instillatâ aquâ teritur, et cum sextario ejus incoquitur, donec omnis humor consumatur. Prodest verò ea compositio etiam ad parotidas, phymata, strumam, omnemque coitum humoris emolliendum.

32. Ad articulos, fici quoque aridæ, partem nepetæ mistam, vel uvam taminiam sine seminibus cum pulegio rectè aliquis imponit.

33. Eadem podagræ præsidio sunt. Sed ad eam fit Aristonis quoque, quod habet nardi, cinnamomi, cassiæ, chamæleontis, junci rotundi, singulorum P. VIII. *. sevi caprini ex irino liquati P. XX. *. iridis P. I. *. quæ in aceto quàm acerrimo jacere per XX. dies debet. Idem autem etiam recentia phymata, doloresque omnes discutit.

34. At Theoxenus ad pedum dolores, sevi à renibus partem tertiam, salis partes duas miscebat, hisque membranulam illitam imponebat, tùm superinjiciebat ammoniacum thymiama in aceto liquatum.

35. At Numenius podagram cæterosque articulos induratos hoc mollebat : abrotoni, rosæ aridæ, papaveris lacrymæ, singulorum P. III. *. resinæ terebinthinæ P.

iv. *. thuris, spumæ nitri, singulorum P. xii. *. ceræ P. iii. *. quibus adjicitur cedri cyathus unus, olei laurini cyathi tres, olei acerbi sextarius.

36. Si quando autem in articulis callus increvit, Dexius docuit imponere calcis P. iv. *. cerussæ P. viii. *. resinæ pinæ P. xx. *. piperis grana P. xx. ceræ P. ii. *. quibus dum contunduntur, hemina vini lenis instillatur.

SECT. XIX. Ex emplastris autem nulla majorem usum præstant, quàm quæ cruentis protinùs vulneribus injiciuntur, ἔναιμα Græci vocant. Hæc enim reprimunt inflammationem, nisi magna vis eam cogit, atque illius quoque impetum minuunt; tùm glutinant vulnera quæ id patiuntur, cicatricem iisdem inducunt. Constant autem ex medicamentis non pinguibus, ideoque ἀλίπαινα à Græcis nominantur.

1. Optimum ex his est quod Barbarum vocatur. Habet æruginis rasæ P. xii. *. spumæ argenti P. xx. *. aluminis; picis aridæ, resinæ pineæ aridæ, singulorum P. i. *. quibus adjiciuntur olei et acetì singulæ heminæ.

2. Alterum ad idem, quod Choacon vocant: habet spumæ argenti P. c. *. resinæ aridæ tantundem: sed spuma priùs ex tribus olei heminis coquitur. His duobus emplastris color niger est, qui ferè talis fit ex pice atque resinâ. At ex bitumine nigerrimus, ex ærugine aut æris squamâ viridis, ex minio ruber, ex cerussâ albus.

3. Paucae admodùm compositiones sunt, in quibus aliquid mixturæ varietas novat. Ergo id quoque nigrum est quod βασιλικὸν nominatur. Habet panacis P. i. *. galbani P. ii. *. picis et resinæ, singulorum P. x. *. olei dimidium cyathum.

4. At quod perviride est, smaragdinum appellatur, in quo sunt resinæ pineæ P. iii. *. ceræ P. i. *. æruginis P. *. semis, thuris fuliginis P. ii. *. olei tantundem et acetì, quo fuligo et ærugo in unum cogantur.

5. Est etiam coloris ferè rufi, quod celeriter ad cicatricem vulnera perducere videtur. Habet thuris P. i. *. resinæ P. ii. *. squamæ æris P. iii. *. spumæ argenti P. xx. *. ceræ P. c. *. olei heminam.

6. Prætereà est quod παρακολλητικὸν à glutinando vocant. Constat ex his : bituminis, aluminis scissilis P. iv. *. spumæ argenti P. vi. *. et olei veteris heminâ.

7. Prætereà sunt quædam generis ejusdem, quæ, quia capitibus fractis maximè conveniunt, κεφαλικά à Græcis nominantur. Philotæ compositio habet terræ Eretriæ, chalcitidis, singulorum P. iv. *. myrrhæ, æris combusti, singulor. P. x. *. ichthyocollæ P. vi. *. æruginis rasæ, aluminis rotundi, misy crudi, aristolochiæ, singulorum P. viii. *. squamæ æris P. xx. *. thuris masculi P. ii. *. ceræ P. i. *. rosæ et olei acerbi ternos cyathos, aceti quantum satis est, dùm arida ex eo conteruntur.

8. Aliud ad idem viride. Æris combusti, squamæ æris, myrrhæ, ichthyocollæ, singulorum P. vi. *. misyos crudi, æruginis rasæ, aristolochiæ, aluminis rotundi, singulorum P. viii. *. ceræ P. vi. *. olei hemina, aceti quod satis sit.

9. Puri autem movendo non aliud melius quàm quod expeditissimum est : τετραφάρμακον à Græcis nominatur. Habet pares portiones ceræ, picis, resinæ, sevi taurini, si id non est, vitulini.

10. Alterum ad idem ἐννεαφάρμακον nominatur quod magis purgat. Constat ex novem rebus, cerâ, melle, sevo, resinâ, myrrhâ, rosâ, medullâ vel cervinâ, vel vitulinâ, vel bubulâ, hyssopo, butyro. Quorum ipsorum quoque pondera paria miscentur.

11. Sunt autem quædam emplastra, quibus utriusque rei facultas est, quæ si singula habenda sunt, meliora sunt; sed in copiâ rejicienda sunt, his potiùs adhibitis,

quæ propriè id quod eo tempore opus est, consequuntur. Exempli causâ duo proponam. Est igitur ad vulnera Attalum, quod habet squamæ æris P. VI. *. thuris fuliginis P. XV. *, ammoniaci tantundem, resinæ terebinthinæ liquidæ P. XXV. *. sevi taurini tantundem, aceti heminas tres, olei sextarium. At inter ea quæ fracto capiti accommodantur, habent quidam id quod ad auctorem Judæum refertur. Constat ex his : salis P. IV. *. squamæ æris rubri, æris combusti, singulorum P. XII. *. ammoniaci, thymiamatis, thuris fuliginis, resinæ aridæ, singulorum P. VI. *. resinæ colophoniacæ, ceræ, sevi vitulini curati, singulorum P. XX. *. additur aceti sesquicyathus, olei minus cyatho. Τεθεραπευμένα Græci appellant, quæ curata vocamus, quum ex sevo puta omnes membranulæ diligenter exemptæ sunt, aut ex alio medicamento.

12. Sunt etiam quædam emplastra nobilia ad extrahendum. Quæ ipsa quoque ἐπισπαστικά nominantur : quale est quod, quia lauri baccas habet, διὰ δαφνίδων appellatur. In eo est, resinæ terebinthinæ P. X. *. nitri, ceræ, picis aridæ, baccarum lauri, singulorum P. XX. *. olei paulum. Quoties aut baccam, aut nucem, aut simile aliquid posuero, scire oportebit, antequàm expendatur, ei summam pelliculam esse demendam.

13. Aliud eodem nomine, quod puri quoque movendo est. Sevi vitulini, ammoniaci, thymiamatis, picis, ceræ, nitri, baccarum lauri, resinæ aridæ, aristolochiæ, pyrethri, pares portiones.

14. Præter hæc est Philocratis, quod habet salis ammoniaci P. VII. *. aristolochiæ P. VIII. *. ceræ, resinæ terebinthinæ, fuliginis thuris, singulorum P. XV. *. spumæ argenti. P. XXXII. *. quibus, ut pus quoque moveant, iridis P. III. *. et galbani P. VI. adjiciuntur.

15. Optimum tamen ad extrahendum est id quod à similitudine sordium ῥοπῶδες Græci appellant. Habet

myrrhæ, croci, iridis, propolis, bdellii, capitulorum Punici mali, aluminis et scissilis et rotundi, misy, chalcitidis, atramenti sutorii cocti, panacis, salis ammoniaci, visci, singulorum P. iv. *. aristolochiæ P. viii. *. squamæ æris P. xvi. *. resinæ terebinthinæ P. lxxv. *. ceræ, et sevi vel taurini vel hircini singulorum P. c. *.

16. Hecatæo quoque auctore, emplastrum generis ejusdem fit ex his : galbani P. ii. *. fuliginis thuris P. iv. *. picis P. vi. *. ceræ et resinæ terebinthinæ, singulorum P. viii. *. quibus paulum irini ungenti miscetur.

17. Valens quoque ad idem emplastrum viride Alexandrinum est. Habet aluminis scissilis P. viii. *. salis ammoniaci P. *. vii. squamæ æris P. xvi. *. myrrhæ, thuris, singulorum P. xviii. *. ceræ P. cl. *. resinæ colophoniacæ aut pineæ P. cc. *. olei heminam, aceti sextarium.

18. Quædam autem sunt emplastra exedentia, quæ σκηπτὰ Græci vocant : quale est id quod habet resinæ terebinthinæ, fuliginis thuris, singulorum P. *. ii. squamæ æris P. i. *. ladani P. ii. *. aluminis tantundem, spumæ argenti P. iv. *.

19. Exest etiam vehementer corpus, atque ossa quoque resolvit, et supercrescentem carnem coercet id quod habet spumæ argenti, squamæ æris, uncias singulas, nitri ignem non experti, lapidis Asii, aristolochiæ P. sextantes; ceræ, resinæ terebinthinæ, thuris, olei veteris, atramenti sutorii, salis ammoniaci P. semis, æruginis rasæ P. bessem, aceti scillitici heminam, vini Aminæi tantundem.

20. Sunt etiam adversus morsus quædam accommodata, quale est Diogenis nigrum, quod habet bituminis, ceræ, resinæ pineæ aridæ, singulorum P. xx. *. spumæ argenti P. c. *. olei sextarium. Aut in quo sunt squamæ

æris P. iv. *. cerussæ et æruginis rasæ, singulorum P. viii. *. ammoniaci P. xii. ceræ, resinæ pineæ, singulorum P. xxv. *. spumæ argenti P. c. *. olei sextarium. Aut in quo sunt squamæ æris P. xiv. *. galbani P. vi. *. cerussæ et æruginis, singulor. P. viii. *. ammoniaci P. xii. ceræ, resinæ pineæ, singulorum P. xxxv. *. ex quibus spuma argenti concoquitur.

21. Rubrum quoque emplastrum quod Ephesium vocatur, huc aptum est. Habet resinæ terebinthinæ P. ii. *. galbani P. iv. minii Sinopici P. vi. *. thuris fuliginis P. vi. *. ceræ P. viii. *. spumæ argenti P. xxxvi. *. olei veteris heminam.

22. Item id quod ex his constat : squamæ æris, thuris fuliginis, singulorum P. iv. *. galbani P. iv. *. salis ammoniaci P. *. xii. ceræ P. xxv. *. olei tribus heminis. Hæc autem aliis quoque recentioribus vulneribus rectè imponuntur.

23. Sunt etiam alba lenia (λευκά Græci vocant) ferè non gravibus vulneribus accommodata, præcipuèque senilibus. Quale est quod habet cerussæ P. lii. *. sevi vitulini curati, et ceræ, singulorum P. lviii. *. olei heminas tres, ex quibus cerussa coquitur.

24. Aliud quod habet cerussæ P. xx. *. ceræ P. lv. *. olei heminam, aquæ sextarium. Quæ quoties adjiciuntur cerussæ vel spumæ argenti, scire licet illa ex his coquenda esse. Est autem ea percandida compositio quæ suprà posita est, ideòque elephantina nominatur.

25. Lenia quoque quædam emplastra sunt, quas λιπαράς ferè Græci nominant; ut id quod habet minii P. iv. *. spumæ argenti P. xxv. *. ceræ et adipis suillæ, singulor. P. xxxvii. *. vitellos quatuor.

26. Alia compositio generis ejusdem : ceræ, resinæ terebinthinæ, singulorum P. v. *. cerussæ P. viii. *. spumæ argenti, plumbi recrementi (σχωρίαν μολύβδου

Græci vocant) singulorum P. x. cicini olei, et myrtei, singulorum heminae.

27. Tertia, quæ ad auctorem Archagathum refertur: misy cocti, æris combusti, singulorum P. iv. *. cerussæ coctæ P. viii. *. resinæ terebinthinæ P. x. *. spumæ argenti P. vi. *.

28. Etiam una generis ejusdem: spumæ argenti, ceræ, adipis suillæ, singulorum P. xxvii. *. vitelli cocti quatuor, rosæ hemina. Aut cerati ex oleo myrteo facti partes tres, adipis suillæ pars quarta, paulum ex plumbi recremento. Aut spumæ argenti selibra, ex olei heminâ, et aquæ marinæ alterâ, cocta donec bullire desierit, cui paulum ceræ sit adjectum. Aut pares portiones ceræ, sevi, stibii, spumæ argenti, cerussæ.

SECT. XX. 1. Pastilli quoque facultates diversas habent. Sunt enim ad recentia vulnera glutinanda sanandaque apti: qualis est qui habet chalcitidis, misy, spumæ nitri, floris æris, gallæ, aluminis scissilis modicè cocti, singulorum P. i. *. æris combusti, capitulorum mali Punici, singulorum P. iiii. *. Hunc oportet diluere aceto, ac sic, ubi vulnus glutinandum est, illinere. At si nervosus aut musculosus is locus est, commodius est cerato miscere, sic ut illius octo partes, nona hujus sit.

Alius ad idem constat ex his, bituminis, aluminis scissilis, singulorum P. i. *. æris combusti P. iv. spumæ argenti P. xi. *. olei sextario.

2. Sed longè Polybi celeberrimus est: σφραγίς autem nominatur: qui habet aluminis scissilis P. iv. *. atramenti sutorii P. ii. *. myrrhæ P. v. *. aloës tantundem, capitulorum Punici mali, fellis taurini, singulorum P. vi. *: quæ contrita vino austero excipiuntur.

3. Ad ulcera sordidâ, et nigritiem in auribus, naribus, obscenis partibus, inflammationesque eorum: chry-

socollæ P. I. *. atramenti sutorii, aluminis scissilis, singulorum P. II. *. halicacabi corticis P. IV. *. minii P. VI. *. spumæ argenti P. XII. *. cerussæ P. XVI. *. quæ ex aceto et coguntur, et, ubi utendum est, diluuntur.

4. Andronis verò est ad uvam inflammata, ad naturalia sordida, etiam cancro laborantia. Gallæ, atramenti sutorii, myrrhæ, singulorum P. I. *. aristolochiæ, aluminis scissilis, singulorum P. II. *. capitulorum Punici mali P. XXV. *. ex passo coactorum, et, quò us exigit, aceto vel vino dilutorum, prout valentius aut lenius vitium est id cui medendum est.

5. Propriè autem ad ani fissa, vel ora venarum fundentia sanguinem, vel cancerum: æruginis P. II. *. myrrhæ P. IV. gummi P. VIII. *. thuris, P. XII. stibis, lacrymæ papaveris, acaciæ, singulorum P. XVI. Quæ ex vino et teruntur, et in ipso usu deliquantur.

6. Expellere autem ex vesicâ cum urinâ calculum videtur hæc compositio: cassiæ, croci, myrrhæ, costi, nardi, cinnamomi, dulcis radicis, balsami, hyperici, pares portiones conteruntur, deindè vinum lene instillatur, et pastilli fiunt, qui singuli habeant P. I. *. hique singuli quotidie mane jejuno dantur.

SECT. XXI. I. Hæc tria compositionum genera, id est, quæ in malagmatis, emplastris pastillisque sunt, maximum præcipuèque varium usum præstant. Sed alia quoque utilia sunt, ut ea quæ feminis subjiciuntur: *πεσσοῦς* Græci vocant. Eorum hæc proprietas est: medicamenta composita molli lanâ excipiuntur, eaque lana in naturalibus conditur.

Ad sanguinem autem evocandum, cauneis duabus adjicitur nitri P. I. *. aut allii semen conteritur: adjicitur myrrhæ paululum: et unguento susino miscetur: aut cucumeris silvestris pars interior, ex lacte muliebri diluitur.

2. Ad vulvam molliendam, ovi vitellus, et fenum Græcum, et rosa et crocum temperantur. Aut elaterii P. II. *. salis tantumdem, uvæ taminiae P. VI. *. melle excipiuntur.

3. Aut, Boetho auctore, croci, resinæ terebinthinæ, singulorum P. IV. *. myrrhæ P. II. *. rosæ P. I. *. sevi vitulini P. II. *. ceræ P. II. *. miscentur.

4. Optima autem adversus inflammationes vulvæ Numenii compositio est, quæ habet croci P. III. *. ceræ P. I. *. butyri P. VIII. *. adipis anserini P. XII. *. vitellos coctos duos, rosæ minùs cyatho.

5. Si verò infans intùs decessit, quò faciliùs ejiciatur, malicorium ex aquâ terendum, eoque utendum est.

6. Si concidere vitio locorum mulier solet, cochleæ cum testis suis comburendæ conterendæque, deindè his mel adjiciendum est.

7. Si non comprehendit, adeps leonina ex rosâ mollienda est.

SECT. XXII. I. Quædam autem mixturæ medicamentorum sunt, quibus aridis neque coactis utimur, sic ut inspergamus, aut cum aliquo liquido mixta illinamus. Quale est ad carnem supercrescentem exedendam, quod habet squamæ æris, fuliginis thuris, singulorum P. I. *. æruginis P. II. *. Hæc autem eadem cum melle purgant ulcera; cum cerâ implent. Misy quoque et galla, si paribus portionibus misceantur, corpus consumunt, eaque vel arida inspergere licet, vel excepta cadmiâ illinire.

2. Putrem verò carnem continet, neque ultrà serpere patitur, et leniter exest mel vel cum lenticulâ, vel cum marrubio, vel cum oleæ foliis antè ex vino decoctis. Item sertula campana in mulso cocta, deindè contrita, aut calx cum cerato, aut amaræ nuces cum allio, sic ut hujus pars tertia sit, paulùmque his croci adjiciatur. Aut

quod habet spumæ argenti P. vi.*. cornu bubuli combusti P. xii.*. olei myrtei et vini cyathos ternos. Aut quod ex iis constat : floris Punici mali, atramenti sutorii, aloës, singulorum P. ii.*. aluminis scissilis, thuris, singulorum P. iv.*. gallæ P. viii.*. aristolochiæ P. x.*. Vehementiùs idem fecit etiam adurendo auripigmentum cum chalcitide, et aut nitro, aut calce, aut chartâ combustâ. Item sal cum aceto. Vel ea compositio quæ habet chalcitidis, capitulorum Punici mali, aloës, singulorum P. ii.*. aluminis scissilis, thuris, singulorum P. iv.*. gallæ P. viii.*. aristolochiæ P. x.*. mellis quantum satis sit ad ea cogenda. Vel cantharidum, sulfuris, singulorum P. i.*. lolii P. iii.*. quibus adjicitur picis liquidæ quantum satis est ad jungendum. Vel chalcitis quoque cum resinâ et rutâ mixta; aut cum eâdem resinâ diphryges; aut uva taminia cum pice liquidâ. Idem verò possunt fæces vini combustæ, et calcis, et nitri pares portiones, vel aluminis scissilis P. iv.*. thuris, sandarachæ, nitri, singulorum P. i.*. gallæ P. viii.*. aristolochiæ P. x.*. mellis quantum satis est.

3. Est etiam Hieræ compositio, quæ habet myrrhæ, chalcitidis, singulorum P. ii.*. aloës, thuris, aluminis scissilis, singulorum P. iv.*. aristolochiæ, gallæ immaturæ, singulorum P. viii.*. malicorii contriti P. x.*.

4. Est Judæi, in quâ sunt calcis partes duæ, nitri quàm ruberrimi pars tertia, quæ urinâ impuberis pueri coguntur, donec strigmenti crassitudo sit. Sed subindè is locus, cui id illinitur, madefaciendus est.

5. At Iollas, chartæ combustæ, sandarachæ, singulorum P. i.*. calcis P. ii. auripigmenti tantumdem miscbat.

6. Si verò ex membranâ quæ super cerebrum est, profluit sanguis, vitellus combustus et contritus inspergi debet. Si ex alio loco sanguinis profluvium est, auri-

pigmenti, squamæ æris, singulorum P. i.*. sandarachæ P. ii.*. marmoris cocti P. iv.*. inspergi debent. Eadem cancro quoque obsistunt. Ad inducendam cicatricem, squamæ æris, thuris fuliginis, singulorum P. ii.*. calcis P. iv.*. Eadem incrementem quoque carnem coercent.

7. Timæus autem ad ignem sacrum vel ad cancerum his utebatur: myrrhæ P. ii.*. thuris, atramenti sutorii, singulorum P. iii.*. sandarachæ, auripigmenti, squamæ æris, singulorum P. iv.*. gallæ P. vi.*. cerussæ combustæ P. viii. Eadem vel arida inspersa, vel melle excepta, idem præstant.

8. Sternutamenta verò vel albo veratro, vel struthio coniecto in nares excitantur, vel his mistis, piperis, veratri albi, singulor. P. ii.*. castorei pondo i.*. spumæ nitri P. i.*. struthii P. ii.*.

9. Gargarizationes autem aut lævandi causâ fiunt, aut reprimendi, aut evocandi. Lævant lac, cremor vel ptisanæ vel furfurum. Reprimit aqua in quâ vel lenticula, vel rosa, vel rubus, vel cotoneum malum, vel palmulæ decoctæ sunt. Evocant, sinapi, piper.

SECT. XXIII. I. Antidota rarò, sed præcipuè interdum necessaria sunt, quia gravissimis casibus opitulantur. Ea rectè quidem dantur collisis corporibus, vel per ictus, vel ubi ex alto deciderunt, vel in viscerum, laterum, faucium, interiorumque partium doloribus. Maximè autem desideranda sunt adversus venena, vel per morsus, vel per cibos, aut potiones nostris corporibus inserta.

Unum est quod habet lacrymæ papaveris P. iv.*. acori malobathri P. v.*. iridis Illyricæ, gummi, singulorum P. i i.*. anisi P. iii.*. nardi Gallici, foliorum rosæ aridorum, cardamomi, singulorum P. iv.*. petroselini P. iv.*. trifolii P. v.*. casiae nigræ, silis, bdellii, balsami, seminis piperis albi, singulorum P. *.v. styracis P. *.v. myr-

rhæ, opopanax, nardi Syri, thuris masculi, hypocistidis succi, singulorum P. vi.*. castorei P. vi.*. costi, piperis albi, galbani, resinæ terebinthinæ, croci, floris junci rotundi, singulorum P.*.vi. dulcis radice P. viii.*. quæ vel melle vel passo excipiuntur.

2. Alterum quod Zopyrus regi Ptolemæo dicitur composuisse, atque Ambrosiam nominasse, ex his constat: Costi, thuris masculi, singulorum P. v.*. piperis albi P. ii.*. floris junci rotundi P. ii.*. cinnamomi P. iii.*. casiae nigrae P. iv.*. croci Cilicii P.*.iv. myrrhæ quam stacten nominant P. v.*. nardi Indici P.*. v. Quæ singula contrita melle cocto excipiuntur: deinde ubi utendum est, id quod Ægyptiæ fabæ magnitudinem impleat, in potione vini diluitur.

3. Nobilissimum autem est Mithridatis quod quotidie sumendo rex ille dicitur adversus venenorum pericula tutum corpus suum reddidisse. In quo hæc sunt, costi P.*.z. acori P. v.*. hyperici, cumini, sagapeni, acaciæ succi, iridis Illyricæ, cardamomi, singulorum P. ii.*. anisi P. iii.*. nardi Gallici, gentianæ radice, aridorum rosæ foliorum, singulorum P. iv.*. papaveris lacrymæ, petroselini, singulorum P.*. iv. casiae, silis, lolii, piperis longi, singulorum P. vi.*. styracis P.*. v. castorei, thuris, hypocistidis succi, myrrhæ, opopanax, singulorum P. vi.*. malobathri folii P. vi.*. floris junci rotundi, resinæ terebinthinæ, galbani, dauci Cretici seminis, singulorum P.*. v. nardi, opobalsami, singulorum P. vi. thlaspi P.*. vi. radice Ponticæ P. vii.*. croci, zinziberis, cinnamomi, singulorum P.*. viii. Hæc contrita melle excipiuntur, et adversus venenum, quod magnitudinem nucis Græcæ impleat, ex vino datur. In cæteris autem affectibus corporis pro modo eorum, vel quod Ægyptiæ fabæ, vel ervi quod magnitudinem impleat, satis est.

SECT. XXIV. 1. Acopa quoque utilia nervis sunt. Quale est quod habet floris junci rotundi P. *. 11. costi, junci quadrati, lauri baccarum, ammoniaci, cardamomi, singulorum P. *. 14. myrrhæ, æris combusti, singulorum P. *. 17. iridis Illyricæ, ceræ, singulorum P. 14. *. Alexandrini calami, junci rotundi, aspalathi, xylobalsami, singulorum P. 16. 11. *. sevi P. 1. *. unguenti irini cyathum.

2. Alterum quod εὐὼδες vocant, hoc modo fit. Ceræ P. *. 11. olei tantumdem, resinæ terebinthinæ ad nucis juglandis magnitudinem, simul incoquuntur, deindè in mortario teruntur, instillaturque subindè quàm optimi mellis acetabulum, tùm irini unguenti et rosæ terni cyathi.

3. Ἐγχεῖρα autem Græci vocant liquida quæ illinuntur. Quale est quod fit ad ulcera purganda et implenda, maximè inter nervos, paribus portionibus inter se mixtis, butyri, medullæ vitulinæ, sevi vitulini, adipis anserinæ, ceræ, mellis, resinæ terebinthinæ, rosæ, olei cicini. Quæ separatim omnia liquantur, deindè liquida miscentur, et tùm simul teruntur. Et hoc quidem magis purgat: magis verò emollit, si pro rosâ cyprus infunditur.

4. Ad sacrum ignem spumæ argenti P. 16. *. cornu bubuli combusti P. 11. *. conteruntur, adjiciturque invicem vinum, et id quod specialiter sic vocatur, et myrteum, donec utriusque terni cyathi conficiantur.

SECT. XXV. 1. Catapotia quoque multa sunt, variisque de causis fiunt. Anodyna vocant quæ somno dolorem levant: quibus uti, nisi nimia necessitas urget, alienum est: sunt enim ex vehementibus medicamentis et stomacho alienis. Prodest tamen etiam ad concoquendum, quod habet papaveris lacrymæ, galbani, singulorum P. 1. *. myrrhæ, castorei, piperis, singulorum P. 11. *. Ex quibus quod ervi magnitudinem habet, satis est devorasse.

2. Alterum stomacho pejus, ad somnum valentius, ex his fit : mandragoræ P. *. ii. apii seminis, item hyoscyami seminis, singulorum P. iv. * quæ ex vino teruntur. Unum autem ejusdem magnitudinis quæ suprâ posita est, abundè est sumpsisse.

3. Sive autem capitis dolores, sive ulcera, sive lippitudo, sive dentes, sive spiritûs difficultas, sive intestinorum tormenta, sive inflammatio vulvæ est, sive coxa, sive jecur aut lienis, aut latus torquet, sive vitio locorum aliqua prolabitur et obmutescit, occurrit dolori per quietem ejusmodi catapotium. Silis, acori, rutæ silvestris seminis, singulorum P. ii. *. castorei, cinnamomi, singulorum P. ii. *. papaveris lacrymæ, panacis, radicis mandragoræ, malorum aridorum, junci rotundi, floris, singulorum P. ii. *. piperis grana lvi. Hæc per se contrita, rursus instillato subindè passo, simul omnia teruntur, donec crassitudo sordium fiat. Ex eo paulum aut devoratur, aut aquâ diluitur et potui datur.

4. Quin etiam silvestris papaveris quum jam ad excipiendam lacrymam maturum est, manipulus qui manu comprehendi potest, in vas demittitur et superinfunditur aqua quæ id contegat, atque ita coquitur. Ubi jam benè manipulus is coctus est, ibidem expressus, projicitur; et cum eo humore passum pari mensurâ miscetur, infervetque donec crassitudinem sordium habeat. Quum refrixit, catapotia ex eo fiunt ad nostræ fabæ magnitudinem, habentque usum multiplicem. Nam et somnum faciunt vel per se assumpta, vel ex aquâ data, et aurium dolores levant, adjectis exiguo modo rutæ succo ac passo. Et tormina supprimunt ex vino liquata, et inflammationem vulvæ coërcent, mixta cerato ex rosâ facto, quum paulum his croci quoque accessit, et ex aquâ fronti inductâ pituitam in oculos decurrentem tenent.

5. Item si vulva dolens somnum prohibet, croci P. ii. *.

anisi, myrrhæ, singulorum P. i. *. papaveris lacrymæ P. iv. *. cicutæ seminis P. viii. *. miscentur, excipiunturque vino vetere, et quod lupini magnitudinem habet in tribus cyathis aquæ diluitur, id tamen in febre periculosè datur.

6. Ad sanandum jecur nitri P. ii. *. croci, myrrhæ, nardi Gallici, singulorum P. i. *. melle excipiuntur, daturque quod Ægyptiæ fabæ magnitudinem habeat.

7. Ad lateris dolores finiendos, piperis, aristolochiæ, nardi, myrrhæ, pares portiones.

8. Ad thoracis, nardi P. i. *. thuris, casiæ, singulorum P. iii. *. myrrhæ, cinnamomi, singulorum P. vi. *. croci P. viii. *. resinæ terebinthinæ quadrans, mellis heminæ tres.

9. Ad tussim Athenionis; myrrhæ, piperis, singulorum P. i. *. castorei, papaveris lacrymæ, singulorum P. i. *. Quæ separatim contusa postea junguntur, et ad magnitudinem fabæ nostræ bina catapotia manè, bina noctu dormituro dantur.

10. Si tussis somnum prohibet, ad utrumque Heraclidis Tarentini: croci P. i. *. cinnamomi, castorei, papaveris lacrymæ, singulorum P. i. *. myrrhæ, piperis longi, costi, galbani, singulorum P. ii. *.

11. Quod si purganda sunt ulcera in faucibus tussientibus: panacis, myrrhæ, resinæ terebinthinæ, singulorum P. v. *. galbani P. ii. *. hyssopi P. ii. *. conterenda sunt, hisque hemina mellis adjicienda, et quod digito excipi potest, devorandum est.

12. Colice verò Casii ex his constat: costi, anisi, castorei, singulorum P. iii. *. petroselini P. iv. *. piperis et longi et rotundi, singulorum P. v. *. papaveris lacrymæ, junci rotundi, myrrhæ, nardi, singulorum P. vi. *. quæ melle excipiuntur. Id autem et devorari potest, et ex aquâ calidâ sumi.

13. Infantem verò mortuum aut secundas expellit aquæ potio, cui salis ammoniaci P. 1. *. aut cui dictami Cretici P. 1. *. adjectum est.

14. Ex partu laboranti erysimum ex vino tepido jejunæ dari debet.

15. Vocem adjuvat thuris P. 1. *. in duobus cyathis vini datum.

16. Adversus urinæ difficultatem, piperis longi, castorei, myrrhæ, galbani, papaveris lacrymæ, croci, costi, uncia singulæ, styracis, resinæ terebinthinæ pondo sextantes, mellis, absinthii cyathi singuli. Ex quibus ad magnitudinem fabæ Ægyptiæ, et manè et cœnato dari debet.

17. Arteriace verò hoc modo fit. Casiæ, iridis, cinnamomi, nardi, myrrhæ, thuris, singulorum P. 1. *. croci P. 1. *. piperis grana xxx. ex passi tribus sextariis decoquuntur, donec mellis crassitudo his fiat. Aut croci, myrrhæ, thuris, singulorum P. 1. *. conjiciuntur in passi eundem modum, eodemque modo decoquuntur. Aut ejusdem passi heminæ tres usque eò coquuntur, donec extracta indè gutta indurescat, et adjicitur tritæ casiæ P. 1. *.

SECT. XXVI. 1. Quùm facultates medicamentorum proposuerim, genera in quibus noxa corpori est, proponam. Ea quinque sunt: quùm quid extrinsecus læsit, ut in vulneribus: quùm quid intrà seipsum corruptum est, ut in cancro: quùm quid innatum est, ut in vesicâ calculus: quùm quid increvit, ut vena quæ intumescens in varicem convertitur: quùm quid deest, ut quùm curta pars aliqua est. Ex his alia sunt in quibus plus medicamenta, alia in quibus plus manus proficit. Ego dilatis iis quæ præcipuè scalpellum et manum postulant, nunc de iis dicam quæ maximè medicamentis egent. Dividam autem hanc quoque curandi partem sicut priorem: et

antè dicam de iis quæ in quamlibet partem corporis incidunt; tùm de iis quæ certas partes infestant. Incipiam à vulneribus.

In his autem antè omnia scire medicus debet, quæ insanabilia sint, quæ difficilem curationem habeant, quæ promptiorem. Est enim prudentis hominis, primùm eum qui servari non potest, non attingere, nec subire speciem ejus, ut occisi, quem sors ipsius peremit: deindè ubi gravis metus sine certâ tamen desperatione est, indicare necessariis periclitantis in difficili rem esse, ne, si victa ars malo fuerit, vel ignorasse, vel fefellisse videatur. Sed ut hæc prudenti viro conveniunt, sic rursus histrionis est parvam rem attollere, quò plus præstitisse videatur. Obligari quoque æquum est confessione promptæ rei, quò curiosiùs etiam circumspiciat ne, quod per se exiguum est malum, majus curantis negligentia fiat.

2. Servari non potest: cui basis cerebri, cui cor, cui stomachus, cui jecinoris portæ, cui in spinâ medulla percussa est; cuique aut pulmo medius, aut jejunum, aut tenuius intestinum, aut ventriculus, aut renes vulnerati sunt; cuive circa fauces grandes venæ vel arteriæ præcisæ sunt.

3. Vix autem ad sanitatem perveniunt, quibus ullâ parte pulmo, aut jecinoris crassum, aut membrana quæ continet cerebrum, aut lienis, aut vulva, aut vesica, aut ullum intestinum, aut septum transversum vulneratum est. Hi quoque in præcipiti sunt, in quibus usque ad grandes intùsque conditas venas in alis vel poplitibus, mucro desedit. Periculosa etiam vulnera sunt ubicumquè venæ majores sunt, quoniam exhaurire hominem profusione sanguinis possunt. Idque evenit non in alis tantùm atque poplitibus, sed etiam in his venis quæ ad anum testiculosque perveniunt. Præter hæc,

malum vulnus est quodcunque in alis vel feminibus, vel inanibus locis, vel in articulis, vel inter digitos est: item quodcunque musculum, aut nervum, aut arteriam, aut membranam, aut os, aut cartilaginem læsit. Tutissimum omnium quod in carne est.

4. Et hæc quidem loco vel meliora vel pejora sunt. Modò verò periculum facit quodcunque magnum est.

5. Aliquid etiam in vulneris genere figurâque est. Nam pejus est quod etiam collisum, quàm quod tantum discissum est, adeò ut acuto quoque, quàm retuso telo vulnerari commodius sit. Pejus etiam vulnus est, ex quo aliquid excisum est, ex quove caro aliâ parte abscissa est, aliâ dependet. Pessima, quæ plaga in orbem est; tutissima quæ lineæ modo recta est: quò deindè propiùs huic illive figuræ vulnus est, eò vel deterius, vel tolerabilius est.

6. Quin etiam confert aliquid et ætas, et corpus, et vitæ propositum, et anni tempus: quia faciliùs sanescit puer vel adolescens, quàm senior, valens quàm infirmus: neque nimis tenuis, neque nimis plenus, quàm si alterum ex his est: integri habitùs quam corrupti, exercitatus quàm iners, sobrius et temperans quàm vino venerique deditus. Opportunissimum quidem curationi tempus vernalis est, aut certè neque fervens neque frigidum: siquidem vulnera et nimius calor et nimium frigus infestant; maximè tamen horum varietas, ideòque perniciosissimus autumnus est.

7. Sed pleraque ex vulneribus oculis subjecta sunt, quorundam ipsæ sedes indices sunt, quas alio loco demonstravimus, quum positus interiorum partium ostendimus. Veruntamen quia quædam vicina sunt, interestque vulnus in summâ parte sit, an penitus penetraverit, necessarium est notas subicere per quas quid intus ictum sit, scire possimus, et ex quibus vel es vel desperatio oriatur.

8. Igitur, corde percusso, sanguis multus effertur, venæ languescunt, color pallidissimus, sudores tanquàm irrorato corpore frigidi malique odoris, oriuntur; extremisque partibus frigidis, matura mors sequitur.

9. Pulmone verò icto, spirandi difficultas est, sanguis ex ore spumans, ex plagâ rubens, simulque etiam spiritus cum sono fertur: in vulnus inclinari juvat, quidam sine ratione consurgunt. Multi si in ipsum vulnus inclinati sunt, loquuntur; si in aliam partem, obmutescunt.

10. Jecinoris autem vulnerati notæ sunt, multus sub dextrâ parte præcordiorum profusus sanguis, ad spinam reducta præcordia, in ventrem cubandi dulcedo, punctiones doloresque usque ad jugulum junctumque ei latum scapularum os intenti: quibus nonnunquàm etiam biliosus vomitus accedit.

11. Renibus verò percussis, dolor ad inguina testiculosque descendit, difficulter urina redditur, eaque aut est cruenta, aut cruor fertur.

12. At liene icto, sanguis niger à sinistra parte prorumpit, præcordia cum ventriculo ab eâdem parte indurescunt, sitis ingens oritur, dolor ad jugulum, sicut jecinore vulnerato, venit.

13. At quùm vulva percussa est, dolor inguinibus et coxis et femoribus est: sanguinis pars per vulnus, pars per naturale descendit, vomitus bilis insequitur. Quædam obmutescunt, quædam mente labuntur, quædam sui compotes, nervorum oculorumque dolore urgeri se confitentur, morientesque tandem eadem, quæ corde vulnerato, patiuntur.

14. Sin cerebrum membranave ejus vulnus accepit, sanguis per nares, quibusdam etiam per aures exit, ferèque bilis vomitus insequitur: quorundam sensus obtunduntur, appellatique ignorant; quorundam trux

vultus est, quorundam oculi quasi resoluti huc atque illuc moventur : ferèque tertio vel quinto die delirium accedit : multorum etiam nervi distenduntur. Ante mortem autem plerique fascias, quibus caput deligatum est, lacerant, ac nudum vulnus frigori objiciunt.

15. Ubi stomachus autem percussus est, singultus et bilis vomitus insequitur : si quid cibi vel potionis assumptum est, id redditur citò. Venarum motus elanguescunt, sudores tenues oriuntur, per quos extremæ partes frigescunt.

16. Communes verò jejuni intestini et ventriculi vulnerati notæ sunt. Nam cibus et potio per vulnus exeunt, præcordia indurescunt, nonnunquam bilis per os redditur : intestino tantum sedes inferior est. Cætera intestina icta vel stercus vel odorem ejus exhibent.

17. Medullâ verò, quæ in spinâ est, discissâ, nervi resolvuntur, aut distenduntur, sensus intercidit, interposito tempore aliquo, sine voluntate inferiores partes vel semen, vel urinam, vel etiam stercus excernunt.

18. At si septum transversum percussus est, præcordia sursum contrahuntur, spina dolet, spiritus rarus est, sanguis spumans fertur.

19. Vesicâ verò vulneratâ, dolent inguina : quod super pubem est, intenditur : pro urinâ sanguis, aut ex ipso vulnere urina descendit, stomachus afficitur. Itaque aut bilem vomunt, aut singultiunt : frigus, et ex eo mors sequitur.

20. His cognitis, etiam nunc quædam alia noscenda sunt, ad omnia vulnera ulceraque, de quibus dicturi sumus, pertinentia. Ex his autem exit sanguis, sanies, pus. Sanguis omnibus notus est : sanies est tenuior hoc, variè crassa, et glutinosa et colorata. Pus crassissimum, albidissimumque; glutinosius et sanguine et sanie. Exit autem sanguis ex vulnere recenti aut jam sanescente :

sanies est inter utrumque tempus : pus ex ulcere jam ad sanitatem spectante. Rursus et sanies, et pus quasdam species Græcis nominibus distinctas habent. Est enim quædam sanies, quæ vel ἰχώρ, vel μελικηρία nominatur : est pus quod ἐλαιῶδες appellatur. Ἰχώρ tenuis, subalbidus ex malo ulcere exit, maximèque ubi, nervo læso, inflammatio secuta est. Μελικηρία crassior est, glutinosior, subalbida, mellique albo subsimilis. Fertur hæc quoque ex malis ulceribus, ubi nervi circa articulos læsi sunt, et inter hæc loca, maximè ex genibus. Ἐλαιῶδες tenue, subalbidum, quasi unctum, colore atque pinguitudine, oleo albo non dissimile, apparet in magnis ulceribus sanescentibus. Malus autem est sanguis nimium aut tenuis aut crassus, colore vel lividus vel niger, aut pituita mixtus aut varius : optimus calidus, rubens, modicè crassus, non glutinosus. Itaque protinus ejus vulneris expedita magis curatio est, ex quo sanguis bonus fluxit. Itemque postea spes in his major est, ex quibus melioris generis quæque proveniunt. Sanies igitur mala est, multa, nimis tenuis, livida, aut pallida, aut nigra, aut glutinosa, aut mali odoris, aut quæ et ipsum ulcus, et junctam ei cutem erodit. Melior est non multa, modicè crassa, subrubicunda aut subalbida. Ichor autem pejor est, multus, crassus, sublividus aut subpallidus, glutinosus, ater, calidus, mali odoris : tolerabiliior est subalbidus, qui cætera omnia contraria prioribus habet. Meliceria autem mala est, multa et percrassa : melior quæ et tenuior et minus copiosa est. Pus inter hæc optimum est : sed id quoque pejus est, multum, tenue dilutum, magisque si ab initio tale est : itemque si colore sero simile, si pallidum, si lividum, si fæculentum est : præter hæc, si malè olet ; nisi tamen locus hunc odorem excitat. Melius est, quò minus est, quò crassius, quò albidius : itemque si læve est, si nihil olet, si

æquale est, modo tamen convenire et magnitudini vulneris et tempori debet. Nam plus ex majore, plus nondum solutis inflammationibus naturaliter fertur. Elæodes quoque pejus est, multum, et parum pingue: quò minus autem, quòque id ipsum pinguius, eò melius est.

21. Quibus exploratis, ubi aliquis ictus est qui servari potest, protinùs prospicienda duo sunt, ne sanguinis profusio, neve inflammatio interimat. Si profusionem timemus, quod ex sede vulneris et ex magnitudine ejus, et ex impetu ruentis sanguinis intelligi potest, siccis linamentis vulnus implendum est, suprâque imponenda spongia, ex aquâ frigidâ expressa, ac manu super comprimenda. Si parum sic sanguis conquiescit, sæpiùs linamenta mutanda sunt: et si sicca parum valent, aceto madefacienda sunt. Id vehemens ad sanguinem suppressum est: ideòque quidam id vulneri infundunt. Sed alius rursùs metus subest, ne, nimis valenter ibi retenta materia magnam inflammationem postea moveat. Quæ res efficit, ut neque rodentibus medicamentis, neque adurentibus, et ob id ipsum inducentibus crustam, quamvis pleraque ex his sanguinem supprimunt, sit utendum: sed, si semel ad ea decurritur, iis potiùs quæ mitiùs idem efficiunt. Quod si illa quoque profluvio vincuntur, venæ quæ sanguinem fundunt apprehendendæ, circaque id quod ictum est, duobus locis deligandæ, intercidendæque sunt, ut et in se ipsæ coëant, et nihilominùs ora præclusa habeant. Ubi ne id quidem res patitur, possunt ferro candenti aduri. Sed etiam satis multo sanguine effuso ex eo loco, quo neque nervus neque musculus est, ut puta in fronte, vel superiore capitis parte, commoddissimum est cucurbitulam admovere à diversâ parte, ut illuc sanguinis cursus revocetur.

22. Et adversùs profusionem quidem in his auxilium est; adversùs inflammationem autem in ipso sanguinis

cursum. Ea timeri potest, ubi læsum est vel os, vel nervus, vel cartilago, vel musculus : aut ubi parùm sanguinis pro modo vulneris fluxit. Ergo quoties quid tale erit, sanguinem maturè suppressere non oportebit, sed pati fluere, dùm tutum erit, adeò ut, si parùm fluxisse videbitur, mitti quoque ex brachio debeat, utique si corpus juvenile et robustum et exercitatum est, multòque magis si id vulnus ebrietas præcessit. Quod si musculus læsus videbitur, præcidendus erit : nam percussus mortiferus est, præcisus sanitatem recipit.

23. Sanguine autem vel suppresso, si nimius erumpit, vel exhausto, si per se parùm fluxit, longè optimum est, vulnus glutinari. Potest autem id quod vel in cute vel etiam in carne est, si nihil ei prætereà mali accedit. Potest caro, alià parte dependens, alià inhærens, si tamen etiamnum integra est, et conjunctione corporis fovetur. In his verò quæ glutinantur, duplex curatio est. Nam si plaga in molli parte est, sui debet ; maximèque si discissa auris ima est, vel imus nasus, vel frons, vel bucca, vel palpebra, vel labrum, vel circa guttur cutis, vel venter. Si verò in carne vulnus est, hiatque, neque in unum oræ facillè attrahuntur, sutura quidem aliena est : imponendæ verò fibulæ sunt (ἀγχιτῆρας Græci nominant) quæ oras, paulùm tamen, contrahant, quò minùs lata postea cicatrix sit. Ex his autem colligi potest, id quoque quod alià parte dependens, alià inhærebit, si alienatum adhuc non est, suturam an fibulam postulet. Ex quibus neutra antè debet imponi, quàm intùs vulnus purgatum est, ne quid ibi concreti sanguinis relinquatur. Id enim et in pus vertitur, et inflammationem movet, et glutinari vulnus prohibet. Ne linamentum quidem, quod suppressendi sanguinis causâ inditum est, inibi relinquendum est : nam id quoque inflammat. Comprehendi verò suturâ vel fi-

bulâ non cutem tantum, sed aliquid etiam ex carne, ubi suberit hæc, oportebit, quò valentiùs hæreat, neque cutem abrumpat. Utraque optima est ex aciâ molli non nimis tortâ, quò mitiùs corpori insidat, utraque neque nimis rara, neque nimis crebra injicienda est. Si nimis rara est, continet: si nimis crebra est, vehementer afficit; quia quò sæpiùs acus corpus transuit, quòque plura loca injectum vinculum mordet, eò majores inflammationes oriuntur, magisque æstate. Neutra etiam vim ullam desiderat; sed eatenùs utilis est, quatenùs cutis ducentem quasi suâ sponte subsequitur: ferè tamen fibulæ latius vulnus esse patiuntur. Sutura oras jungit, quæ ne ipsæ quidem inter se contingere ex toto debent, ut si quid intùs humoris concreverit, sit quâ emanet. Si quod vulnus neutrum horum recipit, id tamen purgari debet. Deindè omni vulnèri primò imponenda est spongia ex aceto expressa: si sustinere aliquis aceti vim non potest, vino utendum est. Levis plaga juvatur etiam, si ex aquâ frigidâ expressa spongia imponitur. Sed ea quocunque modo imposita est, dùm madet, prodest: itaque ut inarescat, non est commitendum. Licet itaque sine peregrinis et conquisitis et compositis medicamentis vulnus curare: sed si quis huic parùm confidit, imponere medicamentum debet quod sine sevo compositum sit, ex his quæ cruentis vulnèribus apta esse proposui: maximèque si caro est, Barbarum; si nervi, vel cartilago, vel aliquid ex eminentibus, quales aures vel labra sunt, Polybi sphragidem. Alexandrinum quoque viride nervis idoneum est; eminentibusque partibus ea quam Græci *ράπτουσαν* vocant. Solet etiam, colliso corpore, exiguâ parte findi cutis. Quod ubi incidit, non alienum est scalpello latius aperire, nisi muscoli nervique juxtà sint, quos incidi non expedit. Ubi satis diductum est, medicamen-

tum imponendum est. At si id quod collisum est, quamvis parùm diductum est, latiùs tamen aperiri propter nervos aut musculos non licet, adhibenda sunt ea quæ humorem leniter extrahant, præcipuèque ex his id quod ῥυπῶδες vocari proposui.

Non alienum est etiam, ubicunquè vulnus grave est, imposito, quo id juvetur, insuper circumdare lanam succidam ex aceto et oleo : vel cataplasma, si mollis is locus est, quod leniter reprimat ; si nervosus aut musculosus, quod emolliat.

24. Fascia verò ad vulnus deligandum lintea aptissima est; eaque lata esse debet, ut semel injecta non vulnus tantùm, sed paulùm utrinquè etiam oras ejus comprehendat. Si ab alterâ parte caro magis recessit, ab eâ meliùs attrahitur : si æquè ab utrâque, transversa comprehendere oras debet ; aut si id vulneris ratio non patitur, media primùm injicienda est, ut tùm in utramque partem ducatur. Sic autem deliganda est, ut et contineat neque adstringat. Quod non continetur, elabitur : quod nimis adstrictum est, cancro periclitatur. Hieme sæpiùs fascia circuire debet, æstate quoties necesse est : tùm extrema pars ejus inferioribus acu assuenda est : nam nodus ulcus lædit, nisi tamen longè est. Illo neminem decipi decet, ut propriam viscerum curationem requirat ab iis de quibus suprâ posui. Nam plaga ipsa curanda extrinsecùs, vel suturâ, vel alio medicinæ genere est. In visceribus nihil movendum est, nisi, si quid ex jecinore, aut liene, aut pulmone dumtaxat extremo dependeat, præcidatur. Alioquin vulnus interius ea victûs ratio eaque medicamenta sanabunt, quæ cuique visceri convenire superiore libro proposui.

25. His ita primo die ordinatis, homo in lecto collocandus, isque, si grave vulnus est, abstinere, quantum vires patiuntur, ante inflammationem à cibo de-

bet; bibere, donec sitim finiat, aquam calidam; vel, si æstas est ac neque febris neque dolor est, etiam frigidam. Adeò tamen nihil perpetuum est, sed semper pro viribus corporis æstimandum, ut imbecillitas etiam cibum protinùs facere necessarium possit, tenuem scilicet et exiguum, qui tantùm sustineat: multique etiam ex profluvio sanguinis intermorientes, ante ullam curationem vino reficiendi sunt; quod alioquin inimicissimum vulneri est.

26. Nimis verò intumescere vulnus, periculosum: nihil intumescere periculosissimum est: illud indicium est magnæ inflammationis, hoc emortui corporis: protinùsque, si mens homini consistit, si nulla febris accessit, scire licet maturè vulnus sanum fore. Ac ne febris quidem terrere debet, si in magno vulnere, dùm inflammatio est, permanet. Illa perniciosa est, quæ vel levi vulnere supervenit, vel ultra tempus inflammationis durat, vel delirium movet, si nervorum rigorem aut distensionem quæ ex vulnere orta est, eam non finit. Vomitus quoque biliosus non voluntarius, vel protinùs, ut percussus est aliquis, vel dum inflammatio manet, malum signum est in his dumtaxat quorum, vel nervi, vel etiam nervosi loci vulnerati sunt. Spontè tamen vomere non alienum est, præcipuè his quibus in consuetudine fuit: sed neque protinùs post cibum, neque jam inflammatione ortâ, neque quùm in superioribus partibus plaga est.

27. Biduo sic vulnere habito, tertio die aperiendum, detergendaque sanies spongiâ ex aquâ frigidâ est, eademque rursùs injicienda sunt. Quinto tandem die quanta inflammatio futura sit, se ostendit. Quo die rursùs detecto vulnere, considerandus color est. Quod si lividus, aut pallidus, aut varius, aut niger est, scire licet malum vulnus esse: idque quandocunquè animad-

versum est, terrere nos potest. Album aut rubicundum esse ulcus, commodissimum est : item cutis dura, crassa, dolens, periculum ostendit. Bona signa sunt, ubi hæc sine dolore tenuis et mollis est. Sed si glutinatur vulnus, aut leviter intumuit, eadem sunt imponenda quæ primò fuerunt. Si gravis inflammatio est, neque glutinandi spes est, ea quæ pus moveant. Aquæ quoque calidæ necessarius usus est, ut et materiam digerat, et duritiam emolliat, et pus citet. Ea sic temperanda est, ut manu contingenti jucunda sit, et usque eò adhibenda donec aliquid ex tumore minuisse, coloremque ulceri magis naturalem reddidisse videatur. Post id fomentum, si latè plaga non patet, imponi protinùs emplastrum debet : maximèque si grande vulnus est, tetrapharmacum; si in articulis, digitis, locis cartilaginosi, ῥυπῶδες, et si latiùs hiat idem, illud emplastrum liquari ex irino unguento oportet : eoque illita linamenta disponi per plagam, deindè emplastrum suprà dari, et super id succidam lanam, minùsque etiam, quàm primò, fasciæ adstringendæ sunt.

28. Propriè quædam in articulis visenda sunt, in quibus, si præcisi nervi sunt qui continebant, debilitas ejus partis sequitur. Si id dubium est, et ex acuto telo plaga est, ea transversa commodior est : si ex retuso et gravi est, nullum in figurâ discrimen est. Sed visendum est, pus suprà articulum an infrà nascatur. Si sub eo nascitur, albumque et crassum dùm fertur, nervum præcisum esse credibile est : magisque, quò majores dolores inflammationesque, et quò maturiùs excitatæ sunt. Quamvis autem non abscissus nervus est, tamen si circà tumor durus diù permanet, necesse est et diuturnum ulcus esse, et, sano quoque eo, tumorem permanere : futurumque est ut tardè membrum id vel extendatur, vel contrahatur. Major tamen in extendendo mora est,

ubi recurvato articulo curatio adhibita est, quàm in recurvando eo quod rectum continuerimus. Collocari quoque membrum quod ictum est ratione certâ debet. Si glutinandum est, ut superius sit : si in eo inflammatio est, ut in neutram partem inclinatum sit : si jam pus profluit, ut devexum sit. Optimum etiam medicamentum quies est : moveri et ambulare, nisi sanis, alienum est. Minus tamen his est periculosum qui in capite vel brachiis, quàm qui in inferioribus partibus vulnerati sunt : minimèque ambulatio convenit, femine, aut crure, aut pede laborante. Locus in quo cubabit, tepidus esse debet. Balneum quoque, dùm parum vulnus purum est, inter res infestissimas est : nam id et humidum et sordidum reddit, ex quibus ad cancrum transitus esse consuevit. Levis frictio rectè adhibetur, sed his partibus, quæ longiùs absunt à vulnere.

29. Inflammatione finitâ, vulnus purgandum est. Id optimè faciunt tincta in melle linamenta, supraque id, emplastrum vel enneapharmacum dandum est. Tùm demùm verò purum ulcus est, quùm rubet, ac nimium neque siccum neque humidum est. At quodcunque sensu caret, quod non naturaliter sentit ; quod nimium aut aridum aut humidum est ; quod aut pallidum, aut albidum, aut lividum aut nigrum est ; id purum non est.

30. Purgato vulnere, sequitur ut impleatur ; jamque calida aqua eatenus necessaria est, ut sanies removeatur. Lanæ succidæ supervacuus usus est : lota melius circumdatur. Ad implendum autem vulnus proficiunt quidem etiam medicamenta aliqua : itaque ea adhiberi non alienum est, ut butyrum cum rosâ et exiguâ mellis parte ; aut cum eâdem rosâ, tetrapharmacum, aut ex rosâ linamenta : plus tamen proficit balneum rarum : cibi boni succi, vitatis omnibus acribus, sed jam pleniores : nam et avis, et venatio, et suilla elixa dari potest : vinum omnibus, dùm febris, dùm inflammatio

est, alienum est : itemque usque ad cicatricem, si nervi musculive vulnerati sunt, etiam si altè caro : at si plaga in summâ cute generis tutioris est, potest non pervetus, modicè tamen datum, ad implendum quoque proficere. Si quid molliendum est, quod in nervosis locis musculosisque necessarium est, cerato quoque super vulnus utendum est. At si caro supercrevit, modicè reprimat siccum linamentum, vehementiùs squama æris. Si plus est, quod tolli opus est, adhibenda sunt etiamnum vehementiora, quæ corpus exedant. Cicatricem post omnia hæc commodè inducit lycium ex passo et lacte dilutum, vel etiam per se impositum siccum linamentum.

31. Hic ordo felicitis curationis est. Sed quædam tamen pericula incidere consuerunt : interdum enim vetustas ulcus occupat, induciturque ei callus, et circum oræ crassæ livent; post quæ quicquid medicamentorum ingeritur, parum proficit, quod ferè negligenter curato ulceri supervenit. Interdum vel ex nimia inflammatione, vel ob æstus immodicos, vel ob nimia frigora, vel quia nimis vulnus adstrictum est, vel quia corpus aut senile, aut mali habitus est, cancer occupat. Id genus à Græcis diductum in species est, nostris vocabulis non est.

Omnis autem cancer non solum id corrumpit quod occupavit, sed etiam serpit, deinde aliis aliisque signis discernitur. Nam modò super inflammationem rubor ulcus ambit, isque cum dolore procedit : ἐρυσσιπέλας Græci nominant : modò ulcus nigrum est, quia caro ejus corrupta est; idque vehementiùs etiam putrescendo intenditur. Ubi vulnus humidum est, et ex nigro ulcere humor pallidus fertur, malique odoris est, carunculæque corruptæ, interdum etiam nervi ac membranæ resolvuntur, specillumque demissum descendit aut in latus, aut deorsum : eoque vitio nonnunquam os quo-

que afficitur. Modò oritur ea quam Græci γάγγραιναν appellant. Priores in quâlibet parte corporis fiunt: hæc in prominentibus membris, id est, inter ungues et alas, vel inguina, ferèque in senibus, vel his quorum corpus mali habitûs est. Caro in ulcere vel nigra vel livida est; sed sicca et arida: proximaque cutis plerumque subnigris pustulis impletur; deindè ei proxima vel pallida, vel livida, ferèque rugosa sine sensu est: ulterior in inflammatione est, omniaque ea simul serpunt; ulcus in locum pustulosum, pustulæ in eum qui pallet aut livet, pallor aut livor in id quod inflammatum est, inflammatio in id quod integrum est, transit. Inter hæc deindè febris acuta oritur, ingensque sitis; quibusdam etiam delirium accedit: alii, quamvis mentis suæ compotes sunt, balbutiendo tamen vix sensus suos ore explicant: incipit affici stomachus: fit fœdi spiritus ipse odor. Atque initium ejus quidem mali recipit curationem: ubi verò penitùs insedit, insanabile est, plurimique sub frigido sudore moriuntur.

32. Ac pericula quidem vulnorum hæc sunt. Vetus autem ulcus scalpello incidendum est, excidendæque ejus oræ, et quicquid super eas livet, æquè incidendum. Si varicula intùs est, quæ id sanari prohibet, ea quoque excidenda. Deindè, ubi sanguis emissus novatumque vulnus est, eadem curatio adhibenda quæ in recentibus vulneribus exposita est. Si scalpello aliquis uti nolit, potest sanare id emplastrum quod ex ladano fit, et, quùm ulcus sub eo exesum est, id quo cicatrix inducitur.

33. Id autem quod Erysipelas vocari dixi, non solùm vulneri supervenire, sed sine hoc quoque oriri consuevit, atque interdùm periculum majus affert, utique si circà cervices aut caput constitit. Oportet, si vires patiuntur, sanguinem mittere, deindè imponere simul reprimentia et refrigerantia, maximèque cerussam solani

succo, aut Cimoliam cretam aquâ pluviâli exceptam, aut ex eâdem aquâ subactam farinam, cupresso adjectâ; aut si tenerius corpus est, lenticulâ. Quicquid impositum est, betæ folio contegendum est, et super linteolum frigidâ aquâ madens imponendum. Si per se refrigerantia parùm proderunt, miscenda erunt hoc modo, sulfuris P. i. * cerussæ et croci singul. P. iiii. *. eaque cum vino conterenda sunt, et id his illinendum: aut si durior locus est, solani folia contrita suillæ adipi miscenda sunt, et illita linteolo superinjicienda.

At si nigrities est, nequedùm serpit, imponenda sunt quæ carnem putrem leniùs exedant, repurgatumque ulcus sic ut cætera nutriendum est. Si magis putre est, jamque procedit ac serpit, opus est vehementiùs erodentibus. Si ne hæc quidem evincunt, aduri locus debet, donec ex eo nullus humor feratur: nam quod sanum est, siccum est, quùm aduritur. Post ustionem putris ulceris superponenda sunt quæ crustas à vivo resolvant: eas ἐσχάρας Græci vocant. Ubi hæc exciderunt, purgandum ulcus maximè melle et resinâ est: sed aliis quoque purgari potest, quibus purulenta curantur, eodemque modo ad sanitatem perducendum est.

34. Gangrænam verò, si nondùm planè tenet, sed adhuc incipit, curare non difficillimum est, utique in corpore juvenili; et magis etiam si muscoli integri sunt, si nervi vel læsi non sunt, vel leviter affecti sunt, neque ullus magnus articulus nudatus est, aut carnis in eo loco paulum est, ideòque non multum quod putresceret, fuit; consistitque eo loco vitium: quod maximè fieri in digito potest. In ejusmodi casu primum est, si vires patiuntur, sanguinem mittere: deindè quicquid aridum est, et intentione quâdam proximum quemque locum malè habet, usque ad sanum corpus concidere. Medicamenta verò, dùm malum serpit, adhibenda nulla

sunt, quæ pus movere consuerunt; ideòque ne aqua quidem calida. Gravia quoque, quamvis reprimentia, aliena sunt: sed his quàm levissimis opus est, superque ea quæ inflammata sunt, utendum est refrigerantibus. Si nihilomagus malum constitit, uri id quod est inter integrum ac vitiatum locum, debet: præcipuèque in hoc casu petendum, non à medicamentis solùm, sed etiam à victûs ratione præsidium est: neque enim id malum nisi corrupti vitiosique corporis est. Ergò primò, nisi imbecillitas probibet, abstinentiâ utendum: deindè danda quæ per cibum potionemque alvum, ideòque etiam corpus, adstringant; sed ea levia. Postea si vitium constitit, imponi super vulnus eadem debent quæ in putri ulcere præscripta sunt. Ac tùm quoque plenioribus cibis uti licebit ex mediâ materiâ, sed tamen non nisi alvum corpusque siccantibus; aquâ verò pluviali frigidâ. Balneum, nisi jam certa fiducia redditæ sanitatis est, alienum est; siquidem emollitum in eo ulcus citò rursus eodem malo afficitur. Solent verò nonnunquàm nihil omnia auxilia proficere, ac nihilomniùs serpere sub his cancer. Inter quæ miserum, sed unicum, auxilium est, ut cætera pars corpori tuta sit, membrum quod paulatim emoritur, abscindere.

35. Hæ gravissimorum ulcerum curationes sunt: sed ne illa quidem negligenda, ubi integrâ cute interior pars collisa est, aut ubi derasum attritumve aliquid est, aut ubi surculus corpori infixus est, aut ubi tenue sed altum vulnus insedit. In primo casu commodissimum est malicorium ex vino coquere, interioremque ejus partem conterere, et cerato miscere ex rosâ facto, idque superponere: deindè ubi cutis ipsa exasperata est, inducere lene medicamentum qualis lipara est. Deraso verò detritoque imponendum est emplastrum tetrpharmacum, minuendusque cibus, et vinum subtrahendum. Neque id quia

non habebit altiores ictus, contemnendum erit: siquidem ex ejusmodi casibus sæpè cancri fiunt. Quod si levius id erit, et in parte exigua, contenti esse poterimus eodem leni medicamento. Surculum verò, si fieri potest, oportet vel manu vel etiam ferramento ejicere. Si vel præfractus est, vel altius descendit quàm ut ita velli possit, medicamento evocandus est. Optimè autem educit superimposita arundinis radix, si tenera est, protinùs contrita; si jam durior, antè in mulso decocta: cui semper mel adjiciendum est, aut aristolochia cum eodem melle. Pessima ex surculis arundo est, quia aspera est: eademque offensa etiam in filice est. Sed usu cognitum est, utramque adversùs alteram medicamentum esse, si contrita ac superimposita est. Facit autem idem in omnibus surculis, quodcunque medicamentum extrahendi vim habet: idem altis tenuibusque vulneribus apertissimum est. Priori rei Philocratis, huic Hecatæi emplastrum maximè convenit.

36. Ubi verò in quolibet vulnere ventum ad inducendam cicatricem est, quod perpurgatis jam repletisque ulceribus necessarium est; primùm ex aqua frigidâ linamentum, dùm caro alitur, deindè quùm jam continenda est, siccum imponendum est, donec cicatrix inducatur. Tàm deligari super album plumbum oportet, quo et reprimitur cicatrix, et colorem maximè sano corpori similem accipit. Idem radix silvestris cucumeris præstat. Idem compositio, quæ habet elaterii P. 1. *. spumæ argenti P. 11. *. unguenti pondo 1v. *. Quæ excipiuntur resinâ terebinthinâ, donec emplastri crassitudo ex omnibus fiat. Ac nigras quoque cicatrices leniter purgant paribus portionibus mixta, ærugo, plumbum elotum, eademque resina cocta; sive eo ungitur cicatrix, quod in facie fieri potest; sive id ut emplastrum imponitur, quod in aliis partibus commodius est.

At si vel excrevit cicatrix, vel concava est, stultum est decoris causâ rursûs et dolorem et medicinam sustinere. Alioquin res utrique succurri patitur: siquidem utraque cicatrix exulcerari scalpello potest. Si medicamentum aliquis mavult, idem efficiunt compositiones hæ quæ corpus exedunt. Cute exulceratâ, super eminentem carnem exedentia medicamenta conjicienda sunt, super concavam implentia, donec utrumque ulcus sanæ cuti æquetur, et tûm cicatrix inducatur.

SECT. XXVII. 1. Dixi de his vulneribus quæ maximè per tela inferuntur. Sequitur ut de his dicam quæ morsu fiunt, interdûm hominis, interdûm simiæ, sæpè canis, nonnunquàm ferorum animalium, aut serpentium. Omnis autem feræ morsus habet quoddam virus: itaque si vehemens vulnus est, cucurbitula admovenda est: si levius, protinûs emplastrum injiciendum, præcipuèque Diogenis. Si id non est, quolibet ex his quæ adversûs morsus proposui: si ea non sunt, viride Alexandrinum: si ne id quidem est, quodlibet non pingue ex his quæ recentibus vulueribus accommodantur. Sal quoque his, præcipuèque ei quod canis fecit, medicamentum est, si manus vulneri imponitur, superque id duobus digitis verberatur; exsaniat enim: ac salsamentum quoque rectè super id vulnus deligatur.

2. Utique autem si rabiosus canis fuit, cucurbitulâ virus ejus extrahendum est: deindè si locus neque nervosus, neque musculosus est, vulnus id adurendum est: si uri non potest, sanguinem homini mitti non alienum est. Tûm usto quidem vulneri superimponenda, quæ cæteris ustis, sunt: ei verò quod expertum ignem non est, ea medicamenta quæ vehementer exedunt. Postque nullo novo remedio, sed jam supraposito, ulcus erit implendum, et ad sanitatem perducendum. Quidam post rabiosi canis morsum protinûs in balneum

mittunt, ibique patiuntur desudare, dùm vires corporis sinunt, ulcere adaperto, quò magis ex eo quoque virus distillet; deindè multo meracoque vino excipiunt, quod omnibus ferè venenis contrarium est. Idque quùm ita per triduum factum est, tutus esse homo à periculo videtur. Solet autem ex eo vulnere, ubi parùm occursum est, aquæ timor nasci: ὕδροφοβίαν Græci appellant: miserrimum genus morbi, in quo simul æger et siti et aquæ metu cruciatur: quo oppressis in angusto spes est. Sed unicum tamen remedium est, nec opinantem in piscinam non antè ei provisam projicere. Et si natandi scientiam non habet, modò mersum bibere pati, modò attollere: si habet, interdùm deprimere, ut invitus quoque aquâ satietur: sic enim simul et sitis et aquæ metus tollitur. Sed aliud periculum excipit, ne infirmum corpus in aquâ frigidâ vexatum nervorum distentio absumat. Id ne incidat, à piscinâ protinùs in oleum calidum demittendus est. Antidotum autem præcipuum id quod primo loco posui: ubi id non est, aliud, si nondùm æger aquam horret, potui ex aquâ dandum est; et si amaritudine offenditur, mel adjiciendum est: at si jam is morbus occupavit, per catapotia sumi potest.

3. Serpentium quoque morsus non nimium distantem curationem desiderant, quamvis in eà multum antiqui variarunt, ut in singula genera anguium singula medendi genera præciperent, aliique alia: sed in omnibus eadem proficiunt. Igitur in primis supra vulnus id membrum deligandum est, non tamen nimium vehementer, ne torpeat: dein venenum extrahendum est. Id cucurbitula optimè facit. Neque alienum est, antè scalpello circa vulnus incidere, quò plus vitii jam sanguinis extrahatur. Si cucurbitula non est, quod tamen vix incidere potest, tùm quodlibet simile vas, quod

idem possit : si ne id quidem est, homo adhibendus est, qui vulnus exsugat. Neque hercules scientiam præcipuam habent hi qui Psylli nominantur, sed audaciam usu ipso confirmatam. Nam venenum serpentis, ut quædam etiam venatoria venena quibus Galli præcipuè utuntur, non gustu, sed in vulnere nocent. Ideoque colubra ipsa tutò estur, ictus ejus occidit; et si, stupenti ei, quod per quædam medicamenta circulatores faciunt, in os digitum quis indidit, neque percussus est, nulla in ejus salivâ noxa est. Ergo quisquis exemplum Psylli secutus, id vulnus exsuxerit, et ipse tutus erit, et tutum hominem præstabit. Illud interea, antè debet attendere, ne quod in gingivis palatove, aliâve parte oris, ulcus habeat. Post hæc is homo loco calido collocandus est, sic ut id quod percussus erit, in inferiorem partem inclinetur. Si neque qui exsugat, neque cucurbitula est, sorbere oportet jus anserinum, vel ovillum, vel vitulinum, et vomere. Vivum autem gallinaceum pullum per medium dividere, et protinùs calidum super vulnus imponere, sic ut pars interior corpori jungatur. Facit id etiam hædus agnusve discissus, et calida ejus caro statim super vulnus imposita : emplastra quoque quæ suprâ comprehensa sunt : aptissimumque est vel Ephesium, vel id quod ei subjectum est. Præsens quoque in aliquo antidoto præsidium est, sin id non est, necessarium est exsorbere potionem meri vini cum pipere, vel quidlibet aliud, quod calori movendo est: ne humorem intùs coïre patiatur: nam maxima pars venenorum frigore interimit. Omnia etiam urinam moventia, quia materiam extenuant, utilia sunt.

4. Hæc adversùs omnes ictus communia sunt. Usus tamen ipse docuit eum quem aspis percussit, acetum potius bibere debere. Quod demonstrasse dicitur casus cujusdam pueri, qui quùm ab hac ictus esset, et partim

ob ipsum vulnus, partim ob immodicos æstus siti premeretur, ac locis siccis alium humorem non reperiret, acetum quod fortè secum habebat, ebibit, et liberatus est: credo, quoniam id, quamvis refrigerandi vim habet, tamen habet etiam dissipandi: quò fit ut terra respersa eo spumet. Eàdem ergo vi veri simile est, spissescentem quoque intùs humorem hominis ab eo discuti, et sic dari sanitatem.

5. In quibusdam etiam aliis serpentibus certa quædam auxilia satis nota sunt: nam scorpio sibi ipse pulcherri-
mum medicamentum est. Quidam contritum cum vino bibunt: quidam eodem modo contritum super vulnus imponunt; quidam, super prunam eo imposito, vulnus suffumigant, undique veste circumdatâ, ne is fumus dilabatur; tùm carbonem ejus super vulnus deligant. Bibere etiam oportet herbæ solaris quam ἡλιοτρόπιον Græci vocant, semen, vel certè folia ex vino. Super vulnus verò etiam furfures ex aceto, vel ruta silvatica rectè imponitur, vel cum melle sal tostus. Cognovi tamen medicos, qui ab scorpione ictis nihil aliud quàm ex brachio sanguinem miserunt.

6. Hæc ad scorpionis: ad aranei autem ictum, allium cum rutâ rectè miscetur, ex oleoque contritum super imponitur.

7. At si cerastes, aut dipsas, aut hæmorrhoids percussit, asphodeli, quod Ægyptiæ fabæ magnitudinem æquet, arefactum in duas potiones dividendum est, sic ut ei rutæ paulùm adjiciatur. Trifolium quoque, et mentastrum, et cum aceto panaces æquè proficiunt. Costum quoque et casia et cinnamomum rectè per potionem assumuntur.

8. Adversus chersydri verò ictum panaces, aut laser quod sit scrupulorum P. II. *. vel porri succus cum heminâ vini sumendus est, et edenda multa satureia. Im-

ponendum autem super vulnus stercus caprinum ex aceto coctum, aut ex eodem hordeacea farina, aut ruta vel nepeta cum sale contrita, melle adjecto. Quod in eo quoque vulnere quod cerastes fecit, æquè valet.

9. Ubi verò phalangium nocuit, præter eam curationem quæ manu redditur, sæpè homo demittendus in solium est, dandusque ei myrrhæ et uvæ taminiae par modus ex passi heminâ, vel radiculæ semen aut lolii radix ex vino, et super vulnus furfures ex aceto cocti, imperandumque ut is conquiescat.

10. Verùm hæc genera serpentium et peregrina, et aliquantò magis pestifera sunt, maximè quæ æstuosis locis gignuntur: Italia frigidioresque regiones hæc quoque parte salubritatem habent, quòd minùs terribiles angues edunt. Adversùs quos satis proficit herba betonica, vel Cantabrica, vel centaurion, agrimonia, vel trixago, vel personata, vel marinæ pastinacæ; singulæ binæve tritæ et cum vino potui datæ, et super vulnus impositæ. Illud ignorari non oportet, omnis serpentis ictum et jejuni et jejuno magis nocere: ideòque perniciosissimi sunt cùm incubant; utilissimumque est, ubi ex anguibus metus est, non antè progredi quàm quis aliquid assumpsit.

11. Non tam facilè his opitulari est, qui venenum vel in cibo, vel in potione sumpserunt. Primùm, quia non protinùs sentiunt, ut ab angue icti; ita nec succurrere quidem statim sibi possunt: deindè, quia noxa non à cute, sed ab interioribus partibus incipit. Commodissimum est tamen, ubi primùm sensit aliquis, protinùs oleo multo epoto vomere: deindè, ubi præcordia exhaustit, bibere antidotum; si id non est, vel merum vinum.

12. Sunt tamen quædam remedia propria adversùs quædam venena, maximèque leviora. Nam si cantharidas aliquis ebibit, panaces cum lacte contusa, vel galbanum, vino adjecto, dari, vel lac per se debet.

13 Si cicutam; vinum merum calidum cum rutâ quam plurimum ingerendum est: deinde is vomere cogendus: posteaque laser ex vino dandum: isque, si febre vacat, in calidum balneum mittendus; si non vacat, uigendus ex calefacientibus est.

14. Si hyoscyamum; fervens mulsum bibendum est, aut quodlibet lac, maximè tamen asininum.

15. Si cerussam; jus malvæ, vel juglandes ex vino contritæ maximè prosunt.

16. Si sanguisuga epota est, acetum cum sale bibendum est: si lac intus coit, aut passum aut coagulum, aut cum aceto laser.

17. Si fungos inutiles quis assumpsit, radícula aut è poscâ aut cum sale et aceto edenda est. Ipsi verò hi et specie quidem discerni possunt ab utilibus, et cocturæ genere idonei fieri. Nam sive ex oleo inferbuerunt, sive piri surculus cum his inferbuit, omni noxâ vacant.

18. Adustis quoque locis extrinsecus vis infertur: itaque sequi videtur ut de his dicam. Hæc autem optimè curantur foliis aut lili, aut linguæ caninæ, aut betæ in vetere vino oleoque decoctis: quorum quodlibet protinus impositum ad sanitatem perducit. Sed dividi quoque curatio potest in ea quæ mediocriter exedentia reprimanturque, primò et pustulas prohibeant, et summam pelliculam exasperent: deinde in ea quæ lenia ad sanitatem perducant. Ex prioribus est lenticulæ cum melle farina, vel myrrha cum vino, vel creta Cimolia cum thuris cortice contrita, et aqua coacta, atque ubi usus necessitas incidit, aceto diluta. Ex insequentibus quælibet lipara: sed idonea maximè est, quæ vel plumbi recrementum, vel vitellos habet. Est etiam illa adustorum curatio, dum inflammatio est, impositam habere cum melle lenticulam: ubi ea declinavit, hordei farinam cum rutâ vel porro, vel marrubio, donec crustæ cadant: tùm

ervum cum melle, aut irim, aut resinam terebinthinam, donec ulcus purum sit : novissimè siccum linamentum.

SECT. XXVIII. 1. Ab his quæ extrinsecùs incidunt, ad ea veniendum est quæ interiùs, corruptâ aliquâ corporum parte, nascuntur. Ex quibus non aliud carbunculo pejus : ejus hæ notæ sunt. Rubor est, superque eum non nimium pustulæ eminent, maximè nigræ, interdum sublividæ aut pallidæ. In his sanies esse videtur, infra color niger est : ipsum corpus aridum et durius quàm naturaliter oportet : circàque quasi crusta est, eaque inflammatione cingitur : neque in eo loco levare cutis potest, sed inferiori carni quasi affixa est. Somnus urget, nonnunquam horror aut febris oritur, aut utrumque. Id quoque vitium subteractis quasi quibusdam radicibus serpit, interdum celerius, interdum tardius : supra quoque procedens inalbescit, dein lividum fit, circumque exiguæ pustulæ oriuntur : et si circa stomachum faucesve incidit, subito spiritum sæpè elidit. Nihil melius est quàm protinùs adurere : neque id grave est ; nam non sentit, quoniam ea caro mortua est : finisque adurendi est, dum ex omni parte sensus doloris est. Tum deindè vulnus, sicut cætera adusta, curandum est : sequitur enim sub medicamentis erodentibus crusta undique à viva carne diducta, quæ trahit secum quicquid corruptum erat ; purusque jam sinus curari potest implantibus. At si in summâ cute vitium est, possunt succurrere quædam vel exedentia tantum, vel etiam adurentia. Vis pro magnitudine adhibenda est. Quodcunque verò medicamentum impositum est, si satis proficiet, protinùs à vivâ corruptam partem resolvit : certa que esse fiducia potest, fore, ut undique vitiosa caro excidat, quâ hujusce rei medicamen exest. Si id non fit, medicamentumque malo vincitur, utique ad ustionem prope-

randum est. Sed in ejusmodi casu abstinendum à cibo ac vino est : aquam liberaliter bibere expedit. Magisque ea servanda sunt, si febricula quoque accessit.

2. Non idem periculum *καρκίνωμα* affert, nisi imprudentiâ curantis exagitatum est. Id vitium fit maxime in superioribus partibus, circa faciem, nares, aures, labra, mammas feminarum : et in jecore aut splene hoc nascitur. Circa locum aliqua quasi puncta sentiuntur ; isque immobilis, inæqualis tumet, interdum etiam torpet. Circa eum inflatæ venæ quasi recurvantur ; hæque pallent aut livent ; nonnunquam etiam in quibusdam delitescunt : tactusque is locus aliis dolorem affert, in aliis eum non habet. Et nonnunquam sine ulcere durior aut mollior est quam esse naturaliter debet : nonnunquam iisdem omnibus ulcus accedit. Interdum nullam habet proprietatem, interdum simile his est quæ vocant Græci *κονδυλώματα*, aspredine quâdam et magnitudine suâ : color ejus ruber est, aut lenticulæ similis. Neque tutò feritur ; nam protinus aut resolutio nervorum, aut distentio insequitur. Sæpè homo ictus obmutescit, atque ejus anima deficit : quibusdam etiam si id ipsum pressum est, quæ circà sunt, intenduntur et intumescunt. Namque pessimum id genus est, ferèque primum id fit quod *κακοῦθος* à Græcis nominatur : deindè ex eo id *καρκίνωμα* quod sine ulcere est : deindè ulcus, ex eo thymium. Tolli nihil nisi *κακοῦθος* potest : reliqua curationibus irritantur : et quò major vis adhibita est, eò magis. Quidam usi sunt medicamentis adurentibus, quidam ferro adusserunt, quidam scalpello exciderunt : neque ulli unquam medicina profuit ; sed adusta protinus concitata sunt, et increverunt donec occiderent. Excisa, etiam post inductam cicatricem, tamen revertuntur, et causam mortis attulerunt : dum interim plerique nullam vim adhibendo, quâ tollere id malum ten-

tent, sed imponendo tantum lenia medicamenta, quae quasi blandiantur, quominus ad ultimam senectutem perveniant, non prohibentur. Discernere autem cacoëthes quod curationem recipit, à carcinomate quod non recipit, nemo scire potest, nisi tempore et experimento. Ergo ubi primum id vitium notatum est, imponi debent medicamenta adurentia. Si levatur malum, minuunturque ejus indicia, procedere curatio potest et ad scalpellum, et ad unctionem. Si protinus irritatum est, scire licet jam carcinoma esse; removendaque sunt omnia acria, omnia vehementia. Sed si sine ulcere is locus durus est, imponi ficum quam pinguissimam, aut rhyodes emplastrum satis est. Si ulcus aequale est, ceratum ex rosâ injiciendum est, adjiciendusque ei pulvis ex contritâ testâ, ex quâ faber ferrarius tingere candens ferrum solitus est. Sed si id nimium supercrevit, tentanda squama aeris est, quae lenissima ex adurentibus est, eatenus, ne quid eminere patiatur; sed ita, si nihil exacerbavit: sin minus, eodem cerato contenti esse debemus.

3. Est etiam ulcus quod *θηρίωμα* Græci vocant. Id et per se nascitur, et interdum ulceri ex aliâ causâ facto supervenit. Color est vel lividus vel niger; odor foedus; multus et muco similis humor. Id ipsum ulcus neque tactum neque medicamentum sentit: prurigine tantum movetur. At circa dolor est et inflammatio: interdum etiam febris oritur, nonnunquam ex ulcere sanguis erumpit: atque id quoque malum serpit. Quae omnia sæpè intenduntur; fitque ex his ulcus quod *φαγέδαιναν* Græci vocant, quia celeriter serpendo penetrandoque usque ossa, corpus vorat. Id ulcus inaequale est, cæno simile, inestque multus humor glutinosus, odor intolerabilis; majorque quam pro modo ulceris inflammatio. Utrumque, sicut omnis cancer, fit maximè in senibus, vel his

quorum corpora mali habitus sunt. Curatio utriusque eadem est; sed in majore malo major vis necessaria. Ac primum à victus ratione ordiendum est, ut quiescat in lectulo, ut primis diebus à cibo abstineat, aquam quam plurimam assumat: alvus quoque ei ducatur: dein post inflammationem cibum boni succi capiat, vitatis omnibus acribus; potionis quantum volet, sic ut interdium quidem aqua contentus sit, in cœnâ etiam vini austeri aliquid bibat. Non æquè tamen fame in his quos *φαγέ-δαινα* urgebit, atque in his qui therioma adhuc habebunt, utendum erit. Et victus quidem talis necessarius est. Super ulcus verò inspergenda est arida aloë, cœnanthe; et si parum proficiet, chalcitis: ac si quis nervus exesâ carne nudatus est, contegendus antè linteolo est, ne sub eo medicamento aduratur. Si validioribus etiamnum remediis opus est, ad eas compositiones veniendum est, quæ vehementius adurant. Quicquid autem inspergitur, averso specillo infundi debet. Superdanda cum melle sunt vel linamenta, vel oleæ folia ex vino decocta, vel marrubium; eaque linteolo contegenda in aqua frigida madefacto, dein benè expresso: circâque, quâ tumor ex inflammatione est, imponenda quæ reprimant cataplasmata. Si sub his nihil proficitur, ferro locus aduri debet, diligenter nervis, si qui apparent, antè contectis. Adustum vel medicamentis vel ferro corpus, primum purgandum, deindè implendum esse, apparere cuilibet ex prioribus potest.

4. Sacer quoque ignis malis ulceribus annumerari debet. Ejus duæ species sunt: alterum genus est subrubicundum, aut mixtum rubore atque pallore, exasperatumque per pustulas continuas, quarum nulla alterâ major est, sed plurimæ perexiguæ. In his semper ferè pus, et sæpè rubor cum calore est, serpitque id nonnunquam sanescente eo quod primum vitiatum est,

nonnunquàm etiam exulcerato, ubi ruptis pustulis ulcus continuatur, humorque exit qui esse inter saniem et pus videri potest. Fit maximè in pectore, aut lateribus aut eminentibus partibus, præcipuèque in plantis. Alterum autem est in summæ cutis exulceratione, sed sine altitudine, latum, sublividum, inæqualiter tamen, mediumque sanescit, extremis procedentibus, ac sæpè id quod jam sanum videbatur, iterum exulceratur. At circà proxima cutis quæ vitium receptura est, tumidior et durior est, coloremque habet ex rubro subnigrum. Atque hoc quoque malo ferè corpora seniores tentantur, aut quæ mali habitus sunt, sed in cruribus maximè. Omnis autem sacer ignis, ut minimum periculum habet ex his quæ serpunt, sic propè difficillimè tollitur. Medicamentum ejus fortuitum est febris quæ uno die humorem noxium absumat. Pus quò crassius et albidius est, eò periculi minùs est. Prodest etiam infrà os ulcerum cædi, quò plus puris exeat, et id, quo ibi corruptum corpus est, extrahat. Sed tamen si febricula accessit, abstinentiâ, lectulo, alvi ductione opus est. In omni verò sacro igni, neque lenibus et glutinosis cibus, neque salsis et acris utendum est, sed his quæ inter utrumque sunt, qualis est panis sine fermento, piscis, hædus, aves, exceptoque apro, omnis ferè venatio. Si non est febricula, et gestatio utilis est, et ambulatio, et vinum, et balneum. Atque in hoc quoque genere potio magis liberalis esse quàm cibus debet. Ipsa autem ulcera si mediocriter serpunt, aquâ calidâ; si vehementiùs, vino calido fovenda sunt: deindè acu pustulæ, quæcumque sunt, aperiendæ: tùm imponenda ea quæ putrem carnem exedant. Ubi inflammatio sublata, ulcusque purgatum est, imponi lene medicamentum debet. In altero autem genere possunt proficere mala cotonea in vino cocta atque contrita: potest emplastrum vel Hieræ, vel tetra-

pharmacum, cui quinta pars thuris adjecta sit: potest nigra edera ex vino austero cocta: ac, si celeriter malum serpit, non aliud magis proficit. Purgato ulcere quod in summâ cute esse proposui, satis ad sanitatem eadem lenia medicamenta proficient.

5. Chironium autem ulcus appellatur, quod et magnum est, et habet oras duras, callosas, tumentes. Exit sanies non multa, sed tenuis. Odor malus neque in ulcere, neque in ejus humore est: nulla inflammatio, dolor modicus est: nihil serpit, ideòque nullum periculum affert: sed non facilè sanescit. Interdùm tenuis cicatrix inducitur, deindè iterùm rumpitur, ulcusque renovatur. Fit maximè in pedibus et cruribus. Super id imponi debet, quod et lene aliquid, et vehemens, et reprimens habeat. Quale ejus rei causâ fit ex his: squamæ æris, plumbi eloti combusti, singulorum P. VI.*. cadmiæ, ceræ, singulorum P. VIII.*. rosæ quantum satis est ad ceram simul cum eis molliendam.

6. Fiunt etiam ex frigore hiberno ulcera, maximè in pueris, et præcipuè pedibus digitisque eorum, nonnunquàm etiam in manibus. Rubor cum inflammatione mediocri est: interdùm pustulæ oriuntur, deindè exulceratio: dolor autem modicus. Prurigo major est: nonnunquàm humor exit, sed non multus, qui referre vel pus vel saniem videtur. In primis multâ calidâ aquâ fovendum est, in quâ rapa decocta, aut si ea non sunt, aliquæ verbenæ ex reprimementibus. Si nondùm adaperitum ulcus, æs, quàm maximè calidum quis pati potest, admovendum est. Si jam exulceratio est, imponi debet alumen, æquâ portione cum thure contritum, cum vino adjecto, aut malicorium in aquâ coctum, deindè contritum. Si summa detracta pellicula est, hîc quoque meliùs lenia medicamenta reficiunt.

7. Struma quoque est tumor, in quo subter concretæ

quædam ex pure et sanguine quasi glandulæ oriuntur : quæ vel præcipuè fatigare medicos solent ; quoniam et febrès movent, nec unquam faciliè maturescunt ; et sive ferro sive medicamentis curantur, plerumque iterum juxtà cicatrices ipsas resurgunt, multoque post medicamento est opus : quibus id quoque accedit, quod longo spatio detinent. Nascuntur maximè in cervice, sed etiam in alis et inguinibus, et in lateribus : in mammis quoque feminarum se reperisse Meges auctor est. Propter hæc et album veratrum rectè datur, atque etiam sæpiùs, donec ea digerantur : et medicamenta ea imponuntur quæ humorem vel educant vel dissipent, quorum suprà mentio facta est. Adurentibus quoque quidam utuntur quæ exedant, crustaque eum locum adstringunt ; tunc verò ut ulcus curant. Quæcumque autem ratio curandi est, corpus, puro ulcere, exercendum atque alendum est, donec ad cicatricem perveniat. Quæ quùm medici doceant, quorundam rusticorum experimento cognitum, quem struma malè habet, eum, si anguem edit, liberari.

8. Furunculus verò est tuberculum acutum cum inflammatione et dolore, maximèque ubi jam in pus vertitur. Qui ubi adaperitus est et exit, subter apparet pars carnis in pus versa, pars corrupta subalbida, subrubra, quem ventriculum quidam furunculi nominant. In eo nullum periculum est, etiam si nulla curatio adhibeatur ; maturescit enim per se, atque erumpit : sed dolor efficit, ut potior medicina sit, quæ maturiùs liberet. Proprium ejus medicamentum galbanum est : sed et alia quoque quæ suprà comprehensa sunt. Si cætera desunt, imponi debet primùm non pingue emplastrum, ut id reprimat ; deindè si non repressit, quodlibet puri movendo accommodatum : si ne id quidem est, vel resina, vel fermentum. Expresso pure, nulla ultrà curatio necessaria est.

9. Φύμα verò nominatur tuberculum furunculo simile, sed rotundius et planius, sæpè etiam majus. Nam furunculus ovi dimidii magnitudinem rarò explet, nunquam excedit; phyma autem latius patere consuevit: sed inflammatio dolorque sub eò minores sunt. Ubi divisum est, pus eodem momento apparet, ventriculus, qui in furunculo, non invenitur; verùm omnis corrupta caro in pus vertitur. Id autem in pueris et sæpiùs nascitur, et faciliùs tollitur: in juvenibus rariùs oritur, et difficiliùs curatur. Ubi ætas induravit, ne nascitur quidem. Quibus verò medicamentis discuteretur, suprà propositum est.

10. Φύγεθλον autem est tumor non altus, sed latus, in quo quiddam pustulæ simile est. Dolor distentioque vehemens est, et major quàm pro magnitudine tumoris; interdùm etiam febricula: idque tardè maturescit, neque magnoperè in pus convertitur. Fit maximè aut in vertice, aut in alis, aut in inguinibus: Panem, ad similitudinem figuræ, nostri vocant: id ipsum quo medicamento tolleretur, suprà demonstravi.

11. Sed quùm omnes hi nihil nisi minuti abscessus sint, generale nomen trahit latius vitium ad suppurationem spectans: idque ferè fit aut post febres aut post dolores partis alicujus, maximèque eos qui ventrem infestarunt; sæpiùsque oculis expositum est: siquidem latius aliquid intumescit ad similitudinem ejus quod phyma vocari proposui, rubetque cum calore, et paulò post etiam cum duritiâ; magisque nocenter adolescit, et sitim vigiliamque exprimit. Interdùm tamen nihil horum in cute deprehendi potest, maximèque ubi altiùs pus movetur; sed cum siti vigiliâque sentiuntur intùs aliquæ punctiones: et quod de subito durius non est, melius est: et quamvis non rubet, coloris tamen aliter mutati est. Quæ signa, jam pure oriente, nascuntur: tumor ruborque multò antè incipiunt. Sed si locus is mollis est, aver-

tendus materiæ aditus est per cataplasmata, quæ simul et reprimunt, et refrigerant: qualia et aliàs et paulò antè in erysipelate proposui. Si jam durior est, ad ea veniendum est quæ digerant et resolvant; qualis est ficus arida contusa: aut sæx mixta cum cerato quod ex adipe suillâ coactum sit, aut cucumeris radix cui ex farinâ duæ partes adjectæ sint, antè ex mulso decoctæ. Licet etiam miscere æquis portionibus ammoniacum, galbanum, propolim, viscum, pondusque adjicere myrrhæ dimidio minùs quàm in prioribus singulis erit. Atque emplastra quoque et malagmata idem efficiunt, quæ suprâ explicui. Quod per hæc discussum non est, necesse est maturescat: idque quò celerius fiat, imponenda est farina hordeacea, ex aquâ cocta, cui et olerum aliquid rectè miscetur. Eadem autem hæc in minoribus quoque abscessibus, quorum nomina proprietatesque suprâ reddidi, rectè fiunt: eademque omnium curatio, tantum modo distat. Crudum est autem, in quo major quasi venarum motus est, et gravitas, et ardor, et distentio, et dolor, et rubor, et durities: et si major abscessus est, horror aut etiam febricula permanet, penitusque condita suppuratio est. Si pro his quæ alibi cutis ostendit, punctiones sunt, ubi ista se remiserunt, jamque is locus prurit, et aut sublividus aut subalbidus est, matura suppuratio est; eaque ubi vel per ipsa medicamenta, vel etiam ferro aperta est, pus debet emitti. Tùm si qua in alis vel inguinibus sunt, sine linamento nutrienda sunt. In cæteris quoque partibus, si una plaga exigua est, si mediocris suppuratio fuit, si non altè penetravit, si febris non est, si valet corpus, æquè linamenta supervacua sunt. In reliquis, parcè tamen, nec nisi magna plaga est, imponi debent. Commodè verò vel super linamenta, vel sine his imponitur lenticula ex melle, aut malicorium ex vino coctum: quæ et per se et mixta idonea sunt.

Si qua circà duriora sunt, ad ea mollienda, vel malva contrita, vel fœni græci linive semen ex passo coctum superdandum est. Quicquid deindè impositum est, non adstringi, sed modicè deligari debet. Illo neminem decipi decet, ut in hoc genere cerato utatur. Cætera quæ pertinent ad purgandum ulcus, ad implendum, ad cicatricem inducendam, conveniuntque vulneribus, exposita sunt.

12. Nonnunquàm autem ex ejusmodi abscessibus, et ex aliis ulcerum generibus fistulæ oriuntur. Id nomen est ulceri alto, angusto, calloso. Fit in omni ferè parte corporis, habetque quædam in singulis locis propria. Priùs de communibus dicam. Genera igitur fistularum plura sunt: siquidem aliæ breves sunt, aliæ altiùs penetrant, aliæ rectæ intùs feruntur, aliæ multòque plures transversæ: aliæ simplices sunt, aliæ duplices triplicesvè, ab uno ore intùs orsæ, quæ tres, aut etiam in plures sinùs dividuntur; aliæ rectæ, aliæ flexæ et tortuosæ sunt. Aliæ intra carnem, desinunt, aliæ ad ossa aut cartilaginem penetrant, aut ubi neutrum horum subest, ad interiora perveniunt: aliæ deindè facilè, aliæ cum difficultate curantur; atque etiam quædam insanabiles reperiuntur. Expedita curatio est in fistulâ simplici recenti intra carnem adjuvatque ipsum corpus, si juvenile, si firmum est: inimica contraria his sunt; itemque si fistula os, vel cartilaginem, vel nervum, vel musculos læsit; si articulum occupavit, si vel ad vesicam, vel ad pulmonem, vel ad vulvam, vel ad grandes venas arteriasve, vel ad inania, ut guttur, stomachum, thoracem, penetravit. Ad intestina quoque eam tendere semper periculosum, sæpè pestiferum est. Quibus multum mali accedit, si corpus vel ægrum, vel senile, vel mali habitùs est. Ante omnia demitti specillum in fistulam convenit, ut quò tendat et

quàm altè perveniat, scire possimus; simul etiam protinùs humida, an siccior sit, quod extracto specillo patet: si verò os in vicino est, id quod disci potest, si jam necne eò fistula penetrarit: et quatenùs nocuerit. Nam si molle est, quod ultimo specillo contingitur, intra carnem adhuc vitium est: si magis id renititur, ad os ventum est. Ibi deindè si elabitur specillum, nondùm caries est: si non elabitur, sed æquali innititur, caries quidem, verùm adhuc levis est. Si inæquale quoque et asperum subest, vehementiùs os exesum est: at cartilago ubi subhæsit, ipsa sedes docet; perventumque esse ad eam ex renisu patet. Sed ex his quidem colliguntur fistularum sedes, spatia, noxæ: simplices verò hæ sint, an in plures partes diducantur, cognosci potest ex modo puris; cujus si plus fertur quàm quod simplici spatio convenit, plures sinus esse manifestum est: quòmq̃ue ferè juxtà sint caro, et nervus, et aliqua nervosa, quales ferè tunicæ membranæque sunt; genus quoque puris docebit, num plures sinus intùs diversa corporis genera perroserint. Siquidem ex carne, pus læve, album, copiosius fertur: at ex nervoso loco, coloris quidem ejusdem, sed tenuius et minus: ex nervo pingue et oleo non dissimile. Denique etiam corporis inclinatio docet num in plures partes fistulæ penetrarint; quia sæpè quum quis aliter decubuit, aliterque membrum collocavit, pus ferri quod jam desierat, incipit; testaturque non solùm alium sinum esse ex quo descendat, sed etiam in aliam corporis partem eum tendere. Sed si in carne, et recens, et simplex est, ac neque rugosâ neque cavâ sede, neque in articulo, sed in eo membro quod per se immobile, non nisi cum toto corpore movetur, satis proficiet emplastrum quod recentibus vulneribus imponitur, dùm habeat vel salem, vel alumen, vel squamam æris, vel æruginem, vel ex metallicis aliquid: exque

co collyrium fieri debet alterâ parte tenuius, alterâ paulò plenius : idque eâ parte quâ tenuius est, antecedente demitti oportet in fistulam, donec sanguis purus se ostendat. Quæ in omnibus fistularum collyriis perpetua sunt. Idem deindè emplastrum in linteolo superimponendum, suprâque injicienda spongia, in acetum antè demissa : solvique quinto die satis est ; genusque victûs adhibendum est, quo carnem ali docui. At si longiùs à præcordiis fistula est, ex intervallo jejunum radículas edisse, deindè vomere, necessarium est. Vetustate callosa fit fistula. Callus autem neminem fallit, quia durus est, et aut albus, aut pallidus. Sed tùm validioribus medicamentis opus est : quale est, quod habet papaveris lacrymæ P. I. *. gummi P. III. *. Cadmiæ P. IV. *. atramenti sutorii P. VIII. *. ex quibus aquâ coactis collyrium fit. Aut in quo sunt gallæ P. I. *. æruginis, sandarachæ, aluminis Ægyptii, singulorum P. I. *. atramenti sutorii combusti P. II. *. Aut quod constat ex chalcitide et saxo calcis, quibus auripigmenti diridio minus quàm in singulis prioribus est, adjicitur, eaque melle cocto excipiuntur. Expeditissimum autem est ex præcepto Megetis, æruginis rasæ P. II. *. conterere, deindè ammoniaci, thymiamatis P. II. *. aceto liquare, eoque infuso æruginem cogere : idque ex primis medicamentis est. Sed ut hæc maximi effectûs sunt, sic ubi ista non adsunt, facilè tamen est callum quibuslibet adurentibus medicamentis erodere : satisque est vel papyrus intortum, vel aliquid ex penicillo in modum collyrii adstrictum eò illinere. Scilla quoque cocta et mixta cum calce callum exest. Si quandò verò longior, sed transversa fistula est, demisso specillo contra principium hujus, incidi commodissimum est ; et collyrium utrinquè quod volueris, demitti. At si duplicem esse fistulam, aut multiplicem existimamus, sic tamen ut brevis, intraque

carnem sit, collyrio uti non debemus, quòd unam curret, reliquas omittat; sed eadem medicamenta arida in calamum scriptorium conjicienda sunt, isque ori fistulæ aptandus, inspirandumque ut ea medicamenta intùs compellantur : aut eadem ex vino liquanda, vel, si sordidior fistula est, ex mulso, si callosior, ex aceto, sunt : atque intùs infundendum, quicquid inditum est. Superponenda sunt quæ refrigerent et reprimant : nam ferè quæ circa fistulam sunt, habent aliquid inflammationis. Neque alienum est ubi quis resolverit, antequàm rursùs alia medicamenta conjiciat, per oricularium clysterem fistulam eluere : si plus puris fertur, vino; si callus durior est, aceto : si jam purgatur, mulso vel aquâ in quâ ervum coctum sit, sic ut huic quoque mellis paulùm adjiciatur. Ferè verò fit, ut ea tunica quæ inter foramen et integram carnem est, victa medicamentis tota exeat, infràque ulcus purum sit : quod ubi contingit, imponenda glutinantia sunt, præcipuèque spongia melle cocto illita. Neque ignoro multis placuisse, linamentum, in modum collyrii compositum, tinctum melle implendi causâ demitti : sed celerius id glutinatur quàm impletur : neque verendum est, ne purum corpus puro corpori junctum non coëat, adjectis quoque medicamentis ad id efficacibus; quùm sæpè exulceratio digitorum, nisi magnâ curâ prospeximus, sanescendo in unum eos jungat.

13. Est etiam ulceris genus, quod à favi similitudine *κηρίον* à Græcis nominatur, idque duas species habet. Alterum genus est subalbidum furunculo simile, sed majus et cum dolore majore. Quod ubi maturescit, habet foramina per quæ fertur humor glutinosus et purulentus; nec tamen ad justam maturitatem pervenit. Si divisum est, multò plus intùs corrupti quàm in furunculo apparet, altiùsque descendit. Rarò fit nisi in ca-

pillis. Alterum est minus, super corpus eminens, durum, latum, subviride, subpallidum, magis exulceratum: siquidem ad singulorum pilorum radices foramina sunt, per quæ fertur humor glutinosus, subpallidus, crassitudinem mellis aut visci referens: interdum olei. Si inciditur, viridis intrà caro apparet. Dolor autem et inflammatio ingens est, adeò ut acutam quoque febrem movere consuerit. Super id quod minus crebris foraminibus exasperatum est, rectè imponitur et ficus arida, et lini semen in mulso coctum, et emplastra ac malagmata materiam educèntia, aut quæ propriè huc pertinentia suprà posui. Super alterum, et ea medicamenta, et farina ex mulso cocta, sic ut ei dimidium resinæ terebinthinæ misceatur, et ficus in mulso decocta, cui paulum hyssopi contriti sit adjectum, et uvæ taminiae pars quarta fico adjecta. Quod si parum in utrolibet genere medicamenta proficiunt, totum ulcus usque ad sanam carnem excidi oportet, et, ulcere ablato, super plagam medicamentà danda sunt, primùm quæ pus citent, deindè quæ purgent, tùm quæ impleant.

14. Sunt quædam verò verrucis similia, quorum diversa nomina ut vitia sunt. *Ἀκροχορδόνια* Græci vocant, ubi sub cute coit aliquid durius, et interdum paulò asperius, coloris ejusdem, infrà tenue, ad cutem latius: idque modicum est, quia rarò fabæ magnitudinem excedit. Vix unum tantum eodem tempore nascitur, sed ferè plura, maximèque in pueris; eaque nonnunquam subito desinunt, nonnunquam mediocrem inflammationem excitant: sunt quæ etiam in pus convertuntur. At *θύμινον* nominatur, quod super corpus quasi verrucula eminet, ad cutem tenue, suprà latius, subdurum, et in summo perasperum. Id quà summum, colorem floris thymi repræsentat, undè ei nomen est; ibique facilè finditur, et cruentatur: nonnunquam aliquantum sanguis

nis fundit; ferèque citra magnitudinem fabæ Ægyptiæ est, rarò majus, interdùm perexiguum: modò autem unum, modò plura nascuntur, vel in talis, vel in palmis, vel in inferioribus pedum partibus. Pessima tamen in obscenis sunt, maximèque ubi sanguinem fundunt.

Μυρμήκια autem vocantur humiliora thymio durioraque, quæ radices altiùs exigunt, majoremque dolorem movent: infrà lata, super autem tenuia, minùs sanguinis mittunt: magnitudine vix unquàm lupini modum excedunt. Nascuntur ea quoque aut in palmis, aut in inferioribus partibus pedum. Clavus autem nonnunquàm quidem etiam alibi, sed in pedibus tamen maximè nascitur; præcipuè tamen ex contuso, quamvis interdùm aliter: doloremque etiam, si non aliàs, tamen ingredienti movet. Ex his Acrochordon sive thymium sæpè etiam per se finiuntur; et quò minora sunt, eò magis. Myrmecia et clavi sine curatione vix unquàm desinunt. Acrochordon si excisa est, nullam radiculam relinquit; ideòque ne renascitur quidem. Thymio clavoque excisis, sub rotunda radícula nascitur, quæ penitùs descendit ad carnem, eaque relictà idem rursùs exigit. Myrmecià latissimis radicibus inhærent, ideòque ne excidi quidem sine exulceratione magnà possunt. Clavum subindè radere commodissimum est: nam sine ullà vi sic emollescit; ac, si sanguinis quoque aliquid emissum est, sæpè emoritur. Tollitur etiam, si quis eum circumpungat, deindè imponat resinam, cui miscuerit pulveris paulùm quem ex lapide molari contrito fecit. Cætera verò genera medicamentis adurenda sunt: aliisque id quod ex fæce vini, myrmeciis id quod ex alumine et sandarachâ fit, aptissimum. Sed ea quæ circà sunt, foliis contegi debent, ne ipsa quoque exulcerentur; deindè postea lentacula imponi solet. Tollit thymium etiam ficus in aquâ cocta.

15. At pustulæ maximè vernis temporibus oriuntur. Earum plura genera sunt : nam modò circa totum corpus partemve asperitudo quædam fit, similis his pustulis quæ ex urticâ vel ex sudore nascuntur : ἐξανθήματα Græci vocant ; eaque modò rubent, modò colorem cutis non excedunt. Nonnunquàm plures similes varis oriuntur, nonnunquàm majores pustulæ lividæ, aut pallidæ, aut nigræ, aut aliter naturali colore mutato, subestque his humor. Ubi eæ ruptæ sunt, infra quasi exulcerata caro apparet, φλύκταιναι Græcè nominantur. Fiunt vel ex frigore, vel ex igni, vel ex medicamentis. Φλυζάκιον autem paulò durior pustula est, subalbida, acuta, ex quâ ipsâ quod exprimitur, humidum est. Ex pustulis verò nonnunquàm etiam ulcuscula sunt aut aridiora, aut humidiora : et modò tantum cum prurigine, modò etiam cum inflammatione aut dolore ; exitque aut pus, aut sanies, aut utrumque : maximèque id evenit in ætate puerili, rarò in medio corpore, sæpè in eminentibus partibus. Pessima pustula est, quæ ἐπινουκτις vocatur : ea colore vel sublivida, vel subnigra, vel alba esse consuevit. Circa hanc autem vehemens inflammatio est ; et cum adaperita est, reperitur intus exulceratio mucosa, colore humori suo similis. Dolor ex eâ supra magnitudinem ejus est ; neque enim ea fabâ major est. Atque hæc quoque oritur in eminentibus partibus, et ferè noctù : undè nomen quoque à Græcis ei impositum est. In omni verò pustularum curatione primum est multum ambulare, atque exerceri ; si quid ista prohibet, gestari. Secundum est cibum minuere, abstinere ab omnibus acribus, et extenuantibus : eadem quoque nutrices facere oportet, si lactens puer ita affectus est. Præter hæc is qui jam robustus est, si pustulæ minutæ sunt, desudare in balneo debet, simulque super eas nitrum inspergere, oleoque vinum miscere, et sic ungi ; tum descendere in solium.

Si nihil sic proficitur, aut si majus pustularum genus occupavit, imponenda lenticula est, detractâque summâ pelliculâ, ad medicamenta lenia transeundum. Epinÿctis post lenticulam rectè herbâ quoque sanguinali vel viridi coriandro curatur. Ulcera ex pustulis facta tollit spuma argenti cum semine fœni Græci mixta, sic ut his in vicem rosa atque intubi succus adjiciatur, donec mellis crassitudo ei fiat. Propriè ad eas pustulas quæ infantes malè habent, lapidis quem pyriten Græci vocant P. VIII. *. cum quinquaginta amaris nucibus miscetur; adjiciunturque olei cyathi tres: sed priùs ungi ex cerussâ pustulæ debent, tùm hoc illini.

16. Scabies verò est asperitudo rubicundior, ex quâ pustulæ oriuntur, quædam humidiores, quædam sicciore. Exit ex quibusdam sanies, fitque ex his continuata exulceratio pruriens, serpitque in quibusdam citò. Atque in aliis quidem ex toto desinit, in aliis verò certo tempore anni revertitur. Quò asperior est, quòque prurit magis, eò difficiliùs tollitur: itaque eam quæ talis est, ἀγρία, id est feram, Græci appellant. In hâc quoque victûs ratio eadem quæ suprâ, necessaria est: medicamentum autem ad incipientem hanc idoneum est, quod fit ex spodii, croci, æruginis, singulorum P. I. *. piperis albi, omphacii, singulorum P. I. *. Cadmiæ P. VIII. *. At ubi jam exulceratio est, id quod fit ex sulfuris P. I. *. ceræ P. IV. *. picis liquidæ heminâ, olei sextariis duobus: quæ simul incoquantur, dùm crassitudo mellis fiat. Est etiam quod ad Protarchum auctorem refertur. Habet hoc farinæ lupinorum sextarium, nitri cyathos quatuor, picis liquidæ heminam, resinæ humidæ selibram, aceti cyathos tres. Crocum quoque, lycium, ærugo, myrrha, cinis, æquis portionibus rectè miscentur, et ex passo coquantur: idque omnem puitam ubique sustinet. Ad si nihil aliud est, amurca ad tertiam par-

tem decocta, vel sulfur pici liquidæ mixtum, sicut in pecoribus proposui, hominibus quoque scabie laborantibus opitulatur.

17. Impetiginis verò species sunt quatuor. Minimè mala est quæ similitudine scabiem repræsentat : nam et rubet, et durior est, et exulcerata est, et rodit. Distat autem ab eâ, quia magis exulcerata est, et varis similes pustulas habet; videnturque esse in eâ quasi bullulæ quædam, ex quibus interposito tempore quasi squamulæ resolvuntur : certioribusque hæc temporibus revertitur. Alterum genus pejus est, simile papulæ ferè, sed asperius rubicundiusque. Figuras varias habet : squamulæ ex summâ cute decidunt; rosio major est : celerius et latius procedit, certioribusque etiam nonnunquam quàm prior temporibus et fit, et desinit : rubra cognominatur. Tertia etiamnum deterior est; nam et crassior est et durior, et magis tumet; in summâ cute finditur, et vehementius rodit. Ipsa quoque squamosa, sed nigra : procedit et latè et tardè; nec minùs serpit in temporibus quibus aut oritur aut desinit; neque ex toto tollitur : nigræ cognomen est. Quartum genus est quod curationem omniò non recipit, distans colore : nam subalbidum est, et recenti cicatrici simile : squamulas quasdam habet pallidas, quasdam subalbidas, quasdam lenticulæ similes, quibus demptis, nonnunquam profluit sanguis. Alioqui verò humor ejus albidus est, cutis dura atque fissa est; proceditque latius. Hæc verò omnia genera maximè oriuntur in pedibus et manibus; atque ungues quoque infestant. Medicamentum non aliud valentius est quàm quod ad scabiem quoque pertinere sub auctore Protarcho retuli. Serapion autem nitri P. ii. *. sulfuris P. iv. excipiebat resinâ copiosâ, eoque utebatur.

18. Papularum quoque duo genera sunt. Alterum est in quo per minimas pustulas cutis exasperatur et rubet,

leviterque roditur : medium habet pauxillò lævius ; tardè serpit : idque vitium maximè rotundum incipit, eâdemque ratione in orbem procedit. Altera autem est quam ὀφθαλμία, id est feram, Græci appellant : in quâ similiter quidem, sed magis cutis exasperatur exulceraturque, ac vehementiùs et roditur et rubet ; et interdùm etiam pilos remittit. Quæ minùs rotunda est, difficiliùs sanescit : nisi sublata est, in impetiginem vertitur : sed levis papula etiam si jejunâ salivâ quotidie defricatur, sanescit. Major commodissimè murali herba tollitur, si sub eâ detrita est. Ut verò ad composita medicamenta veniamus, idem illud Protarchi tantò valentius in his est, quantò minùs in his vitii est : alterum ad idem Myronis, nitri rubri, thuris, singulorum P. i. *. cantharidum purgatarum P. ii. *. sulfuris ignem non experti tantundem, resinæ terebinthinæ liquidæ P. xx. *. farinæ lolii sextario tres, gith cyathi tres, picis crudæ sextarius.

19. Vitiligo quoque quamvis per sè nullum periculum affert, tamen et fœda est, et ex malo corporis habitu fit. Ejus tres species sunt. Ἀλφός vocatur, ubi color albus est, ferè sub asper, et non continuus, ut quædam quasi guttæ dispersæ esse videantur. Interdùm etiam latius, et cum quibusdam intermissionibus serpit. Μέλας colore ab hoc differt, quia niger est, et umbræ similis : cætera eadem sunt. Λευκὴ habet quiddam simile alphi, sed magis albida est, et altiùs descendit, in eâque albi pili sunt, et lanugini similes. Omnia hæc serpunt, sed in aliis celeriùs, in aliis tardiùs. Alphos et Melas, in quibusdam, variis temporibus et oriuntur et desinunt : Leuce quem occupavit, non facîle dimittit. Priora curationem non difficillimam recipiunt ; ultimum vix unquam sanescit : ac si quid ei vitio demptum est, tamen non ex toto sanus color redditur. Utrùm autem aliquod horum sanabile sit, an non sit, experimento facîle co-

ligitur : incidi enim cutis debet , aut acu pungi. Si sanguis exit , quod ferè fit in duobus prioribus , remedio locus est : si humor albidus , sanari non potest : itaque ab hoc quidem abstinendum est. Super id verò quod curationem recipit , imponenda lenticula mixta cum sulfure et thure , sic ut ea contrita ex aceto sit. Aliud ad idem , quod ad Irenæum auctorem refertur. Alcyonium , nitrum , cuminum , fici folia arida paribus portionibus contunduntur , adjecto aceto. His in sole vitiligo perungitur ; deindè non ita multò post , ne nimis erodatur , eluitur. Propriè quidam , Myrone auctore , eos quos Alphos vocari dixi , hoc medicamento perungunt : sulfuris P. ii. *. nitri P. iv. *. myrti aridæ contritæ acetabulum miscent ; deindè in balneo super vitiliginem inspergunt farinam ex fabâ ; tùm hæc inducunt. Hi verò quos Melanas vocari dixi , curantur , quùm simul contrita sunt alcyonium , thus , hordeum , faba ; eaque sine oleo in balneo ante sudorem insperguntur , tùm genus id vitiliginis defricatur.

LIBER SEXTUS.

SECT. I. **D**IXI de his vitiis, quæ per totum corpus orientia, medicamentorum auxilia dèsiderant : nunc ad ea veniam quæ non nisi in singulis partibus incidere consuerunt, orsus à capite. In hoc igitur capillis fluentibus maximè quidem sæpè radendo succurritur. Adjicit autem vim quamdam ad continendum ladanum cum oleo mixtum. Nunc de his capillis loquor, qui post morbum ferè fluunt : nam quominus caput quibusdam ætate nudetur, succurri nullo modo potest.

SECT. II. Porrigo autem est, ubi inter pilos quædam quasi squamulæ surgunt, eæque à cute resolvuntur, et interdum madent; multò sæpius siccæ sunt : idque evenit modò sine ulcere, modò exulcerato loco; huic quoque, modò malo odore, modò nullo accedente : ferèque id in capitis pilo fit; rariùs in barbâ, aliquandò etiam in supercilio. Ac neque sine aliquo corporis vitio nascitur, neque ex toto inutile est : nam, benè integro capite, non exit. Ubi aliquod in eo vitium est, non incommodum est, summam cutem potiùs subindè corrumpi, quàm id quod nocet, in aliam partem magis necessariam verti. Commodius est ergo subindè peccando repurgare, quàm id ex toto prohibere. Si tamen ea res nimium offendit, quod, humore sequente, fieri potest; magisque si is etiam mali odoris est, caput sæpè radendum est; deindè id super adjuvandum aliquibus ex leviter reprimentibus, quale est nitrum cum aceto, vel ladanum cum myrteo et vino, vel myrobalanum

cum vino. Si parùm per hæc proficitur, vehementioribus uti licet, cum eo, ut sciamus, utique in recenti vitio id inutile esse.

SECT. III. Est etiam ulcus, quod à fici similitudine σύκωσις à Græcis nominatur : caro excrescit; et id quidem generale est. Sub eo verò duæ species sunt: alterum ulcus durum et rotundum est, alterum humidum et inæquale. Ex duro exiguum quiddam et glutinosum exit; ex humido plus, et mali odoris. Fit verò utrumque in his partibus quæ pilis conteguntur: sed id quidem quod callosum et rotundum est, maximè in barbâ; id verò quod humidum, præcipuè est in capillo. Super utrumque oportet imponere elaterium, aut lini semen contritum aut aquâ coctum, aut ficum in aquâ decoctam, aut emplastrum tetrapharmacum ex aceto subactum: terra quoque Eretria ex aceto liquata rectè illinitur.

SECT. IV. Arearum quoque duo genera sunt. Commune utrique est, quòd, emortuâ summâ pelliculâ, pili primùm extenuantur, deindè excidunt: ac si ictus is locus est, sanguis exit liquidus et mali odoris. Increscit utrumque in aliis celeriter, in aliis tardè: pejus est quod densam cutem et subpinguem ex toto glabram facit: sed ea quæ ἀλωπεκία nominatur, sub quâlibet figurâ dilatatur. Fit et in capillo, et in barbâ. Id verò quod à serpentis similitudine ὀφίασις appellatur, incipit ab occipitio: duorum digitorum latitudinem non excedit; ad aures duobus capitibus serpit, quibusdam etiam ad frontem, donec se duo capita in priorem partem committant. Illud vitium in quâlibet ætate est, hoc ferè in infantibus. Illud vix unquàm sine curatione, hoc per se sæpè finitur. Quidam hæc genera arearum scalpello exasperant: quidam illinunt adurentia ex oleo, maximèque chartam combustam: quidam resinam te-

rebinthinam cum thapsiâ inducunt. Sed nihil melius est quàm novaculâ quotidie radere, quâ, quum paulatim summa pellicula excisa est, adaperiuntur pilorum radiculæ: neque antè oportet desistere, quàm frequentem pilum nasci apparuerit. Id autem quod subinde raditur, illini atramento scriptorio satis est.

SECT. V. Pene ineptiæ sunt, curare varos et lenticulas et ephelidas: sed eripi tamen feminis cura cultus sui non potest. Ex his autem quæ suprâ proposui, vari lenticulæque vulgo notæ sunt: quamvis rarior ea species est quam ξένιον Græci vocant, quum sit ea lenticulâ rubicundior et inæqualior. Ἐφηλίδες verò à plerisque ignoratur, quæ nihil est nisi asperitas quædam et durities mali coloris. Cætera non nisi in facie, lenticula etiam in aliâ parte nonnunquam nasci solet: de quâ per se scribere alio loco, visum operæ pretium non est. Sed vari commodissimè tolluntur impositâ resinâ, cui minus quàm ipsa est, aluminis scissilis, et paulum mellis adjectum est. Lenticulam tollunt galbanum et nitrum, quum pares portiones habent, contritaque ex aceto sunt, donec ad mellis crassitudinem venerint. His corpus illinendum, et, interpositis pluribus horis, manè eluendum est, oleoque leviter ungendum. Ephelidem tollit resina, cui tertia pars salis fossilis, et paulum mellis adjectum est. Ad omnia verò ista, atque etiam ad colorandas cicatrices prodest ea compositio, quæ ad Tryphonem patrem auctorem refertur. In eâ pares portiones sunt myrobalani, magmatis, cretæ Cimoliæ subcæruleæ, nucum amararum, farinæ hordei atque ervi, struthii albi, sertulæ Campanæ seminis. Quæ omnia contrita melle quàm amarissimo coquantur, illitumque à vespere usque manè eluitur.

SECT. VI. Sed hæc quidem mediocria sunt: ingentibus verò et variis casibus oculi nostri patent; qui quum

magnam partem ad vitæ simul et usum et dulcedinem conferant, summâ curâ tuendi sunt. Protinûs autem, ortâ lippitudine, quædam notæ sunt ex quibus quid eventurum sit, colligere possumus. Nam si simul et lacryma, et tumor, et crassa pituita cœperint, si ea pituita lacrymæ mixta est, neque lacryma calida est, pituita verò alba et mollis, tumor non durus; longæ valetudinis metus non est. At si lacryma multa et calida, pituitæ paulum, tumor modicus, idque in uno oculo est, longum id, sed sine periculo, futurum est: idque lippitudinis genus minimè cum dolore est, sed vix ante vicesimum diem tollitur; nonnumquàm per duos menses durat. Quando finitur, pituita alba et mollis esse incipit, lacrymæque miscetur. At si simul eæ utrumque oculum invaserunt, potest esse brevior, sed periculum ulcerum est. Pituita autem sicca et arida dolorem quidem movet, sed maturiùs desinit, nisi quid exulceravit. Tumor magnus si sine dolore est et siccus, sine ullo periculo est: si siccus quidem, sed cum dolore est, ferè exulcerat, et nonnumquàm ex eo casu fit, ut palpebra cum oculo glutinetur. Ejusdem exulcerationis timor in palpebris pupillisve est, ubi super magnum dolorem lacrymæ salsæ calidæque eunt; aut etiam si, tumore jam finito, diù lacryma cum pituitâ profluit. Pejus etiamnum est, ubi pituita pallida aut livida est, lacryma calida et multa profluit, caput calet, à temporibus ad oculos dolor pervenit, nocturna vigilia urget: siquidem sub his oculis plerumquè rumpitur, votumque est, ut tantum exulceretur. Intus ruptum oculum febricula juvat. Si foras jam ruptus procidit, sine auxilio est. Si de nigro aliquid albidum factum est, diù manet: at si asperum et crassum est, etiam post curationem vestigium aliquod relinquit. Curari verò oculos sanguinis detractio, medicamento, balneo, vino vetustissimus auctor Hippo-

crates memoriæ prodidit : sed eorum tempora et causas parùm explicuit, in quibus medicinæ summa est. Neque minùs in abstinentiâ et alvi ductione sæpè auxilii est. Hos igitur interdùm inflammatio occupat, ubi cum tumore in his dolor est, sequiturque pituitæ cursus nonnunquàm copiosior vel acrior, nonnunquàm utrâque parte moderatior : in ejusmodi casu prima omnium sunt quies et abstinentia. Ergò primo die, loco obscuro cubare debet, sic ut à sermone quoque absteineat : nullum cibum assumere, si fieri potest, ne aquam quidem; sin minùs, certè quàm minimum ejus. Quòd si graves dolores sunt, commodiùs secundo die, si tamen res urget, etiam primo, sanguis mittendus est; utique si in fronte venæ tument, si firmo corpori materia superest. Si verò minor impetus, minùs acrem curationem requirit; alvum, sed non nisi secundo tertiove die, duci oportet. At modica inflammatio neutrum ex his auxilium desiderat, satisque est uti quiete et abstinentiâ. Neque tamen in lippientibus longum jejunium necessarium est, ne pituita tenuior atque acrior fiat : sed secundo die dari debet id quod levissimum videri potest ex his, quæ pituitam faciunt crassiorem, qualia sunt ova sorbilia : si minor vis urget, pulticula quoque, aut panis ex lacte. Insequentibusque diebus, quantum inflammationi detrahetur, tantùm adjici cibis poterit, sed generis ejusdem : utique ut nihil saluum, nihil acre, nihil ex his quæ extenuant, sumatur; nihil potui præter aquam. Et victûs quidem ratio talis maximè necessaria est. Protinùs autem primo die croci P. i.*. et farinæ candidæ quàm tenuissimæ P. ii.*. excipere oportet ovi albo, donec mellis crassitudinem habeat; idque in linteolum illinere; et fronti agglutinare, ut compressis venis pituitæ impetum cohibeat. Si crocum non est, thus idem facit. Linteolo an lanâ excipiatur, nihil interest. Superinungi verò oculi debent, sic ut croci quantum

tribus digitis comprehendi potest, sumatur; myrrhæ ad fabæ, papaveris lacrymæ ad lenticulæ magnitudinem; eaque cum passo conterantur, et specillo super oculum inducantur. Aliud ad idem : myrrhæ P. i.*. mandragoræ succi P. i.*. papaveris lacrymæ P. ii.*. foliorum rosæ, cicutæ seminis, singulor. P. iii.*. acaciæ P. iv.*. gummi P. viii.*. Et hæc quidem interdium : nocturnum verò, quò commodior quies veniat, non alienum est superimponere candidi panis interiorem partem ex vino subactam : nam et pituitam reprimit, et si quid lacrymæ processit, absorbet, et oculum glutinari non patitur. Si grave id et durum propter magnum oculorum dolorem videtur, ovi et album et vitellus in vas defundendum est, adjiciendumque eò mulsi paulum, idque digito permiscendum. Ubi facta unitas est, demitti debet lana mollis bene carpta, quæ id excipiat, superque oculos imponi. Ea res et levis est, et refrigerando pituitam coercet, et non exarescit, et glutinari oculum non patitur. Farina quoque hordeacea cocta, et cum malo cotoneo cocto mixta commodè imponitur : neque ab ratione abhorret etiam penicillo potissimum uti expresso, si levior impetus est, ex aquâ ; si major, ex poscâ. Priora fasciâ deliganda sunt, ne per somnum cadant ; at hoc superimponi satis est, quia et reponi ab ipso commodè potest ; et quum inaruit, iterum madefaciendum est. Si tantum mali est, ut somnum diù prohibeat, eorum aliquid dandum est quæ ἄνωδονα Græci vocant : satisque est puero quod ervi, viro quod fabæ magnitudinem impleat. In ipsum verò oculum primo die, nisi modica inflammatio est, nihil rectè conjicitur : sæpè enim potius concitatur eo pituita quàm minuitur. A secundo die gravi quoque lippitudini per iudita medicamenta rectè succurritur, ubi vel jam sanguis missus, vel alvus ducta est ; aut neutrum necessarium esse manifestum est.

2. Multa autem multorumque auctorum collyria ad id apta sunt, novisque etiam nunc mixturis temperari possunt, quum lenia medicamenta et modicè reprimentia facillè et variè misceantur. Ego nobilissima exsequar.

3. Est igitur Philonis, quod habet cerussæ elotæ, spodii, gummi, singulorum P. i.*. papaveris lacrymæ combustæ. P. ii.*. Illud scire oportet, hic quoque omnia medicamenta, singula primùm per se teri, deindè mixta, iterum adjectâ paulatim vel aquâ vel alio humore. Gummi quum quasdam alias facultates habeat, hoc maximè præstat, ut ubi collyria diù facta inaruerunt, glutinata sint, neque frientur.

4. Dionysii verò collyrium est. Papaveris lacrymæ combustæ, donec tenerescat, P. i.*. thuris combusti, gummi, singulorum P. ii.*. spodii P. iv.*.

5. Cleonis nobile admodum, Papaveris lacrymæ frictæ P. i.*. croci P. i.*. gummi P. v.*. quibus, quum teruntur, adjicitur rosæ succus. Aliud ejusdem valentis: squamæ æris quod *ζόμωμζ* appellant, P. i.*. croci P. ii.*. spodii P. iv.*. plumbi et eloti et combusti P. vi.*. gummi tantumdem. Attalium quoque ad idem est, maximè ubi multa pituita profluit. Castorei P.*. i. aloës P. i.*. croci P. i.*. myrrhæ P. ii.*. lycii P. iii.*. Cadmiæ curatæ P. viii.*. stibis tantumdem, acaciæ succi P. xii.*. quod non habet liquidum gummi in pyxidiculâ servatur. Theodotus verò huic compositioni adjecit papaveris lacrymæ combustæ P. i.*. æris combusti et eloti P. ii.*. nucleos palmarum combustos numero xx.*. gummi P. xii.

6. At ipsius Theodoti, quod à quibusdam *ἀχάριστον* nominatur, ejusmodi est. Castorei, nardi Indici, singulorum P. i.*. lycii P. ii.*. papaveris lacrymæ tantumdem, myrrhæ P. ii.*. croci, cerussæ elotæ, aloës, singu-

lorum P. III.*. Cadmiæ, botrytidis elotæ, æris combusti, singulorum P. VIII.*. gummi P. XVIII.*. acaciæ succi P. XX.*. stibis tantumdem; quibus aqua pluviatilis adjicitur.

7. Præter hæc ex frequentissimis collyriis est id quod quidam *κόθιον*, quidam à cinereo colore *τέρριον* appellant. Habet amyli, tragacanthæ, acaciæ succi, gummi, singulorum P. I.*. papaveris lacrymæ P. II.*. cerussæ elotæ P. IV.*. spumæ argenti elotæ P. VIII. quæ æquè ex aquâ pluviatili conteruntur.

8. Euelpides autem qui ætate nostrâ maximus fuit ocularius medicus, utebatur eo quod ipse composuerat: *τρογώδες* nominabat. Castorei P. II.*. lycii, nardi, papaveris lacrymæ, singulorum P. I.*. croci, myrrhæ, aloës, singulor. P. IV.*. æris combusti P. VIII.*. Cadmiæ et stibis, singulor. P. XII.*. acaciæ succi P. XXVI.*. gummi tantumdem.

Quò gravior verò quæque inflammatio est, eò magis leniri medicamento debet, adjecto vel albo ovi, vel muliebri lacte. At si neque medicus, neque medicamentum præstò est, sæpiùs utrumlibet horum in oculos penicillo ad id ipsum facto infusum, id malum lenit. Ubi verò aliquis relevatus est, jamque cursus pituitæ constitit, reliquias, fortassè leviores futuras, discutiant balneum et vinum. Igitur lavari debet leviter, antè ex oleo perfricatus, diutiùsque in cruribus et feminibus; multâque calidâ aquâ fovere oculos, deindè per caput priùs calidâ, tùm egelidâ perfundi: à balneo cavere, ne quo frigore afflatus lædatur: posthæc cibo paulò pleniore, quàm ex eorum dierum consuetudine, uti: vitatis tamen omnibus pituitam extenuantibus. Vinum bibere leve, subausterum, modicè vetus, neque effusè neque timidè; ut neque cruditas ex eo, et tamen somnus fiat, lenianturque intùs latentia acria. Sed si quis in balneo sensit ma-

jorem oculorum perturbationem quam attulerat, quod incidere his solet qui, manente adhuc pituitæ cursu, festinarunt; quàm primùm discedere debet, nihil eo die vini assumere, cibi minùs etiam quàm pridè. Deindè quùm primùm satis pituita substitit, iterùm ad usum balnei redire. Solet tamen evenire nonnunquàm, sive tempestatum vitio sive corporis, ut pluribus diebus, neque dolor, neque inflammatio, et minimè pituitæ cursus finiatur. Quod ubi incidit, jamque ipsâ vetustate res matura est, ab eisdem auxilium petendum est, id est balneo ac vino. Hæc enim, ut in recentibus malis aliena sunt, quia concitare ea possunt et accendere; sic in veteribus, quæ nullis aliis auxiliis cesserunt, admodum efficacia esse consuerunt: videlicet hic quoque ut alibi, quùm secunda vana fuerint, contrariis adjuvantibus. Sed antè tonderi ad cutem convenit; deindè in balneo aquâ calidâ quàm plurimâ caput atque oculos fovere; tùm utrumque penicillo detergere, et ungere caput irino unguento: continereque in lectulo se, donec omnis calor qui conceptus est, finiatur, desinatque sudor qui necessario in capite collectus est. Tùm ad idem cibi vinique genus veniendum est, sic uti potiones meracæ sint, obtegendumque caput, et quiescendum. Sæpè enim post hæc gravis somnus: sæpè sudor, sæpè alvi dejectio pituitæ cursum finit. Si levatum malum est, quod aliquandò sæpiùs fit, per plures dies idem fieri oportet, donec ex toto sanitas restituatur. Si diebus iisdem alvus nihil reddit, ducenda est, quò magis superiores partes levantur. Nonnunquàm autem ingens inflammatio tanto impetu erumpit, ut oculos suâ sede propellat: πρόπτωσιν id, quoniam oculi procidunt, Græci appellant. His utique, si vires patiuntur, sanguinem mitti; si id fieri non potest, alvum duci, longioremque inediam indici necessarium est. Opus autem lenissimis medicamentis est:

ideòque Cleonis collyrio quidam quod ex duobus ante positum est, utuntur : sed optimum est Nilei : neque de ullo magis inter omnes auctores convenit.

9. Id habet nardi Indici, papaveris lacrymæ, singulorum P. I. *. gummi P. I. *. croci P. II. *. foliorum rosæ recentium P. IV. *. quæ vel aquâ pluviatili, vel vino levi, subaustero coguntur. Neque alienum est malicorium, vel sertulam Campanam ex vino coquere, deindè conterere, aut myrrham nigram cum rosæ foliis miscere, aut hyoscyami folia cum ovi cocti vitello, aut farinam cum acaciæ succo, vel passo, aut mulso : quibus si folia quoque papaveris adjiciuntur, aliquantò valentiora sunt. Horum aliquo præparato, penicillo fovere oculos oportet ex aquâ calidâ expresso ; in quâ antè vel myrti vel rosæ folia decocta sint : deindè ex illis aliquid imponi. Præter hæc ab occipitio incisâ cute, cucurbitula admovenda est. Quod si per hæc restitutus oculus in sedem suam non est, eodemque modo prolapsus permanet, scire oportet lumen esse amissum ; deindè futurum ut aut indurescat is, aut in pus vertatur. Si suppuratio se ostendit ab eo angulo qui propior tempori est, incidi oculus debet, ut, effuso pure, inflammatio ac dolor finiatur, et intùs tunicæ residant, quò minùs fœda postea facies sit. Utendum deindè vel iisdem collyriis est ex lacte aut ovo, vel croco cui album ovi miscetur. At si induruit et sic emortuus est, ne in pus verteretur, quatenùs fœdè prominebit, excindendus erit, sic ut hamo summa tunica apprehendatur : infrà id deindè scalpellus incidat ; tùm eadem medicamenta erunt conjicienda, donec omnis dolor finiatur. Iisdem medicamentis in eo quoque oculo utendum est, qui primum procidit, deindè per plura loca fissus est.

10. Solent etiam carbunculi ex inflammatione nasci, nonnunquàm in ipsis oculis, nonnunquàm in palpebris :

et in his ipsis, modò ab interiore parte, modò ab exteriorè. In hoc casu alvus ducenda est, cibus minuendus, lac potui dandum, ut acria quæ læserunt, leniantur. Quod ad cataplasmata et medicamenta pertinet, his utendum quæ adversùs inflammationes proposita sunt. Atque hìc quoque Nilei collyrium optimum est : si tamen carbunculus in exteriorè palpebræ parte est, ad cataplasmata aptissimum est lini semen ex mulso coctum : aut si id non est, tritici farina eodem modo còcta.

11. Pustulæ quoque ex inflammatione interdùm oriuntur. Quòd si inter initia protinùs incidit, magis etiam servanda sunt, quæ de sanguine et quiete suprà proposui : sin seriùs quàm ut sanguis mitti possit, alvus tamen ducenda est : si id quoque aliqua res inhibet, utique victùs ratio servanda est : medicamentis autem hìc quoque lenibus opus est, quale Nilei, quale Cleonis est.

12. Id quoque quod Philalethes vocatur, huic aptum est. Myrrhæ, papaveris lacrimæ, singulorum P. 1. *. plumbi eloti, terræ Samiæ quæ ὄζυρ vocatur, tragacanthæ, singulorum P. 1v. *. stibis cocti, amyli, singulorum P. vi. *. spodii eloti, cerussæ elotæ, singulorum P. viii. *. Quæ aquâ pluviatili excipiuntur. Usus collyrii vel ex ovo vel ex lacte est.

13. Ex pustulis ulcera interdùm fiunt : eaque recentia æquè lenibus medicamentis nutrienda sunt, et iisdem ferè quæ suprà in pustulis posui. Fit quoque propriè ad hæc quod δὲ λιβάνου vocatur. Habet æris combusti et eloti, papaveris lacrymæ frictæ, singulorum P. 1. *. spodii eloti, thuris, stibis combusti et eloti, myrrhæ, gummi, singulorum P. 11. *.

14. Evenit etiam ut oculi vel ambo, vel singuli, minores fiant quàm esse naturaliter debeant : idque et acerpituitæ cursus in lippitudine efficit, et continuati fletus,

et ictus parùm benè curati. In his quoque iisdem lenibus medicamentis ex muliebri lacte utendum est; cibis verò his qui maximè corpus alere et implere consuerunt: vitandaque omni modo causa quæ lacrymas excitet, cura-que domesticorum; quorum etiam si quid tale incidit, ejus notitiæ subtrahendum: atque acria quoque medicamenta et acres cibi non alio magis nomine his nocent, quàm quòd lacrymas movent.

15. Genus quoque vitii est, quùm inter pilos palpebrarum pediculi nascuntur: φθειρίασιν Græci nominant. Quod quùm ex malo corporis habitu fiat, rarò non ultrà procedit. Sed ferè tempore interposito, pituitæ cursus acerrimus sequitur, exulceratisque vehementer oculis aciem quoque ipsam corrumpit. His alvus ducenda est, cåput ad cutem tondendum, diùque quotidie jejunis perfricandum. His, ambulationibus aliisque exercitationibus diligenter utendum, gargarizandum ex mulso in quo nepeta et pinguis ficus decocta sit: sæpè in balneo multà calidà aquâ fovendum caput: vitandi acres cibi, lacte vinoque pingui utendum, bibendumque liberaliùs quàm edendum est. Medicamenta verò intùs quidem lenia danda sunt, ne quid acrioris pituitæ concitent. Super ipsos verò pediculos alia, quæ necare eos, et prohibere ne similes nascantur possint. Ad id ipsum spumæ nitri P. 1. *. sandarachæ P. 1. *. uvæ taminiae P. 1. *. simul teruntur, adjiciturque vetus oleum pari portione, atque acetum, donec ei mellis crassitudo sit.

16. Hactenùs oculorum morbi lenibus medicamentis nutriuntur: genera deindè alia sunt, quæ diversam curationem desiderant, ferèque ex inflammationibus nata; sed, finitis quoque his, manentia. Atque in primis in quibusdam perseverat tenuis pituitæ cursus; quibus alvus ab inferiore parte evocanda est, demendum ali-

quid ex cibo. Neque alienum est illini frontem compositione Andreae, quæ habet gummi P. i. *. cerussæ, stibis, singulorum P. ii. *. spumæ argenti et coctæ et elotæ P. iv. *. Sed et ea spuma ex aquâ pluviatili coquitur, et arida hæc medicamenta ex succo myrti conteruntur. His illitâ fronte, cataplasma quoque superinjiciendum ex farinâ quæ frigidâ aquâ coacta sit, cuique aut acaciæ succus, aut cupressus adjecta sit. Cucurbitula quoque inciso vertici rectè accommodatur, aut ex temporibus sanguis emittitur. Inungi verò eo debet quod habet squamæ æris, papaveris lacrymæ, singulorum P. i. *. cervini cornu combusti et eloti, plumbi eloti, gummi, singulorum P. iv. *. thuris P. xii. *. Hoc collyrium, quia cornu habet, διὰ κέρατος nominatur. Quotiescunque non adjicio quod genus humoris adjiciendum sit, aquam intelligi volo.

17. Ad idem Euelpidis, quod is μεμυγμένον nominabat. In eo papaveris lacrymæ et albi piperis singulæ unciae sunt, gummi libra, æris combusti P. i. *. Inter has autem curationes, post intermissionem aliquam prosunt balneum et vinum. Quumque omnibus lipientibus vitandi cibi sint qui extenuant, tum præcipuè his quibus tenuis humor diù fertur. Quod si jam fastidium est eorum quæ pituitam crassiorem reddunt (sicut in hoc genere materiæ maximè promptum est) confugiendum est ad ea quæ, quia ventrem, corpus quoque adstringunt.

18. At ulcera, si cum inflammatione finita non sunt, aut supercrescentia, aut sordida, aut cava, aut certè vetera esse consuerunt. Ex his supercrescentia, collyrio quod μεμυγμένον vocatur, optimè reprimuntur: sordida purgantur et eodem, et eo quod σμυδιόν nominatur.

19. Habet æruginis P. iv. *. gummi tantumdem, ammoniaci, minii Sinopici, singulorum P. xvi. *. Quæ

quidam ex aquâ, quidam, quò vehementiora sint, ex aceto terunt.

20. Id quoque Euelpidis, quod Phynona appellabat, huic utile est. Croci P. i. *. papaveris lacrymæ, gummi, singulorum P. ii. *. æris combusti et eloti, myrrhæ, singulorum P. iv. piperis albi P. vi. *. Sed antè lenitum hoc inungendum est.

21. Id quoque ejusdem, quod Sphærian nominabat, in eodem valet. Lapidis hæmatitis eloti P. ii. *. piperis grana sex, Cadmiæ elotæ, myrrhæ, papaveris lacrymæ, singulorum P. iii. *. croci P. iv. *. gummi P. viii. *. Quæ cum vino Aminæo conteruntur.

22. Liquidum quoque medicamentum ad idem componebat, in quo erant hæc. Æruginis P. *. misy combusti, atramenti sutorii, cinnamomi, singulorum P. iii. *. croci, nardi, papaveris lacrymæ, singulorum P. i. *. myrrhæ P. ii. *. æris combusti P. iii. *. cineris ex odoribus P. iv. *. piperis grana xv. Hæc ex vino austero teruntur: deindè cum passi tribus heminis decoquuntur, donec corpus unum sit: idque medicamentum vetustate efficacius fit.

23. Cava verò ulcera commodissimè implent ex his quæ suprâ posita sunt, Sphærian, et id quod Philaletes vocatur. Idem Sphærian vetustis ulceribus, et vix ad cicatricem venientibus, optimè succurrit.

24. Est etiam collyrium quod, quùm ad plura valeat, plurimùm tamen proficere in his ulceribus videtur; refertur ad Hermonem auctorem. Habet piperis longi P. i. z. albi P. v. *. cinnamomi, costi, singulorum P. i. *. atramenti sutorii, nardi, casia, castorei, singulorum P. ii. *. gallæ P. v. *. myrrhæ, croci, thuris, lycii, cerussæ, singulorum P. viii. *. papaveris lacrymæ P. xii. *. aloës, æris combusti, Cadmiæ, singulorum P. xvi. acaiciæ, stibis, gummi, singulorum P. xxv. *.

25. Factæ verò ex ulceribus cicatrices duobus vitii periclitantur, ne aut cavæ aut crassæ sint. Si cavæ sunt, potest eas implere id quod Sphærian vocari dixi, vel id quod Asclepias nominatur. Habet papaveris lacrymæ P. II. *. sagapeni, opopanax, singulorum P. III. *. æruginis P. IV. *. gummi P. VIII. * piperis P. XII. *. cadmiæ elotæ, cerussæ, singulorum P. XVI. *. At si crassæ cicatrices sunt, extenuat vel Smilion, vel Canopite collyrium, quod habet cinnamomi, acaciæ, singulorum P. I. *. cadmiæ elotæ, croci, myrrhæ, papaveris lacrymæ, gummi, singulorum P. II. *. piperis albi, thuris, singulorum P. III. *. æris combusti P. IX. *. Vel Euelpidis Pyxinum, quod ex his constat. Salis fossilis P. IV. *. ammoniaci, thymiamatis P. VIII. *. papaveris lacrymæ P. XII. *. cerussæ P. XV. *. piperis albi, croci Siculi, singulorum P. LII. *. gummi P. XIII. *. Cadmiæ elotæ P. XI. *. Maximè tamen tollere cicatricem videtur id quod habet gummi P. III. *. æruginis P. I. *. crocomagmatis P. IV. *.

26. Est etiam genus inflammationis in quâ, si cui tument ac distenduntur cum dolore oculi, sanguinem ex fronte emitti necessarium est, multâque aquâ calidâ caput atque oculos foveri, gargarizari ex lenticulâ vel ex fici cremore, inungi acribus medicamentis quæ suprâ comprehensa sunt, maximèque eo quod Sphærian nominatur, quod lapidem hæmatiten habet. Atque alia quoque utilia sunt, quæ ad extenuandam aspritudinem fiunt, de quâ protinùs dicam.

27. Hæc autem inflammationem oculorum ferè sequitur, interdum major, interdum levior. Nonnunquam etiam ex aspritudine lippitudo fit, deindè aspritudinem ipsam auget, fitque ea in aliis brevis, in aliis longa, et quæ vix unquam finiatur. In hoc genere valetudinis quidam crassas durasque palpebras et ficulneo folio, et aspe-

rato specillo, et interdum scalpello eradunt, versasque quotidie medicamentis suffricant : quæ neque nisi in magnâ vetustâque aspritudine, neque sæpè facienda sunt : nam melius eodem ratione victis et idoneis medicamentis pervenitur. Ergo exercitationibus utemur et balneo frequentiore, multâque oculorum palpebras aquâ calidâ fovebimus, cibos autem sumemus acres et extenuantes. At medicamentum id quod Cæsarianum vocatur, habet atramenti sutorii P. i. *. misy P. *. piperis albi P. v. *. papaveris lacrymæ, gummi, singulorum P. ii. *. cadmiæ clotæ P. iii. *. stibis P. vi. *. satisque constat hoc collyrium adversus omne genus oculorum valetudinis idoneum esse, exceptis his quæ lenibus curantur.

28. Id quoque quod Hieracis nominatur, ad aspritudinem prodest. Habet myrrhæ P. i. *. ammoniaci, thymiamatis P. ii. *. æruginis rasæ P. iv. *. cum aquâ pluviali. Ad idem idoneum est etiam id quod Canopite est, et id quod Smilion vocatur, et quod pyxinum, et id quod Sphærimon. Si composita medicamenta non adsunt, felle caprino, vel quàm optimo melle satis commodè aspritudo curatur.

29. Est etiam genus aridæ lippitudinis: ξηροφθαλμίαν Græci appellant. Neque tument neque fluunt oculi, sed rubent tantum, et cum dolore quodam graves sunt, et noctu prægravi pituitâ inhærescunt : quantòque minor generi huic impetus, tantò finis minùs expeditus est. In hoc vitio multum ambulare, multum exerceri, lavari sæpè, ibique desudare, multâque frictione uti necessarium est. Cibi neque qui implent, neque nimium acres apti sunt, sed inter hos medii. Manè, ubi concoxisse manifestum est, non alienum est ex sinapi gargarizare, tum deindè caput atque os diutius defricare.

30. Collyrium verò aptissimum est, quod Rhinion

vocatur. Habet myrrhæ P. i. *. papaveris lacrymæ, acaciæ succi, piperis, gummi, singulorum P. i. *. lapidis hæmatitis, lapidis Phrygii, lycii, lapidis scissilis, singulorum P. ii. *. æris combusti P. xv. *. Ac pyximum quoque eodem accommodatum est.

31. Si verò scabri oculi sunt, quod maximè in angulis esse consuevit, potest prodesse Rhinion id quod supra positum est : potest similiter prodesse id quod habet æruginis rasæ, piperis longi, papaveris lacrymæ, singulorum P. ii. *. piperis albi, gummi, singulorum P. iv. *. cadmiæ elotæ, cerussæ, singulorum P. vi. *. Nullum tamen melius est quàm Euelpidis, quod Βελεπιδιον nominabat. Habet papaveris lacrymæ, cerussæ, lapidis Asii, singulorum P. ii. *. gummi P. iii. *. piperis albi P. iv. *. croci P. vi. *. psorici P. xiii. *. Nulla autem per se materia est quæ Psoricum nominetur ; sed chalcitidis aliquid, et Cadmiæ dimidio plus ex aceto simul conteruntur, idque in vas fictile additum et contextum ficulneis foliis sub terrâ reponitur, sublatumque post dies viginti rursus teritur, et sic appellatur. Verùm in basilico quoque collyrio convenit, ad omnes affectus oculorum id esse idoneum, qui non lenibus medicamentis curantur. Ubi autem non sunt medicamenta composita, scabros angulos lævant et mel et vinum : succurritque et his, et aridæ lippitudini, si quis panem ex vino subactum super oculum imponit. Nam quum ferè sit humor aliquis, qui modò ipsum oculum, modò angulos aut palpebras exasperet, sic, et si quid prodit humoris, extrahitur, et si quid juxtà est, repellitur.

32. Caligare verò oculi nonnunquàm ex lippitudine, nonnunquàm etiam sine hâc propter senectutem imbecillitatemve aliam, consuerunt. Si ex reliquiis lippitudinis id vitium est, adjuvat collyrium quod As-

clepias nominatur : adjuvat et id quod ex crocomagmate fit.

33. Propriè etiam ad id componitur, quod δὶὰ χρόνου vocant. Habet piperis P. i. *. croci Cilicii, papaveris lacrymæ, cerussæ, singulorum P. ii. *. psorici, gummi, singulorum P. iv. *.

34. At si ex senectute aliâve imbecillitate id est, rectè inungi potest, et melle quàm optimo, et cyprino, et oleo vetere. Commodissimum tamen est balsami partem unam, et olei veteris aut cyprini partes duas, mellis quàm acerrimi partes tres miscere. Utilia huic quoque medicamenta sunt quæ ad caliginem proximè, quæque ad extenuandas cicatrices suprâ comprehensa sunt. Cuicunque verò oculi caligabunt, huic opus erit multâ ambulatione atque exercitatione, frequenti balneo, ubi totum quidem corpus perfricandum est; præcipuè tamen caput, et quidem irino, donec insudet; velandumque postea, nec delegendum antequàm sudor et calor domi conquierint. Tùm cibis utendum acribus et extenuantibus, interpositisque aliquibus diebus, ex sinapi gargarizandum.

35. Suffusio quoque, quam Græci ὑπόχυσιν nominant, interdum oculi potentie quâ cernit, se opponit. Quod si inveteraverit, manu curandum est. Inter initia nonnunquàm etiam certis observationibus discutitur. Sanguinem ex fronte vel naribus mittere, in temporibus venas adurere, gargarizando pituitam evocare, suffumigare, oculos acribus medicamentis inungere, expedit. Victus optimus est qui pituitam extenuat.

36. Ac ne resolutio quidem oculorum quam παράλυσιν Græci nominant, alio victus modo vel aliis medicamentis curanda est. Exposuisse tantum genus vitii satis est. Igitur interdum evenit, modò in altero oculo, modò in utroque, aut ex ictu aliquo, aut ex morbo

comitali, aut ex distentione nervorum quâ vehementer oculus ipse concussus est, ut is neque quôquam intendi possit, nec omninò consistat; sed huc illucve sine ratione moveatur, ideoque ne conspectum quidem rerum præstet.

37. Non multum ab hoc malo distat id quod *μυδρίασις* Græci vocant. Pupilla effunditur et dilatatur, aciesque ejus hebetescit, ac penè caligat. Difficillimè genus id imbecillitatis eliditur. In utrâque verò, id est et paralyti et mydriasi, pugnandum est per eadem omnia quæ in caligine oculorum præcepta sunt, paucis tantum mutatis: siquidem ad caput irino interdum acetum, interdum nitrum adjiciendum est, oculos verò melle inungi satis est. Quidam in posteriore vitio calidis aquis usi relevatique: quidam sine ullâ manifestâ causâ subito obcæcati sunt. Ex quibus nonnulli cum aliquandiù nihil vidissent, repentinâ profusione alvi lumen receperunt: quo minùs alienum videtur, et recenti re, et interposito tempore, medicamentis quoque moliri dejectiones, quæ omnem noxiam materiam in inferiora depellant.

38. Præter hæc imbecillitas oculorum est, ex quâ quidam interdum satis, nocturnè nihil cernunt, quod in feminam, benè respondentibus menstruis, non cadit. Sed sic laborantes inungi oportet sanie jecinoris (maximè, hircini; si minùs, caprinæ), ubi id assum coquitur, exceptâ: atque edi quoque ipsum jecur debet. Licet tamen etiam iisdem medicamentis non inutiliter uti, quæ vel cicatrices, vel aspritudinem extenuant: quidam contrito semini portulacæ mel adjiciunt, eatenus ne id ex specillo destillet, eoque inungunt. Exercitationibus, balneo, frictionibus, gargarizationibus iisdem, his quoque utendum est.

39. Et hæc quidem in ipsis corporibus oriuntur: extrinsecus verò interdum sic ictus oculum lædit, ut

sanguis in eo suffundatur. Huic nihil commodius est quàm sanguine vel columbæ, vel palumbi vel hirundinis inungere. Neque id sine causâ fit, quùm harum acies extrinsecus læsa, interposito tempore, in antiquum statum redeat, celerrimèque hirundinis. Undè etiam locus fabulæ factus est, per parentes, herbâ id restitui; quod per se sanescit. Eorum ergò sanguis nostros quoque oculos ab externo casu commodissimè tuetur, hoc ordine, ut sit hirundinis optimus, deindè palumbi: minimè efficax columbæ et illi ipsi et nobis. Suprà percussum verò oculum, ad inflammationem leniendam, non est alienum imponere etiam cataplasmata. Sal ammoniacus, vel quilibet alius quàm optimè teri debet sic ut ei paulatim oleum adjiciatur, donec crassitudo strigmenti fiat. Id deindè miscendum est cum hordeaceâ farinâ, quæ ex mulso decocta sit. Facile autem recognitis omnibus quæ medici quique prodiderunt, apparere cuilibet potest, vix ullum ex his quæ suprà comprehensa sunt, oculi vitium esse, quod non simplicibus quoque et promptis remediis submoveri possit.

SECT. VII. I. Hactenus in oculis ea reperiuntur, in quibus medicamenta plurimùm possunt: ideòque ad aures transendum est, quarum usum proximum à luminibus natura nobis dedit. Sed in his aliquantò majus periculum est: nam vitia oculorum intrâ ipsos nocent; aurium inflammationes doloresque interdum etiam ad mentiam mortemque præcipitant. Quo magis inter initia protinùs succurrendum est, ne majori periculo locus sit. Ergò ubi primùm dolorem aliquis sensit, abstinere et continere se debet: postero die, si vehementius malum est, caput tondere, idque irino unguento calido perungere et operire. At magnus cum febre vigiliæque dolor exigit, ut sanguis quoque mittatur: si id aliquæ

causæ prohibent, alvus solvenda est. Cataplasmata quoque calida subindè mutata proficiunt; sive fœni græci, sive lini, sive alia farina ex mulso decocta est. Rectè etiam subindè admoventur spongiæ, ex aquâ calidâ expressæ. Tùm levato dolore, ceratum circumdari debet ex irino aut cyprino factum: in quibusdam tamen melius, quod ex rosâ est, proficit. Si vehemens inflammatio somnum ex toto prohibet, adjici cataplasmati debent papaveris cortices fricti atque contriti, sic ut ex his pars dimidia sit; eaque tùm simul ex passo mixto decoquuntur. In aurem verò infundere aliquod medicamentum oportet, quod semper antè tepesceri convenit, commodissimèque per strigilem instillatur. Ubi auris repleta est, super lana mollis addenda est, quæ humorem intùs contineat. Et hæc quidem communia sunt. Medicamentum verò est et rosa et radicum arundinum succus, et oleum in quo lumbrici cocti sunt, et humor ex amaris nucibus aut ex nucleo mali Persiei expressus. Composita verò ad inflammationem doloremque leniendum hæc ferè sunt: castorei, papaveris lacrymæ pares pòrtiones conteruntur, deindè adjicitur his passum. Vel papaveris lacrymæ, croci, myrrhæ par modus sic teritur, ut in vicem modò rosa, modò passum instilletur. Vel id quod amarum in Ægyptiâ fabâ est, conteritur, rosâ adjectâ: quibus myrrhæ quoque paulùm à quibusdam miscetur, vel papaveris lacrymæ, aut thus cum muliebri lacte, vel amararum nucum cum rosâ succus. Vel castorei, myrrhæ, papaveris lacrymæ pares portiones cum passo. Vel croci P. i.*. myrrhæ, aluminis scissilis, singulorum P. iii.*. quibus, quùm teruntur, paulatim miscentur passi cyathi tres, mellis minùs cyatho: idque ex primis medicamentis est. Vel papaveris lacryma ex aceto. Licet etiam compositione uti Themisonis, quæ habet castorei, opopanacis, papa-

veris lacrymæ ex aceto, singulorum P. ii.*. spumæ lycii P. iv.*. Quæ contrita passo excipiuntur, donec cerati crassitudinem habeant, atque ita reponuntur. Ubi usus requirit, rursus id medicamentum, adjecto passo, specillo teritur. Illud perpetuum est, quotiescunque crassius medicamentum est quàm ut in aurem instillari possit, adjiciendum cum esse humorem ex quo id componi debet, donec satis liquidum sit.

2. Si verò pus quoque aures habent, rectè lycium per se infunditur, aut irinum unguentum, aut porri succus cum melle, aut centaurii succus cum passo, aut dulcis punici mali succus in ipsius cortice tepefactus, adjectâ myrrhæ exiguâ parte. Rectè etiam miscentur myrrhæ (quam *σακχην* cognominant) P. i.*. croci tantumdem, nuces amaræ xv. mellis sesquicyathus : quæ contrita, quum utendum est, in cortice Punici mali tepefiant. Ea quoque medicamenta quæ oris exulcerati causâ componuntur, æquè ulcera aurium sanant. Quæ si vetustiora sunt, et multa sanies fluit, apta compositio est quæ ad auctorem Erasistratum refertur, piperis P. i.*. croci P. i.*. myrrhæ, misy cocti, singulorum P. ii.*. æris combusti P. ii.*. Hæc ex vino teruntur : deindè ubi inaruerunt, adjiciuntur passi heminæ tres, et simul coquuntur. Quum utendum est, adjicitur his mel et vinum. Est etiam Ptolemæi chirurgi medicamentum, quod habet lentisci P. i.*. gallæ P. i.*. omphacii P. i.*. succum Punici mali. Est Menophili validum admodum, quod ex his constat ; piperis longi P. i.*. castorei P. ii.*. myrrhæ, croci, papaveris lacrymæ, nardi Syriaci, thuris, malicorii, ex Ægyptiâ fabâ partis inferioris, nucum amararum, mellis quàm optimi, singulorum P. iv.*. quibus, quum teruntur, adjicitur acetum quàm acerrimum, donec crassitudo in his passi fiat. Est Cratonis ; cinnamomi, casiae, singulorum P. i.*. lycii, nardi, myr-

rhæ, singulorum P. 1. *. aloës P. 11. *. mellis cyathi tres, vini sextarius: ex quibus lycium cum vino decoquitur, deindè his alia miscentur. At si multùm puris malusque odor est, æruginis rasæ, thuris, singulorum P. 11. *. mellis cyathi duo, aceti quatuor, simul incoquantur. Ubi utendum est, dulce vinum miscetur. Aut aluminisscissilis, papaveris lacrymæ, acaciæ succi par pondus miscetur, hisque adjicitur hyoscyami succi dimidio minor quàm unius ex superioribus portio; eaque trita ex vino diluuntur. Per se quoque hyoscyami succus satis proficit.

3. Commune verò auxilium adversùs omnes aurium casus, jamque usu comprobatum, Asclepiades composuit. In eo sunt cinnamomi, casiæ, singulorum P. 1. *. floris junci rotundi, castorei, albi piperis et longi, amomi, myrobalani, singulorum scrupuli duo, thuris masculi, nardi Syriaci, myrrhæ pinguis, croci, spumæ nitri, singulorum P. 11. *. Quæ separatim contrita, rursùs mixta ex aceto conteruntur, atque ita condita, ubi utendum est, aceto diluuntur. Eodem modo commune auxilium auribus laborantibus est Polybii sphragis ex dulci vino liquata: quæ compositio priore libro continetur. Quod si et sanies profluit, et tumor est, non alienum est, mixto vino per oricularium clysterem eluere, et tùm infundere vinum austerum cum rosâ mixtum, cui spodii paulùm sit adjectum, aut lycium cum lacte, aut herbæ sanguinalis succum cum rosâ, aut mali Punici succum cum exiguâ parte myrrhæ.

4. Si sordida quoque ulcera sunt, meliùs mulso eluuntur, et tùm aliquod ex his quæ suprâ scripta sunt, quod mel habeat, infunditur. Si magis pus profluit, et caput utique tondendum est; et multâ calidâ aquâ perfundendum, et usque ad lassitudinem ambulandum, et cibo modico utendum est. Si cruor quoque ex ulceribus apparuit, lycium cum lacte debet infundi, vel aqua in

aquâ rosa decocta sit, succo aut herbæ sanguinalis aut acaciæ adjecto. Quòd si super ulcera caro increvit, eaque mali odoris saniem fundit, aquâ tepidâ elui debet; tùm infundi id quod ex thure, et æruginè, et aceto, et melle fit, aut mel cum æruginè incoctum. Squama quoque æris cum sandarachâ contrita per fistulam rectè instillatur.

5. Ubi verò vermes orti sunt, si juxtâ sunt, protrahendi oriculario specillo sunt; si longiùs, medicamentis enecandi, cavendumque ne postea nascantur. Ad utrumque proficit, album veratrum cum aceto contritum. Elui quoque aurem oportet vino in quo marrubium decoctum sit: sic emortui vermes in primam auris partem prolabuntur, undè facillimè educi possunt.

6. Sin foramen auris compressum est, et intùs crassa sanies subest, mel quàm optimum addendum est. Si id parùm proficit, mellis cyatho et dimidio æruginis rassæ P. 11. *. adjiciendum est, incoquendumque, et eo utendum. Iris quoque cum melle idem proficit. Item mellis et rosæ scrupuli duo. Item galbani P. 11. *. myrrhæ cum melle, et fellis taurini, singulorum P. 11. *. vini quantum satis est ad myrrham diluendam.

7. Ubi verò graviùs aliquis audire cœpit, quod maximè post longos capitis dolores evenire consuevit, in primis aurem ipsam considerare oportet: apparebit enim aut crusta, qualis super ulcera innascitur, aut sordium coitus. Si crusta est, infundendum est aut oleum calidum, aut cum melle ærugo, vel porri succus, aut cum mulso nitri paulum. Atque ubi crusta à corpore jam recedit, eluenda auris aquâ tepidâ est, quò faciliùs ea per se diducta oriculario specillo protrahatur. Si sordes, eæque mollès sunt, eodem specillo eximendæ sunt: at si duræ sunt, acetum et cum eo nitri paulum conjiciendum est: quùmque emollitæ sunt, eodem

modo elui aurem purgarique oportet. Quòd si capitis gravitas manet, attendendum idem, et leniter sed diù perfricandum est: adjecto vel irino vel laureo oleo, sic ut utrilibet paulùm aceti misceatur: tùm diù ambulandum, leniterque post unctionem aquà calidà caput fovendum: cibisque utendum ex imbecillissimà et medià materià, magisque assumendæ dilutæ potiones: nonnunquàm gargarizandum est. Infundendum autem in aurem castoreum cum aceto et laureo oleo, et succo radiculae corticis: aut cucumeris agrestis succus, adjectis contritæ rosæ foliis. Immaturæ quoque uvæ succus cum rosà instillatus, adversus surditatem satis proficit.

8. Aliud vitii genus est, ubi aures intra seipsæ sonant, atque ob hoc quoque fit, ne externum sonum accipiant. Levissimum est, ubi id ex grâvedine est: pejus, ubi ex morbo, capitisve longis doloribus incidit; pessimum, ubi magnis morbis venientibus, maximèque comitiali, provenit. Si ex grâvedine est, purgare aurem oportet, et spiritum continere, donec indè humor aliquis exspumet. Si ex morbo vel capitis dolore, quod ad exercitationem, frictionem, perfusionem, gargarizationemque pertinet, eadem facienda sunt. Cibis non utendum nisi extenuantibus: in aurem dandus radiculae succus cum rosà, vel cum succo radicis ex cucumere agresti, vel castoreum cum aceto et laureo oleo: veratrum quoque cum aceto contèritur, deindè mellè cocto excipitur, et indè collyrium factum in aurem demittitur. Si sine his cœpit, ideòque novo metu terret, in aurem dari debet castoreum cum aceto vel irino vel laureo oleo, aut huic mixtum castoreum cum succo nucum amararum, aut myrrha nitrum cum rosà et aceto. Plus tamen in hoc quoque proficit victûs ratio: eademque facienda sunt quæ suprâ comprehendi cum majore quoque diligentia; et prætereà, donec

is sonus finiatur, à vino abstinendum. Quòd si simul et sonus est et inflammatio, laureum oleum conje-
cisse abundè est, aut id quod ex amaris nucibus ex-
primitur; quibus quidam vel castoreum vel myrrham
miscent.

9. Solet etiam interdùm in aurem aliquid incidere,
ut calculus, aliquodve animal. Si pulex intùs est, com-
pellendum eò lanæ paulùm est, quò ipse is subit, et
simul extrahitur. Si non est secutus, aliudve animal est,
specillum lanâ involutum in resinam quàm glutinosis-
simam, maximèque terebinthinam demittendum, idque
in aurem injiciendum, ibique vertendum est; utique
enim comprehendet, et eximet. Sin aliquid exanime
est, specillo oriculario protrahendum est, aut hamulo
retuso paulùm recurvato. Si ista nihil proficiunt, po-
test eodem modo resinâ protrahi. Sternutamenta quo-
que admota id commodè elidunt, aut oriculario clystere
aqua vehementer intùs compulsa. Tabula quoque col-
locatur media inhærens capitibus utrinquè pendentibus,
superque eam homo deligatur in id latus versus ejus
auris eo modo laborat, sic ut extra tabulam emineat.
Tùm malleo caput tabulæ quod à pedibus est, feritur:
atque ita concussâ aure, id quod inest, excidit.

SECT. VIII. 1. Nares verò exulceratas fovere oportet
vapore aquæ calidæ. Id et spongiâ expressâ atque ad-
motâ fit, et subjecto vase oris angusti calidâ aquâ re-
pleto. Post id fomentum, illinenda ulcera sũnt, aut
plumbi recremento, aut cerussâ, aut argenti spumâ:
cùm quodlibet horum aliquis conterit, ei, dùm teritur,
in vicem vinum et oleum myrteum adjicit, donec mel-
lis crassitudinem fecerit. Sin autem ea ulcera circa os
sunt, pluresque crustas et odorem fœdum habent, quod
genus Græci ὤζιναν appellant, sciri quidem debet,
vix ei malo posse succurri. Nihilominus tamen hæc ten-

tari possunt, ut caput ad cutem tondeatur, assidueque vehementer perfricetur, multâ calidâ aquâ perfundatur: multa eidem ambulatio sit, cibus modicus, neque acer neque valentissimus. Tùm in narem ipsam mel cum exiguo modo resinæ terebinthinæ conjiciatur (quod specillo quoque involuto lanâ fit,) attrahaturque spiritu is succus, donec in ore gustus ejus sentiat. Sub his enim crustæ resolvuntur, quæ tùm per sternutamenta elidi debent. Puris ulceribus, vapor aquæ calidæ subjiciendus est: deindè adhibendum aut lycium ex vino dilutum, aut amurca, aut omphacium, aut menthæ aut marrubii succus, aut atramentum sutorium, quod candefactum, deindè contritum sit: aut interior scillæ pars contrita, sic ut horum cuilibet mel adjiciatur. Cujus in cæteris admodum exigua pars esse debet; in atramento sutorio tanta, ut ea mixtura liquida fiat; cum scillâ utique pars major; involvendumque lanâ specillum est, et in eo medicamento tingendum, eoque ulcera implenda sunt. Rursusque linamentum involutum et oblongum eodem medicamento illinendum, demittendumque in narem est, et ab inferiore parte leniter deligandum: idque per hiemem et ver bis die; per æstatem et autumnum ter die fieri debet.

2. Interdum verò etiam in naribus carunculæ quædam similes muliebribus mammis nascuntur, hæque in imis partibus, quæ carnosissimæ sunt, inhaerent. Has curare oportet medicamentis adurentibus, sub quibus ex toto consumuntur. Polypus verò est caruncula modò alba modò subrubra, quæ varium ossi inhæret, et modò ad labra tendens, narem implet, modò retrò per id foramen, quò spiritus à naribus ad fauces descendit, adeò increscit, uti post uvam conspici possit; strangulatque hominem, maximè Austro aut Euro flante: ferèque mollis est, rarò dura: eaque magis spiritum impedit et

nares dilatat. Et ferè *καρκινώδης* est; itaque attingi non debet.

Illud aliud genus ferè quidem ferro curatur, interdùm tamen inarescit, si addita in narem per linamentum aut penicillum ea compositio est, quæ habet minii Sinopici, chalcitidis, calcis, sandarachæ, singulorum P. 1. *. atramenti sutorii P. 11. *.

SECT. IX. In dentium autem dolore, qui ipse quoque maximis tormentis annumerari potest, vinum ex toto circumcidendum est. Cibo quoque primò abstinendum, deindè eo modico mollique utendum, ne mandentis dentes irriter; tùm extrinsecùs admovendus per spongiam vapor aquæ calidæ, imponendumque ceratum ex cyprino aut irino factum, lanâque id comprehendendum, caputque velandum est. Quòd si gravior is dolor est, utiliter et alvus ducitur, et calida cataplasmatâ super maxillam injiciuntur, et ore humor calidus cum medicamentis aliquibus continetur, sæpiùsque mutatur. Cujus rei causâ et quinquefolii radix in vino, et hyoscyami radix vel in poscâ vel in vino mixto coquitur, sic ut paulùm his salis adjiciatur, et papaveris non nimium: aridi cortices et mandragoræ radix, eodem modo. Sed in his tribus utique vitandum est, ne quod haustum erit devoretur. Ex populo quoque albâ cortex radicis in hunc usum in vino mixto rectè coquitur, et in aceto cornu cervini ramentum, et nepeta cum tædâ pingui: ac ficus item pinguis vel in mulso, vel in aceto et melle, ex quibus quùm ficus decocta est, is humor percolatur. Specillum quoque lanâ involutum in calidum oleum demittitur, eoque ipse dens fovetur. Quinetiam quædam quasi cataplasmata in dentem ipsum illinuntur: in quem usum ex malo Punico acido atque arido malicorii pars interior cum pari portione et gallæ et pinei corticis conteritur, misceturque his minium;

eaeque contrita aquâ pluviatili coquuntur. Aut panacis, papaveris lacrymæ, peucedani, uvæ taminiae sine seminibus, pares portiones conteruntur. Aut galbani partes tres, papaveris lacrymæ pars quarta. Quicquid dentibus adnotum est, nihilominus supra maxillam ceratum, quale suprâ posui, esse debet lanâ obtectum. Quidam etiam myrrhæ, cardamomi, singulorum P. i. *. croci, pyrethri, ficorum partes, singulorum P. iv. *. sinapis P. vii. *. contrita linteolo illinunt, imponuntque in humero partis ejus quâ dens dolet: si is superior est, à scapulis; si inferior, à pectore: idque dolorem levat, et cum levavit, protinus submovendum est. Si verò excusus est dens, festinare ad eximendum eum, nisi res coegit, non est necesse: sed tùm omnibus fomentis quæ suprâ posita sunt, adjiciendæ quædam valentiores compositiones sunt, quæ dolorem levant: quales hæ sunt quæ habent papaveris lacrymæ P. i. *. piperis P. ii. *. soreos P. x. *. quæ contrita galbano excipiuntur: idque circumdatur: aut Menemachi, maximè ad maxillares dentes, in quâ sunt croci P. i. *. cardamomi, thuris fuliginis, ficorum, piperis, pyrethri, singulorum P. iv. *. sinapis P. vii. *. Quidam autem immiscent pyrethri, piperis, elaterii, singulorum P. i. *. aluminis scissilis, papaveris lacrymæ, uvæ taminiae, sulfuris ignem non experti, bituminis, lauri baccarum, sinapis, singulorum P. ii. *. Quòd si dolor eximi eum cogit, et piperis semen cortice liberatum, et eodem modo bacca ederae conjecta in id foramen, dentem findit, isque per testas excidet. Et plani piscis, quam pastinacam nostri, τρυγῶνα Græci vocant, aculeus torretur, deindè conteritur, resinâque excipitur, quæ denti circumdata hunc solvit. Et alumen scissile in id foramen conjectum dentem citat. Sed id tamen involutum lanulâ demitti commodius est, quia sic dente servato, dolorem

levat. Hæc à Medicis accepta sunt : sed agrestium experimento cognitum est, quòd dēns dolet, herbam mentastrum cum suis radicibus velli debere, et in pelvem conjici, supraque aquam infundi, collocarique juxta sedentem hominem undiquè veste contextum, tùm in pelvem candentes silices demitti, sic ut aquâ tegantur, hominemque eum hiantē cre vaporem excipere, ut suprâ dictum est, undiquè inclusum. Nam et sudor plurimus sequitur, et per os continens pituita defluit, idque sæpè longiorem, semper annuam valetudinem bonam præstat.

SECT. X. Si verò tonsillæ sine exulceratione per inflammationem intumuerunt, caput velandum est : extrinsecus is locus vapore calido fovendus, multâ ambulatione utendum, caput in lecto sublime habendum, gargarizandumque reprimentibus. Radix quoque ea quam dulcem appellant contusa, et in passo mûlsove decocta, idem præstat. Leniter quoque quibusdam medicamentis eas illini non alienum est, quæ hoc modo fiunt. Ex malo Punico dulci succus exprimitur, et ejus sextarius leni igne coquitur, donec ei mellis crassitudo sit; tùm croci, myrrhæ, aluminis scissilis, singulorum P. ʒ. per se conteruntur, paulatimque his adjiciuntur vini lenis cyathi duo, mellis unus : deindè priori succo ista miscentur, et rursus leniter incoquantur. Aut ejusdem succi sextarius eodem modo coquitur, atque eâdem ratione trita ei adjiciuntur hæc : Nardi P. ʒ. omphacii P. ʒ. cinnamomi, myrrhæ, casiæ, singulorum P. ʒ. Eadem autem hæc et auribus et naribus purulentis accommodata sunt. Cibus quoque in hâc valetudine lenis esse debet, ne exasperet. Quòd si tanta inflammatio est ut spiritum impediat, in lecto conquiescendum, à cibo abstinendum, neque assumendum quicquam præter aquam calidam est : alvus quoque ducenda est :

gargarizandum ex fico et mulso : illinendum mel cum omphacio : extrinsecus admovendus, sed aliquantò diutius, vapor aquæ calidus, donec ea suppurent, et per se aperiantur. Si, pure substante, non rumpuntur hi tumores, incidendi sunt, deinde ex mulso calido gargarizandum. At si modicus quidem tumor sed exulceratio est, furfurum cremori ad gargarizandum paulum mellis adjiciendum est, illinendaquæ ulcera hoc medicamento. Passi quàm dulcissimi tres heminæ ad unam coquantur, tùm adjicitur thuris P. 1.*. croci, myrrhæ, singulorum P. 1. leviterque omnia rursus fervescunt. Ubi pura ulcera sunt, eodem furfurum cremore vel lacte gargarizandum est. Atque hîc quoque cibus lenibus opus est, quibus adjici dulce vinum potest.

SECT. XI. Ulcera autem oris, si cum inflammatione sunt, et parum pura ac rubicunda sunt, optimè his medicamentis curantur quæ suprâ posita ex malis Punicis fiunt. Continendusque sæpè ore reprimens cremor est, cui paulum mellis sit adjectum : utendum ambulationibus, et non acri cibo. Simul atque verò pura ulcera esse cœperunt, lenis humor, interdum etiam quàm optima aqua ore continenda est. Prodestque assumptum purum vinum, pleniorque cibus, dum acribus vacet : inspergique ulcera debent alumine scissili, cui dimidio plus gallæ immaturæ sit adjectum. Si jam crustas habent, quales in adustis esse consuerunt, adhibendæ sunt hæ compositiones quas Græci ἀνθραξ nominant. Junci quadrati, myrrhæ, sandarachæ, aluminis pares portiones. Aut croci, myrrhæ, singulorum P. 11.*. iridis, aluminis scissilis, sandarachæ, singulorum P. 1v.*. junci quadrati P. viii.*. Aut gallæ, myrrhæ, singulorum P. 11.*. aluminis scissilis P. 11.*. rosæ foliorum P. 1v. Quidam autem croci P.*. aluminis scissilis, myrrhæ, singulorum P. 1.*. sandarachæ P. 11.*. junci qua-

drati P. iv.*. miscent. Priora arida insperguntur: hoc cum melle illinitur, neque ulceribus tantum, sed etiam tonsillis.

Verum ea longè periculosissima sunt ulcera, quas ἄφθα; Græci appellant, sed in pueris: hos enim sæpè consumunt, in viris et mulieribus idem periculum non est. Hæc ulcera à gingivis incipiunt, deindè palatum totumque os occupant: tùm ad uvam faucesque descendunt: quibus obsessis, non facilè fit ut puer convalescat. Ac miserius etiam est, si lactens adhuc infans est, quo minùs imperari remedium aliquod potest. Sed in primis nutrix cogenda est exerceri ambulationibus, et his operibus quæ superiores partes movent: mittenda in balneum, jubendaque ibi calidâ aquâ mammas perfundere, tùm alenda cibus lenibus, et his qui non facilè corrumpuntur: potione, si febricitat puer, aquæ; si sine febre est, vini diluti. Ac si alvus nutrici substitit, ducenda est. Si pituita ejus in os coit, vomere debet. Tùm ipsa ulcera perungenda sunt melle cui rhus quem Syriacum vocant, aut amaræ nuces adjectæ sunt: vel mixtis inter se rosæ foliis aridis, pineis nucleis, menthæ coliculo, melle: vel eo medicamento quod ex moris fit, quorum succus eodem modo quo Punici mali ad mellis crassitudinem coquitur; eâdemque ratione ei crocum, myrrha, alumen, vinum, mel, miscetur: neque quicquam dandum, à quo humor evocari possit. Si verò jam firmior puer est, gargarizare debet his ferè quæ suprâ comprehensa sunt. Ac si lenia medicamenta in eo parùm proficiunt, adhibenda sunt ea quæ adurendo crustas ulceribus inducant. Quale est scissile alumen, vel chalcitis, vel atramentum sutorium. Prodest etiam fames et abstinencia quanta maxima imperari potest. Cibus esse debet lenis: ad purganda tamen ulcera interdum caseus ex melle rectè datur.

SECT. XII. Linguae quoque ulcera non aliis medicamentis egent, quam quæ primâ parte superioris capitis exposita sunt. Sed quæ in latere ejus nascuntur, diutissimè durant: videndumque est, nùm contrâ dens aliquis acutior sit, qui sanescere sæpè ulcus eo loco non sinit; ideòque limandus est.

SECT. XIII. Solent etiam interdùm juxtà dentes in gingivis tubercula quædam oriri dolentia: *παρουλίδα* Græci appellant. Hæc initio leniter sale contrito perfrire oportet, aut inter se mixtis sale fossili combusto, cupresso, nepetâ; deindè eluere os cremore lenticulæ, et inter hæc hiare donec pituitæ satis profluat.

In majore verò inflammatione iisdem medicamentis utendum est, quæ ad ulcera oris suprâ posita sunt: et mollis linamenti paulum involvendum aliquâ compositione ex his quæ *ἀνθηράς* vocari dixi, demittendumque id inter dentem et gingivam: quòd si durior erit et id prohibebit, extrinsecùs admovendus erit spongiâ vapor calidus, imponendumque ceratum. Si suppuratio se ostendet, diutius eo vapore utendum erit, et continendum ore calidum mulsum in quo ficus decocta sit: idque subcrudum incidendum, ne si diutius ibi pus permanserit, os lædât. Quòd si major is tumor est, commodius totus exciditur, sic ut ex utrâque parte dens liberetur. Pure exempto, si levis plaga est, satis est ore calidam aquam continere, et extrinsecùs fovere eodem vapore; si major est, lenticulæ cremore uti, iisdemque medicamentis, quibus cætera ulcera oris curantur. Alia quoque ulcera in gingivis plerumque oriuntur, quibus eadem quæ in reliquo ore succurrunt: maximè tamen maudere ligustrum oportet, succumque ejus ore continere. Fit etiam interdùm, ut ex gingivæ ulcere, sive *παρουλὶς* fuit, sive non fuit, diutius pus feratur, quod aut dente corrupto aut fracto, vel aliter vitiatò

osse; maximèque id per fistulam evenire consuevit. Ubi incidit, locus aperiendus, dens eximendus: testa ossis, si qua abcessit, recipienda est; si quid vitiosus est, radendum. Post quæ, quid fieri debeat, suprà in aliorum ulcerum curatione comprehensum est. Si verò à dentibus gingivæ recedunt, eadem antheræ succurrunt. Utile est etiam pira aut mala non permatura mandere, et ore eum humorem continere. Idemque præstare non acre acetum in ore retentum potest.

SECT. XIV. Uvæ vehemens inflammatio terrere quoque debet. Itaque in hac et abstinencia necessaria est, et sanguis rectè mittitur; et, si id aliqua res prohibet, alvus utiliter ducitur: caputque super hæc velandum, et sublimius habendum est: tum aquâ gargarizandum, in quâ simul rubus et lenticulâ decocta sit. Illinenda autem ipsa uva vel omphacio, vel gallâ, vel alumine scissili, sic ut cuilibet eorum mel adjiciatur. Est etiam medicamentum huic aptum, quod Andronium appellatur. Constat ex his, alumine scissili, squamâ æris rubri, atramento sutorio, gallâ, myrrhâ, misy: quæ per se contrita mixtaque rursus paulatim adjecto vino austero teruntur, donec his mellis crassitudo sit. Chelidoniæ quoque succo per cochlear illita uva maximè prodest. Ubi horum aliquo illita uva est, ferè multa pituita decurrit, quàmque ea quievit, ex vino calido gargarizandum. Quòd si minor inflammatio est, laser terere, eique adjicere frigidam aquam satis est, eamque aquam cochleari exceptam ipsi uvæ subijcere. At mediocriter eam tumentem aqua quoque frigida, eodem modo subiecta, reprimit. Ex eadem autem aquâ gargarizandum quoque est, quæ vel cum lasere, vel sine eo, hac ratione uvæ subjecta est.

SECT. XV. Si quandò autem ulcera oris cancer invasit, primò considerandum est, num malus corporis

habitus sit, eique occurrendum; deindè ipsa ulcera curanda. Quòd si in suminà parte id vitium est, satis proficit anthera humido ulceri arida inspersa, sicciori cum exiguà parte mellis illita: si paulò altiùs, chartæ combustæ partes duæ, auripigmenti pars una: si penitùs malum descendit, chartæ combustæ partes tres, auripigmenti pars quarta; aut pares portiones salis fricti et iridis frictæ; aut item pares portiones chalcitidis, calcis, auripigmenti. Necessarium autem est linamentum in rosâ tingere, et super adurentia medicamenta imponere, ne vicinum et sanum locum lædant. Quidam etiam in acris aceti heminam frictum salem conjiciunt, donec tabescere desinat: deindè id acetum coquunt, donec exsiccetur, eumque salem contritum inspergunt. Quoties autem medicamentum injicitur, et antè et post, os diluendum est, vel cremore lenticulæ, vel aquâ in quâ aut ervum, aut oleæ aut verbenæ decoctæ sint, sic ut cuilibet eorum paulum meliis misceatur. Acetum quoque ex scillâ retentum ore satis adversus hæc ulcera proficit; et ex aceto cocto sali, sicut suprâ demonstratum est, rursus mixtum acetum: sed et diù continere utrumlibet, et id bis aut ter die facere, prout vehemens malum est, necessarium est. Quòd si puer est cui id incidit, specillum lanâ involutum in medicamentum demittendum est, et super ulcus tenendum, ne per imprudentiam adurentia devoret. Si dolor in gingivis est, moventurque aliqui dentes, refigi eos oportet; nam curationem vehementer impediunt. Si nihil medicamenta proficient, ulcera erunt adurenda. Quod tamen in labris ideò non est necessarium, quoniam excidere commodius est. Et id quidem, æquè adustum atque excisum, sine eâ curatione quæ corpori manu adhibetur, impleri non potest. Gingivarum verò ossa quæ hebetia sunt, in perpetuum ustione nudantur: neque enim postea caro

increscit. Imponenda tamen adustis lenticula est, donec sanitatem, qualis esse potest, recipiant.

SECT. XVI. Hæc in capite ferè medicamentis egent : sub ipsis verò auribus oriri *παρωτίδες* solent, modò in secundâ valetudine ibi inflammatione ortâ, modò post longas febres, illuc impetu morbi converso. Id abscessus genus est : itaque nullam novam curationem desiderat, animadversionem tantummodò hanc habet necessariam, quia, si sine morbo id intumuit, primum reprimendum experimentum est : si ex adversâ valetudine, illud inimicum est ; maturarique et quam primum aperiri commodius est.

SECT. XVII. Ad umbilicos verò prominentes, ne manu ferroque utendum sit, antè tentandum est, ut abstineant : alvus his ducatur, imponatur super umbilicum id quod ex his constat : cicutæ et fuliginis, singulorum P. i. *. cerussæ elotæ P. iv. *. plumbi eloti P. viii. *. ovis duobus, quibus etiam solani succus adjicitur. Hoc diutius impositum esse oportet, et interim conquiescere hominem, cibo modico uti, sic ut vitentur omnia infantia.

SECT. XVIII. 1. Proxima sunt ea quæ ad partes ob-scœnas pertinent, quarum apud Græcos vocabula et tolerabilius se habent, et accepta jam usu sunt, quùm in omni fere medicorum volumine atque sermone jactentur : apud nos fœdiora verba, ne consuetudine quidem aliquâ verecundiùs loquentium commendata sunt : ut difficilis hæc explanatio sit simul et pudorem et artis præcepta servantibus. Neque tamen ea res à scribendo detertere me debuit : primùm, ut omnia quæ salutaria accepi, comprehenderem, dein quia in vulgus eorum curatio etiam præcipuè cognoscenda est, quæ invitissimus quisque alteri ostendit.

2. Igitur si ex inflammatione coles intumuit, redu-

cique summa cutis, aut rursus induci non potest, multà calidà aquà fovendus locus est. Ubi verò glans contacta est, oriculario quoque clystere inter eam cutemque aqua calida inserenda est. Si mollita sic et extenuata cutis ducenti paruit, expeditior reliqua curatio est. Si tumor vicit, imponenda est vel lenticula, vel marrubium, vel oleæ folia ex vino cocta, sic ut cuilibet eorum, dùm teritur, mellis paulum adjiciatur: sursumque coles ad ventrem deligandus est. Quod in omni curatione ejus necessarium est: isque homo continere se, et abstinere à cibo debet, et potionem aquæ tantum à siti vindicari. Postero die rursus adhibendum iisdem rationibus aquæ fomentum est, et cum vi quoque experitundum, an cutis sequatur: eaque si non parebit, leviter summo scalpello concidenda erit. Nam quum sanies profluxerit, extenuabitur is locus, et facilius cutis ducetur. Sive autem hoc modo victa erit, sive nunquam repugnaverit, ulcera vel in cutis ulteriore parte, vel in glande, ultrave eam in cole, reperiuntur: quæ necesse est, aut pura siccave sint, aut humida et purulenta. Si sicca sunt, primum aquà calidà fovenda sunt: deinde imponendum lycium ex vino est, aut amurca cocta cum eodem, aut cum rosà butyrum. Si levis iis humor inest, vino eluenda sunt, tum butyro et rosæ mellis paulum, et resinæ terebinthinæ pars quarta adjicienda est, eoque utendum. At si pus ex his profluit, ante omnia elui mulso calido debent: tum imponi piperis P. I. *. myrrhæ P. II. *. croci, mysi cocti, singulorum P. II. *. quæ ex vino austero coquantur, donec mellis crassitudinem habeant. Eadem autem compositio tonsillis, uvæ madenti, oris nariumque ulceribus accommodata est. Aliud ad eadem piperis P. I. *. myrrhæ P. I. *. croci P. II. mysi cocti P. I. *. æris combusti P. II. *. quæ primum ex vino austero conteruntur, deinde ubi inaruerunt, iterum

teruntur ex passi tribus cyathis, et incoquantur, donec visci crassitudinem habeant. Ærugo quoque cum cocto melle, et ea quæ ad oris ulcera suprâ comprehensa sunt, curant: aut Erasistratis compositio, aut Cratonis rectè super purulenta naturalia imponitur. Folia quoque oleæ ex novem cyathis vini coquantur: his adjicitur aluminis scissilis P. iv. *. lycii P. viii. *. mellis sesquicyathus: at si plus puris est, id medicamentum ex melle; si minùs, ex vino diluitur. Illud perpetuum est, post curationem, dùm inflammatio manet, quale suprâ positum est, cataplasma suprâ dare, et quotidie ulcera eâdem ratione curare. Quòd si pus et multum, et cum malo odore cœpit profluere, elui cremore lenticulæ debet, sic ut ei mellis paulum adjiciatur. Aut oleæ, aut lentisci folia, vel marrubium decoquendum est, eoque humore eodem modo cum melle utendum; imponendaque eadem, aut etiam omphacium cum melle, aut id quod ex æruginè et melle ad aures fit, aut compositio Andronis, aut anthera, sic ut ei paulum mellis adjiciatur. Quidam ulcera omnia, de quibus adhuc dictum est, lycio ex vino curant. Si verò ulcus latius atque altius serpit, eodem modo elui debet; imponi verò aut ærugo, aut omphacium cum melle, aut Andronis compositio, aut marrubii, myrrhæ, croci, aluminis scissilis cocti, rosæ foliorum aridorum, gallæ, singulorum P. i. *. minii Sinopici P. ii. *. Quæ per se singula primùm teruntur, deindè juncta iterùm, melle adjecto, donec liquidi cerati crassitudinem habeant: tùm in æneo vase leniter coquantur, ne superfluant. Quùm jam guttæ indurescunt, vas ab igne removetur; idque medicamentum, prout opus est, aut ex melle aut ex vino liquatur. Idem autem per se etiam ad fistulas utile est. Solet etiam interdum ad nervos ulcus descendere, profluitque pituita multa, sanies tenuis malique odoris, non coacta, aut

aquæ similis in quâ caro recens lota est; doloresque is locus et punctiones habet. Id genus quamvis inter purulenta est, tamen lenibus medicamentis curandum est, quale est emplastrum τετραφάρμακον ex rosâ liquatum, sic ut thuris quoque paulûm ei misceatur. Aut id quod ex butyro, rosâ, resinâ, melle fit, suprâ verò à me positum est: præcipuèque id ulcus multâ calidâ aquâ fovendum est, velandumque, neque frigori committendum. Interdûm autem per ipsa ulcera coles sub cute exesus est, sic ut glans excidat: sub quo casu cutis ipsa circumcidenda est. Perpetuumquē est, quoties glans, aut ex cole aliquid, vel excidit, vel abscinditur, hæc cutem non esse servandam, ne consadat ulcerique agglutinetur; ac neque reduci possit postea, et fortassè fistulam quoque urinæ claudat. Tubercula etiam, quæ κόρυζα Græci vocant, circa glandem oriuntur, quæ vel medicamentis vel ferro aduruntur, et quûm crustæ exciderunt, squama æris inspergitur, ne quid ibi rursûs increseat.

3. Hæc citra cancrum sunt, qui cûm in reliquis partibus, tûm in his quoque vel præcipuè ulcera infestat. Incipit à nigritie, quæ si cutem occupavit, protinûs specillum subjiendum, eaque incidenda est; deindè oræ vulsellâ præhendendæ: tûm quicquid corruptum est, excidendum, sic ut ex integro quoque paulûm dematur; idque adurendum. Quoties quid ustum est, id quoque sequitur, ut imponenda lenticula sit; deindè ubi crustæ exciderunt, ulcera sic ut alia curentur. At si cancer ipsum colem occupavit, inspergenda aliqua sunt ex adurentibus, maximèque id quod ex calce, chalcitide, auripigmento componitur. Si medicamenta vincuntur, hic quoque scalpello quidquid corruptum est; sic ut aliquid etiam integri trahat, præcidi debet. Illud quoque æquè perpetuum est, exciso cancro, vul-

nus esse adurendum. Sed sive ex medicamentis, sive ex ferro crustæ occalluerunt, magnum periculum est ne his decidentibus, ex cole profusio sanguinis insequatur. Ergo longâ quiete et immobili penè corpore opus est, donec ex ipso crustæ puræ leniter resolvantur. At si vel volens aliquis, vel imprudens, dùm ingreditur, immatūrè crustas diduxit, et fluit sanguis, frigida aqua adhibenda est. Si hæc parùm valet, decurrendum est ad medicamenta quæ sanguinem supprimunt. Si ne hæc quidem succurrunt, aduri diligenter et timidè debet, neque ullo postea motu dandus eidem periculo locus est.

4. Nonnunquàm etiam id genus cancri quod *φαγέδαινα* à Græcis nominatur, oriri solet. In quo minimè differendum, sed protinùs iisdem medicamentis occurrendum est; et, si parùm valent, ferro adurendum. Quædam etiam nigrities est, quæ non sentitur, sed serpit; ac, si sustinuimus, usque ad vesicam tendit, neque succurri postea potest. Si id in summâ glande circa fistulam urinæ est, priùs in eam tenue specillum demittendum est, ne claudatur: deindè id ferro adurendum. Si verò altè penetravit, quicquid occupatum est, præcidendum est. Cætera eadem, quæ in aliis canceris, facienda sunt.

5. Occallescit etiam in cole interdùm aliquid, idque omni penè sensu caret; quod ipsum quoque excidi debet. Carbunculus autem ibi natus, ut primùm apparet, oriculario clystere eluendus est: deindè ipse quoque medicamentis urendus, maximèque chalcitide cum melle, aut æruginè cum cocto melle, aut ovillo stercore fricto et contrito cum eodem melle. Ubi is excidit, liquidis medicamentis utendum est, quæ ad oris ulcera componuntur.

6. In testiculis verò, si qua inflammatio sine ictu orta, est, sanguis ex talo mittendus est; à cibo abstinendum,

imponendum cataplasma ex fabæ fariná ex mulso coctâ, cum cumino contrito ex melle cocto; aut contritum cuminum cum cerato ex rosâ facto; aut lini semen frictum, contritum et in mulso coctum; aut tritici farina ex mulso cocta cum cupresso; aut lilii radix contrita. At si iidem induruerunt, imponi debet lini vel fæni Græci semen ex mulso coctum, aut ex cyprino ceratum: aut similia ex vino contrita, cui paulum croci sit adjectum. Si vetustior jam durities est, maximè proficit cucumeris agrestis radix ex mulso cocta, deindè contrita. Si ex ictu tument, sanguinem mitti necessarium est, magisque si etiam livent. Imponendum verò utrumlibet ex his quæ cum cumino componuntur, suprâque posita sunt: aut ea compositio quæ habet nitri cocti P. I. *. resinæ pinæ, cumini, singulorum II. *. uvæ taminiae sine seminibus P. IV. *. mellis quantum satis sit ad ea cogenda. Quod si ex ictu testiculus aliquid desit, ferè pus quoque increscit; neque aliter succurri potest quàm si, inciso scroto, et pus emissum, et ipse testiculus excisus est.

7. Anus quoque multa tædiique plena mala recipit, nec interse multum abhorrentes curationes habet. Ac primum in eo sæpè, et quidem pluribus locis, cutisscinditur: Πάγᾱδια Græci vocant. Id si recens est, quiescere homo debet, et in aquâ calidâ desiderare. Columbina quoque ova coquenda sunt: ea ubi induruerunt, purganda: deindè alterum jacere in aquâ bene calidâ debet, altero calido foveri locus, sic ut invicem utroque aliquis utatur. Tùm tetrapharmacum aut rhyodes rosâ diluendum est, aut cœsypum recens miscendum cum cerato liquido ex rosâ facto: aut eidem cerato liquidum plumbum elotum adjiciendum; aut resinæ terebinthinæ myrrha, aut spumæ argenti vetus oleum, et quolibet ex his id perungendum. Si quidquid læsum est, extrâ est, neque intus reconditum, eodem medicamento tinctum lina-

mentum superdandum est, et quicquid antè adhibuimus, cerato contegendum. In hoc autem casu neque acribus cibus utendum, neque asperis, nec alvum comprimentibus: nec aridum quidem quidquam satis utile est nisi admodum paulum: liquida, lenia, pingua, glutinosa meliora sunt. Vino leni uti nihil prohibet.

8. Condyloma autem est tuberculum quod ex quâdam inflammatione nasci solet. Id ubi ortum est, quod ad quietem, cibos potionesque pertinet, eadem servari debent, quæ proximè scripta sunt: iisdem etiam ovis rectè tuberculum id fovetur. Sed desiderare autè homo in aquâ debet, in quâ verbenæ decoctæ sint ex reprimmentibus. Tùm rectè imponitur et lenticula cum exigua mellis parte, et sertula campana ex vino cocta, et rubi folia contrita cum cerato ex rosâ facto, et cum eodem cerato contritum, vel cotoneum malum, vel malicorii ex vino cocti pars interior, et chalcitis cocta atque contrita, deindè œsypo ac rosâ excepta, et ex eâ compositione, quæ habet thuris P. i. *. aluminis scissilis P. ii. *. cerusæ P. iii. * spumæ argenti P. v. *. quibus, dùm teruntur, invicem rosa et vinum instillatur. Vinculum autem ei loco linteolum aut panniculus quadratus est, qui ad duo capita duas ansas, ab alterâ verò parte totidem fascias habet; cùmque subjectus est, ansis ad ventrem datis à posteriore parte in eas adductæ fasciæ conjiciuntur, atque ubi arctatæ sunt, dexteriori sinistra, sinistriori dextra procedit; circumdatæque circa alvum inter se novissimè nodo deligantur. Sed si vetus condyloma jam induruit, neque sub his curationibus desiit, aduri medicamento potest, quod ex his constat; æruginis P. ii. *. myrrhæ P. iv. *. gummi P. viii. *. thuris P. xii. *. stibis, papaveris lacrymæ, acaciæ, singulorum P. xvi. *. quo medicamento quidam etiam ulcera de quibus proximè dixi, renovant. Si hoc parùm in condylomate proficit,

adhiberi possunt etiam vehementiùs adurentia. Ubi consumptus est tumor, ad medicamenta lenia transeundum est.

9. Tertium autem ani vitium est, ora venarum tanquàm ex capitulis quibusdam surgentia, quæ sæpè sanguinem fundunt : αἱμορροΐδας Græci vocant : idque etiam in ore vulvæ feminarum incidere consuevit. Atque in quibusdam parùm tutò supprimitur, qui sanguinis profluvio imbecilliores non fiunt; habent enim purgationem hanc, non morbum. Ideòque curati quidam, quùm sanguis exitum non haberet, inclinâtâ in præcordia ac viscera materiâ, subitis et gravissimis morbis correpti sunt. Si cui verò id nocet, is desiderare in aquâ ex verbenis debet : imponere maximè malicorium cum aridis rosæ foliis contritum, aut ex his aliquid quæ sanguinem supprimunt. Solet autem ibi oriri inflammatio, maximè ubi dura alvus eum locum læsit. Tùm in aquâ dulci desidendum est, et id fovendum ovis, imponendi vitelli cum rosæ foliis ex passo subactis : idque si intùs est, digito illinendum; si extrâ, superillitum panniculo imponendum est. Ea quoque medicamenta quæ recentibus scissuris posita sunt, hîc idonea sunt. Cibis verò in hoc casu iisdem quibus in prioribus, utendum est. Si ista parùm juvant, solent imposita medicamenta adurentia ea capitula absumere. At si jam vetustiora sunt, sub auctore Dionysio inspergenda sandaracha est, deindè imponendum quod ex his constat; squamæ æris, auripigmenti, singulorum P. v.*. saxi calcis P. viii. *. postero die acu compungendum. Adustis capitulis fit cicatrix, quæ sanguinem fundi prohibet. Sed quoties is suppressus est, ne quid periculi afferat, multâ exercitatione digerenda materia est. Prætereaque et viris, et feminis quibus menstrua non proveniunt, interdùm ex brachio sanguis mittendus est.

10. At si anus ipse vel os vulvæ procidit (nam id quoque interdum fit) considerari debet, purumne id sit quod provolutum est, an humore mucoso circumdatum. Si purum est, in aquâ desiderare homo debet aut salsâ, aut cum verbenis vel malicorio incoctâ. Si humidum, vino austero subluendum est, illinendumque fæce vini combustâ. Ubi utrolibet modo curatum est, intus reponendum est, imponendaque plantago contrita, vel folia salicis in aceto cocta; tum linteolum, et super lana æquè deliganda, cruribus inter se devinctis.

11. Fungo quoque simile ulcus in eâdem sede nasci solet: id, si hiems est, egelidâ; si aliud tempus, frigidâ aquâ fovendum est: deindè spuma æris inspergenda, suprâque ceratum ex myrteo factum cui paulum æris squamæ, thuris fuliginis et calcis sit adjectum. Sin id hâc ratione non tollitur, vel medicamentis vehementioribus, vel ferro adurendum est.

SECT. XIX. Digitorum autem vetera ulcera commodissimè curantur, aut lycio, aut amurcâ coctâ, quùm utrilibet vinum adjectum est. In iisdem recedere ab ungue caruncula cum magno dolore consuevit: *πτερύγιον* Græci appellant. Oportet alumen melinum rotundum in aquâ liquare, donec mellis crassitudinem habeat: tum quantum ejus aridi fuit, tantumdem mellis infundere, et rudiculâ miscere, donec similis croco color fiat, eoque illinire. Quidam ad eundem usum decoquere simul malvam solent, quùm paria pondera aluminis aridi et mellis miscuerint. Si hâc ratione eæ non exciderunt, excidendæ sunt: deindè digiti fovendi aquâ ex verbenis imponendumque super medicamentum ita factum: Chalcitis, malicorium, squama æris excipiuntur fico pingui leniter cocto ex melle: aut chartæ combustæ, auripigmenti, sulfuris ignem non experti par modus cerato miscetur ex myrteo facto: aut æruginis rasæ P. I. *

squamæ æris P. xx . * mellis cyatho coguntur, aut pares portiones miscentur, saxi calcis, chalcitidis, auripigmenti. Quidquid horum impositum est, tegendum liuteolo aquâ madefacto est. Tertio die digitus resolvendus est, et si quid aridi est, iterum excidendum, similisque adhibenda curatio est. Si malum non vincitur, purgandus scalpello: tenuibusque ferramentis adurendum, et, sicut reliqua usta, curandum est. At ubi scabri ungues sunt, circum aperiri debent, quâ corpus contingunt, tum super eos ex hac compositione aliquid imponi, sandarachæ, sulfuris, singulorum P. xx . * nitri, auripigmenti, singulorum P. iv . * resinæ liquidæ P. viii . * tertioque id die resolvendum est. Sub quo medicamento vitiosi ungues cadunt, et in eorum locum meliores renascuntur.

LIBER SEPTIMUS.

TERTIAM esse Medicinæ partem quæ manu curet, et vulgo notum, et à me propositum est. Ea non quidem medicamenta atque victûs rationem omittit, sed manu tamen plurimum præstat, estque ejus effectus inter omnes medicinæ partes evidentissimus. Si quidem in morbis quùm multùm fortuna conferat, eademque sæpè salutaria, sæpè vana sint, potest dubitari, secunda valetudo medicinæ an corporis beneficio contigerit. In his quoque, in quibus medicamentis maximè nitimur, quamvis profectus evidentior est, tamen sanitatem et per hæc frustrà quæri, et sine his reddi sæpè manifestum est. Sicut in oculis quoque deprehendi potest, quia à medicis diu vexati, sine his interdùm sanescunt. At in eâ parte quæ manu curat, evidens est, omnem profectum, ut aliquid ab aliis adjuvetur, hinc tamen plurimum trahere. Hæc autem pars quùm sit vetustissima, magis tamen ab illo parente omnis medicinæ Hippocrate, quàm à prioribus exulta est : deindè posteaquàm diducta ab aliis habere professores suos cœpit, in Ægypto quoque increvit, Philoxeno maximè auctore, qui pluribus voluminibus hanc partem diligentissimè comprehendit. Gorgias quoque et Sostratus, et Heron, et Apollonii duo, et Ammonius Alexandrinus, multique alii celebres viri, singuli quædam repererunt. Ac Romæ quoque non mediocres professores, maximèque nuper Tryphon pater, et Evelpistus Megetis filius, et (ut ex scriptis ejus intelligi potest) horum eruditissimus Me-

ges, quibusdam in melius mutatis, aliquantùm ei disciplinæ adjecerunt. Esse autem Chirurgus debet adolescens, aut certè adolescentiæ propior, manu strenuâ, stabili, nec unquàm intremiscente; eâque non minùs sinistrâ quàm dextrâ promptus; acie oculorum acri clarâque, animo intrepidus, misericors sic ut sanari velit eum quem accipit, non ut clamore ejus motus, vel magis quàm res desiderat, properet, vel minùs quàm necesse est, secet: sed perindè faciat omnia, ac si nullus ex vagitibus alterius affectus oriatur. Potest autem requiri, quid huic parti propriè vindicandum sit, quia vulnerum quoque ulcerumque multorum curationes, quas alibi exsecutus sum, chirurgi sibi vindicant. Ego eundem quidem hominem posse omnia ista præstare concipio: at ubi illi se diviserunt, eum laudo qui quàm plurimùm percepit. Ipse autem huic parti ea reliqui, in quibus vulnus facit medicus, non accipit, et in quibus vulneribus ulceribusve plus profici manu quàm medicamento credo; tùm quidquid ad ossa pertinet, quæ deinceps exsequi aggrediar. Dilatis itaque in aliud volumen ossibus, in hoc cætera explicabo; præpositisque his quæ in quâlibet parte corporis fiunt, ad ea quæ proprias sedes habent, transibo.

SECT. I. Luxata igitur, in quâcumque parte corporis sunt, quamprimùm sic curari debent, ut quâ dolor est, eâ scalpello cutis crebrò incidatur, detergeaturque eodem averso profluens sanguis. Quòd si paulò tardiùs subvenitur, jamque etiam rubor est, quâ rubet corpus, si tumor quoque accessit, quicumque is est, idem optimum auxilium est. Tùm superdanda reprimentia sunt: maximèque lana succida ex aceto et oleo. Quòd si levior is casus est, possunt etiam sine scalpello imposita eadem mederi: et si nihil aliud est, cinis quoque, maximè ex sarmentis; si is non est, quilibet alius ex aceto, vel etiam ex aquâ coactus.

SECT. II. Verùm hoc quidem promptum est : in his autem negotium majus est quæ per se, vitio intus orto, intumescunt, et ad suppurationem spectant. Ea omnia genera abscessuum esse aliàs proposui, medicamentaque eis idonea exsecutus sum : nunc superest ut dicam de iis quæ manu fieri debeant. Ergo priusquàm indurescant, cutem incidere, et cucurbitulam accommodare oportet, quæ quidquid illuc malæ corruptæque materiæ coit, extrahat ; idque iterum tertioque rectè fit, donec omne indicium inflammationis excedat. Neque tamen fas non est, nihil cucurbitulam agere : interdum enim fit, sed rarò, ut quidquid abscedit, velamento suo includatur : id antiqui tunicam nominabant : Meges, quia tunica omnis nervosa est, dicit non nasci sub eo vitio nervum quo caro consumeretur, sed subjecto jam vestustiore pure, callum circumdari. Quod ad curationis rationem nullo loco pertinet ; quia quicquid si tunica est, idem, si callus est, fieri debet. Neque ulla res prohibet, etiam si callus est, tamen quia cingit, tunicam nominari : tum, pure quoque maturius, hæc interdum esse consuevit : ideoque quod sub eà est, extrahi per cucurbitulam non potest. Sed facilè id intelligitur, ubi nihil admota illa mutavit. Ergo sive id incidit, sive jam durities est, in hac auxilii nihil est ; sed, ut aliàs scripsi, vel avertenda concurrens eò materia, vel digerenda, vel ad maturitatem perducenda est. Si priora contigerunt, nihil præter ea necessarium est. Si pus maturuit, in alis quidem et in inguinibus, rarò secandum est ; item ubicunquè mediocris abscessus est : item quoties in summâ cute vel etiam carne vitium est, nisi festinare cubantis imbecillitas cogit ; satisque est cataplasmatibus efficere, ut per se pus aperiatur : nam ferè sine cicatrice potest esse is locus, qui expertus ferrum non est. Si autem altius malum est, considerari debet, ner-

vosusne is locus sit, an non sit. Nam si sine nervis est, candenti ferramento aperiri debet : cujus hæc gratia est, quod exigua plaga diutiùs ad pus evocandum patet, parvaque postea cicatrix fit. At si nervi juxta sunt, ignis alienus est, ne vel distendantur hi, vel membrum debilitent : necessaria verò opera scalpelli est. Sed cætera etiam subcruda aperiri possunt : inter nervos verò ultima exspectanda maturitas est, quæ cutem extenuet, eique pus jungat, quò propiùs reperiatur. Jamque alia rectam plagam desiderant in pane, quia ferè vehementer cutem extenuat, tota ea super pus excidenda est. Semper autem ubi scalpellus admovetur, id agendum est, ut et quàm minimæ et quàm paucissimæ plagæ sint; cum eo tamen ut necessitati succurramus et in modo et in numero. Nam majores sinus latiùs interdum etiam duabus aut tribus lineis incidendi sunt; dandaque opera, ut imus sinus exitum habeat, ne quis humor intus subsidat, qui proxima et adhuc sana rodendo sinuet. Est etiam in rerum naturâ, ut cutis latiùs excidenda sit. Nam ubi post longos morbos totus corporis habitus vitiatus est, latèque se siuus suffudit, et in jam eo cutis pallet, scire licet eam jam emortuam esse, et inutilem futuram : ideòque excidere commodius est, maximè si circa articulos majores id evenit, cubantemque ægrum fluens alvus exhaurit, neque per alimenta quidquam corpori accedit. Sed excidi ita debet, ut plaga ad similitudinem myrtei folii fiat, quò faciliùs sanescat : idque perpetuum est, ubicunquè medicus, et ex quâcunque causâ, cutem excidit. Pure effuso in alis vel inguinibus, linamento opus non est : spongia ex vino imponenda est. In cæteris partibus, si æquè ea linamenta supervacua sunt, purgationis causâ paulum mellis infundendum; dein glutinantia superdanda, si illa necessaria sunt; super ea quoque

similiter dari spongia eodem modo ex vino expressa debet. Quandò autem linamentis opus sit, quandò non sit, aliàs dictum est. Cætera eadem, incisâ suppuratione, facienda sunt, quæ, ubi ea per medicamenta rupta est, facienda esse proposui.

SECT. III. Protinùs autem quantùm curatio efficiat, quantùmque aut sperari aut timeri debeat, ex quibusdam signis intelligi potest, ferèque iisdem quæ in vulneribus exposita sunt. Nam bona signa sunt, somnum capere, facilè spirare, siti non confici, cibum non fastidire; si febricula fuit, eâ vacare: itemque habere pus album, læve, non fœdi odoris. Mala sunt, vigilia, spiritûs gravitas, sitis, cibi fastidium, febris, pus nigrum aut fæculentum et fœdi odoris. Item, procedente curatione, eruptio sanguinis; aut si, antequàm sinus carne impleatur, oræ carnosæ fiunt, illâ quoque ipsâ carne hebetate nec firmâ. Deficere tamen animam, vel in ipsâ curatione vel postea, pessimum omnium est. Quin etiam morbus ipse sive subito solutus est, dein suppuratio exorta est, sive, effuso pure, permanet, non injustè terret. Estque inter causas timoris, si sensus in vulnerere rodentium non est. Sed ut hæc ipsa fortuna huc illucve discernit, sic medici partium est, eniti ad reperiendam sanitatem. Ergo quoties ulcus resiluerit, eluere id, si reprimendus humor videbitur, vino ex aquâ pluviali mixto, vel aquâ in quâ lenticula cocta sit, debeat: si purgandum erit, mulso; rursusque imponere eadem. Ubi jam repressus videbitur humor, ulcusque purum erit, produci carnem conveniet, et foveri vulnus pari portione vini ac mellis, superque imponi spongiam ex vino et rosâ tinctam. Per quæ quùm caro producat, plus tamen (ut aliàs quoque dixi) victûs ratio eò confert, id est, solutis jam febribus et cibi cupiditate redditâ, balneum rarum, quotidiana sed

lenis gestatio, cibi potionesque corpori reficiendo aptæ. Quæ omnia, per medicamenta suppuratione quoque ruptâ, sequuntur: sed quia magno malo vix sine ferro mederi licet, in hunc locum reservata sunt.

SECT. IV. 1. Adversus fistulas quoque, si altius penetrant, ut ad ultimas demitti collyrium non possit, si tortuosæ sunt, si multiplices, majus in manu quam in medicamentis præsidium est; minùsque operæ est, si sub cute transversæ feruntur, quàm si rectæ intùs tendunt. Igitur si sub cute transversa fistula est, demitti sub cutem specillum debet, supraque id ea incidi. Si flexus reperiuntur, hi quoque simul specillo et ferro persequendi sunt: idemque faciendum, si plures se quasi ramuli ostendunt. Ubi ad fines fistulæ ventum est, excidendus ex eâ totus callus est, superque fibulæ dandæ, et medicamentum quo glutinetur. At si rectâ subter tendit, ubi, quò maximè ferat, specillo exploratum est, incidi is sinus debet, dein fibula oris cutis injicienda est, et æquè glutinantia medicamenta superdanda sunt; aut si corruptius ulcus, quod interdum osse vitiato fit, ubi id quoque curatum est, pus moventia.

2. Solent autem inter costas fistulæ subter exire: quod ubi incidit, eo loco costa ab utrâque parte præcidenda et eximenda est, ne quid intùs corruptum relinquatur. Solent quoque, ubi costas transierunt, septum id, quod transversum à superioribus visceribus intestina discernit, violare. Quod intelligi et ex loco, et ex magnitudine doloris potest, et quia nonnunquam spiritus eò cum humore quasi bullante prorumpit, maximèque si hunc ore æger continuit. In eo medicinæ locus nullus est: in cæteris verò quæ circa costas sanabilia sunt, pinguis medicamenta inimica sunt; cæteris, quæ ad vulnera accommodantur, uti licet: optimè tamen sicca linamenta,

vel si purgandum aliquid videtur, in melle tincta imponuntur.

3. Ventri nullum os subest; sed ibi perniciosæ admodum fistulæ fiunt, adeò ut Sostratus insanabiles esse crediderit. Id non ex toto ita se habere usus ostendit: et quidem (quod maximè mirum videri potest) tuior fistula est contrà jecur et lienem et ventriculum, quàm contrà intestina: non quo perniciosior res ibi sit, sed quo alteri periculo locum faciat. Cujus experimento moti quidam auctores parùm modum rei cognoverunt. Nam venter sæpè etiam telo perforatur, prolapsaque intestina conduntur, et oras vulneris suturæ comprehendunt: quod quemadmodum fiat, mox indicabo. Itaque etiam ubi tenuis fistula abdomen perrupit, excidere eam licet, suturæque oras conjungere. Si verò ea fistula intùs patuit, excisa necesse est latius foramen relinquat, quod nisi permagnâ vi, utique ab interiore parte, sui non potest, quâ quasi membrana quædam fuit abdomen, quam περιτόναιον Græci vocant. Ergo ubi aliquis ingredi ac moveri cœpit, rumpitur illa sutura, atque intestina évolvuntur: quo fit, ut pereundum homini sit. Sed non omni modo res ea desperationem habet; ideòque tenuioribus fistulis adhibenda curatio est.

4. Propriam etiamnum animadversionem desiderant eæ, quæ in ano sunt. In has demisso specillo, ad ultimum ejus caput incidi cutis debet, dein novo foramine specillum educi lino sequente, quod in aliam ejus partem, ob id ipsum perforatam, conjectum sit. Ibi linum prehendendum, vinciendumque cum altero capite est, ut laxè cutem quæ super fistulam est, teneat: idque linum esse debet crudum, et duplex triplexve, sic tortum ut unitas facta sit. Interim autem licet negotia agere, ambulare, lavari, cibum capere perindè atque sanis-

simo: tantummodò id linum bis die, salvo nodo, ducendum est, sic ut subeat fistulam pars quæ superior fuit. Neque committendum est, ut id linum putrescat; sed tertio quoque die nodus resolvendus est, et ad caput alterum recens linum alligandum, eductoque vetere, id in fistulâ cum simili nodo relinquendum. Sic enim id paulatim cutem quæ supra fistulam est, incidit, simulque et id sanescit quod à lino relictum est, et id quod ab eo mordetur, inciditur. Hæc ratio curationis longa, sed sine dolore est. Qui festinant, adstringere cutem lino debent, quò celerius secent, noctûque ex penicillo tenuia quædam intus demittere, ut cutis hoc ipso extenuetur quo extenditur: sed hæc dolorem movent. Adjicitur celeritati sicut tormento quoque, si et linum et id quod ex penicillo est, aliquo medicamento illinitur ex his quibus callum exedi posui. Poterit tamen fieri, ut ad scalpelli curationem etiam illo loco veniendum sit, si intus fistula fert, si multiplex est. Igitur in hæc genera demisso specillo, duabus lineis incidenda cutis est, ut media inter eas habenula tenuis admodum ejiciatur; ne protinus oræ coëant, sitque locus aliquis linamentis, quæ quàm paucissima superinjicienda sunt, omniaque eodem modo facienda quæ in abscessibus posita sunt. Si verò ab uno ore plures sinus erunt, recta fistula scalpello erit incidenda; ab eo ceteræ quæ jam patebunt, lino excipiendæ: si intus aliqua procedet quò ferrum tutò pervenire non poterit, collyrium demittendum erit. Cibus autem in omnibus ejusmodi casibus, sive manu, sive medicamentis agetur, dari debet humidus, potio liberalis, diuque aqua: ubi jam caro increscit, tum demum et balneis raris utendum erit, et cibus corpus implentibus.

SECT. V. 1. Tela quoque quæ illata corporibus intus hæserunt, magno negotio sæpè ejiciuntur: suntque quæ-

dam difficultates ex generibus eorum : quædam ex his sedibus in quas illa penetrarunt. Omne autem telum extrahitur, aut ab eâ parte quâ venit, aut ab eâ in quam tetendit. Illic viam quâ redeat, ipsum sibi fecit; hîc à scalpello accipit : nam contra mucronem caro inciditur. Sed si non altè telum insedit, et in summâ carne est, aut certè magnas venas et loca nervosa non transiit, nihil melius est quàm, quâ venit, id evellere. Si verò plus est, per quod telo revertendum, quàm quod perrumpendum est; jamque venas nervosque id transiit, commodius est aperire quod superest, eaque extrahere : nam et propiùs petitur, et tutiùs evellitur; et in majore membro, si medium mucro transiit, faciliùs sanescit quod pervium est, quia utrinquè medicamento fovetur. Sed si retrò telum recipiendum, amplianda scalpello plaga est, quò faciliùs id sequatur, quòque minor oriatur inflammatio; quæ major fit, si ab illo ipso telo, dùm redit, corpus laniatur. Item si ex aliâ parte vulnus aperitur, laxius esse debet quàm ut, telo postea transiente, amplietur. Summa autem utrâque parte ita habenda cura est, ne nervus, ne vena major, ne arteria incidatur. Quorum ubi aliquid detectum est, excipiendum hamo retuso est, abducendumque à scalpello. Ubi autem satis incisum est, telum eximendum est, tunc quoque eodem modo et eâdem curâ habitâ, ne sub eo quod eximetur, aliquid eorum lædatur quæ tuenda esse proposui.

2. Hæc communia. Sunt propria quædam in singulis telorum generibus, quæ protinùs subjiciam. Nihil tam facile in corpus quàm sagitta conditur, eademque altissimè insidit. Hæc autem eveniunt, et quia magnâ vi fertur illa, et quia ipsa in angusto est. Sæpiùs itaque ab alterâ parte, quàm ex quâ venit, recipienda est; præcipuèque quia ferè spiculis cingitur, quæ magis

laniant, si retrorsus quàm si contrà trahuntur. Sed inde, apertâ viâ, caro diduci debet ferramento ad similitudinem facto Græcæ litteræ ¹: deindè, ubi apparuit mucro, si mucroni arundo inhæret, propellenda est, donec ab alterâ parte apprehendi et extrahi possit: si jam illa decidit, solumque intus ferrum est, mucro vel digitis apprehendi vel forfice, atque ita educi debet. Neque alia ratio extrahendi est, ubi ab eâ parte quâ venit, evelli magis placuit: nam ampliatio magis vulnere, aut arundo, si inest, evellenda est; aut si ea non est, ferrum ipsum. Quod si spicula apparuerunt, eaque breviora et tenuiora sunt, forfice ibi comminui debent, vacuumque ab his telum educi: si ea majora valentioraque sunt, fissis scriptoriis calamis contegenda, ac ne quid lacerent, sic evellenda sunt. Et in sagittis quidem hæc observatio est.

3. Latum verò telum si conditum est, ab alterâ parte educi non expedit, ne ingenti vulnere ipsi quoque ingens vulnus adjiciamus. Evellendum est ergo genere quodam ferramenti, quod Διοκλεῖον καυθίσκον Græci vocant, quoniam auctorem Dioclem habet, quem inter priscos maximosque medicos fuisse jam posui. Lamina vel ferrea, vel ænea etiam, ab altero capite duos utrinquè deorsum conversos uncas habet, ab altero duplicata lateribus, leviterque extrema in eam partem inclinata quæ sinuata est, insuper ibi etiam parte inclinata quæ perforata est. Hæc juxta telum transversa demittitur: deindè ubi ad imum mucronem ventum est, paulum torquetur, ut telum foramine suo excipiat. Quùm in cavo mucro est, illicò duo digiti subjecti partis alterius uncis, simul et ferramentum id extrahunt et telum.

4. Tertium genus telorum quod interdum evelli

¹ Hæc littera quæ deest in mss. codicibus videtur fuisse Λ.

debet, plumbea glans, aut lapis, aut simile aliquid, quod, perruptâ cute, integrum intûs inedit. In omnibus his latius vulnus aperiendum, idque quod inest eâ quâ venit, forfice extrahendum est. Accedit verò aliquid difficultatis sub omni ictu, si telum vel ossi inhæsit, vel in articulo se inter duo ossa demersit. In osse usque eò movendum est, donec laxetur is locus qui mucronem momordit, et tûm vel manu vel forfice telum extrahendum est: quæ ratio in dentibus quoque ejiciendis est. Et vix unquàm ita telum non sequitur: sed si morabitur, excuti quoque ictum aliquo ferramento poterit. Ultimum est, ubi non evellitur, terebrâ juxtâ forare, ab eo quoque foramine ad speciem literæ V contra telum os excidere sic, ut lineæ quæ diducuntur, ad telum spectent: eo facto, id necesse est labet, et facile auferatur. Inter duo verò ossa si per ipsum articulum perruperit, circa vulnus duo membra fasciis habenisve deliganda, et per has in diversas partes diducenda sunt, ut nervos distendant: quibus extentis, laxius inter ossa spatium est, ut sine difficultate telum recipiatur. Illud videndum est, sicut in aliis locis posui, ne quis nervus, aut vena aut arteria à telo lædatur, dùm id extrahitur; eâdem scilicet ratione quæ suprâ posita est.

5. At si venenato quoque telo quis ictus est, iisdem omnibus, si fieri potest, etiam festinantius actis, adjicienda curatio est quæ vel epoto veneno, vel à serpente ictis adhibetur. Vulneris autem ipsius, extracto telo, medicina non alia est quàm quæ esset, si corpore icto nihil inhæsisset: de quâ satis alio loco dictum est.

SECT. VI. Hæc evenire in quâlibet parte corporis possunt: reliqua certas sedes habent, de quibus dicam, orsus à capite. In hoc multa variaque tubercula oriuntur: γαγγλία, μελικηρίδας, ἀθερώματα nominant, aliisque etiamnum vocabulis quædam alii discernunt;

quibus ego στεατώματα quoque adjiciam. Quæ, quamvis et in cervice, et in alis, et in lateribus oriri solent, per se tamen non posui, quum omnia ista mediocres differentias habeant, ac neque periculo terreant, neque diverso genere curantur. Omnia autem ista et ex parvulo incipiunt, et diù, paulatimque increscunt, et tunicâ suâ includuntur. Quædam ex his dura ac renitentia, quædam mollia cedentiaque sunt: quædam spatio nudantur, quædam tecta capillo suo permanent, ferèque sine dolore sunt. Quid intus habeant, ut conjecturâ præsagiri potest, sic ex toto cognosci, nisi quum ejecta sunt, non potest. Maximè tamen in his quæ renituntur, aut lapillis quædam similia, aut concreti confertique pili reperiuntur: in his verò quæ cedunt, aut melli simile aliquid, aut tenui puliculæ, aut quasi rasæ cartilagini, aut carni hebeti et cruentæ, quibus alii aliique colores esse consuerunt, ferèque ganglia renituntur. Atheromati subest quasi tenuis pulicula; meliceridi liquidior humor; ideòque pressus circumfluit. Steatomati pingue quiddam, idque latissimè patere consuevit; resolvitque totam cutem superpositam sic, ut ea labet, quum in cæteris sit adstrictior. Omnia, derasa antè, si capillis conteguntur, per medium oportet incidere: sed steatomatis tunica quoque secanda est, ut effundatur quidquid intus coit; quia non facilè à cute et subjectâ carne ea separatur. In cæteris ipsa tunica inviolata servanda est. Protinùs autem alba et intenta se ostendit: tùm scalpelli manubriolo diducenda à cute et carne est, ejiciendaque cum eo quod intus tenet. Si quandò tamen ab inferiore parte tunicæ musculus inhæsit, ne is lædatur, superior pars illius decidenda, alia ibidem relinquenda est. Ubi tota exempta est, committendæ oræ, fibulaque his injicienda, et super medicamentum glutinans dandum

est. Ubi vel tota tunica, vel aliquid ex eâ relictum est, pus moventia adhibenda sunt.

SECT. VII. 1. Sed ut hæc neque genere vitii, neque ratione curationis inter se multum distant, sic in oculis, quæ manum postulant, et ipsa diversa sunt, et aliter aliterque curantur. Igitur in superioribus palpebris vesicæ nasci solent pingues gravesque, quæ vix attollere oculos sinunt, levesque pituitæ cursus, sed assiduos, in oculis movent: ferè verò in pueris nascuntur: Oportet, compresso digitis duobus oculo, atque ita cute intentâ, scalpello transversam lineam incidere, suspensâ leviter manu, ne vesica ipsa vulneretur; et ut locus ei patefactus est, ipsa prorumpit: tum digitis eam apprehendere et evellere: facile autem sequitur. Dein superinungi collyrio debet ex his aliquo quo lippientes oculi superinunguntur; paucissimisque diebus cicatricula inducitur. Molestius est, ubi incisa vesica est; effundit enim humorem, neque postea, quia tenuis admodum est, potest colligi. Si fortè id incidit, eorum aliquid imponendum est quæ puri movendo sunt.

2. In eâdem palpebrâ supra pilorum locum, tuberculum parvulum nascitur, quod à similitudine hordei à Græcis *χρῖθῆ* nominatur: tunicâ quiddam quod difficulter maturescit, comprehensum est. Id vel calido pane, vel cerâ subindè calefactâ foveri oportet sic, ne nimius is calor sit, sed facilè eâ parte sustineatur: hæc enim ratione sæpè discutitur, interdum concoquitur. Si pus se ostendit, scalpello dividi debet, et quidquid intus humoris est, exprimi; eodem deindè vapore postea quoque foveri et superinungi, donec ad sanitatem perveniat.

3. Alia quoque quædam in palpebris huic non dissimilia nascuntur; sed neque utique figuræ ejusdem, et

mobilia, simul atque digito hùc vel illùc impelluntur : quæ quia grandini similia sunt, ideò χαλᾶζια Græci vocant. Hæc incidi debent, si sub cute sunt, ab exteriore parte ; si sub cartilagine, ab interiore : dein scalpelli manubriolo deducenda ab integris partibus sunt. Ac, si intùs plaga est, inungenda primùm lenibus, deindè acrioribus : si extrà, superdandum emplastrum quo id glutinetur.

4. Unguis verò, quod πτερύγιον Græci vocant, est membranula nervosa quæ oriens ab angulo, nonnumquàm ad pupillam quoque pervenit, eique officit : sæpiùs à narium, interdùm etiam à temporum parte nascitur. Hunc recentem non difficile est discutere medicamentis, quibus cicatrices in oculis extenuantur : si inveteravit, jamque ei crassitudo quoque accessit, excidi debet. Post abstinentiam verò unius diei, vel adversus in sedili contra medicum is homo collocandus est, vel sic aversus, ut in gremium ejus caput resupinus effundat. Quidam, si in sinistro oculo vitium est, adversum ; si in dextro, resupinum collocari volunt. Alteram autem palpebram à ministro diduci oportet, alteram à medico : sed ab hoc, si ille adversus est, inferiorem ; si supinus, superiorem. Tùm idem medicus hamulum acutum, paulùm mucrone intùs recurvato, subjicere extremo ungui debet, eumque infigere, atque eam quoque palpebram tradere alteri, ipse hamulo apprehenso levare unguem, eumque acu trajicere linum trahente, deindè acum ponere, lini duo capita apprehendere, et per ea erecto ungue, si quâ parte oculo inhæret, manubriolo scalpelli diducere, donec ad angulum veniat : deindè invicem modò remittere, modò attrahere sic, ut et initium ejus et finis anguli reperiatur. Duplex enim periculum est, ne vel ex ungue aliquid relinquatur, quod exulceratum vix ullam recipiat curationem, vel

ex angulo quoque caruncula abscindatur, quæ, si vehementius unguis ducitur, sequitur, ideòque decedit: abscissà, patescit foramen, per quod postea semper humor descendit: ῥυάδα Græci vocant. Verus ergo anguli finis utique noscendus est, qui ubi satis constitit, non nimium adducto ungue, scalpellus adhibendus est; deindè sic excidenda ea membranula, ne quid ex angulo lædatur. Eò deindè ex melle linamentum superdandum est, supràque linteolum, et aut spongia aut lana succida; proximisque diebus diducendus quotidie oculus est, ne cicatrice inter se palpebræ glutinentur, si quidem id quoque tertium periculum accedit; eodemque modo linamentum imponendum, ac novissimè inungendum collyrio quo ulcera ad cicatricem perducuntur. Sed ea curatio vere esse debet, aut certè ante hiemem: de quâ re ad plura loca pertinente semel dixisse satis erit. Nam duo genera curationum sunt. Alia in quibus eligere tempus non licet, sed utendum est eo quod incidit, sicut in vulneribus et in fistulis: alia in quibus nullus dies urget, et expectare tutissimum et facile est, sicut evenit in iis quæ et tardè increscunt, et dolore non cruciant: in his ver expectandum est; aut si quid magis pressit, melior tamen autumnus est quàm æstas vel hiems; atque is ipse medius, jam fractis æstibus, nondum ortis frigoribus. Quò magis autem necessaria pars erit quæ tractabitur, hoc quoque majori periculo subjecta est: et sæpè quò major plaga facienda, eò magis hæc temporis ratio servabitur.

5. Ex curatione verò unguis, ut dixi, vitia nascuntur, quæ ipsa aliis quoque de causis oriri solent. Interdum enim fit in angulo, parùm ungue exciso vel aliter, tuberculum quod palpebras parùm diduci patitur: ἑγχαυθίς; græcè nominatur. Excipi hamulo et circumcidi debet;

hic quoque diligenter temperatâ manu : ne quid ex ipso angulo abscidatur. Tùm exiguum linamentum respergendum est vel cadmiâ, vel atramento sutorio, inque eum angulum, diductis palpebris, inserendum, suprâque eodem modo deligandum, proximisque diebus similiter nutriendum, ut primo tantùm aquâ egelidâ vel etiam frigidâ foveatur.

6. Interdùm inter se palpebræ coalescunt, aperiri que non potest oculus. Cui malo solet etiam illud accedere, ut palpebra cum albo oculi cohærescat; scilicet cùm in utrovis fuit ulcus negligenter curatum : sanescendo enim quod diduci potuit et debuit, glutinavit : ἀγχυλο-
βλέφαρον sub utroque vitium Græci vocant. Palpebræ tantùm inter se cohærentes non difficulter diducuntur; sed interdùm frustrâ, nam rursus glutinantur. Experiri tamen oportet, quia benè res sæpius cedit. Igitur aversum specillum inserendum, diducendæque eo palpebræ sunt; deindè exigua penicilla interponenda, donec exulceratio ejus loci finiatur. At ubi albo ipsius oculi palpebra inhæsit, Heraclides Tarentinus auctor est, adverso scalpello subsecare magnâ cum moderatione, ut neque ex oculo neque ex palpebrâ quidquam abscidatur, ac si necesse est, ex palpebrâ potiùs. Post hæc innungatur oculus medicamentis quibus aspritudo curatur; quotidieque palpebra vertatur, non solùm ut ulceri medicamentum inducatur, sed etiam ne rursus inhæreat; ipsique etiam præcipiatur, ut sæpe eam duobus digitis attollat. Ego sic restitutum esse neminem memini : Meges se quoque multa tentasse, neque unquàm profuisse, quia semper iterùm oculo palpebra inhæserit, memoriæ prodidit.

7. Etiamnum in angulo qui naribus propior est, ex aliquo vitio quasi parva fistula aperitur, per quam pituita assiduè destillat : αἰγίλωπας Græci vocant. Idquæ

assiduè malè habet oculum ; nonnumquàm etiam, ex osse, usque ad nares penetrat. Id quoque interdùm naturam carcinomatis habet : ubi intentæ venæ et æquatæ sunt, color pallet, cutis dura est, et levi tactu irritatur, inflammationemque in eas partes quæ conjunctæ sunt, evocat. Ex his eos qui quasi carcinoma habent, curare periculosum est, nam mortem quoque ea res maturat ; eos verò quibus ad nares tendit, supervacuum ; neque enim sanescunt. At quibus id in angulo est, potest adhiberi curatio, quùm eò non ignotum sit esse difficilem : quantòque angulo propius id foramen est, tantò difficilior est, quoniam perangustum est in quo versari manus possit. Recenti tamen re, mederi facilius est. Sed hamulo autem summum ejus foraminis excipiendum ; deindè totum id cavum, sicut in fistulis dixi, usque ad os excidendum ; oculoque et cæteris junctis partibus benè obtectis, os ferro adurendum est, vehementiùsque si jam carie vexatum est. Quò crassior huic squama abscedat, quidam adurentia imponunt, ut atramentum sutorium, vel chalcitidem, vel æruginem rasam : quod et tardius, et non idem facit. Osse adusto curatio sequitur eadem quæ in cæteris ustis.

8. Pili verò qui in palpebris sunt, duabus de causis oculum irritare consuerunt : nam modò palpebræ superioris summa cutis relaxatur et procidit ; quo fit ut ejus pili ad ipsum oculum convertantur, quia non simul cartilago quoque se remisit ; modò sub ordine naturali pilorum alius ordo subcrescit, qui protinùs intùs ad oculum tendit. Curationes hæ sunt. Si pili nati sunt, qui non debuerunt, tenuis acus ferrea ad similitudinem spathæ lata, in ignem conjicienda est : deindè candens sublatâ palpebrâ sic, ut ejus perniciosi pili in conspectum curantis veniant, super ipsis pilorum radicibus ab angulo immittenda est, ut ea tertiam partem

palpebræ transsuat : deindè iterùm tertiòque usque ad alterum angulum : quo fit, ut omnes pilorum radices adustæ emoriantur. Tùm superimponendum medicamentum est quod inflammationem prohibeat; atque ubi crústæ exciderunt, ad cicatricem perducendum. Facillimè autem id genus sanescit. Quidam aiunt acu transsui juxta pilos in exteriorem partem palpebræ oportere, eamque transmitti duplicem capillum muliebrem ducentem, atque ubi acus transiit, in ipsius capilli sinum, quà duplicatur, pilum esse conjiciendum, et per eum in superiorem palpebræ partem attrahendum, ibique corpori agglutinandum, et imponendum medicamentum quo foramen quoque glutinetur; sic enim fore ut is pilus in exteriorem partem postea spectet. Id primùm fieri non potest, nisi in pilo longiore, quùm ferè breves eo loco nascantur : deindè, si plures pili sunt, necesse est longum tormentum, quùm toties acus trajectory magnam inflammationem moveat. Novissimè quùm humor aliquis ibi subsit, oculo et antè per pilos et tùm per palpebræ foramina affecto, vix fieri potest ut gluten quo vinctus est pilus, non resolvatur; eoque fit, ut is eo unde vi abductus est, redeat. Ea verò curatio quæ palpebræ laxioris ab omnibus frequentatur, nihil habet dubii : siquidem oportet, contecto oculo, mediam palpebræ cutem, sive ea superior sive inferior est, apprehendere digitis ac sic levare, tùm considerare quantulo detracto futurum sit, ut naturaliter se habeat. Siquidem hìc quoque duo pericula circumstant; si nimium fuerit excisum, ne contegi oculus non possit; si parum, ne nihil actum sit, et frustrà sectus aliquis sit. Quà deindè incidendum videbitur, per duas lineas atramento notandum est sic, ut inter oram quæ pilos continet, et propiorem ei lineam, aliquid relinquatur quod apprehendere acus postea possit. His constitutis, scal-

pellus adhibendus est, et si superior palpebra est, antè, si inferior, postea propiùs ipsis pilis incidendum : initiumque faciendum in sinistro oculo ab eo angulo qui tempore, in dextro, ab eo qui naribus propior est ; idque quod inter duas lineas est, excidendum. Deindè oræ vulneris inter se simplici suturâ committebdæ, operiendusque oculus est : et si parùm palpebra descendet, laxanda sutura ; si nimium, aut adstringenda, aut etiam rursùs tenuis habenula ab ulteriore orâ excidenda. Ubi secta est, aliæ suturæ adjiciendæ, quæ supra tres esse non debent. Præter hæc in superiore palpebrâ sub pilis ipsis incidenda linea est, ut ab inferiore parte diducti pili sursùm spectent : idque, si levis inclinatio est, etiam solum satis tuetur : inferior palpebra eo non eget. His factis, spongia ex aquâ frigidâ expressa super deliganda est. Postero die glutinans emplastrum injiciendum : quarto suturæ tollendæ, et collyrio quod inflammationes reprimit, superinungendum.

9. Nonnunquâm autem, nimium sub hâc curatione excisâ cute, evenit ut oculus non contegatur ; idque interdum etiam aliâ de causâ fit : *λαγώφθαλμον* Græci appellant. In quo si nimium palpebræ deest, nulla id restituere curatio potest ; si exiguum, mederi licet. Paulum infra supercilium cutis incidenda est lunatâ figurâ, cornibus ejus deorsùm spectantibus. Altitudo esse plagæ usque ad cartilaginem debet, ipsâ illâ nihil læsâ : nam si ea incisa est, palpebra concidit, neque attolli postea potest. Cutis igitur tantum diducta sit, ut paulum in imâ oculi orâ descendat, hiante scilicet super plagam, in quam linamentum conjiciendum est, quod et conjungi diductam cutem prohibeat, et in medio carunculam citet, quæ ubi eum locum implevit, postea rectè oculus operitur.

10. Ut superioris autem palpebræ vitium est, quo

parùm descendit, ideòque oculum non contegit, sic inferioris, quo parùm sursùm attollitur, sed pendet et hiat, neque potest cum superiore committi. Atque id quoque evenit interdùm ex simili vitio curationis, interdùm etiam senectute: ἐκτρόπιον Græci vocant. Si ex malâ curatione est, eadem ratio medicinæ est quæ suprâ posita est: plagæ tantùm cornua ad maxillas, non ad oculum convertenda sunt: si ex senectute est, tenui ferramento id totum extrinsecùs adurendum est; deindè melle inungendum, et à quarto die vapore aquæ calidæ fovendum, inungendumque medicamentis ad cicatricem perducentibus.

11. Hæc ferè circà oculum in angulis palpebrisque incidere consueverunt: in ipso autem oculo nonnunquàm summa attollitur tunica, sive ruptis intùs membranis aliquibus, sive laxatis, et similis figura acino fit: undè id σαρόλωμα Græci vocant. Curatio duplex est: alterâ, ad ipsas radices per medium transsuere acu duo lina ducente; deindè alterius lini duo capita ex superiore parte, alterius ex inferiore adstringere inter se, quæ paulatim secando id excidant. Alterâ, in summâ parte ejus ad lenticulæ magnitudinem excidere, deindè spodium aut cadmiam infriare. Utrolibet autem facto, album ovi lanâ excipiendum et imponendum; posteaque vapore aquæ calidæ fovendus oculus, et lenibus medicamentis ungendus est.

12. Clavi autem vocantur callosa in albo oculi tubercula, quibus nomen à figuræ similitudine est. Hos ad imam radicem perforare acu commodissimum est, infrâque eam excidere, deindè lenibus medicamentis inungere.

13. Suffusionis jam aliàs feci mentionem, quia quùm recens incidit, medicamentis quoque sæpè discutitur: sed ubi vetustior facta est, manûs curationem deside-

rat, quæ inter subtilissimas haberi potest. De quâ antequàm dico, paucis ipsius oculi natura indicanda est: cujus cognitio quùm ad plura loca pertineat, tùm vel præcipuè ad hunc pertinet. Is igitur summas habet duas tunicas, ex quibus superior à Græcis κερατοειδής vocatur: ea, quâ parte alba est, satis crassa, pupillæ loco extenuatur. Huic interior adjuncta est mediâ parte quâ pupilla est, modico foramine concava, circâ tenuis, ulterioribus partibus ipsa quoque plenior, quæ χοριοειδής à Græcis nominatur. Hæ duæ tunicæ, quùm interiora oculi cingant, rursùs sub his coeunt, extenuatæque et in unum coactæ per foramen quod inter ossa est, ad membranas cerebri perveniunt, eisque inhærescunt. Sub his autem quâ parte pupilla est, locus vacuus est: deindè infrâ rursùs tenuissima tunica quam Herophilus ἀραχνοειδής nominavit. Ea media subsidit, eoque cavo continet quiddam, quod à vitri similitudine ὑαλοειδής Græci vocant. Id neque liquidum neque aridum est, sed quasi concretus humor, ex cujus colore pupillæ color vel niger est vel cæsius, quùm summa tunica tota alba sit. Id autem superveniens ab interiore parte membranula includit: sub his gutta humoris est, ovi albo similis, à quâ videndi facultas proficiscitur: κρυσταλλοειδής à Græcis nominatur.

14. Igitur vel ex morbo vel ex ictu concresecit humor sub duabus tunicis, quâ locum vacuum esse proposui: isque paulatim indurescens interiori potentiæ se opponit: vitiique ejus plures species sunt; quædam sanabiles, quædam quæ curationem non admittunt. Nam si exigua suffusio est, si immobilis, colorem verò habet marinæ aquæ vel ferri nitentis, et à latere sensum aliquem fulgoris relinquit, spes superest. Si magna est, si nigra pars oculi, amissâ naturali figurâ, in aliam vertit, si suffusioni color cæruleus est, aut auro simi-

lis, si labat illa, et hanc atque illam movetur, vix unquam succurritur. Ferè verò pejor est, quæ ex graviore morbo majoribusve capitis doloribus, vel ictu vehementiore orta est. Neque idonea curationi senilis ætas est, quæ sine novo vitio tamen aciem hebetem habet. Ac ne puerilis quidem, sed inter has media ætas. Oculi quoque curationi neque exigui, neque concavi satis opportunus est, atque ipsius suffusionis quædam maturitas est. Expectandum igitur est donec jam non fluere, sed duritiæ quædam concrevisse videatur. Ante curationem autem modico cibo uti, bibere aquam tri-duo debet, pridè ab omnibus abstinere. Post hæc in adverso sedili homo collocandus est loco lucido, lumini adverso sic, ut contrà medicus paulò altiùs sedeat: à posteriore autem parte caput ejus qui curabitur, minister contineat, ut immobile id præstet; nam levi motu eripi acies in perpetuum potest. Quin etiam ipse oculus qui curabitur, immobilior faciendus est, super alterum lanâ impositâ et deligatâ; curari verò sinister oculus dextrâ manu, dexter sinistrâ debet. Tum acus admovenda est, aut acuta, aut forte non nimium tenuis; eaque demittenda, sed rectâ, est per summas duas tunicas medio loco inter nigrum oculi et angulum tempori propiorem, è regione mediæ suffusionis sic, ut ne qua vena lædatur. Neque tamen timidè demittenda est, quia inani loco excipitur: ad quem quum ventum est, ne mediocriter quidem peritus falli potest, quia prementi nihil renititur. Urbi ergo eò ventum est, inclinanda acus ad ipsam suffusionem est; leviterque ibi verti et paulatim eam deducere infra regionem pupillæ debet; ubi deindè eam transiit, vehementiùs imprimi ut inferiori parti insadat. Si hæsit, curatio expleta est: si subindè redit, eadem acu magis concidenda, et in plures partes dissipanda est, quæ singulæ et faci-

lius conduntur, et minùs quàm latè officiunt. Post hæc educenda acus rectà est, imponendumque est lanà molli exceptum ovi album, et suprà, quod inflammationem coërceat, atque ita devinciendum. Post hæc opus est quiete, abstinentiâ, lenium medicamentorum inunctionibus, cibo, qui postero die satis maturè datur, primum liquido, ne maxillæ laborent; deindè inflammatione finitâ, tali qualis in vulneribus propositus est, quibus, ut aqua quoque diutiùs bibatur, necessariò accedit.

15. De pituitæ quoque tenuis cursu qui oculos infestat, quatenùs medicamentis agendum est, jam explicui. Nunc ad ea veniam quæ curationem manûs postulant. Animadvertimus autem quibusdam nunquàm siccescere oculos, sed semper humore tenui madere: quæ res aspritudinem continuat, et levibus momentis inflammationes et lippitudines excitat, totam deniquè vitam hominis infestat: idque in quibusdam nullâ ope adjuvari potest, in quibusdam sanabile est. Quod primum discrimen nosse oportet, ut alteris succurratur, alteris manus non injiciatur. Ac primum supervacua curatio est in his qui ab infantibus id vitium habent, quia necessariò mansurum est usque mortis diem: deindè non necessaria etiam in his, quibus non multa, sed acris pituita est; siquidem manu nihil adjuvantur: medicamentis et victûs ratione quæ crassiorem pituitam reddit, ad sanitatem perveniunt. Lata etiam capita vix medicinæ patent. Tùm interest pituitam emittant venæ quæ inter calvariam et cutem sunt, an quæ inter membranam cerebri et calvariam. Superiores ferè per tempora oculos rigant; inferiores per eas membranas quæ ab oculis ad cerebrum tendunt. Potest autem adhiberi remedium his quæ supra calvariæ os fluunt; non potest his quæ sub osse. Ac ne his quidem succurritur,

quibus pituita utrinquè descendit, quia, levatâ alterâ parte, nihilominùs altera infestat. Quid sit autem, hâc ratione cognoscitur. Raso capite, ea medicamenta quibus in lippitudine pituita suspenditur, à superciliis usque ad verticem illini debent. Si sicci oculi esse cœperunt, apparet per eas venas quæ sub cute sunt, irrigari; si nihilominùs madent, manifestum est sub osse descendere. Si est tumor, sed levior, duplex vitium est. Plurimi tamen ex laborantibus reperiuntur, quos superiores venæ exerceant, ideòque pluribus etiam opitulari licet: idque non in Græciâ tantummodò: sed in aliis quoque gentibus celebre est, adeò ut nulla medicinæ pars magis per nationes quasque exposita sit. Reperti in Græciâ sunt, qui novem lineis cutem capitis inciderent, duabus in occipitio rectis, unâ super eas transversâ, dein duabus super aures, unâ inter eas item transversâ; tribus inter verticem et frontem rectis. Reperti sunt, qui à vertice rectas eas lineas ad tempora deducerent, cognitisque ex motu maxillarum musculorum initiis, leviter super eos cutem inciderent, diductisque per retusos hamos oris, insererent linamenta sic, ut, neque inter se cutis antiqui fines committerentur, et in medio caro increaseret, quæ venas ex quibus humor ad oculos transiret, adstringeret. Quidam etiam atramento duas lineas duxerunt à mediâ aure ad mediam alteram aurem, deindè à naribus ad verticem. Tùm ubi lineæ committebantur, scalpello inciderunt, et post sanguinem effusum, os ibidem adusserunt. Nihilominùs autem et in temporibus, et inter frontem atque verticem eminentibus venis, iidem candens ferrum admoverunt. Frequens curatio est venas in temporibus adurere, quæ ferè quidem in ejusmodi malo tument: sed tamen, ut inflentur magisque se ostendant, cervix antè modicè deliganda est; tenui-

busque ferramentis et retusis venæ adurendæ, donec in oculis pituitæ cursus conquiescat. Id enim signum est quasi excæcatorum itinerum per quæ humor ferebatur. Valentior tamen medicina est, ubi tenues conditæque venæ sunt, ideòque legi non possunt. Eodem modo cervice deligatâ, retentoque ab ipso spiritu, quò magis venæ prodeant, atramento notare eas contra tempora et inter verticem ac frontem; deindè cervice resolutâ, quâ notæ sunt, venas incidere, et sanguinem mittere; ubi satis is fluxit, tenuibus ferramentis adurere. Contra tempora quidem, timidè, ne subjecti muscoli qui maxillam tenent, sentiant; inter frontem verò et verticem, vehementer, ut squama ab osse secedat. Efficacior tamen etiamnum est Afrorum curatio, qui verticem usque ad os adurunt sic, ut squamam remittat. Sed nihil melius est quàm quod in Galliâ quoque Comatâ fit, ubi venas in temporibus et in superiore capitis parte legunt. Adusta quomodò curanda sint, jam explicui: nunc illud adjiciò, nèque ut crustæ decendant, neque ut ulcus impleatur, adustis venis, esse prope-randum, ne vel sanguis erumpat, vel citò pus supprimatur; quàm per hoc siccescere eas partes opus sit, per illud exhauriri opus non sit: si quandò tamen sanguis eruperit, infrianda medicamenta esse, quæ sic sanguinem supprimant, ne adurant. Quemadmodùm autem venæ deligendæ sint, quidque lectis his faciendum sit, quùm venero ad crurum varices, dicam.

SECT. VIII. Verùm ut oculi multiplicem curationem etiam manûs exigunt, sic in auribus admodùm pauca sunt quæ in hâc medicinæ parte tractentur. Solet tamen evenire vel à primo natali die protinùs, vel postea factâ exulceratione, deindè per cicatricem aure repletâ, ut foramen in eâ nullum sit, ideòque ea audiendi usu careat. Quod ubi incidit, specillo tentandum est, altènc id

repletum, an in summo tantum glutinatum sit. Nam si altè est, prementi non cedit; si in summo, specillum protinus recipit. Illud attingi non oportet, ne sine effectus spe distentio oriatur nervorum, et ex eà mortis periculum sit: hoc facillè curatur. Nam quà cavum esse debet, vel medicamentum aliquod imponendum est ex adurentibus, vel candente ferro aperiendum, vel etiam scalpello incidendum: quumque id patefactum, et jam ulcus purum est, conjicienda eò pinna est, illita medicamento cicatricem inducente; circaque id, medicamentum dandum, ut cutis circa pinnam sanescat: quo fit ut, eà remotà, postea facultas audiendi sit. At ubi aures, in viro puta, perforatæ sunt et offendunt, trajicere id cavum celeriter candente acu satis est, ut leviter ejus oræ exulcerentur, aut etiam adurente medicamento idem exulcerare; postea deinde imponere id quod purget, tum quod eum locum repleat, et cicatricem inducat. Quòd si magnum id foramen est, sicut solet esse in his qui majora pondera auribus gesserunt, incidere quod superest ad extremum oportet: supra deinde oras scalpello exulcerare, et postea suere, ac medicamentum, quo id glutinetur, imponere. Tertium est, si quid ibi curti est, sarcire: quæ res quum labris quoque et naribus fieri possit, eandemque curationem habeat, simul explicanda est.

SECT. IX. Curta igitur in his tribus, ac si qua parva paria sunt, curari possunt: si qua majora sunt, aut non recipiunt curationem, aut ita per hanc ipsam deformantur, ut minus indecora antè fuerint. Atque in aure quidem et naribus deformitas sola timeri potest: in labris verò si nimium contracta sunt, usus quoque necessario jactura fit, quia minus facillè et cibus assumitur, et sermo explicatur. Neque enim creatur ibi corpus, sed ex vicino adducitur: quod in levi mutilatione, et

nihil eripere, et fallere oculum potest; in magnâ non potest. Neque senile autem corpus, neque quod mali habitûs est, neque in quo difficulter ulcera sanescunt, huic medicinæ idoneum est; quia nusquàm celerius cancer occupat, aut difficilius tollitur. Ratio curationis ejusmodi est. Id quod curtum est, in quadratum dirigere oportet, ab interioribus ejus angulis lineas transversas incidere, quæ citiorem partem ab ulteriore ex toto diducant: deindè ea quæ sic reposuimus, in unum adducere. Si non satis junguntur, ultra lineas quas antè fecimus, alias duas lunatas et ad plagam conversas immittere, quibus summa tantùm cutis diducatur: sic enim fit, ut facilius quod adducitur, sequi possit: quod non vi cogendum est, sed ità adducendum, ut ex facili subsequatur, et dimissum non multùm recedat. Interdùm tamen ab alterâ parte cutis haud omuinò adducta deformem, quem reliquit, locum reddit. Hujusmodi loci altera pars incidenda, altera intacta habenda est. Ergò neque ex imis naribus, neque ex medio naso imisve narium partibus, neque ex angulis labrorum quidquam attrahere tentabimus: utrinquè autem petemus, si quid summis naribus, si quid imis, si quid aut medio naso, aut mediis naribus, aut mediis labris deerit. Quæ tamen interdùm etiam duobus locis curta esse consueverunt: sed eadem ratio curandi est. Si cartilago in eo quod incisum est, eminet, excidenda est; neque enim aut glutinatur, aut acu tutò trajicitur. Neque longè tamen excidi debet, ne inter duas oras liberæ cutis utrinquè coïtus puris fieri possit. Tùm junctæ oræ inter se suendæ sunt, utrinquè cute apprehensâ, et quâ priores lineæ sunt, eâ quoque suturæ injiciendæ sunt. Siccis locis, uti naribus, illita spuma argenti satis proficit. In ulteriores verò lunatasque plagas linamentum dandum est, ut caro in-
erescens vulnus impleat: summâque curâ quod ità su-

tum est, tuendum esse, apparere ex eo potest, quod de cancro suprà posui. Ergò etiam tertio quoque die foven-
dum erit vapore aquæ calidæ, rursusque idem medica-
mentum injiciendum : ferèque septimo die glutinatum
est. Tùm suturæ eximi, et ulcus ad sanitatem perducì
debet.

SECT. X. Polypum verò qui in naribus nascitur,
præcipuè ferro curari jam aliàs posui. Ergò etiam hunc
ferramento acuto in modum spathæ facto resolvere ab
osse oportet, adhibitâ diligentîâ, ne infrâ cartilago
lædatur, in quâ difficilis curatio est. Ubi abscissus est,
unco ferramento extrahendus est : tùm implicitum
linamentum, vel aliquid ex penicillo respergendum
est medicamento quo sanguis supprimitur, eoque naris
leviter implenda. Sanguine suppresso, linamento ulcus-
culum purgandum est. Ubi purum est, eò pinna,
eodem modo quo in aure suprà positum est, medica-
mento illita, quo cicatrix inducitur, intùs demittenda,
donec ex toto id sanescat.

SECT. XI. Id autem vitium quod ὄζαινα à Græcis voca-
tur, si medicamentis non cederet, quemadmodùm manu
curandum esset, apud magnos Chirurgos non reperi. Cre-
do, quia res rarò ad sanitatem satis proficit, quùm aliquod
in ipsâ curationè tormentum habeat. Apud quosdam
tamen positum est, vel subtilem fistulam, vel enodem
scriptorium calamum in narem esse conjiciendum, do-
nec sursùm ad os perveniat: tùm per id, tenue ferra-
mentum candens dandum esse ad ipsum os, deindè
adustum locum purgandum esse ærugine et melle: ubi
purus est, lycio ad sanitatem perducendum. Vel na-
rem incidendam esse ab imâ parte ad os, ut et conspici
locus possit, et faciliùs candens ferramentum admoveri :
tùm sui narem debere, et adustum quidem ulcus eâdem
ratione curari: suturam verò illini vel spumâ argenti,
vel alio glutinante.

SECT. XII. 1. In ore quoque quædam manu curantur, ubi in primis dentes nonnunquam moventur, modò propter radicum imbecillitatem, modò propter gingivarum arescentium vitium. Oportet in utrolibet candens ferramentum gingivis admoveri, ut leviter attingat, non insadat. Adestæ gingivæ melle illinendæ, et mulso eluendæ sunt. Ut pura ulcera esse cœperunt, arida medicamenta infrianda sunt ex his quæ reprimunt. Si verò dens dolores movet, eximique eum, quia medicamenta nihil adjuvant, placuit, circumradi debet, ut gingiva ab eo resolvatur: tùm is concutiendus est. Eademque facienda, donec benè moveatur: nam dens hærens cum summo periculo evellitur, ac nonnunquam maxilla loco movetur: idque etiam majore periculo in superioribus dentibus fit, quia potest tempora oculosque concutere. Tùm, si fieri potest, manu; si minùs, forfice, dens excipiendus est. Ac si exesus est, antè id foramen vel linamento vel benè accommodato plumbo replendum est, ne sub forcipe confringatur. Rectà verò forfex ducenda est, ne inflexis radicibus os rari cui dens inhæret, parte aliquâ frangatur: neque ideò nullum ejus rei periculum est, utique in dentibus brevibus qui ferè longiores radices non habent: sæpè enim forfex quàm dentem comprehendere non possit, aut frustrà comprehendat, os gingivæ prehendit et frangit. Protinùs autem ubi plus sanguinis profluit, scire licet, aliquid ex osse fractum esse. Ergò specillo conquirenda est testa quæ recessit, et vulsellâ protrahenda est. Si non sequitur, incidi gingiva debet, donec labans ossis testa recipiatur. Quòd si factum statim non est, indurescit extrinsecùs maxilla sic, ut is hiare non possit, foris imponendum calidum ex farinâ et fico cataplasma est, donec ibi pus moveatur: tùm incidi gingiva debet. Pus quoque multum profluens

ossis fracti nota est : itaque etiam tùm id extrahi convenit : nonnunquàm etiam , eo læso , fistula fit quæ eradi debet. Dens autem scaber , quâ parte niger est , radendus est , illinendusque rosæ flore contrito , cui gallæ quarta pars , et altera myrrhæ sit adjecta : continendumque ore crebrò vinum meracum : atque in eo casu velandum caput , ambulatione multâ , frictione capitis , cibo non acri utendum est. At si ex ictu vel alio casu aliqui labant dentes , auro cum his qui benè hærent vincendi sunt : continendaque ore reprimentia , ut vinum in quo malicorium decoctum , aut in quod galla candens coniecta sit. Si quandò etiam in pueris ante alter dens nascitur quam prior excidat is qui cadere debuit , circumpurgandus et evellendus est ; is autem qui natus est in locum prioris , quotidie digito adurgendus , donec ad justam magnitudinem perveniat. Quotiescunque dente exempto radix relictæ est , protinùs ea quoque ad id facto forfice , quem ῥιζόγρυν Græci vocant , eximenda est.

2. Tonsillas autem quæ post inflammationes induruerunt (ἄντιάδες autem à Græcis appellantur ,) quùm sub levi tunicâ sint , oportet digito circumradere et evellere : si ne sic quidem resolvuntur , hamulo excipere et scalpello excidere : tùm ulcus aceto eluere , et illinire vulnus medicamento quo sanguis supprimitur.

3. Uva si cum inflammatione descendit , dolorique est , et subrubicundi coloris , præcidi sine doloris periculo non potest ; solet enim multum sanguinem effundere : itaque melius est his uti quæ aliàs proposita sunt. Si verò inflammatio quidem nulla est , nihilominùs autem ea ultra justum modum à pituitâ diducta est , et tenuis , acuta , alba est , præcidi debet : itemque si ima livida et crassa , summa verò tenuis est. Neque quidquam commodius est , quàm vulsellâ prehendere , sub eâque quod

volumus, excidere. Neque enim ullum periculum est, ne plus minùsve præcidatur, quàm liceat tantum infra vulsellam relinquere, quantum inutile esse manifestum est; idque præcidere quo longior uva est quàm esse naturaliter debet. Post curationem eadem facienda sunt, quæ in tonsillis proximè posui.

4. Lingua verò quibusdam cum subjectâ parte, à primo natali die, juncta est, qui ob id ne loqui quidem possunt. Horum extrema lingua vulsellâ prehenda est, sub eâque membrana incidenda; magnâ curâ habitâ, ne venæ quæ juxtâ sunt, violentur, et profusione sanguinis noceant. Reliqua curatio vulneris in prioribus posita est. Et plerique quidem ubi consanuerunt, loquuntur: ego autem cognovi, qui, succisâ linguâ, quàm abundè super dentes eam promeret, non tamen loquendi facultatem consecutus est. Adeò in Medicinâ, etiam ubi perpetuum est quod fieri debet, non tamen perpetuum est id, quod sequi convenit.

5. Sub linguâ quoque interdum aliquid abscedit, quod ferè consistit in tunica, doloresque magnos movet: quod si exiguum est, incidi semel satis est: si majus, summa cutis usque ad tunicam excidenda est, deindè utrinquè oræ hamulis excipiendæ, et tunica undiquè circumdata liberanda est; magnâ diligentia per omnem curationem habitâ, ne qua major vena incidatur.

6. Labra autem sæpè finduntur, eaque res habet cum dolore etiam hanc molestiam, quòd sermo prohibetur, qui subindè eas rimas cum dolore diducendo sanguinem citat. Sed has, si in summo sunt, medicamentis curare commodius est quæ ad ulcera oris fiunt. Si verò altiùs descenderunt, necessarium est tenui ferramento adurere; quod spathæ simile, quasi transcurrere, non imprimi debet. Postea facienda eadem sunt quæ in auribus adustis exposita sunt.

SECT. XIII. At in cervice, inter cutem et asperam arteriam, tumor increscit, βρογχοκήλην Græci vocant, quo, modò caro hebes, modò humor aliquis melli aquæve similis, includitur; interdùm etiam minutis ossibus pili immixti. Ex quibus quidquid est tunicâ continetur, potest autem adurentibus medicamentis curari, quibus summa cutis cum subjectâ tunicâ exeditur: quo facto, sive humor est, profluit; sive quid densius, digitis educitur: tùm ulcus sub linamentis sanescit. Sed scalpelli curatio brevior est. Medio tumore una linea inciditur usque ad tunicam: deindè vitiosus sinus ab integro corpore digito separatur, totusque cum velamento suo eximitur. Tùm aceto, cui vel salem vel nitrum aliquis adjecit, eluitur, oræque unâ suturâ junguntur, cæteraque eadem quæ in aliis suturis superinjiciuntur: leniter deindè, ne fauces urgeat, deligatur. Si quandò autem tunica eximi non potuerit, intùs inspergenda adurentia, linamentisque id curandum est, et cæteris pus moventibus.

SECT. XIV. Sunt etiam circa umbilicum plura vitia, de quibus propter raritatem inter auctores parùm constat. Verisimile est autem id à quoque prætermisum, quod ipse non cognoverat, à nullo id quod non viderat, fictum. Commune omnibus est umbilicum indecorè prominere. Causæ requiruntur: Meges tres has posuit: modò intestinum eò irrumpere, modò omentum, modò humorem. Sostratus nihil de omento dixit: duobus iisdem adjecit carnem ibi interdùm increscere, eamque modò integram esse, modò carcinomati similem. Gorgias ipse quoque omenti mentionem omisit: sed eadem tria causatus, spiritum quoque interdùm eò dixit irrumpere. Heron, omnibus his quatuor positis, et omenti mentionem habuit, et ejus quod simul et omentum et intestinum habuerit. Quid autem horum sit, his indi-

ciis cognoscitur. Ubi intestinum prolapsum est, tumor neque durus, neque mollis est, omni frigore minuitur: non solum sub omni calore, sed etiam retento spiritu, crescit. Sonat interdum, atque ubi resupinatus est aliquis, delapso intestino, ipse desidit. Ubi verò omentum est, cætera similia sunt, tumor mollior et ab imâ parte, latus, extenuatus in verticem est; si quis apprehendit, elabitur. Ubi utrumque est, indicia quoque mixta sunt, et inter utrumque mollities: at caro durior est, semperque, etiam resupinato corpore, tumet, prementique non cedit, prioribus faciliè cedentibus. Si vitiosa est, easdem notas habet quas in carcinomate exposui. Humor autem si premitur, circumfluit: at spiritus pressus cedit, sed protinùs redit, resupinato quoque corpore, tumorem in eâdem figurâ tenet. Ex his id quod ex spiritu vitium est, medicinam non admittit: caro quoque carcinomati similis cum periculo tractatur; itaque omittenda est. Sana excidi debet, idque vulnus linamentis curari. Humorem quidam, vel inciso summo tumore, effundunt, et vulnus iisdem linamentis curant. In reliquis variæ sententiæ sunt. Ac resupinandum quidem corpus esse, res ipsa testatur, ut in uterum, sive intestinum sive omentum est, delabatur. Sinus verò umbilici, tum vacuus, à quibusdam duabus regulis exceptus est, vehementerque earum capitibus deligatis, ibi emoritur: à quibusdam ad imum acutrajectâ duo lina ducente, deindè utriusque lini duobus capitibus diversæ partes adstrictæ: quod in uvâ quoque oculi fit; nam, sic, id, quod supra vinculum est, moritur. Adjecerunt quidam ut, antequàm vincirent, summum unâ lineâ inciderent quò faciliùs, digito demisso, quod illuc irrupisset, depellerent; tum deindè vinxerunt. Sed abundè est jubere spiritum continere, ut tumor quantus maximus esse potest, se ostendat,

tum imam basim ejus atramento notare, resupinatoque homine, digitis tumorem eum premere, ut si quid delapsum non est, manu cogatur. Post hæc umbilicum attrahere, et quâ nota atramenti est, lino vehementer adstringere: deinde partem superiorem aut medicamentis aut ferro adurere, donec emoriatur; atque, ut cætera usta, nlcus nutrire. Idque non solum ubi intestinum vel omentum vel utrumque est, sed etiam ubi humor est, optimè proficit. Sed antè quædam visenda sunt, ne quod ex vinculo periculum sit. Nam curationi neque infans, neque aut robustus annis aut senex aptus est, sed à septimo ferè anno ad quartum decimum. Deinde ei corpus idoneum est id quod integrum est: at quod mali habitus est, quodque papulas, impetigines, similiaque habet, idoneum non est. Levibus quoque tumoribus facîle subvenitur; at in eorum, qui nimis magni sunt, curatione periculum est. Tempus autem anni et autumnale et hibernum vitandum est: ver idoneum maximè est, ac prima æstas non aliena est. Præter hæc abstinere pridè debet: neque id satis est; sed alvus quoque ei ducenda est, quò faciliùs omnia quæ excesserunt, intra alvum considant.

SECT. XV. Aquam his qui hydropici sunt, emitti oportere aliàs dixi: nunc quemadmodum id fiat, dicendum. Quidam autem sub umbilico, ferè quatuor interpositis digitis a sinistrâ parte, quidam ipso umbilico perforato, id facere consuerunt: quidam cute primùm adustâ, deinde interiore abdomine inciso; quia, quod per ignem divisum est, minùs celeriter coit. Ferramentum autem demittitur, magnâ curâ habitâ, ne qua vena incidatur. Id tale esse debet, ut ferè tertiam digiti partem latitudo mucronis impleat: demittendumque ita est, ut membranam quoque transeat quâ caro ab inte-

riore parte finitur : eò tùm plumbea aut ænea fistula conjicienda est, vel recurvatis in exteriorem partem labris, vel in mediâ circumsurgente quâdam morâ, ne tota intùs delabi possit. Hujus ea pars quæ intrâ, paulò longior esse debet quàm quæ extrâ, ut ultra ulteriorem membranam procedat. Per hanc effundendus humor est : atque ubi major pars ejus evocata est, cludenda demisso linteolo fistula est, et in vulnere, si id ustum non est, relinquenda : deindè per insequentes dies circa singulas heminas emittendum, donec nullum aquæ vestigium appareat. Quidam tamen etiam non ustâ cute, protinùs fistulam recipiunt, et super vulnus spongiam, ex aquâ frigidâ expressam, vel ex aceto deligant : deindè, postero die, rursùs fistulam demittunt, quod recens vulnus paulùm diductum patitur, ut si quid humoris superest, emittatur : idque bis ita fecisse contenti sunt.

SECT. XVI. Nonnunquàm autem venter ictu aliquo perforatur, sequiturque ut intestina evolvantur. Quod ubi incidit, protinùs considerandum est, an integra ea sint, deindè an his color suus maneat. Si tenuius intestinum perforatum est, nihil profici posse jam retuli. Latius intestinum sui potest; non quòd certa fiducia sit, sed quòd dubia spes certâ desperatione sit potior; interdùm enim glutinatur. Tùm si utrumlibet intestinum lividum, aut pallidum, aut nigrum est, quibus illud quoque necessariò accedit, ut sensu careat, medicina omnis inanis est. Si verò adhuc ea sui coloris sunt, cum magnâ festinatione succurrendum est; momento enim alienatur externo et insueto spiritu circumdata. Resupinaudus autem homo est, coxis erectioribus: et si angustius vulnus est, quàm ut intestina commodè refundantur, incidendum est donec satis pateat. Ac si jam sicciora intestina sunt, perluenda aquâ sunt, cui paul-

lùm admodùm olei sit adjectum. Tùm minister oras vulneris leniter diducere manibus suis, vel etiam duobus hamis membranæ interiori injectis, debet : medicus priora semper intestina quæ posteriora prolapsa sunt, condere sic, ut orbium singulorum locum servet. Re-positis omnibus, leniter homo concutiendus est : quo fit, ut per se singula intestina in suas sedes diducantur, et in his considant. His conditis, omentum quoque considerandum est, ex quo, si quid jam nigri et emortui est, forfice excidi debet : si quid integrum est, leniter super intestina deduci. Sutura autem, neque summæ cutis, neque interioris membranæ per se satis proficit, sed utriusque. Et quidem duobus linis injicienda est, et spissior quàm alibi, quia et rumpi facilius motu ventris potest, et non æquè magnis inflammationibus pars ea exposita est. Igitur in duas acus fila conjicienda, eæque duabus manibus tenendæ : et priùs interiori membranæ sutura injicienda est sic, ut sinistra manus in dexteriore orâ, dextra in sinisteriore à principio vulneris orsâ, ab interiori parte in exteriorem acum immittat. Quo fit ut ab intestinis ea pars semper acum sit quæ retusa est. Semel utrâque parte trajectâ, permutandæ acus inter manus sunt, ut ea sit in dextrâ quæ fuit in sinistrâ; ea veniat in sinistram, quam dextra continuit : iterùmque eodem modo per oras immittendæ sunt : atque ita tertio et quarto, deincepsque permutatis inter manus acubus, includenda plaga. Post hæc eadem fila, eademque acus ad cutem transferendæ ; similique ratione ei quoque parti sutura injicienda, semper ab interiore parte acubus venientibus, semper inter manus trajectis. Dein glutinantia injicienda, quibus aut spongiam, aut succidam lanam ex aceto expressam accedere debere manifestius est, quàm ut semper dicendum sit. Impositis his, leniter deligari venter debet.

SECT. XVII. 1. Interdum tamen vel ex ictu aliquo, vel retento diutius spiritu, vel sub gravi fasce, interior abdominis membrana, superiore cute integrâ, rumpitur. Quod feminis quoque ex utero sæpè evenire consuevit; fitque præcipuè circa ilia. Sequitur, autem, quum superior caro mollis sit, ut non satis intestina contineat, hisque intenta cutis indecorè intumescat. Atque id quoque aliter ab aliis curatur. Quidam enim per acum duobus linis ad imam basim immissis, sic utrinquè devinciunt, quemadmodum et in umbilico et in uvâ positum est, ut quidquid supra vinculum est, emoriatur: quidam medium tumorem excidunt ad similitudinem myrtacei folii: quod semper eodem modo servandum esse jam posui, et tùm oras suturâ jungunt. Commodissimum est autem, resupinato corpore, experiri manu, quâ parte is tumor maximè cedat; quia necesse est eâ parte rupta membrana sit, quâque integra est, eâ magis obnitatur: tùm quâ rupta videbitur, immittendæ scalpello duæ lineæ sunt, ut, exciso medio, interior membrana utrinquè recentem plagam habeat; quia quod vetus est, suturâ non coit. Loco patefacto, si quâ parte membrana non novam plagam sed veterem habet, tenuis excidenda habena est, quæ tantum oras ejus exulceret. Cætera quæ ad suturam reliquamque curationem pertinent, suprâ comprehensa sunt.

2. Præter hæc evenit ut in quorundam ventribus varices sint: quarum, quia nulla alia curatio est, quàm quæ in cruribus esse consuevit, tùm eam partem explanaturus, hanc quoque eò differo.

SECT. XVIII. Venio autem ad ea quæ in naturalibus partibus circa testiculos ori solent: quæ quò facilius explicem, prius ipsius loci natura paucis properanda est. Igitur testiculi simile quiddam medullis habent: nam sanguinem non emittunt, et omni sensu carent: dolent

autem in ictibus et inflammationibus tunicarum quibus hi continentur. Dependent verò ab inguinibus per singulos nervos, quos κρεμασθήρας Græci nominant, cum quorum utroque binæ descendunt et venæ et arteriæ. Hæc autem tunicâ conteguntur tenui, nervosâ, sine sanguine, albâ, quæ ἐλυτροειδής à Græcis nominatur: super eam valentior tunica est, quæ interiori vehementer imâ parte inhæret: δαρτὸν Græci vocant. Multæ deindè membranulæ venas et arterias eosque nervos comprehendunt; atque inter duas quoque tunicas superioribus partibus leves parvulæque sunt. Hactenùs propria utrique testiculo et velamenta et auxilia sunt: communis deindè utrique omnibusque interioribus sinus est, qui etiam conspicitur à nobis: ὄσχεὸν Græci, scrotum nostri vocant; isque ab imâ parte mediis tunicis leviter innexus, à superiore tantùm circumdatus est. Sub hoc igitur plura vitia esse consuerunt: quæ modò, ruptis tunicis quas ab inguinibus incipere proposui, modò his integris, fiunt. Si quidem interdùm vel ex morbo primùm inflammatur, deindè postea pondere abrumpitur, vel ex ictu aliquo protinùs rumpitur tunica, quæ diducere ab inferioribus partibus intestina debuit; tùm pondere eò devolvitur aut omentum aut etiam intestinum: idque, ibi repertâ viâ, paulatim ab inguinibus in inferiores quoque partes nisum, subindè nervosas tunicas, et ob id ejus rei patientes, diducit: ἐντερὸκλήλην et ἐπιπλήλοκλήλην Græci vocant: apud nos indecorum, sed commune his herniæ nomen est. Deindè, si descendit omentum, nunquàm in scroto tumor tollitur, sive inedia fuit, sive corpus huc illucve conversum, aut alio quovis modo collocatum: itemque, si retentus est spiritus, non magnoperè increscit; tactu verò inæqualis est, et mollis et lubricus. At si intestinum quoque descendit, tumor is sine inflammatione modò minuitur,

modò increscit : estque ferè sine dolore ; et, quùm con-
quiescit aliquis aut jacet, interdùm ex toto desidit, in-
terdùm sic dividitur, ut in scroto exiguæ reliquiæ
maneant ; at clamore et satietate, et si sub aliquo
poudere is homo nisus est, crescit ; frigore omni con-
trahitur, calore diffunditur ; estque tùm scrotum et
rotundum, et tactu læve ; idque quod subest, lubricum
est : si pressum est, ad inguen revertitur ; dimissumque
iterùm cum quodam quasi murmure devolvitur. Et id
quidem in levioribus malis evenit : nonnunquàm autem,
stercore accepto, vastiùs tumet, retròque compelli non
potest, affertque tùm dolorem et scroto, et inguinibus et
abdomini. Nonnunquàm stomachus quoque affectus,
primùm rufam bilem per os reddit, deindè viridem,
quibusdam etiam nigram. Integris verò membranis,
interdùm eam partem humor dstringit. Atque ejus quo-
que species duæ sunt : nam vel inter tunicas is increscit
vel in membranis quæ ibi circa venas et arterias sunt,
ubi hæ gravatæ occalluerunt. Ac ne ei quidem humori
qui inter tunicas est, unasedes est : nam modo inter sum-
mam et mediam, modo inter mediam et imam consistit.
Græci communi nomine quidquid est, ὑδροκῆλην appel-
lant : nostri verò, scilicet nullis discriminibus satis cog-
nitis, hæc quoque sub eodem nomine quo priora, habent.
Signa autem quædam communia sunt, quædam propria.
Communia, quibus humor deprehenditur ; propria, qui-
bus locus. Humorem subesse discimus, si tumor est nun-
quàm ex toto se remittens, sed interdùm levior aut prop-
ter famem aut propter febriculam, maximèque in pueris ;
isque mollis est, si non nimius humor subest : at si is vehe-
menter increvit, renititur sicut uter repletus et arcè ad-
strictus. Venæ quoque in scroto inflantur, et, si digito
pressimus, cedit humor, circumfluensque id quod non
premitur, attollit, et tanquàm in vitro cornuve per scrotum

apparet, isque, quantum in ipso est, sine dolore est. Sedes autem ejus sicprehenditur. Si inter summam medianque tunicam est, cum digitis duobus pressimus, paulatim humor inter eos revertens subit; scrotum ipsius et albidius est: si ducitur, aut nihil, aut paululum intenditur; testiculus eâ parte neque visu neque tactu sentitur. At si sub mediâ tunicâ est, intentum scrotum magis se attollit, adeo ut superior coles sub tumore eo delitescat. Præter hæc, æquè integris tunicis, ramex innascitur: *κίρσοκήλην* Græci appellant, venæ intumescunt: eæque intortæ conglomeratæque ad superiorem partem, vel ipsum scrotum implent, vel mediam tunicam vel imam: interdum etiam, sub imâ tunicâ, circa ipsum testiculum nervumque ejus, increscunt. Ex his eæ quæ in ipso scroto sunt, oculis patent: hæ verò quæ mediæ imæve tunicæ insident, ut magis conditæ, non æquè quidem cernuntur; sed tamen etiam visui subjectæ sunt: præterquam etiam quod et tumoris aliquid est pro venarum magnitudine et modo: et id prementi magis renititur, ac per ipsos venarum toros inæquale est; et quâ parte id est, testiculus magis justo dependet. Quum verò etiam super ipsum testiculum nervumque ejus id malum increvit, aliquantò longiùs testiculus ipse descendit, minorque altero fit, ut pote alimento amisso. Rarò, sed aliquandò caro quoque inter tunicas increscit: *σαρκοκήλην* Græci vocant. Interdum etiam ex inflammatione tumet ipse testiculus, ac febres quoque affert; et nisi celeriter ea inflammatio conquievit, dolor ad inguina atque ilia pervenit, partesque hæ intumescunt; et nervus ex quo testiculus dependet, plenior fit, simulque indurescit. Super hæc inguen quoque nonnunquam ramices implent: *εουβωνοκήλην* appellant.

SECT. XIX. His cognitis, de curatione dicendum est, in quâ quædam communia omnium sunt, quædam pro-

pria singulorum. Priùs de communibus dicam. Loquar autem nunc de his quæ scalpellum desiderant : nam quæ vel sanari non possint, vel aliter nutrirì debeant, dicendum erit simul atque ad species singulas venero. Inciditur autem interdum inguen, interdum scrotum. In utrâque curatione homo antè per triduum bibere aquam, pridie abstinere etiam à cibo debet : ipso autem die collocari supinus; deindè si inguen incidendum est, idque jam pube contegitur, antè radendum est, et tunc extenso scroto, ut cutis inguinis intenta sit, id incidendum sub imo ventre, quâ cum abdomine tunicæ inferiores committuntur. Aperiendum autem audacter est, donec summa tunica quæ ipsius scroti est, incidatur, perveniaturque ad eam quæ media est. Plagâ factâ, foramen deorsum versum subest. In id demittendus est sinistræ manûs digitus index, ut, diductis intervenientibus membranulis, sinum laxet. Minister autem sinistrâ manu comprehenso scroto, sursum versum id debet extendere, et quàm maximè ab inguinibus abducere, primum cum ipso testiculo, dum medicus omnes membranas quæ supra mediam tunicam sunt, si digito diducere non potest, scalpello abscindat : deindè sine eo; ut is elapsus ipsi plagæ jungatur, digitoque indè promatur, et super ventrem cum duabus suis tunicis collocetur. Indè si qua vitiosa sunt, circumcidenda sunt : in quibus quàm multæ venæ discurrant, tenuiores quidem præcidi protinus possunt : majores verò antè longiore lino deligandæ sunt, ne periculosè sanguinem fundant. Sin media tunica vexata erit, aut sub eâ malum increverit, excidenda ea erit sic, ut altè ad ipsum inguen præcidatur. Infrâ tamen non tota demenda est : nam quod ad basim testiculi vehementer cum imâ tunicâ connexum est, excidi sine summo periculo non potest ; itaque ibi relinquendum est. Idem in imâ quoque tu-

nicâ, si læsa ea est, faciendum est. Sed non à summâ inguinis plagâ, verùm infrâ paululùm ea abscindenda, ne, læsâ abdominis membranâ, inflammationes moveat. Neque tamen nimium ex eâ sursùm relinquendum est, ne postea sinuetur, et sedem eidem malo præstet. Purgatus itaque testiculus, per ipsam plagam, cum venis et arteriis et nervo suo, leniter demittendus est; videndumque ne sanguis in scrotum descendat, neve concretus, aliquo loco maneat. Quæ ita fient, si venis vinciendo medicus prospexerit: lina quibus capita earum continebuntur, extra plagam dependere debebunt; quæ, pure orto, sine ullo dolore excident. Ipsi autem plagæ injiciendæ duæ fibulæ sunt, et insuper medicamentum quo glutinetur. Solet interdum ab alterâ orâ necessarium esse aliquid excidi, ut cicatrix major et latior fiat. Quod ubi incidit, linamenta super non fulcienda, sed leviter tantum ponenda sunt, supràque ea quæ inflammationem repellant, id est, ex aceto vel lanâ succidâ vel spongiâ: cætera eadem quæ, ubi pus moveri debet, adhibenda sunt. At quum infrâ incidi oportet, resupinato homine, subjicienda sub scroto sinistra manus est, deindè id vehementer apprehendum et incidendum. Si parvulum est quod nocet, modicè, ut tertia pars integra ad sustinendum testiculum infrâ relinquatur: si majus est, etiam ampliùs, ut paulum tantummodò ad imum cui testiculus insidere possit, integrum maneat. Sed primò rectus scalpellus quàm levissimâ manu teneri debet, donec scrotum ipsum diducat; tùm inclinandus mucro est, ut transversas membranas secet, quæ inter summam mediamque tunicam sunt. At si vitium in proximo est, mediam tunicam attingi non oportet: si sub illâ quoque conditur, etiam illa incidenda est, sicut tertia quoque, si illa vitium tegit. Ubicumquè autem repertum malum est, ministrum ab inferiore parte expri-

mere moderatè scrotum oportet, medicum digito manubriolove scalpelli diductam inferiorem partem tunicæ extrà collocare; deindè eam ferramento, quod, ob similitudinem, corvum vocant, incidere sic, ut in eamdem intrare duo digiti, index et medius, possint. His deindè coniectis, excipienda reliqua pars tunicæ, et inter digitos scalpellus immittendus est, eximendumque aut effundendum quidquid est noxium. Quamcumque autem tunicam quis violavit, illam quoque debet excidere, ac mediam quidem, ut suprà dixi, quàm altissimè ad inguen, imam autem paulò infrà. Cæterùm, antequàm excidantur, hæ quoque vinciri lino summæ debent, et ejus lini capita extra plagam relinquenda sunt, sicut in illis quoque venis quæ id requisierint. Eo facto, testiculus intùs reponendus est, oræque scroti suturis inter se committendæ, neque iis paucis, ne parùm glutinentur, et longior fiat curatio; neque multis, ne inflammationem augeant. Atque hìc quoque videndum est, ne quid in scroto sanguinis maneat; tùm imponenda glutinantia sunt. Si quandò autem in scrotum sanguis defluxit, aliquidve concretum ex eo decedit, incidi subter id debet; purgatoque eo, spongia acri aceto madens circumdari. Deligatum autem vulnus omne quod ex his causis factum est, si dolor nullus est, quinque primis diebus non est resolvendum; sed bis die tantùm aceto irroranda lanâ vel spongiâ: si dolor est, tertio die resolvendum, et ubi fibulæ sunt, hæ incidendæ; ubi linamentum, id immutandum est: rosâque et vino madefaciendum id quod imponitur. Si inflammatio increscit, adjiciendum prioribus cataplasma ex lenticulâ et melle, vel ex malicorio, quod in austero vino coctum sit, vel ex his mixtis. Si sub his inflammatio non conquierit, post diem quintum multâ calidâ aquâ vulnus fovendum, donec scrotum

ipsum et extenuetur, et rugosius fiat : tùm imponendum cataplasma ex triticeâ farinâ, cui resina pinea adjecta sit : quæ ipsa, si robustus curatur, ex aceto ; si tener, ex melle coquenda sunt. Neque dubium est, quodcunque vitium fuit, si magna inflammatio est, quin ea quæ pus movent, imponenda sint. Quòd si pus in ipso scroto ortum est, paulùm id incidì debet, ut exitus detur; linamentumque eatenùs imponendum est, ut foramen tegat. Inflammatione finitâ, propter nervos, priore cataplasmate, dein cerato utendum est. Hæc propriè ad ejusmodi vulnera pertinent. Cætera et in curatione, et in victu similia his esse debent, quæ in alio quoque vulnere genere præcepimus.

SECT. XX. His propositis, ad singulas species veniendum est. Ac si cui parvulo puero intestinum descendit, ante scalpellum experienda vinctura est. Fascia ejus rei causâ fit, cui imo loco pila assuta est ex panniculis facta, quæ ad repellendum intestinum ipsi illi subjicitur, deindè reliqua fasciæ pars arcè circumdatur, sub quo sæpè et intùs compellitur intestinum, et inter se tunicæ glutinantur. Rursùs si ætas processit, multùmque intestini descendisse ex tumore magno patet, adjiciunturque dolores et vomitus (quæ ex stercore ex cruditate eò delapso ferè accidunt), scalpellum adhiberi sine perniciè non posse manifestum est : levandum tantummodò malum, et per alias curationes extrahendum est. Sanguis mitti ex brachio debet; deindè, si vires patiuntur, imperanda tridui abstinètia est : si minùs, certè pro vi corporis quàm longissima. Eodem verò tempore, superhabendum cataplasma ex lini semine, quod antè aliquis ex mulso decoxerit. Posthæc et farina hordeacea cum resinâ injicienda, et is demittendus in solium aquæ calidæ, cui oleum quoque adjectum sit; dandumque aliquid cibi levis et calidi. Quidam etiam alvum

ducunt : id deducere aliquid in scrotum potest , educere ex eo non potest. Per ea verò quæ suprà scripta sunt, levato malo, si quandò aliàs dolor reverterit, eadem erunt facienda. Sine dolore quoque si multa intestina prolapsa sunt, secari supervacuum est, non quò excludi à scroto non possint (nisi tamen id inflammatio prohibuit), sed quò repulsa inguinibus immorentur, ibique tumorem excitent; atque ita fiat mali non finis, sed mutatio. At in eo quem scalpello curari oportebit, simul atque ad mediam tunicam vulnus in inguine factum pervenerit, duobus hamulis ea juxta ipsas oras apprehendi debet, dum, diductis omnibus membranulis, medicus eam liberet. Neque enim cum periculo lædatur, quæ excidenda est, quàm intestinum esse nisi sub eâ non possit. Ubi diducta antem erit, ab inguine usque ad testiculum incidi debet sic, ne is ipse lædatur; tùm excidi. Ferè tamen hanc curationem puerilis ætas et modicum malum recipit. Si vir robustus est, majusque id vitium est, extrahi testiculus non debet, sed in suâ sede permanere. Id hoc modo fit. Inguen eâdem ratione usque ad mediam tunicam scalpello aperitur, eaque tunica eodem modo duobus hamis excipitur sic, ut à ministro testiculus eatenus contineatur, ne per vulnus exeat : tùm ea tunica deorsum versum scalpello inciditur, sub eâque index digitus sinistræ manûs ad imum testiculum demittitur, eumque ad plagam compellit : deindè dextræ manûs duo digiti, pollex atque index, venam, et arteriam, et nervum, tunicamque eorum à superiore tunicâ diducunt. Quòd si aliquæ membranulæ prohibent, scalpello resolvuntur, donec ante oculos tota jam tunica sit. Excisis quæ excidenda sunt, repositoque testiculo, ab orâ quoque ejus vulneris quod in inguine est, demenda ha-

benula paulò latior est; quò major plaga sit, et plus creare carnis possit.

SECT. XXI. 1. At si omentum descendit, eodem quidem modo quo suprà scriptum est, aperiendum inguen, diducendæque tunicæ sunt. Considerandum autem est, majorne ejus modus, an exiguus sit. Nam quod parvulum est, super inguen in uterum, vel digito, vel averso specillo, repellendum est: si plus est, sinere oportet dependere, quantum ex utero prolapsum est, idque adurentibus medicamentis illinire, donec emoriatur et excidat. Quidam hìc quoque duo lina acu trahunt, binisque singulorum capitibus diversas partes adstringunt, sub quo æquè, sed tardiùs emoriatur. Adjicitur tamen hìc quoque celeritati, si omentum supra vinculum illinitur medicamentis quæ sic exedunt, ne erodant: *σηπιτιζά* Græci vocant. Fuerunt etiam qui omentum forfice præciderent, quod in parvulo non est necessarium: si majus est, potest profusionem sanguinis facere; si quidem omentum quoque venis quibusdam etiam majoribus illigatum est. Neque verò si, discisso ventre, id prolapsum forfice præciditur, quùm et emortuum sit, et aliter tutiùs avelli non possit, indè hùc exemplum transferendum est. Vulnus autem curari, si relictum omentum est, suturâ debet: si id ampliùs fluit, et extrâ emortuum est, excisis oris, sicut suprà positum est.

2. Si verò humor intùs est, incidendum est, in pueris quidem inguen, nisi in his quoque liquoris ejus major modus id prohibet, in viris verò et ubicunquè multus humor subest, scrotum. Deindè si inguen incisum est, eò protractis tunicis, humor effundi debet: si scrotum, et sub hoc protinùs vitium est, nihil aliud quàm humor est effundendus, abscindendæque membranæ sunt, si quæ eum continuerunt: deindè eluen-

dum id ex aquâ quæ vel salem adjectum vel nitrum habeat : si sub mediâ imâve tunicâ, totæ hæ extrâ scrotum collocandæ excidendæque sunt.

SECT. XXII. Ramex autem, si super ipsum scrotum est, adurendus est tenuibus et acutis ferramentis, quæ ipsis venis infigantur; cum eo, ne ampliùs quàm has urant; maximèque ubi inter se implicatæ glomerantur, eò ferrum admovendum est : tùm super farina ex aquâ frigidâ subacta injicienda est, utendumque eo vinculo quod idoneum esse ani curationibus posui. Tertio die, lenticula cum melle imponenda est : post, ejectis crustis, ulcera melle purganda, rosâ implenda, et ad cicatricem aridis linamentis perducenda sunt. Quibus verò super mediam tunicam venæ tument, incidendum inguen est, atque tunica promenda; ab eâque venæ digito vel manubriolo scalpelli separandæ. Quâ parte inhærebunt, eâ et ab superiore et ab inferiore parte lino vinciendæ; tùm sub ipsis vinculis præcidendæ, reponendusque testiculus est. At ubi supra tertiam tunicam ramex insedit, mediam excidi necesse est : deindè, si duæ tresve venæ tument, et ita pars aliqua obsidetur, ut major eo vitio vacet, idem faciendum quod suprâ scriptum est; ut ab inguine et à testiculo deligatæ venæ præcidantur, isque condatur. Sin totum id ramex obsederit per plagam demittendus digitus index erit, subjiciendusque venis sic, ut paulatim eas protrahat, æquè adducendo, donec is testiculus par alteri fiat. Tùm fibulæ oris sic injiciendæ, ut simul eas quoque venas comprehendant. Id hoc modo fit. Acus ab exteriorè parte oram vulneris perforat : tùm non per ipsam venam, sed per membranam ejus immittitur; per eamque in alteram oram compellitur. Venæ vulnerari non debent, ne sanguinem fundant. Membrana semper inter has venas est, ac neque periculum affert; et filo compre-

hensas illas abundè tenet : itaque etiam satis est duas fibras esse : tùm venæ, quæcunque protractæ sunt, in ipsum inguen averso specillo compelli debent. Solvendi fibras tempus, inflammatione finitâ, et purgato vulnere, est, ut unâ simul, et oras, et venas, cicatrix devinciat. Ubi verò inter imam tunicam et ipsum testiculum nervumque ejus ramex ortus est, una curatio est, quæ totum testiculum abscindit. Nam neque ad generationem quidquam is confert, et omnibus indecorè, quibusdam etiam cum dolore dependet. Sed tùm quoque inguen incidendum, media tunica promenda, atque excidenda est : idem imæ faciendum, nervusque, ex quo testiculus dependet, præcidendus. Post id venæ et arteriæ ad inguen lino deligandæ, et infra vinculum abscindendæ sunt.

SECT. XXIII. Caro quoque, si quandò inter tunicas increvit, nihil dubii est, quin eximenda sit; sed id, ipso scroto inciso, fieri commodius est. At si nervus induit, curari res neque manu, neque medicamento potest. Urgent enim febres ardentes, et aut virides, aut nigri vomitus : præter hæc ingens sitis, et linguæ aspritudo, ferèque à die tertio, spumans bilis alvo cum rosione redditur. Atque neque assumi facilè cibus, neque contineri potest, neque multò post extremæ partes frigescunt, tremor oritur, manus sine ratione extenduntur; deindè in fronte frigidus sudor, eumque mors sequitur.

SECT. XXIV. Ubi verò in ipso inguine ramex est, si tumor modicus est, id semel incidi; si major, duabus lineis debet, ut medium excidatur : deindè, non extracto testiculo, sicut intestinis quoque prolapsis interdum fieri docui, colligendæ venæ, vinciendæque, ubi tunicis inhærebunt, et sub his nodis præcidendæ sunt. Neque quidquam novi curatio vulneris ejus requirit.

SECT. XXV. 1. Ab his, ad ea transeundum est, quæ in cole ipso fiunt. In quo si glans nuda est, vultque aliquis eam decoris causâ tegere, fieri potest; sed expeditius in puero quàm in viro: in eo cui id naturale est, quàm in eo qui quarundam gentium more circumcisis est: in eo cui glans parva, juxtaque eam cutis spatiosior, brevis verò ipse coles est, quàm in quo contraria his sunt. Curatio autem eorum quibus id naturale est, ejusmodi est. Cutis circa glandemprehenditur, et extenditur, donec illam ipsam condatur; ibique deligatur. Deindè juxta pubem in orbem tergus inciditur, donec coles nudetur; magnâque curâ cavetur ne, vel urinæ iter, vel venæ quæ ibi sunt, incidantur. Quo facto, cutis ad vinculum inclinatur, nudaturque circa pubem velut circulus, eoque linamenta dantur, ut caro increseat et id impleat, satisque velamenti suprâ latitudo plagæ præstet. Sed donec cicatrix sit, vinctum esse id debet, in medio tantum relicto exiguo urinæ itinere. At in eo qui circumcisis est, sub circulo glandis scalpello diducenda cutis ab interiore cole est. Non ita verò dolet; quia, summo soluto, deduci deorsum usque ad pubem manu potest: neque ideò sanguis profluit. Resoluta autem cutis rursus extenditur ultra glandem: tùm multâ frigidâ aquâ fovetur, emplastroque circumdatur quod valentem inflammationem reprimat. Proximisque diebus et propè à fame victus est, ne fortè eam partem satietas excitet. Ubi jam sine inflammatione est, deligari debet à pube usque glandis circulum: super glandem autem, averso emplastro imposito, induci. Sic enim fit ut inferior pars glutinetur; superior ita sanescat, ne inhæreat.

2. Contrâ, si glans ita contexta est, ut nudari non possit, quod vitium Græci φέωσις appellant, aperienda est; quod hoc modo fit. Subter à summâ orâ cutis in-

ciditur rectâ lineâ usque ad frenum, atque ita superius tergus relaxatum cedere retrò potest. Quòd si parùm sic profectum est, aut propter angustias, aut propter duritiem tergoris, protinùs triangulâ formâ cutis ab inferiore parte excidenda est sic, ut vertex ejus ad frenum, bâsis in tergo extremo sit: tùm, superdanda linamenta sunt, aliquaque medicamenta quæ ad sanitatem perducant. Necessarium autem est, donec cicatrix sit, conquiescere: nam ambulatio, atterendo ulcus, sordidum reddit.

3. Infibulare quoque adolescentulos, interdùm vocis, interdùm valetudinis causâ, quidam consuerunt: ejusquæ hæc ratio est. Cutis quæ super glandem est, extenditur, notaturque utrinquè à lateribus atramento quâ perforetur; deindè remittitur. Si super glandem notæ revertuntur, nimis apprehensum est, et ultrâ notari debet: si glans ab his libera est, is locus idoneus fibulæ est. Tùm, quâ notæ sunt, cutis acu filum ducente transsuitur, ejusque fili capita inter se deligantur, quotidieque id movetur, donec circa foramina cicatriculæ fiant. Ubi hæc confirmatæ sunt, exempto filo, fibula inditur, quæ quò levior, eò melior est. Sed hoc quidem sæpiùs inter supervacua quàm inter necessaria est.

SECT. XXVI. 1. Res verò interdùm cogit emoliri manu urinam; quùm illa non redditur, aut quia senectute iter ejus collapsum est, aut quia calculus, vel concretum aliquid ex sanguine intùs se opposuit: ac mediocris quoque inflammatio sæpè eam reddi naturaliter prohibet: idque non in viris tantummodò, sed in feminis quoque interdùm necessarium est. Ergo æneæ fistulæ fiunt, quæ ut omni corpori, ampliori minorique, sufficiant, ad mares, tres, ad feminas duæ medico habendæ sunt. Ex virilibus maxima decem et quinque est digitorum, media duodecim, minima novem: ex mulie-

bribus, major novem, minor sex. Incurvas verò esse eas paulùm, sed magis viriles, oportet, lævesque admodum; ac neque nimis plenas, neque nimis tenues. Homo tùm resupinus, eo modo quo in curatione ani figuratur, super subsellium aut lectum collocandus est. Medicus autem à dextro latere, sinistrâ quidem manu colem masculi continere, dextrâ verò fistulam demittere in iter urinæ debet: atque ubi ad cervicem vesicæ ventum est, simul cum cole fistulam inclinatam in ipsam vesicam compellere, eamque, urinâ redditâ, recipere. Femina brevius urinæ iter et rectius habet, quod mammulæ simile inter imas oras super naturale positum, non minùs sæpè auxilio eget, aliquandò minùs difficultatis exhibet. Nonnunquàm etiam prolapsus in ipsam fistulam calculus, qui subindè eâ extenuatur, non longè ab exitu inhærescit. Eum, si fieri potest, oportet evelere, vel oriculario specillo, vel eo ferramento quo in sectione calculus protrahitur. Si id fieri non potuit, cutis extrema quàm plurimùm attrahenda, et, conditâ glande, lino vincienda est: deindè à latere rectâ plagâ coles incidendus, et calculus eximendus est; tùm cutis remittenda. Sic enim fit, ut incisum colem integra pars cutis contegat, et urina naturaliter profluat.

2. Quùm vesicæ verò calculique facta mentio sit, locus ipse exigere videtur, ut subjiciam, quæ curatio calculosis, quùm aliter succurri non potest, adhibeatur. Ad quam festinare, quùm præceps sit, nullo modo convenit. Ac neque omni tempore, neque in omni ætate, neque in omni vitio id experiendum est, sed solo vere, in eo corpore quod jam novem annos, nondùm quatuordecim excessit; et, si tantùm mali subest, ut neque medicamentis vinci possit, neque etiam trahi posse videatur, quominùs, interposito aliquo spatio, interimat. Non quo tamen non interdùm etiam temeraria

medicina proficiat, sed quo sæpiùs utique in hoc fallat, in quo plura, et genera, et tempora, periculi sunt: quæ simul enī ipsâ curatione proponam. Igitur, ubi ultima experiri statutum est, antè aliquot diebus victu corpus præparandum est, ut modicos, ut salubres cibos, ut minimè glutinosos assumat, ut aquam bibat. Ambulandi verò inter hæc exercitatione utatur, quò magis calculus ad vesicæ cervicem descendat. Quod an inciderit, digitis quoque, sicut in curatione docebo, in anum demissis, cognoscitur. Ubi ejus rei fides est, pridie is puer in jejuniis continendus est, et tū loco calido curatio adhibenda; quæ hoc modo ordinatur. Homo prævalens et peritus in sedili alto consedit, supinumque eum et aversum, super genua sua coxis ejus collocatis, comprehendit, reductisque ejus cruribus, ipsum quoque jubet, manibus ad suos poplites datis, eos quàm maximè possit attrahere, simulque ipse sic eos continet. Quòd si robustius corpus ejus est qui curatur, duobus sedilibus junctis, duo valentes insident, quorum et sedilia, et interiora crura inter se deligantur, ne diduci possint. Tū is super duorum genua eodem modo collocatur, atque alter, prout consedit, sinistrum crus ejus, alter dextrum, simulque ipse poplites suos attrahit. Sive autem unus, sive duo continent, super humeros ejus suis pectoribus incumbunt. Ex quibus evenit, ut inter ilia sinus super pubem sine ullis rugis sit extensus, et, in angustum compulsâ vesicâ, faciliùs calculus capi possit. Præter hæc etiamnum à lateribus duo valentes obijciuntur, qui circumstantes labare, vel unum, vel duos, qui puerum continent, non sinunt. Medicus deindè, diligenter unguibus circumcisis, atque sinistræ manûs duos digitos, indicem et medium, leniter priùs unum, deindè alterum, in anum ejus demittit, dextræque digitos super imum abdomen leniter im-

ponit, ne si utrinquè digiti circa calculum vehementer concurrerint, vesicam lædant. Neque verò festinanter in hâc re, ut in plerisque, agendum est; sed ita ut quàm maximè id tutò fiat: nam læsa vesica nervorum distentiones cum periculo mortis excitat. Ac primum circa cervicem quæritur calculus: ubi repertus est, minore negotio expellitur. Et ideò dixi, ne curandum quidem, nisi quùm hoc indiciiis suis cognitum est. Si verò aut ibi non fuit, recessit retrò, digiti ad ultimam vesicam dantur, paulatimque dextra quòque manus ejus ultrà translata subsequitur. Atque ubi repertus est calculus, qui necesse est in manus incidat, eò curiosiùs deducitur, quò minor læviorque est; ne effugiat, idest, ne sæpiùs agitanda vesica sit. Ergo ultra calculum dextra semper manus ejus opponitur, sinistra digitis deorsum eum compellit, donec ad cervicem pervenitur: in quam, si oblongus est, sic compellendus est, ut pronus exeat: si planus, sic ut transversus sit: si quadratus, ut duobus angulis sedeat: si alterâ parte plenior, sic ut priùs eâ quâ tenuior sit, evadat. In rotundo nihil interesse ex ipsâ figurâ patet, nisi si lævior alterâ parte est, ut ea antecedit. Quùm jam eò venit, incidi super vesicæ cervicem juxta anum cutis plagâ lunatâ usque ad cervicem vesicæ debet, cornibus ad coxas spectantibus paulum; deindè, eâ parte quâ resina plaga est, etiamnum sub cute altera transversa plaga facienda est, quâ cervix aperiatur, donec urinæ iter pateat sic, ut plaga paulò major quàm calculus sit. Nam qui metu fistulæ, quam illo loco *κορυάδα* Græci vocant, parùm patefaciunt, cum majore periculo eòdem revolvuntur; quia calculus iter, quùm vi promitur, facit, nisi accipit: idque etiam perniciosius est, si figura quoque calculi vel aspritudo aliquid eò contulit. Ex quo et sanguinis profusio, et

distentio nervorum fieri potest. Quæ si quis evasit, multò tamen patientiorem fistulam habiturus est, ruptâ cervice, quàm habuisset incisâ. Quùm verò patefacta est, in conspectum calculus venit, in cujus colore nulum discrimen est. Ipse si exiguus est, digitis ab alterâ parte propelli, ab alterâ protrahi potest. Si major, injiciendus à superiore ei parte uncus est, ejus rei causâ factus. Is est ad extremum tenuis, in semicirculi speciem retusæ latitudinis, ab exteriori parte lævis quâ corpori jungitur, ab interiori asper, quâ calculum attingit. Isque longior potiùs esse debet: nam brevior extrahendi vim non habet. Ubi injectus est, in utrumque latus inclinandus est, ut appareat an calculus teneatur; quia si apprehensus est, ille simul inclinatur. Idque eo nomine opus est, ne, quùm adduci uncus cœperit, calculus intùs effugiat, hic in oram vulneris incidat, eamque convulneret. In quâ re, quod periculum esset, jam suprâ proposui. Ubi satis teneri calculum patet, eodem penè momento triplex motus adhibendus est, in utrumque latus, deindè extrâ, sic tamen ut leniter id fiat, paulùmque primò calculus attrahatur: quo facto, attollendus uncus extremus est, uti intùs magis maneat, faciliùsque illum producat. Quòd si aliquandò à superiore parte calculus parùm commodè comprehenditur, à latere erit apprehendendus. Hæc est simplicissima curatio. Sed varietas rerum quasdam etiamnum animadversiones desiderat. Sunt enim quidam non asperi tantummodò, sed spinosi quoque calculi, qui per se quidem delapsi in cervicem, sine ullo periculo eximuntur. In vesicâ verò, non tutò vel hi conquiuntur, vel attrahuntur; quoniam ubi illam convulnerant, ex distentione nervorum mortem maturant: multòque magis, si spina aliqua vesicæ inhæret, eamque, quùm duceretur, duplicavit. Colligitur autem

eo quod difficilius urina redditur, in cervice calculum esse; eo quod cruenta destillat, illum esse spinosum : maximèque id sub digitis quoque experiendum est, neque adhibenda manus, nisi id constitit. Ac tùm quoque leniter intus digiti objiciendi, ne violenter promovendo convulnerent : tùm incidendum. Multi hìc quoque scapello usi sunt. Meges (quoniam is infirmior est, potestque in aliquâ prominentiâ incidere, incisoque super illam corpore, quâ cavum subest, non secare, sed relinquere quod iterùm incidi necesse sit) ferramentum fecit rectum, in summâ parte labrosum, in imâ semicirculatum acutumque. Id receptum inter duos digitos, indicem ac medium, super pollice imposito, sic deprimebat, ut simul cum carne, si quid ex calculo prominebat, incideret. Quò consequebatur, ut semel quantùm satis esset, aperiret. Quocunque autem modo cervix pate facta est, leniter extrahi, quod asperum est, debet, nullâ propter festinationem vi admotâ.

3. At calculus arenosus, et ante manifestus quoniam et urina quæ redditur, arenosa est; et in ipsâ curatione, quoniam inter subjectos digitos neque æquè, sed leniter renititur, et insuper dilabitur. Item molles calculos, et ex pluribus minutisque, sed inter se parùm adstrictis compositos, indicat urina trahens quasdam quasi squamulas. Hos omnes, leniter permutatis subindè digitorum vicibus, sic oportet adducere, ne vesicam lædant, neve intus aliquæ dissipatæ reliquiæ maneant, quæ postmodum curationi difficultatem faciant. Quidquid autem ex his in conspectum venit, vel digitis, vel unco eximendum est. At si plures calculi sunt, singuli protrahi debent; sic tamen, ut si quis exiguus supererit, potiùs relinquatur. Si quidem in vesicâ difficulter invenitur, inventusque, celeriter effugit. Ita longâ

inquisitione vesica læditur, excitatque inflammationes mortiferas, adeò ut quidam non secti; quùm diù frustra quæ per digitos vesica esset agitata, decesserint. Quibus accedit etiam, quòd exiguus calculus ad plagam urinâ postea promovetur et excidit. Si quando autem is major non videtur, nisi ruptâ cervice, extrahi posse, findendus est: cujus repertor Ammonius, ob id λιθοτόμος cognominatus est. Id hoc modo fit. Uncus injicitur calculo sic, ut facilè eum concussum quoque teneat, ne is retrò revolvatur: tùm ferramentum adhibetur crassitudinis modicæ, primâ parte tenui, sed retusâ; quod admotum calculo ex alterâ parte ictum findit: magnâ curâ habitâ, ne aut ad ipsam vesicam ferramentum perveniat, aut calculi fracturâ ne quid incidat.

4. Hæ verò curationes in feminis quoque similes sunt, de quibus tamen parùm, propriè quædam dicenda sunt. Si quidem in his ubi parvulus calculus est, scalpellus supervacuus est, quia is urinâ in cervicem compellitur, quæ et brevior quàm in maribus, et laxior est. Ergo et per se sæpè excidit, et si in primo quod est angustius, inhæret; eodem tamen unco sine ullâ noxâ educitur. At in majoribus calculis necessaria eadem curatio est: sed virgini subijci in anum digiti, tanquàm masculo; mulieri, per naturale ejus debent. Tùm virgini quidem, sub'imâ sinisteriore orâ; mulieri verò inter urinæ iter et os pubis incidendum est sic, ut utroque loco plaga transversa sit: neque terreri convenit, si plus ex muliebri corpore sanguinis profluit.

5. Calculo evulso, si valens corpus est, neque magnoperè vexatum, sinere oportet sanguinem fluere, quò minor inflammatio oriatur. Atque ingredi quoque eum paulùm non alienum est, ut excidat, si quid intùs concreti sanguinis mansit. Quòd si per se non destitit, rursùs, ne vis omnis intereat, suppressi debet: idque

protinùs in imbecillioribus, ab ipsâ curatione faciendum est: siquidem, ut distentione nervorum periclitatur aliquis, dùm vesica ejus agitur, sic alter metus excipit, remotis medicaminibus, ne tantùm sanguinis profluat, ut occidat. Quod ne incidat, desiderare is debet in acre acetum, cui aliquantum salis sit adjectum: sub quo et sanguis ferè conquiescit, et adstringitur vesica; ideòque minùs inflammatur. Quòd si parùm proficit, agglutinanda cucurbitula est et inguinibus, et coxis, et super pubem. Ubi jam satis vel evocatus est sanguis, vel prohibitus, resupinus collocandus est sic, ut caput humile sit, coxæ paulùm excitentur: ac super vulnus imponendum est duplex aut triplex linteolum, aceto madens. Deindè, interpositis duabus horis, in solium is aquæ calidæ resupinus demittendus est sic, ut à genibus ad umbilicum aqua teneat, cætera vestimentis circumdata sint, manibus tantummodò pedibusque nudatis, ut et minùs digeratur, et ibi diutiùs maneat. Ex quo sudor multus oriri solet, qui spongiâ subindè in faciem detergendus est, finisque ejus fomenti est, donec infirmando offendat. Tùm multo is oleo perungendus, inducendusque hapsus lanæ mollis, tepido oleo repletus, qui pubem, et coxas, et inguina, et plagam ipsam contextam eodem ante linteolo protegat; isque subindè oleo tepido madefaciendus est, ut neque frigus ad vesicam admittat, et nervos leniter molliat. Quidam cataplasmatibus calefacientibus utuntur: ea plus pondere nocent, quo, vesicam urgendo, vulnus irritant, quàm calore proficiunt. Ergo ne vinculum quidem ullum necessarium est. Proximo die, si spiritus difficiliùs redditur, si urina non excedit, si locus circa pubem maturè intumuit, scire licet in vesica sanguinem concretum remansisse: igitur, demissis eodem modo digitis, leniter pertractanda vesica est, et discutienda, si qua coierunt: quo fit ut per

vulnus postea procedant. Non alienum etiam est, oriculario clystere acetum nitro mixtum per plagam in vesicam compellere: nam sic quoque discutiuntur, si qua cruenta coierunt: eaque facere etiam primo die convenit, si timemus, ne quid intus sit, maximèque, ubi ambulando id elicere imbecillitas prohibuit. Cætera eadem facienda sunt, ut demittatur in solium, ut eodem modo panniculus, eodem lana superinjiciatur. Sed neque sæpe neque tam diù in aquâ calidâ puer habendus quàm adolescens est, infirmus quàm valens; levi quàm graviore inflammatione affectus; is cujus corpus digeritur, quàm is cujus adstrictum est. Inter hæc verò, si somnus est, et æqualis spiritus, et madens lingua, et sitis modica, et venter imus sedet, et mediocris est cum febre modicâ dolor, scire licet rectè procedere curationem. Atque in his inflammatio ferè quinto vel septimo die finitur: quâ levatâ, solium supervacuum est. Supini tantummodò vulnus aquâ calidâ fovendum est, ut si quid urinae rodit, abluatur. Imponenda autem medicamenta sunt pus moventia, et si purgandum ulcus videbitur, melle illinendum: id, si rodet, rosâ temperabitur. Huic curationi aptissimum videtur enneapharmacum emplastrum: nam et sebum habet ad pus movendum, et mel ad ulcus repurgandum: medullam etiam maximèque vitulinam, quæ in id, ne fistula relinquatur, præcipuè proficit. Linamenta verò tùm super ulcus non sunt necessaria; super medicamentum ad id continendum rectè imponuntur. At ubi ulcus purgatum est, puro linamento ad cicatricem perducendum est. Quibus temporibus tamen, si felix curatio non fuit, varia pericula oriuntur: quæ præsapire protinùs licet, si continua vigilia est, si spiritus difficultas, si lingua arida est, si sitis vehemens, si venter imus tumet, si vulnus hiat, si transfluens urina id non rodit, si similiter ante

tertium diem quædam livida excidunt, si vehementes dolores sunt, si post diem quintum magnæ febres urgent, et fastidium cibi permanet, si cubare in ventrem jucundius est. Nihil tamen pejus est distentione nervorum, et ante nonum diem, vomitu bilis. Sed quùm inflammationis sit metus, succurri abstinentiâ, modicis et tempestivis cibis, inter hæc fomentis, et quibus suprà scripsimus, oportet.

SECT. XXVII. Proximus canceri metus est. Is his cognoscitur, si et per vulnus, et per ipsum colem fluit saniem mali odoris, cumque eâ quædam à concreto sanguine non abhorrentia, tenesque carunculæ lanulis similes: præter hæc, si oræ vulneris aridæ sunt, si dolent inguina, si febris non desinit, eaque in noctem augetur, si inordinati horrores accedunt. Considerandum autem est, in quam partem cancer is tendat: si ad colem, indurescit is locus, et rubet, et tactu dolorem excitat, testiculique intumescunt: si in idsam vesicam, ani dolor sequitur, coxæ duræ sunt, non facile crura extendi possunt. At si in alterutrum latus, oculis id expositum est, paresque utrinquè, easdemque notas, sed minores habet. Primum autem ad rem pertinet, corpus rectè jacere, ut superior pars semper eadem sit in quam vitium fertur: ita si ad colem it, supinus is collocari debet, si ad vesicam, in ventrem; si in latus, in id quod integrius est. Deindè ubi ventum fuerit ad curationem, homo in aquam demittetur, in quâ marrubium decoctum sit, aut cupressus, aut myrtus, idemque humor clystere intùs adigetur: tùm superponetur lenticula cum malicorio mixta; quæ utraque ex vino decocta sint: vel rubus, aut oleæ folia, eodem modo decocta, aliave medicamenta, quæ ad cohibendos purgandosque cancos proposuimus: ex quibus, si qua erunt arida, per scriptorium calanum inspirabuntur. Ubi

stare cœperit cancer, mulso vulnus eluetur, vitabiturque eo tempore ceratum quod, ad recipiendum id malum, corpus emollit: potiùs plumbum elotum cum vino inungetur, superque idem linteolo illitum imponetur; sub quibus perveniri ad sanitatem potest; cum eo tamen ut non ignoremus, orto cancro, sæpè affici stomachum, qui cum vesicâ quodam consortio est, exque eo fieri ut neque retineatur cibus, neque si quis retentus est, concoquatur, neque corpus alatur: ideòque ne vulnus quidem aut purgari, aut ali possit; quæ necessariò mortem maturant. Sed ut his succurri nullo modo potest, sic à primo tamen die tenenda ratio curationis est: in quâ quædam observatio ad cibum quoque potionemque pertinens necessaria est. Nam cibus inter principia non nisi humidus dari debet: ubi ulcus purgatum est, ex mediâ materiâ olera et salsamenta semper aliena sunt. Potione opus est modicâ: nam si parùm bibitur, accenditur vulnus, et vigilia urget, et vis corporis minuitur: si plus æquo assumitur, subindè vesica impletur, eoque irritatur. Non nisi aquam autem bibendam esse manifestius, quàm ut subindè dicendum sit. Solet verò sub ejusmodi victu evenire, ut alvus non reddatur. Hæc aquâ ducenda est in quâ vel fœnum græcum, vel malva decocta sit. Idem humor rosâ mixtus in ipsum vulnus oriculario clystere agendus est, ubi id roditurina, neque purgari patitur. Ferè primò per vulnus exit hæc, deindè, eo sanescente, dividitur, et pars per colem descendere incipit, donec ex toto plaga claudatur; quod interdùm tertio mense, interdùm non ante sextum, nonnumquàm exacto quoque anno fit. Neque desperari debet solida glutinatio vulneris, nisi ubi aut vehementer rupta cervix est, aut ex cancro multæ magnæque carunculæ, simulque nervosa aliqua exciderunt. Sed ut vel nulla ibi fistula, vel exigua admodum reliu-

quatur, summâ curâ providendum est. Ergo quùm jam ad cicatricem vulnus in tendit, extentis jacere feminibus et cruribus oportet, nisi tamen molles arenosive calculi fuerunt: sub his enim tardiùs vesica purgatur: ideòque diutiùs plagam patere necessarium est; et tùm demùm, ubi jam nihil tale extrâ fertur, ad cicatricem perducì. Quòd si antequàm vesica purgata est, oræ se glutinarunt, dolorque et inflammatio redierunt, vulnus digitis vel averso specillo diducendum est, ut torquentibus exitus detur; hisque effusis, quùm diutiùs pura urina descendit, tùm demùm quæ cicatricem inducant, imponenda sunt; extendendique, ut suprâ docui, pedes quàm maximè juncti. Quòd si fistulæ metus, ex his causis quas proposui, subesse videbitur, quò faciliùs claudatur ea, vel certè coangustetur, in anum quoque danda plumbea fistula est; extentisque cruribus, femina talique inter se deligandi sunt, donec qualis futura est, cicatrix sit.

SECT. XXVIII. Et hoc quidem commune esse maribus et feminis potest: propriè verò quædam ad feminas pertinent, ut in primis quòd earum naturalia nonnunquam, inter se glutinatis oris, concubitum non admittunt. Idque interdùm evenit protinùs in utero matris, interdùm exulceratione in his partibus factâ, et per malam curationem his oris sanescendo junctis. Si ex utero est, membrana ori vulvæ opposita est; si ex ulcere, caro id replevit. Oportet autem membranam duabus lineis inter se transversis incidere ad similitudinem literæ X, magnâ curâ habitâ, ne urinæ iter violetur: deindè undiquè eam membranam excidere. At si caro increvit, necessarium est rectâ lineâ patefacere. Tùm ab orâ vel vulsellâ, vel hamo apprehensâ, tanquàm habenulam, excidere; et intùs implicitum in longitudinem linamentum (λημνίσχον Græci vocant)

in aceto tinctum demittere, suprâque succidam lanam aceto madentem deligare: tertio die solvere ulcus, et sicut alia ulcera curare: cùmque jam ad sanitatem tendet, plumbeam fistulam medicamento cicatricem inducente illinere, eamque intus dare; suprâque idem medicamentum injicere, donec ad cicatricem plaga perveniat.

SECT. XXIX. Ubi concepit autem aliqua, si jam propè maturus partus intus emortuus est, neque excidere per se potest, adhibenda curatio est, quæ numerari inter difficillimas potest: nam et summam prudentiam moderationemque desiderat, et maximum periculum affert. Sed vulvæ natura mirabilis, quum in multis aliis, tum in hac re quoque facilè cognoscitur. Oportet autem ante omnia resupinam mulierem transverso lecto sic collocare, ut feminibus ejus ipsius ilia comprimantur: quo fit ut, et imus venter in conspectu medici sit, et infans ad os vulvæ compellatur; quæ vulva, emortuo partu, id comprimit, ex intervallo verò paulum dehiscit. Hâc occasione usus medicus, unctæ manûs indicem digitum primum debet inserere, atque ibi continere donec iterum id aperiatur, rursusque alterum digitum demittere debebit, et per easdem occasiones alios, donec tota esse intus manus possit. Ad cujus rei facultatem multum confert et magnitudo vulvæ, et vis nervorum ejus, et corporis totius habitus, et mentis etiam robur: quum præsertim intus nonnunquam etiam duæ manus dari debeant. Pertinet etiam ad rem quàm calidissimum esse imum ventrem et extrema corporis, nequedum inflammationem cœpisse, sed, recenti re, protinus adhiberi medicinam. Nam si corpus jam intumuit, neque demitti manus, neque educi infans nisi ægerrimè potest; sequiturque sæpè cum vomitu et cum tremore mortifera nervorum distentio. Verum intus emortuo corpori manus injecta, protinus habitum ejus sentit.

Nam aut in caput, aut in pedes conversum est, aut transversum jacet; ferè tamen sic ut vel manus ejus, vel pes, in propinquo sit. Medici verò propositum est, ut eum manu dirigat, vel in caput, vel etiam in pedes, si fortè aliter compositus est: ac si nihil aliud est, manus vel pes apprehensus, corpus rectius reddit; nam manus in caput, pes in pedes eum convertit. Tùm si caput proximum est, demitti debet uncus undiquè lævis, acuminis brevis, qui vel oculo, vel auri, vel ori, interdum etiam fronti, rectè injicitur, deindè attractus infantem educit. Neque tamen quolibet is tempore extrahi debet: nam si compresso vulvæ ore id tentatum est, non emittente eo, infaus abrumpitur, et unci acumen in ipsum os vulvæ delabitur, sequiturque nervorum distentio, et ingens periculum mortis. Igitur compressâ vulvâ, conquiescere; hiante, leniter trahere oportet, et per has occasiones paulatim eum educere. Trahere autem dextra manus uncum, sinistra intus posita infantem ipsum, simulque dirigere eum debet. Solet etiam evenire, ut is infans humore distendatur, exquè eo profluat foedi odoris sanies. Quòd si tale est, indice digito corpus illud forandum est, ut effuso humore extenuetur: tùm id leniter per ipsas manus recipiendum est; nam uncus injectus hebeti corpusculo facilè elabitur: in quo quid periculi sit, suprâ positum. Sed in pedes quoque conversus infans non difficulter extrahitur, quibus apprehensis, per ipsas manus commodè educitur. Si verò transversus est, neque dirigi potuit; uncus alæ injiciendus, paulatimque attrahendus est: sub quo ferè cervix replicatur, retròque caput ad reliquum corpus spectat. Remedio est cervix præcisa, ut separatim utraque pars auferatur. Id unco fit, qui priori similis in inferiore tantum parte per totam aciem exacuitur. Tùm id agendum est, ut antè caput, deindè reliqua pars au-

feratur; quia ferè majore parte extractâ, caput in vacuam vulvam prolabitur, extrahique sine summo periculo non potest. Si tamen id incidit, super ventrem mulieris duplici panniculo injecto, valens homo non imperitus à sinistro latere ejus debet assistere, et super imum ventrem ejus duas manus imponere, alterâque alteram premere; quo fit ut illud caput ad os vulvæ compellatur: idque eâdem ratione quæ suprâ posita est, unco extrahitur. At si pes alter juxtâ repertus est, alter retrò cum corpore est, quidquid protractum est, paulatim abscindendum est: et si clunes os vulvæ urgere cœperunt, iterum retrò repellendæ sunt, conquisitusque pes ejus adducendus: aliæque etiamnum difficultates faciunt, ut qui solidus non exit, concisus eximi debeat. Quoties autem infans protractus est, tradendus ministro est, ut is eum supinis manibus sustineat, medicus deindè sinistrâ manu leniter trahere umbilicum debet, ità ne abrumpat, dextrâque eum sequi usque ad eas quas secundas vocant (quod velamentum infantis intùs fuit), hisque ultimis apprehensis, venulas membranulasque omnes eâdem ratione manu diducere à vulvâ, totumque illud extrahere, et si quid intùs prætereà concreti sanguinis remanet. Tùm compressis in unum feminibus, illa in conclavi collocanda est, modicum calorem, sine ullo perflatu, habente. Super imum ventrem ejus imponenda lana succida, in aceto et rosâ tincta. Reliqua curatio talis esse debet, qualis in inflammationibus, et in his vulneribus, quæ in nervosis locis sunt, adhibetur.

SECT. XXX. I. Ani quoque vitia, ubi medicamentis non vincuntur, manûs auxilium desiderant. Ergò, si qua scissâ in eo vetustate induruerunt, jamque callum habent, commodissimum est ducere alvum, tùm spongiam calidam admove, ut relaxentur illa, et foras prodeant. Ubi in conspectu sunt, scalpello singula excidere,

et ulcera renovare; deindè imponere linamentum molle, et suprà linteolum illitum melle, locumque eum melli lanâ implere, et ita vincire; altero die, deincepsque cæteris, lenibus medicamentis uti, quæ ad recentia eadem vitia necessaria esse aliàs proposui; et utique, per primos dies, sorbitionibus eum sustinere, paulatim deindè cibis adjicere aliquid, generis tamen ejus quod eodem loco præceptum est. Si quandò autem ex inflammatione pus in his oritur, ubi primùm id apparuit, incidendum est, ne anus ipse suppuret. Neque tamen antè properandum est: nam si crudum incisum est, inflammationi multùm accedit, et puris aliquantò ampliùs concitatur. His quoque vulneribus, lenibus cibis iisdemque medicamentis opus est.

2. At tubercula quæ *κονδυλώματα* appellantur, ubi induruerunt, hâc ratione curantur. Alvus ante omnia ducitur; tùm vulsellâ tuberculum apprehensum juxta radices exciditur. Quod ubi factum est, eadem sequuntur quæ suprà post curationem adhibenda esse proposui: tantummodò si quid increscit, squamâ æris coërcendum est.

3. Ora etiam venarum fundentia sanguinem, sic tolluntur. Ubi sanguini qui effluit, sanies adjicitur, alvus acribus ducitur, quò magis ora promoveantur; eoque fit ut omnia venarum quasi capitula conspicua sint. Tùm si capitulum exiguum est, basimque tenuem habet, adstringendum lino paulùm suprà est, quàm ubi cum ano committitur. Imponenda spongia ex aquâ calidâ est, donec id liveat: deindè aut ungue, aut scalpello suprà nudum id exulcerandum est. Quod nisi factum est, magni dolores subsequuntur, interdùm etiam urinæ difficultas. Si id majus est, et basis latior, hamulo uno aut altero excipiendum est, paulùmque suprà basim incidendum, neque relinquendum quidquam ex eo capitulo,

neque quidquam ex ano demendum est. Quod consequitur is, qui neque nimium, neque parum hamos ducit. Quà incisum est, acus debet immitti, infraque eam lino id capitulum alligari. Si duo triaue sunt, inum quodque primum curandum est; si plura, non omnia simul, ne tempore eodem undiquè teneræ cicatrices sint. Si sanguis profluit, excipiendus est spongiâ, deindè linamentum imponendum, ungenda femina et inguina, et quidquid juxtà ulceris est; ceratumque superdandum est, et farinâ hordeaceâ calidâ implendus locus est; et sic deligandus est. Postero die, is desiderare in aquâ calidâ debet, eodemque cataplasmate foveri. Ac bis die, et ante curationem, et post eam, cervices ac femina liquido cerato perungenda sunt, tepidoque is loco continendus. Interpositis quinque aut sex diebus, oriculario specillo linamenta educenda. Si capita simul non exciderunt, digito promovenda: tum lenibus medicamentis, iisdemque quæ alibi posui, ulcera ad sanitatem perducenda. Finito vitio, quemadmodum agendum esset, jam aliàs superiùs exposui.

SECT. XXXI. Ab his ad crura proximus transitus est, in quibus orti varices non difficili ratione tolluntur. Hùc autem, et earum venularum quæ in capite nocent, et eorum varicum qui in ventre sunt, curationem distuli, quoniam ubique eadem est. Igitur vena omnis quæ noxiâ est, aut adusta tabescit, aut manu eximitur. Si recta est, si, quamvis transversa, tamen simplex, si modica est, meliùs aduritur. Si curva est, et velut in orbes quosdam implicatur, pluresque inter se involvuntur, utilius eximere est. Adurendi ratio hæc est. Cutis superinciditur: tum patefacta vena tenui et re-tuso ferramento candente modicè premitur; vitaturque, ne plagæ ipsius cræ adurantur, quas reducere hamulis facile est. Id, interpositis ferè quaternis digitis, per to-

tum varicem fit; et tùm superimponitur medicamentum quo adusta sanantur. At exciditur hoc modo. Cute eadem ratione super venam incisâ, hamulo oræ excipiuntur, scalpelloque undiquè à corpore vena diducitur; caveturque, ne inter hæc ipsa lædatur; eique retusus hamulus subjicitur; interpositoque eodem ferè spatio quod suprâ positum est, in eâdem venâ idem fit quæ quò tendat, facilè hamulo extento cognoscitur. Ubi jam idem, quacunque varices sunt, factum est, uno loco adducta per hamulum vena præciditur: deindè quâ proximus hamus est, attrahitur et evellitur; ibique rursùs abscinditur. Ac sic undiquè varicibus crure liberato, tùm plagarum oræ committuntur, et super emplastrum glutinans injicitur.

SECT. XXXII. At si digiti vel in utero protinùs, vel propter communem exulcerationem postea cohæserunt, scalpello diducuntur, dein separatim uterque non pingui emplastro circumdatur; atque ita per se uterque sanescit. Si verò fuit ulcus in digito, posteaque malè inducta cicatrix curvum eum reddidit, primùm malagma tentandum est: dein, si id nihil prodest (quod et in veteri cicatrice et ubi nervi læsi sunt, evenire consuevit) videre oportet, nervine id vitium an cutis sit. Si nervi est, attingi non debet; neque enim sanabile est: si cutis, tota cicatrix excidenda, quæ ferè callosa efficitur, ut extendi digitum non patiatur: tùm rectus sic ad novam cicatricem perducendus est.

SECT. XXXIII. Gangrænam inter ungues, alasque, aut inguina nasci, et si quandò medicamenta vincuntur, membrum præcidi oportere, alio loco mihi dictum est. Sed id quoque cum periculo summo fit: nam sæpè in ipso opere, vel profusione sanguinis, vel animæ defectione moriuntur. Verùm hìc quoque nihil interest, an satis tutum præsidium sit, quod unicum est. Igitur

inter sanam vitiatamque partem incidenda scalpello caro usque ad os sic est, ut neque contra ipsum articulum id fiat, et potiùs ex sanâ parte aliquid excidatur, quàm ex ægrâ relinquatur. Ubi ad os ventum est, reducenda ab eo sana caro, et circa os subsecanda est, ut eâ quoque parte aliquid os nudetur: dein id serrulâ præcidendum est, quàm proximè sanæ carni etiam inhærenti: ac tùm frons ossis quam serrula exasperavit, lævanda est, suprâque inducenda cutis, quæ sub ejusmodi curatione laxa esse debet, ut quàm maximè undiquè os contegat. Quò cutis inducta non fuerit, id linamentis erit contegendum, et super id spongia ex aceto deliganda. Cætera postea sic facienda, ut in vulneribus, in quibus pus moveri non debet, præceptum est.

LIBER OCTAVUS.



SECT. I. Superest ea pars quæ ad ossa pertinet, quæ quò faciliùs accipi possit, priùs positus figuràsque eorum indicabo. Igitur calvaria incipit: ex interiore parte concava, extrinsecùs gibba, utrinquè lævis, et quà cerebri membranam contegit, et quà cute capillum gignente contegitur: eaque simplex ab occipitio et temporibus; duplex usque in verticem à fronte est. Ossa ejus ab exterioribus partibus dura, ab interioribus, quibus inter se connectuntur, molliora sunt: interque ea venæ discurrunt, quas his alimentum subministrare credibile est. Rarò autem calvaria solida sine suturis est; locis tamen æstuosis faciliùs invenitur: et id caput firmissimum atque à dolore tutissimum est. Ex cæteris, quò suturæ pauciores sunt, eò capitis valetudo commodior est: neque enim certus earum numerus est, sicut nec locus quidem. Ferè tamen duæ super aures, tempora à superiore capitis parte discernunt: tertia ad aures per verticem tendens, occipitium à summo capite diducit. Quarta ab eodem vertice per medium caput ad frontem procedit; eaque modò sub imo capillo desinit, modò frontem ipsam secans inter supercilia finitur. Ex his cæteræ quidem suturæ in unguem committuntur: eæ verò quæ supra aures transversæ sunt, totis oris paullatim extenuantur, atque ita inferiora ossa superioribus leniter insidunt. Crassissimum verò in capite os post aurem est, quà capillus, ut verisimile est, ob id ipsum non gignitur. Sub iis quoque musculis qui tempora connec-

tunt, os medium in anteriorem partem inclinatum, positum est. At facies suturam habet maximam, quæ à tempore incipiens, per medios oculos naresque transversa pervenit ad alterum tempus. A quâ breves duæ sub interioribus angulis deorsum spectant: et malæ quoque in summâ parte singulas transversas suturas habent; à mediisque naribus aut superiorum dentium gingivis per medium palatum una procedit, altera quæ transversa idem palatum secat. Et suturæ quidem in plurimis hæ sunt. Foramina autem intrâ caput maxima oculorum sunt, deindè narium, tum quæ in auribus habemus. Ex his quæ oculorum sunt, recta simpliciaque ad cerebrum tendunt. Narium duo foramina osse medio discernuntur: si quidem hæc primùm à superciliis angulisque oculorum osse incohantur ad tertiam ferè partem: deindè in cartilaginem versa, quò propius ori descendunt, eò magis carunculâ quoque molliuntur. Sed ea foramina, quæ à summis ad imas nares simplicia sunt, ibi rursus in bina itinera dividuntur: aliaque ex his ad fauces pervia spiritum et reddunt et accipiunt, alia ad cerebrum tendunt. In ultimâ parte in multa et tenuia foramina dissipantur, per quæ sensus odoris nobis datur. In aure quoque primò rectum et simplex iter, procedendo flexuosum. Juxta cerebrum in multa et tenuia foramina diducitur, per quæ facultas audiendi est. Juxta ea duo parvuli quasi sinus sunt, superque eos finitur os, quod transversum à genis tendens ab inferioribus ossibus sustinetur: jugale appellari potest, ab eâdem similitudine à quâ id Græci ζυγῶδες appellant. Maxilla verò est molle os, eaque una est, cujus eadem et media et etiam ima pars mentum est, à quo utrinquè procedit ad tempora; solaque ea movetur: nam malæ, cum toto osse quod superiores dentes excipit, immobiles sunt. Verùm ipsius maxillæ partes ex-

tremæ quasi bicornes sunt. Alter processus infrà latior, vertice ipso tenuatur, longiùsque procedens sub osse jugali subit, et super id temporum musculis illigatur. Alter brevior et rotundior, et in eo sinu qui juxta foramina auris est, cardinis modo fit: ibique huc et illuc se inclinans maxillæ facultatem motûs præstat. Duriore osse dentes sunt, quorum pars maxillæ, pars superiori ossi malarum hæret. Ex his quaterni primi, quia secant, *τομικοὶ* à Græcis nominantur: hi deindè quatuor caninis dentibus ex omni parte cinguntur: ultra quos utrinquè ferè maxillares quini sunt, præterquàm in his, in quibus ultimi, qui serò gigni solent, non increverunt. Ex his priores singulis radicibus, maxillares utique binis, quidam etiam ternis quaternisve nituntur: ferèque longior radix breviorē dentem edit; rectique dentis recta etiam radix, curvi flexa est: ex eadem radice in pueris novus dens subit, quæ multò sæpiùs priorem expellit: interdum tamen supra infrave eum se ostendit. Caput autem spina excipit. Ea constat ex vertebri quatuor et viginti: septem in cervice sunt, duodecim ad costas, reliquæ quinque sunt proximæ costis. Hæ teretes brevesque; ab utroque latere processus duos exigunt: mediæ perforatæ, quæ spinæ mēdulla cerebro commissa descendit, circà quoque per duos processus tenuibus cavis perviæ, per quæ à membranâ cerebri similes membranulæ deducuntur: omnesque vertebrae, exceptis tribus summis, à superiore parte in ipsis processibus parum desidentes sinus habent; ab inferiore alios deorsum versum processus exigunt. Summa igitur protinùs caput sustinet, per duos sinus receptis exiguis ejus processibus; quo fit ut caput sursum deorsum versum tuberibus exasperetur: secunda superiori parti inseritur. Quod ad circuitum pertinet, pars summa angustiore orbe finitur: itaque superior secundæ circum-

data, in lătera quoque caput moveri sinit: tertia eodem modo secundam excipit; ex quo facilis cervici mobilitas est. Ac ne sustinere quidem caput posset, nisi utrinquē recti valentesque nervi collum continerent, quos τένοντες Græci appellant; si quidem horum inter omnes flexus alter semper intentus infrā prolabi superiora non patitur. Jam quoque vertebra tertia tubercula quæ inferiori inserantur, exigit: cæteræ, processibus deorsum spectantibus, in inferiores insinuantur, ac per sinus quos utrinquē habent, superiores accipiunt, multisque nervis et multâ cartilagine continentur: ac sic unâ flexu modico in promptum dato, cæteris negatis homo rectus insistit, et aliquid a d necessaria opera curvatur. Infra cervicem verò summa costa contra humerum sita est: indè undecim inferiores usque ad imum pectus perveniunt, eæque primis partibus rotundæ et leniter quasi capitulatæ, vertebrarum transversis processibus ibi quoque paulum sinuatis inhærent: indè latescunt, et in exteriorem partem recurvatæ, paulatim in cartilagine degenerant; eaque parte rursus in interiora leniter flexæ committuntur cum osse pectoris: quod valens ac durum à faucibus incipit, ab utroque latere lunatum et à præcordiis jam ipsum quoque cartilagine mollitum terminat: sub costis verò prioribus quinque, quas κότλας Græci nominant, breves tenuioresque, atque ipsæ quoque paulatim in cartilagine versæ extremis abdominis partibus inhærescunt; imaque ex his majore jam parte nihil nisi cartilago est. Rursus à cervice duo lata ossa utrinquē ad scapulas tendunt: nostri scutula operta, ὠμοπλάτας Græci nominant. Ea in summis verticibus sinuata, ab his triangula, paulatimque latescentia ad spinam tendunt; et quò latiora quaque parte sunt, hoc hebetiora. Atque ipsa quoque in imo capite cartilaginosa, posteriore parte velut in-

natant, quoniam nisi in summo nulli ossi inhærescunt; ibi verò validis musculis nervisque constricta sunt. At à summâ costâ paulò interiùs quàm ubi ea media est, os excrescit: ibi quidem tenue; procedens verò, quò propiùs lato scapularum ossi fit, eò plenius latiusque est, et paulùm in exteriora curvatum: quod protinùs alterâ verticis parte modicè intumescens, sustinet jugulum. Id autem ipsum recurvum ac neque inter durissima ossa numerandum: altero capite in eo quod posui, altero in exiguo sinu pectoralis ossis insidit; paululùmque motu brachii movetur, et cum lato osse scapularum: infra caput ejus nervis et cartilagine connectitur. Hinc humerus incipit, extremis utrinquè capitibus tumidus, mollis, sine medullâ, cartilaginosus: medius teres, durus, medullosus; leniter gibbus et in priorem, et in exteriorem partem. Prior autem pars est, quæ à pectore est, posterior quæ ab scapulis; interior quæ ad latus tendit, exterior quæ ab eo recedit: quod ad omnes articulos pertinere in ulterioribus patebit. Superius autem humeri caput rotundius quàm cætera ossa, de quibus adhuc dixi, vertici lati scapularum ossis parvo excessu inseritur, ac majore parte extra situm nervis deligatur. At inferius duos processus habet, inter quos quod medium est, magis etiam extremis partibus sinuatur. Quæ res sedem brachio præstat, quod constat ex ossibus duobus. Radius, quem *ῥαχίς* Græci appellant, superior breviorque, et primò tenuior, rotundo et leniter cavo capite exiguum humeri tuberculum recipit, atque ibi nervis et cartilagine continetur. Cubitus inferior longiorque, et primò plenior in summo capite, duobus quasi verticibus exstantibus in sinum humeri quem inter duos processus ejus esse proposui, se inserit. Primò verò duo brachii ossa juncta paulatim dirimuntur, rursusque

ad manum coeunt, modo crassitudinis mutato; siquidem ibi radius plenior, cubitus admodum tenuis est: dein radius, in caput cartilagosum consurgens, in vertice ejus sinuatur. Cubitus rotundus in extremo, parte alterâ paulum procedit. Ac, ne sæpius dicendum sit, illud ignorari non oportet, plurima ossa in cartilaginem desinere; nullum articulum non sic finiri: neque enim aut moveri posset, nisi lævi inniteretur; aut cum carne nervisque conjungi, nisi ea media quædam materia committeret. In manu verò prima palmæ pars ex multis minutisque ossibus constat, quorum numerus incertus est; sed oblonga omnia et triangula: structurâ quâdam inter se connectuntur, quum in vicem superior alterius angulus, alterius planities sit; eoque fit ex his unius ossis paulum in interiora concavi species. Verum ex manu duo exigui processus in sinum radii conjiciuntur: tum ex alterâ parte ad digitos quinque ossa recta tendentia palmam explent; à quibus ipsi digiti oriuntur, qui ex ossibus ternis constant; omniumque eadem ratio est. Interius os vertice sinuatur, recipitque exterioris exiguum tuberculum, nervique ea continent: à quibus orti ungues indurescunt; ideòque non ossi, sed carni magis radicibus suis inhærent. Ac superiores quidem partes sic ordinatæ sunt. Ima verò spina in coxarum osse desinit, quod transversum longèque valentissimum, vulvam, vesicam, rectum intestinum tuetur: idque ab exteriori parte gibbum, et ad spinam resupinatum; à lateribus, id est, in ipsis coxis sinus rotundos habet: à quibus oritur os quod pectinem vocant; idque super intestina sub pube transversum ventrem firmat: rectius in viris, recurvatum magis in exteriora in feminis, ne partum prohibeat. Indè femina oriuntur, quorum capita rotundiora etiam quàm humerorum sunt, quum

illa ex cæteris rotundissima sint : infrà verò duos processus à priore et à posteriore parte habent : dein dura et medullosa , et ab exteriori parte gibba ; rursùs ab inferioribus quoque capitibus intumescunt. Superiora in sinus coxæ, sicut humeri in ea ossa quæ scapularum sunt, conjiciuntur : tùm infrà introrsùs leniter tendunt, quò æqualiùs superiora membra sustineant. Atque in eo inferiora quoque capita media sinuantur, quò faciliùs excipi à cruribus possint. Quæ commissura osse parvo, molli, cartilaginoso tegitur : patellam vocant. Hæc super innatans, nec ulli ossi in hærens, sed carne et nervis deligata, paulòque magis ad femoris os tendens, inter omnes crurum flexus juncturam tuetur. Ipsum autem crus est ex ossibus duobus : etenim per omnia femur humero, crus verò brachio simile est : adeò ut habitus quoque et decor alterius ex altero cognoscatur ; quod ab ossibus incipiens, etiam in carne respondet. Verùm alterum os ab exteriori parte suræ positum est, quod ipsum quoque sura rectè nominatur. Id brevius, supràque tenuius, ad ipsos talos intumescit : alterum à priore parte positum, cui tibiæ nomen est, longius, et in superiore parte plenius, solum cum femoris inferiore capite committitur, sicut cum humero cubitus. Atque ea quoque ossa, infrà supràque conjuncta, media, ut in brachio, dehiscunt. Excipitur autem crus infrà osse transverso talorum ; idque super os calcis situm est ; quod quâdam parte sinuatur, quâdam excessus habet, et procedentia ex talo recipit, et in sinum ejus inseritur. Id quoque sine medullâ durum, magisque in posteriorem partem projectum, teretem ibi figuram repræsentat. Cætera ossa pedis ad eorum, quæ in manu sunt, similitudinem instructa sunt : plantæ palmis, digiti digitis, ungues unguibus respondent.

SECT. II. Omne autem os, ubi injuria accessit, aut vitatur, aut finditur, aut frangitur, aut foratur, aut colliditur, aut loco movetur. Id quod vitatum est, primò ferè pingue fit, deindè vel nigrum vel cariosum: quæ, supernatis gravibus ulceribus aut fistulis, hisque vel longâ vetustate, vel etiam cancro occupatis, eveniunt. Oportet autem ante omnia os nudare, ulcere exciso; et, si latius ejus vitium est quàm ulcus fuit, carnem subsecare, donec integrum os undiquè pateat: tùm id quod pingue est, semel iterùmve satis est admoto ferramento adurere, ut ex eo squama secedat; aut radere, donec jam aliquid cruoris ostendatur, quæ integri ossis nota est: nam necesse est aridum sit id quod vitatum est. Idem in cartilagine quoque læsâ faciendum est: siquidem ea quoque scalpello radenda est, donec integrum id sit quod relinquitur: deindè sive os, sive cartilago rasa est, nitro benè trito respergendum est: neque alia facienda sunt, ubi caries nigritiesve in summo osse est; siquidem id vel paulò diutius eodem ferramento adurendum, vel radendum est. Qui radit hæc, audaciter imprimere ferramentum debet, ut et agat aliquid, et maturius desinat. Finis est, quum vel ad album os, vel ad solidum ventum est. Albo finiri ex nigrítie vitium, soliditate quâdam ex carie manifestum est: accedere etiam cruoris aliquid integro, suprâ dictum est. Si quandò autem an altiùs descenderit utrumlibet, dubium est, in carie quidem expedita cognitio est: specillum enim tenue in foramina demittitur, quod magis minùsve intrando, vel in summo cariem esse, vel altiùs descendisse testatur. Nigrities colligi quidem potest etiam ex dolore et ex febre: quæ ubi mediocria sunt, illa altè descendisse non potest. Manifestior tamen adactâ terebrâ fit: nam finis vitii est, ubi scobis nigra esse desiit. Igitur si caries altè descendit, per te-

rebram urgenda crebris foraminibus est, quæ altitudine vitium æquent: tùm in ea foramina demittenda candentia ferramenta sunt, donec siccum os ex toto fiat. Simul enim post hæc et resolvetur ab inferiore osse, quodcumque vitiatum est, et is sinus carne replebitur; et humor aut nullus postea feretur, aut mediocris. Sin autem nigrities aut si caries ad alteram quoque partem ossis transit, oportet excidi: atque idem in carie quoque ad alteram partem ossis non penetrante fieri potest. Quod totum vitiatum, totum eximendum est: si inferior pars integra est, eatenus quod corruptum est, excidi debet. Item, sive capitis, sive pectoris os, sive costa cariota est, inutilis ustio est, et excidendi necessitas est. Neque audiendi sunt qui, osse nudato, diem tertium exspectant, ut tunc excidant: ante inflammationem enim tutius omnia tractantur. Itaque, quantum fieri potest, eodem momento et cutis incidenda est, et os detegendum, et omni vitio liberandum est: longèque perniciosissimum est, quod in osse pectoris est; quia vix, etiam si rectè cessit curatio, veram sanitatem reddit.

SECT. III. Exciditur verò os duobus modis: si parvulum est quod læsum est, modiololo quem *χοιρινίδα* Græci vocant; si spatiosius, terebris. Utriusque rationem proponam. Modiolus ferramentum concavum teres est, imis oris serratum, per quod medium clavus ipse quoque interiore orbe cinctus demittitur. Terebrarum autem duo genera sunt: alterum simile ei quo fabri utuntur; alterum capituli longioris, quod ab acuto mucrone incipit, deinde subito latius fit, atque iterum ab alio principio paulò minùs quàm æqualiter sursùm procedit. Si vitium in angusto est, quod comprehendere modiolus possit, ille potiùs aptatur: et, si caries subest, medius clavus in foramen demittitur: si nigrities, angulo scalpri

sinus exiguus fit, qui clavum recipiat, ut, eo insistente, circumactus modiolus delabi non possit: deindè is habenâ quasi terebra convertitur. Estque quidam premendi modus, ut et foret, et circumagatur; quia si leviter imprimitur, parùm proficit; si graviter, non movetur. Neque alienum est instillare paulùm rosæ vel lactis, quò magis lubrico circumagatur: quod ipsum tamen si copiosius est, aciem ferramenti hebetat. Ubi jam iter modiolò pressum est, mediùs clavus educitur, et ille per se agitur: deindè quùm sanitas inferioris partis scobe cognita est, modiolus removetur. At si latius vitium est quàm ut illo comprehendatur, terebrâ res agenda est. Eâ foramen fit in ipso fine vitiosi ossis atque integri, deindè alterum non ità longè, tertiumque, donec totus is locus qui excidendus est, his cavis cinctus sit: atque ibi quoque quatenùs terebra agenda sit, scobis significat. Tunc excisoriùs scalper ab altero foramine ad alterum malleolò adaectus, id quod inter utrumque medium est, excidit: ac sic ambitus similis ei fit, qui in angustiozem orbem modiolò imprimitur. Utrò modo verò id circumductum est, idem excisoriùs scalper in osse corrupto planus summam quamque testam levet, donec interdùm os relinquatur. Vix unquàm nigrities integrum; caries per totum os perrumpit, maximèque ubi vitiosa calvaria est. Id quoque signi specillo significatur, quod depressum in id foramen quod infrà solidam sedem habet, et ob id renitens aliquid invenit, et madens exit. Si pervium invenit, altiùs descendens inter os et membranam, nihil oppositum invenit, educiturque siccus: non quo non subsit aliqua vitiosa sanies; sed quoniam ibi, ut in latiore sede, diffusa sit. Sive autem nigrities quam terebra detexit, sive caries quam specillum ostendit, os transit, modiolì quidem usus ferè supervacuus est; quia latiùs pateat necesse est, quod tam

altè processit. Terebrâ verò eâ quàm secundo loco posui, utendum; eaque ne nimis incalescat, subindè in aquam frigidam demittenda est. Sed tùm majore curâ agendum est, quùm jam aut simplex os dimidium perforatum est, aut in duplici superius: illud, spatium ipsum; hoc, sanguis significat. Ergo tùm lentiùs ducenda habena, suspendendaque magis sinistra manus est, et sæpiùs attollenda, et foraminis altitudo consideranda: ut quando-cunque os perrumpitur, sentiamus, neque periclitemur, ne mucrone cerebri membrana lædatur: ex quo graves inflammationes cum periculo mortis oriuntur. Factis foraminibus, eodem modo media septa, sed multò circumspectiùs excidenda sunt, ne fortè angulus scalpr eandem membranam violet, donec fiat aditus per quem membranæ custos immittatur: *μηνιγγοφύλακκα* Græci vocant. Lamina ænea est, firma, paulùm resima, ab exteriori parte lævis: quæ ubi demissa est, ut exterior pars ejus cerebro propior sit, subindè ei subjicitur quod scalpro discutiendum est: ac si excipit ejus angulum, utrâ transire non patitur; eoque et audaciùs et tutiùs scalprum malleolo subindè medicus ferit, donec excisum undique os eâdem laminâ levetur, tollique siue ullâ noxâ cerebri possit. Ubi totum os ejectum est, circumradendæ lævandæque sunt oræ; et, si quid scobis membranæ insedit, colligendum. Ubi, superiore parte sublata, inferior relictæ est, non oræ tantùm, sed os quoque totum lævandum est; ut sine noxâ postea cutis increseat, quæ aspero ossi innascens protinùs non sanitatem, sed novos dolores movet. Patefacto cerebro, quâ ratione agendum sit, dicam, quùm ad fracta ossa venero. Si basis aliqua servata est, superimponenda sunt medicamenta non pingua, quæ recentibus vulneribus accommodantur, suprâque imponenda lana succida oleo atque aceto madens. Ubi tempus processit, ab ipso osse

caro increscit, eaque factum manu sinum complet. Si quod etiam os adustum est, à parte sanâ recedit; subitque inter integram atque emortuam partem caruncula quæ, quod abscessit, expellat; idque ferè, quia testa tenuis et angusta est, λεπίς, id est squama, à Græcis nominatur. Potest etiam evenire, ut ex ictu neque findatur os, neque perfringatur; sed summum tantum collidatur exaspereturque: quod ubi incidit, radi et lævari satis est. Hæc quamvis maximè fiunt in capite, tamen cæteris quoque ossibus communia sunt; ut, ubicumquè idem incidet, eodem remedio sit utendum. At quæ fracta, fissa, forata, collisa sunt, quasdam proprias in singulis generibus, quasdam communes in pluribus curationes requirunt: de quibus protinùs dicam, initio ab eâdem calvariâ accepto.

SECT. IV. Igitur ubi ea percussa, protinùs requirendum est, num bilem is homo vomuerit; num oculi ejus obcæcati sint; num obmutuerit; num per nares auresve sanguis ei effluxerit; num conciderit; num sine sensu quasi dormiens jacuerit: hæc enim non nisi osse fracto eveniunt; atque ubi inciderunt, scire licet necessariam, sed difficilem curationem esse. Si verò etiam torpor accessit, si mens non constat, si nervorum vel resolutio, vel distentio secuta est, verisimile est etiam cerebri membranam esse violatam; eoque in angusto magis spes est. At si nihil horum secutum est, potest etiam dubitari, an os fractum sit: et protinùs considerandum est, lapide, an ligno, an ferro, an alio telo percussus sit, et hoc ipso lævi an aspero, mediocri an vastiore, vehementer an leniter; quia, quò mitior ictus fuit, eò faciliùs os ei restitisse credibile est. Sed nihil tamen melius est, quàm certiore id notâ explorare. Ergo quà plaga est, demitti specillum oportet, neque nimis tenue, neque acutum, ne, quùm in quosdam sinus na-

turales inciderit, opinionem fracti ossis frustrà faciat; neque nimis plenum, ne parvulæ rimulæ fallant. Ubi specillum ad os venit, si nihil nisi læve et lubricum occurrit, integrum id videri potest: si quid asperi est, utique quâ suturæ non sunt, fractum os esse testatur. A suturis se deceptum esse Hippocrates memoriæ prodidit, more scilicet magnorum virorum, et fiduciam magnarum rerum habentium. Nam levia ingenia, quia nihil habent, nihil sibi detrahunt: magno ingenio, multaque nihilominus habituro, convenit etiam simplex veri erroris confessio, præcipuèque in eo ministerio quod utilitatis causâ posteris traditur, ne qui decipiantur eâdem ratione, quâ quis antè deceptus est. Sed hæc quidem alioquin magni memoria professoris, uti interponeremus, effecit. Potest autem sutura eo nomine fallere, quia æquè aspera est, ut aliquis hanc esse, etiam si rima est, existimet eo loco, quo subesse hanc verisimile est. Ergo eo nomine decipi non oportet, sed os aperire tutissimum est. Nam neque utique certa sedes, ut suprâ posui, suturarum est; et potest idem, et naturaliter commissum et ictu fissum esse, juxtâve aliquid fissum habere. Quin aliquandò etiam, ubi ictus fuit vehementior, quamvis specillo nihil invenitur, tamen aperire commodius est. Ac si ne tùm quidem rima manifesta est, inducendum super os atramentum scriptorium est, deindè scalpro id deradendum; nigritiem enim continet, si quid fissum est. Solet etiam evenire, ut alterâ parte fuerit ictus, et os alterâ fiderit. Itaque si graviter aliquis percussus est, si mala indicia subsecuta sunt, neque eâ parte quâ cutis discussa est, rima reperitur, non incommodum est parte alterâ considerare, num quis locus mollior sit et tumeat, eumque aperire, siquidem ibi fissum os reperietur. Nec tamen magno negotio cutis sanescit, etiam si frustrâ secta

est. Os fractum, nisi succursum est, gravibus inflammationibus afficit, difficiliùsque postea tractatur. Rarò, sed aliquandò tamen, evenit ut os quidem totum integrum maneat, intus verò ex ictu vena aliqua in cerebri membranâ rupta aliquid sanguinis mittat, isque ibi concretus magnos dolores moveat, et oculos quibusdam obcæcet. Sed ferè contra id dolor est, et eo loco cute incisâ, pallidum os reperitur: ideòque id quoque os excidendum est. Quàcunque autem de causâ curatio hæc necessaria est, si nondùm satis cutis patefacta est, latius aperienda est, donec quidquid læsum est, in conspectu sit. In quo ipso videndum est, ne quid ex ipsâ membranulâ quæ sub cute calvariam cingit, super os relinquatur: siquidem hæc scalpro terebrisve lacerata, vehementes febres cum inflammationibus excitat: itaque eam commodius est ex toto ab osse deduci. Plagam, si ex vulnere est, talem necesse est habeamus, qualem acceperimus: si manu facienda est, ea ferè commodissima est, quæ duabus transversis lineis litteræ X figuram accipit, tum deindè à singulis procedentibus lingulis cutis subsecatur. Inter quæ si sanguis fertur, spongiâ subindè in aceto tinctâ cohibendus est, occupandusque objectis linamentis, et caput altiùs excitandum. Neque id vitium ullum metum, nisi inter musculos qui tempora continent, affert; sed ibi quoque nihil tutiùs fit. In omni verò fissio fractove osse protinùs antiquiores medici ad ferramenta veniebant, quibus id exciderent: sed multò melius est, antè emplastra experiri quæ calvariæ causâ componuntur. Eorum aliquid oportet ex aceto mollitum per se super fissum fractumve os imponere, deindè super id aliquandò latius quàm vulnus est, eodem medicamento illitum linteolum, et præter ea succidam lavam aceto tinctam: tunc vulnus deligare, et quotidie resolvere, similiterque curare usque ad diem

quintum. A sexto die, etiam vapore aquæ calidæ per spongiam fovere; cæteraquæ eadem facere. Quòd si caruncula increscere cœperit, et febricula aut soluta erit, aut levior, et cupiditas cibi reverterit, satisque somni accedat, in eodem medicamento erit perseverandum. Procedente deindè tempore, emolliendum id emplastrum adjecto ecrato ex rosâ facto, quò faciliùs carnem producat: nam per se reprimendi vim habet. Hâc ratione sæpè rimæ callo quodam implentur, estque ea ossis velut cicatrix, et latius fracta ossa, si qua inter se non cohærebant, eodem callo glutinantur, estque id aliquantò melius velamentum cerebro, quàm caro quæ exciso osse increscit. Si verò sub primâ curatione febris intenditur, brevesque somni, et iidem per somnia tumultuosi sunt, ulcus madet neque alitur, et in cervicibus glandulæ oriuntur, magni dolores sunt, cibi que super hæc fastidium increscit; tùm demùm ad manum scalprumque veniendum est. Duo verò sub ictu calvariæ pericula sunt, ne vel findatur, vel medium desidat: si fissum est, possunt oræ esse compressæ; vel quia altera super alteram excessit, vel etiam quia vehementer rursùs se commiserunt. Ex quo evenit, ut humor ad membranam quidem descendat, exitum verò non habeat; ac sic eam irriter, et graves inflammationes moveat. At ubi medium desedit, eamdem cerebri membranam os urget, interdùm etiam ex fracturâ quibusdam aculeis pungentibus. His ita succurrendum est, ut tamen quàm minimum ex osse dematur. Ergò si ora alteri insedit, satis est id quod eminet, plano scalpro excidere; quo sublato, jam rima hiat quantum curationi satis est. At si oræ inter se comprimuntur, à latere ejus interposito digiti spatio terebrâ foramen faciendum est, ab eoque scalper duabus lineis ad rimam agendus ad similitudinem V litteræ sic, ut vertex ejus à fo-

ramine basis a rimâ sit. Quòd si rima longiùs patet, ab altero foramine rursùs similis sinus fieri debet; et ita nihil latens sub eo osse concavo est, abundèque exitus datur intùs lædentibus. Nec si fractum quidem os desedit, totum excidi necesse est. Sed sive totum perfractum est, et ab alio ex toto recessit, sive circumpositæ calvariæ inhæret, exiguâ parte, ab eo quod naturaliter se habet, scalpro dividendum est: deindè, in eo quod desedit, juxta rimam quam fecimus, foramina addenda sunt: si in angusto noxa est, duo; si latius patet, tria: septaque eorum excidenda: et tùm scalper utrinquè ad rimam agendus sic, ut lunatum sinum faciat, imaque pars ejus intùs ad fracturam, cornua ad os integrum spectent. Deindè, si qua labant, et ex facili removeri possunt, forfice ad id factâ colligenda sunt, maximèque ea quæ acuta membranam infestant. Si id ex facili fieri non potest, subjicienda lamina est, quam custodem ejus membranæ esse proposui; et super eam quidquid spinosum est, et intùs eminet, excidendum est: eâdem laminâ, quidquid deorsum insidet, attollendum. Hoc genus curationis efficit, ut quâ parte fracta ossa tamen inhærent, solidentur; quâ parte abrupta sunt, sine ullo tormento sub medicamentis tempore excidant, spatiumque inter hæc satis illis magnum ad extrahendam saniem relinquatur, plusque in osse propugnaculi cerebrum habeat, quàm habiturum fuerit eo exciso. His factis, ea membrana acri aceto respergenda est, ut sive aliquid sanguinis ex eâ profluit, cohibeatur; sive intùs concretus cruor remanet, discutiatur. Tùm idem medicamentum eodem modo qui suprâ positus est, mollitum, ipsi membranæ imponendum est; cæteraque eodem modo facienda sunt, quæ ad linteolum illitum et lanam succidam pertinent; collocandusque is in loco tepido: et curandum quotidie vulnus his

etiam æstate. Quòd si membrana per inflammationem intumuerit, infundenda erit rosa tepida : si usque eò tumebit, ut super ossa quoque emineat, coërcebit eam benè trita lenticula, vel folia vitis contrita, et cum recenti vel butyro vel adipe auferino mista; cervixque molliori debeat liquido cerato ex irino facto. At si parùm pura membrana videbitur, par modus ejus emplastri et mellis miscendus erit, idque super infundendum; ejusque continendi causâ unum aut alterum linamentum injiciendum, et super linteolo cui emplastrum illitum sit, contegendum. Ubi satis pura membrana est, eâdem ratione adjiciendum emplastro ceratum, ut carnem producat. Quod ad abstinentiam verò, et primos ulterioresque cibos. potionesque pertinet, eadem quæ in vulnerebus præcepi, servanda sunt, eò magis, quò periculosius hæc pars afficitur. Quin etiam, quùm jam non solùm sustineri, sed ali his quoque oportebit, tamen erunt vitanda quæcunque mandenda sunt; item fumus et quidquid excitat sternutamentum. Spem verò certam faciunt membrana mobilis ac sui coloris, caro increscens rubicunda, facilis motus maxillæ atque cervicis. Mala signa sunt, membrana immobilis, nigra vel livida, vel aliter corrupti coloris; dementia, acris vomitus, nervorum vel resolutio vel distentio, caro livida, maxillarum rigor atque cervicis. Cætera, quæ ad somnum, cibi desiderium, febrem, puris colorem attinent, eadem, quæ in cæteris vulneribus, vel salutaria, vel mortifera sunt. Ubi benè res cedit, incipit ab ipsâ membranâ; vel si os eo loco duplex est, indè quoque caro increscere; eaque id quod inter ossa vacuum est, replet : nonnunquàm etiam super calvariam excrescit. Quod si incidit, inspergenda squama aris est, ut id reprimat cohibeatque, ea carni superdanda quæ ad cicatricem perducant; omnibusque ea locis commo-

dè inducitur, exceptâ frontis eâ parte, quæ paulum super id est quod inter supercilia est: ibi enim vix fieri potest, ut non per omnem ætatem sit exulceratio; quæ linteolo medicamentum habente contegenda sit. Illa utique capite fracto servanda sunt, ut, donec jam valida cicatrix erit, vitentur sol, ventus, frequens balneum, major vini modus.

SECT. V. In naribus verò et os et cartilago frangi solet, et quidem modò adversa, modò à latere. Si adversa fracta sunt, alterumve ex his, nares desidunt, difficulter spiritus trahitur; si à latere os fractum est, is locûs cavus est: si cartilago, in alteram partem nares declinantur. Quidquid in cartilagine incidit, excitanda ea leniter est, aut subjecto specillo, aut duobus digitis utrinquè compressis: deindè in longitudinem implicata linamenta, et molli pelliculâ cincta circumsutaque, intùs adigenda sunt: aut eodem modo compositum aliquid ex arido penicillo: aut grandis pinna, gummi vel fabrili glutine illita, et molli pellicula circumdata, quæ desiderare cartilaginem non sinat. Sed si adversa ea fracta est, æqualiter utraque naris implenda est: si à latere, crassius esse debet ab eâ parte in quam nasus jacet, ab alterâ tenuius, id quod inseritur. Extrinsecùs autem circumdanda habena est mollis, media illita mixtis inter se similâ et thuris fuligine, eaque ultrâ aures ducenda, et fronti duobus capitibus agglutinanda est: id enim corpori quasi gluten inhærescit, et cùm induit, nares commodè continet. Sin quod intùs inditum est, lædit, sicut maximè fit, ubi interior cartilago perfracta est, excitatæ nares eâdem tantummodò habenâ continendæ sunt, deindè post quatuordecim dies id ipsum demendum est. Resolvitur autem aquâ calidâ, eâque tùm is locus quotidie fovendus est. Sin os fractum est, id quoque digitis in suam sedem reponendunz

est: atque ubi adversum id ictum est, utraque naris implenda est; ubi à latere, ea in quam os impulsum est; imponendumque ceratum, et paulò vehementiùs deligandum est, quia callus eo loco non ad sanitatem tantummodò, sed etiam ad tumorem increscit. A tertio die fovendum id aquâ calidâ est, tantòque magis, quantò propiùs esse sanitati debet. Quòd si plura erunt fragmenta, nihilominùs extrinsecùs singula in suas sedes digitis erunt compellenda, imponendaque extrinsecùs eadem habena, et super eam ceratum; neque ultrà fascia adhibenda est. At si quod fragmentum undique resolutum, cum cæteris non glutinabitur, intelligetur id quidem ex humore qui multus ex vulnere feretur; vulsellâ verò extrahetur: finitisque inflammationibus, imponetur aliquod medicamentum ex iis quæ leniter reprimunt. Pejus est, ubi aut ossi aut cartilagini fractæ, cutis quoque vulnus accessit. Id admodum rarò fit. Si incidit, illa quidem nihilominùs eâdem ratione in suas sedes excitanda sunt: cuti verò superimponendum emplastrum aliquod ex his quæ recentibus vulneribus accommodata sunt; sed insuper nullo vinculo deligandum est.

SECT. VI. In aure quoque interdùm rumpitur cartilago: quod si incidit, antequàm pus oriatur, imponendum glutinans medicamentum est; sæpè enim suppurationem prohibet, et aurem confirmat. Illud et in hâc, et in naribus ignorari non oportet; non ipsam quidem cartilaginem glutinari, circa tamen carnem increscere, solidarique eum locum: itaque si cum cute cartilago rupta est, cutis utrinquè suitur. Nunc autem de eâ dico quæ, cute integrâ, frangitur. In eâ verò si jam pus natum est, aperienda alterâ parte cutis, et ipsa cartilago contrâ lunatâ plagâ excidenda est: deindè utendum est medicamento leniter sanguinem supprime, quale

lycium est aquâ dilutum, donec sanguis fluere desinat : tùm imponendum linteolum cum emplastro sic, ut pingue omne vitetur; et à parte posteriore lana mollis auri subjiçienda est, quæ, quod est inter hanc et caput, compleat : tùm ea leniter deliganda est, et à tertio die vapore, ut in naribus posui, fovenda. Atque in his quoque generibus abstinentia primi temporis necessaria est, donec inflammatio finiatur.

SECT. VII. Ab his ad maxillam venturus indicanda quædam puto, communiter ad omnia ossa pertinentia, ne sæpiùs eadem dicenda sint. Omne igitur os modò rectum, ut lignum, in longitudinem finditur, modò frangitur transversum, interdùm obliquum : atque ad ipsum nonnunquàm retusa habet capita, nonnunquàm acuta. Quod genus pessimum est, quia neque facillè committuntur, quæ nulli retuso innituntur, et carnem vulnerant, interdùm nervum quoque aut musculum. Quin etiam aliquandò plura fragmenta fiunt; sed in aliis quidem ossibus ex toto sæpè fragmentum à fragmento recedit; maxillæ verò semper, aliquâ parte etiam vexata ossa inter se cohærent. Igitur in primis digitis duobus utrinquè prementibus, et ab ore, et ab cute omninò ossa in suam sedem compellenda sunt : deindè, si transversa maxilla fracta est (sub quo casu ferè dens super proximum dentem excidit) ubi ea in suam sedem collocata est, duo proximi dentes, aut, si hi labant, posteriores inter se setâ deligandi sunt. Id in alio genere fracturæ supervacuum est, cætera eadem facienda sunt : nam linteolum duplex madens vino et oleo superinjiciendum cum eâdem similâ et eâdem thuris fuligine est : deindè aut fascia, aut mollis habena media in longitudinem incisa, ut utrinquè mentum complectatur, et indè capita ejus supra caput adducta ibi deligentur. Illud quoque ad omnia ossa perti-

nens dictum crit; famem primùm esse necessariam, deindè à die tertio humidum cibum, sublatà inflammatione, paulò pleniorē, eumque qui carnem alat; per omne tempus vinum esse alienum: deindè tertio die resolvi debere, foverique per spongiam vapore aquæ calidæ, eademque quæ primò fuerunt, superdari: idem die quinto fieri, et donec inflammatio finiatur, quæ vel nono die vel septimo ferè solvitur: eâ sublatâ, rursùs ossa esse tractanda, ut si quod fragmentum loco suo non est, reponatur: neque id esse solvendum, nisi duæ partes ejus temporis intra quod quæque ossa confervent, transierint. Ferè verò intra quartum decimum, et unum et vicesimum diem sanescunt, maxilla, malæ, jugulum, pectus, latum os scapularum, costæ, spina, coxarum os, tali, calx, manus, planta: intra vicesimum et tricesimum diem crura, brachiaque: intra septimum et vicesimum, et quadragesimum, humeri et femina. Sed de maxillâ illud quoque adjiciendum est, quòd humidus cibus diù assumendus est: atque etiam quùm tempus processit, in lagano similibusque aliis perseverandum est, donec ex toto maxillam callus firmarit: item primis utique diebus habendum silentium.

SECT. VIII. I. Jugulum verò si transversum fractum est, nonnunquàm per se rursùs rectè coit, et nisi movetur, sanari sine vincturâ potest; nonnunquàm verò, maximè ubi motum est, elabitur; ferèque id, quod ab humero est, sub id quod à pectore est, in posteriorem partem inclinatur. Cujus ea ratio est, quòd per se non movetur, sed cum humeri motu consentit: itaque, eo subsistente, subit humerus agitatus. Rarò verò admodum in priorem partem jugulum inclinatur, adeò ut magni professores nunquàm se vidisse memoriæ mandarint: sed locuples tamen ejus rei auctor Hippo-

crates est. Verùm ut dissimilis uterque casus est, sic quædam dissimilia requirit. Ubi ad scapulas jugulum tendit, simul dextrâ manu planâ propellendus in posteriorem partem humerus est, et illud in priorem attrahendum : ubi ad pectus conversum est, ipsum quidem retrò dandum, humérus autem in priorem partem adducendus est : ac, si is inferior est, non id quod à pectore est, deprimendum est, quia immobile est, sed humerus ipse attollendus : sic as superior est, id quod pectore est, implendum lanâ, et humerus ad pectus deligandus est. Si acuta fragmenta sunt, incidi contrâ cutis debet ; et ex ossibus ea quæ carnem vulnérant, præcidenda sunt : tùm retusa ossa committenda sunt. Si quod ab aliquâ parte eminet, opponendum ei triplex linteolum est, in vino et oleo tinctum. Si plura fragmenta sunt, excipienda sunt ex ferulâ factò canaliculo, eodemque intùs incerato, ne fascia diducatur ; quæ jugulo composito circumdanda est sæpiùs potiùs quàm valentiùs : quod ipsum quoque in omnibus ossibus fractis perpetuum est. A dextro verò jugulo, si id fractum est, ad alam sinistram, à sinistro ad dexteram, rursùsque sub alâ suâ fascia dari debet. Post hæc si jugulum ad scapulas inclinatum est, brachium ad latus ; si in partem priorem, ad cervicem deligandum est, supinusque homo collocandus ; cæteraque eadem facienda, quæ suprâ comprehensa sunt.

2. Sunt verò plura ossa ferè immobilia, vel dura, vel cartilaginosa, quæ vel frauguntur, vel forantur, vel colliduntur, vel finduntur, ut malæ, pectus, latum os scapularum, costæ, spina, coxarum os, tali, calx, manus, planta : horum omnium eadem curatio est. Si suprâ vulnus est, id suis medicamentis nutriendum est : quo sanescente, rimas quoque ossis, aut si quod foramen est, callus implet. Si cutis integra est, et os læ-

sum esse ex dolore colligimus, nihil aliud quàm quiescendum, imponendumque ceratum est, et leniter deligandum, donec sanitate ossis dolor finiatur.

SECT. IX. 1. Propriè tamen quædam de costâ dicenda sunt, quia juxtâ viscera, gravioribusque periculis is locus expositus est. Hæc quoque igitur interdum sic finditur, ut ne summum quidem os, sed interior pars ejus, quæ rara est, lædatur: interdum sic, ut eam totam is casus perruperit. Si tota fracta non est, nec sanguis exspuitur, nec febricula sequitur, nec quidquam suppurat, nisi admodum rarò, nec dolor magnus est; tactu tamen is locus leviter indolescit; sed abundè est eadem quæ suprâ scripta sunt, facere, et à mediâ fasciâ incipere deligare, ne in alterutram partem hæc cutem inclinet. Ab uno verò et vicesimo die, quo utique os esse debet glutinatum, id agendum cibus uberioribus est ut corpus quàm plenissimum fiat, quò meliùs os vestiat, quod illo loco tenerum adhuc injuriæ sub tenui cute expositum est. Per omne autem tempus curationis vitandus clamor, sermo quoque, tumultus, ira, motus vehementior corporis, fumus, pulvis, et quidquid vel tussim vel sternutamentum movet; ne spiritum quidem magnoperè continere expedit. At si tota costa perfracta est, casus asperior est: nam et graves inflammationes, et febris, et suppuratio, et sæpè vitæ periculum sequitur, et sanguis spuitur. Ergò, si vires patiuntur, ab eo brachio quod super eam costam est, sanguis mittendus est: si non patiuntur, alvus tamen sine ullo acri ducenda est, diutiùsque inediâ pugnandum. Panis verò ante septimum diem non assumendus, sed unâ sorbitione vivendum, imponendumque ei loco ceratum ex lino factum, cui cocta quoque resina adjecta sit, aut Polyarchi malagma, aut panni ex vino et rosâ et oleo, superque imponenda laua succida mollis,

et duæ fasciæ à mediis orsæ, minimèque adstrictæ. Multò verò magis omnia vitanda, quæ suprâ posui, adeò ut ne spiritus quidem sæpiùs movendus sit. Quòd si tussis infestabit, ad id potio sumenda erit, vel ex trixagine, vel ex rutâ, vel ex herbâ stœchade, vel ex cumino et pipere. Gravioribus verò doloribus urgentibus, cataplasma imponi quoque conveniet vel ex lolio, vel ex hordeo cui pinguis fici tertia pars sit adjecta: et id quidem interdiù superjacebit; noctu verò idem, aut ceratum, aut malagma, aut panni, quia potest cataplasma decidere. Ergò quotidie quoque resolvetur, donec jam cerato aut malagmate possimus esse contenti: et decem quidem diebus extenuabitur fame corpus, ab undecimo verò ali incipiet: ideòque etiam laxior quàm primò fascia circumligabitur; ferèque ea curatio ad quadragesimum diem perveniet. Sub quâ si metus erit suppurationis, plus malagma quàm ceratum ad digerendum proficiet. Si suppuratio vicerit, neque per quæ suprâ scripta sunt, discuti potuerit, omnis mora vitanda erit, ne os infrâ vitietur; sed quâ parte maximè tumebit, demittendum erit candens ferramentum, donec ad pus perveniat; idque effundendum. Si nusquàm caput se ostendet, ubi maximè pus subsit, sic intelligimus. Cretâ cimoliâ totum locum illinemus, et siccati patiemur: quo loco maximè humor in eâ perseverabit, ibi pus proximum erit, eaque uri debet. Si latius aliquid abscedet, duobus aut tribus locis erit perforandum, demittendumque linamentum, aut aliquid ex penicillo, quod summum lino sit devinctum, ut faciliè educatur: reliqua eadem, quæ in cæteris adustis, facienda sunt. Ubi purum erit ulcus, ali corpus debet, ne tabes, perniciosa futura, id malum subsequatur. Nonnunquàm etiam leviùs ipso osse affecto, et inter initia neglecto, non pus, sed humor quidam, mucis similis, intùs coit,

mollescitque contrà cutis : in quâ simili ustione utendum est.

2. In spinâ quoque est quod propriè notemus. Nam si id quod ex vertebrâ excedit, aliquo modo fractum est, locus quidem concavus fit; punctiones autem in eo sentiuntur, quia necesse est ea fragmenta spinosa esse : quo fit, ut homo in interiorem partem subindè nitatur. Hæc noscendæ rei causâ sunt : medicamentis verò iisdem opus est, quæ primâ parte hujus capitis exposita sunt.

SECT. X. 1. Similes rursùs ex magnâ parte casus curationesque sunt humeri et femoris : communia etiam quædam humeris, brachiis, feminibus, cruribus, digitis : si quidem ea minimè periculose media franguntur. Quò propior fractura capiti vel superiori vel inferiori est, eò pejor, est : nam et majores dolores affert, et difficiliùs curatur. Ea maximè tolerabilis est simplex, transversa; pejor, ubi fragmenta multa atque ubi obliqua; pessimum, ubi eadem acuta. Nonnunquàm autem fracta in his ossa in suis sedibus remanent, multò sæpiùs excidunt, aliudque super aliud effertur : idque ante omnia considerari debet, et sunt notæ certæ. Si suis sedibus sunt mota, resima, punctionisque sensum præsentant; tactu inæqualia sunt. Si verò non adversa, sed obliqua junguntur, quod fit ubi loco suo non sunt, membrum id altero latere brevius est, et musculi ejus tument. Ergò si hoc deprehensum est, protinùs id membrum oportet extendere : nam nervi musculique intenti per ossa contrahuntur, neque in suum locum veniunt, nisi illos per vim aliquis intendit. Rursùs, si primis diebus id omisum est, inflammatio oritur; sub quâ et difficilè et periculose vis nervis adhibetur : nam distentio nervorum vel cancer sequitur, vel certè, ut mitissimè agatur, pus. Itaque si antè reposita ossa non sunt, postea reponenda sunt. Intendere au-

tem digitum vel aliud quodque membrum, si adhuc tenerum est, etiam unus homo potest, quum alteram partem dextrâ, alteram sinistrâ prehendit: valentius membrum duobus eget, qui in diversa contendunt. Si firmiores nervi sunt, ut in viris robustis, maximèque eorum feminibus et cruribus evenit, habenis quoque vel linteis fasciis utrinquè capita articulorum deliganda, et per plures in diversa ducenda sunt. Ubi paulò longius, quàm naturaliter esse debet, membrum vis fecit, tùm demùm ossa manibus in suam sedem compellenda sunt, indiciumque ossis repositi est dolor sublatus. Et membrum alteri æquatum involvendum duplicibus triplicibusve pannis in vino et oleo tinctis, quos linteos esse commodius est. Ferè verò fasciis sex opus est. Prima brevissima adhibenda, quæ circa fracturam ter voluta sursum versum feratur, et quasi in cochleam serpat; satisque est eam ter hoc quoque modo circuire. Altera dimidio longior, eaque, si quâ parte os eminet, ab eâ, si totum æquale est, undelibet super fracturam incipere debet, priori adversa, deorsumque tendere, atque iterum ad fracturam reversa in superiore parte ultra priorem fasciam desinere. Super has injiciendum latiore linteo ceratum est, quod eas contineat; ac si quâ parte os eminet, triplex eâ pannus objiciendus, eodem vino et oleo madens. Hæc tertiâ fasciâ comprehendenda sunt, quartâque sic, ut semper insequens priori adversa sit, et tertia tantum in inferiore parte, tres in superiore finiant, quia satius est sæpius circuire, quàm adstringi; siquidem id quod adstrictum est, alienatur, et cancro opportunum est: articulum autem quàm minimè vincire opus est; sed si juxta hunc os fracta est, necesse est. Deligatum verò membrum in diem tertium continendum est: eaque viatura talis esse debet, ut primo die.

nihil offenderit, non tamen laxa visa sit; secundo laxior, tertio jam penè resoluta. Ergò tùm rursùm id membrum deligandum, adjiciendaque prioribus quinta fascia est; iterùmque quinto die resolvendum est, et sex fasciis involvendum sic, ut tertia et quinta infrà, cæteræ suprâ finiantur. Quotiescunquè autem solvitur membrum, calidâ aquâ fovendum est: sed si juxta articulum fractura est, diù instillandum vinum est, exiguâ parte olei adjectâ, eademque omnia facienda, donec adeò inflammatio solvatur, ut tenuius quoque quàm ex consuetudine id membrum fiat. Quòd si septimus dies non dedit, certè nonus exhibet: tùm facillimè ossa tractantur. Rursùs ergò si parùm commissa sunt, committi debent: si qua fragmenta eminent, in suas sedes reponenda sunt: deindè eodem modo membrum deligandum, ferulæque super accommodandæ sunt, quæ fissæ circumpositæque ossa in suâ sede contineant; et, in quam partem fractura inclinât, ab eâ latior valentiorque ferula imponenda est. Easque omnes circa articulum esse oportet resimas, ne hunc lædant, nec ultrâ adstringi quàm ut ossa contineant: et quùm spatio laxentur, tertio quoque die paulùm habenis suis coarctari: ac si nulla prurigo, nullus dolor est, sic manere, donec duæ partes ejus temporis quo os quodque confervet, compleantur: postea leviùs aquâ calidâ fovere, quia primo digeri materiam opus est, tùm evocari. Ergò cerato quoque liquido id leniter est ungendum, perfricandaque summa cutis est, laxiùsque id deligandum est. Tertio quoque die solvendum sic, ut remotâ calidâ aquâ, cætera eadem fiant: tantummodò singulæ fasciæ, quoties resolutæ fuerint, subtrahantur.

2. Hæc communia sunt, illa propria. Si quidem humerus fractus, non sic, ut membrum aliud, intenditur;

sed homo collocatur alto sedili, medicus autem humilior adversus. Una fascia brachium amplexa, ex ceruice ipsius qui læsus est, id sustinet; altera ab alterâ parte super cubitum data, ibi accipit nodum: tertia vincto imo humero deorsum demittitur, ibi quoque capitibus ejus inter se junctis. Deindè ab occipitio ipsius, minister sub eâ fasciâ quam secundo loco posui, porrecto, si dexter humerus ducendus est, dextro, si sinister, sinistro brachio, demissum inter femina ejus qui curatur, baculum tenet: medicus super eam fasciam de quâ tertio loco dixi, plantam injicit dextram, si sinister; sinistram, si dexter humerus curatur; simulque alteram fasciam minister attollit, alteram premit medicus: quo fit ut leniter humerus extendatur. Fasciis verò, si medium aut imum os fractum est, brevioribus opus est; si summum, longioribus, ut ab eo sub alterâ quoque alâ per pectus et scapulas porrigantur. Protinùs verò brachium quùm deligatur, sic inclinandum est, idque efficit, ut ante fascias quoque sic figurandum sit: ne postea suspensum aliter atque quùm deligabatur, humerum inclinet: brachioque suspenso, ipse quoque humerus ad latus leniter deligandus est: per quæ fit ut minimè moveatur: ideòque ossa sic se habent, ut aliquis composuit. Quùm ad ferulas ventum est, extrinsecùs esse earum longissimæ debent, à lacerto breviores, sed sub alâ brevissimæ. Sæpiùs eæ resolvendæ sunt, ubi in viciniâ cubiti humerus fractus est, ne ibi nervi rigescant, et inutile brachium efficiant. Quoties solutæ sunt, fractura manu continenda, cubitus aquâ calidâ fovendus, et molli cerato perfricandus; ferulæque vel omninò non imponendæ, contrâ eminentia cubiti, vel aliquantò breviores sint.

3. At si brachium fractum est, in primis considerandum est, alterum os an utrumque comminutum sit:

non quò alia in ejusmodi casu curatio sit admovenda ; sed primum , ut valentiùs extendatur , si utrumque os fractum est ; quia necesse est minùs nervos contrahi , altero osse integro eosque intendente : deindè , ut curiosiùs omnia in continendis ossibus fiant , si neutrum alteri auxilio est : nam ubi alterum integrum est , plus opis in eo quàm in fasciis ferulisque sit. Deligari autem brachium debet paulùm pollice ad pectus inclinato , siquidem is maximè brachii naturalis habitus sit ; idque involutum mitellâ commodissimè excipitur , quæ latitudine ipsi brachio , perangustis capitibus collo injicitur ; atque ita commodè brachium ex cervice suspensum est : idque paulùm suprâ cubiti alterius regionem pendere oportet.

4. Quòd si ex summo cubito quid fractum sit , glutinare id vinciendo alienum est ; fit enim brachium immobile : at si nihil aliud quàm dolori occursum est , idem qui fuit , ejus usus est.

5. In crure æquè ad rem pertinet , alterum saltem os integrum manere. Commune verò ei femorique est quod , ubi deligatum est , in canalem conjiciendum est. Is canalis et ab inferiori parte foramina habere debet , per quæ si quis humor excesserit , descendat ; et à plantâ moram quæ simul et sustineat eam , et delabi non patiatur ; et à lateribus cava per quæ , loris datis , moræ quædam crus femurque , ut collocatum est , detineant. Esse etiam is debet à plantâ , si crus fractum est , circa poplitem ; si femur , usque ad coxam ; si juxta superius caput femoris , sic , ut ipsa ei quoque coxa insit. Neque tamen ignorari oportet , si femur fractum est , fieri brevius , quia nunquàm in antiquum statum revertitur , summisque digitis postea cruris ejus insisti : sed multò tamen femori debilitas est , ubi fortunæ negligentia quoque accessit.

6. Digitum satis est ad unum surculum post inflammationem deligari.

7. His propriè ad singula membra pertinentibus, rursus illa communia sunt. Primis diebus fames; deindè tùm quùm jam increcere callum oportet, liberalius alimentum; longa à vino abstinencia, fomentum aquæ calidæ, dùm inflammatio est, liberale; quùm ea desiit, modicum: tùm etiam longior ulterioribus ex liquido cerato membris, et mollis tamen unctio. Neque protinùs exercendum id membrum, sed ad antiquos usus paulatim reducendum est. Gravius aliquantò est, quùm ossis fracturæ carnis quoque vulnus accessit, maximèque, si id musculi femoris aut humeri senserint; nam inflammationes multò graviores, et promptiores cancos habent. Ac femur quidem, si ossa inter se cesserunt, fere præcidi necesse est: humerus verò quoque in periculum venit, sed faciliùs conservatur. Quibus periculis etiam magis id expositum, quod juxtà ipsos articulos ictum est: curiosiùs igitur agendum est; et musculus quidem per mediam plagam transversus præcidendus; sanguis verò, si parùm fluxit, mittendus: corpus inedià extenuandum. Ac reliqua quidem membra lentiùs intendenda, et leniùs in his ossa in suam sedem reponenda sunt: his verò neque intendi nervos, neque ossa tractari satis expedit: ipsique homini permittendum est, ut sic ea collocata habeat, quemadmodum minimè lædunt. Omnibus autem his vulneribus imponendum primò linamentum est vino madens, cui rosæ paulùm admodum adjectum sit: cætera eadem. Deligandaque fasciis sunt aliquantò quàm vulnus est latioribus, laxiùs scilicet quàm si ea plaga non esset: quantò faciliùs et alienari et occupari cancro vulnus potest, numero potiùs fasciarum id agendum est, ut laxæ quoque æquè contineant. Quod in femore hu-

meroque sic fiet, si ossa fortè rectè concurrerint : sin aliter se habebunt, eatenùs circumdari fascia debebit, ut impositum medicamentum contineat. Cætera eadem quæ suprà scripsi, facienda sunt; præterquàm quod neque ferulis neque canalibus, inter quæ vulnus sanescere non potest, sed pluribus tantummodò et latioribus fasciis opus est: ingerendum quoque subindè in eas est calidum oleum et vinum; magisque in primo fame utendum: vulnus calidâ aquâ fovendum, frigusque omni ratione vitandum est; et transeundum ad medicamenta quæ puri movendo sunt: major quoque vulneris quàm ossis cura agenda: ergo quotidie solvendum id nutriendumque est. Inter quæ si quod parvulum fragmentum ossis eminet, id si retusum est, in suam sedem dandum; si acutum, antè acumen ejus, si longius est, præcidendum; si brevius, limandum et utrumque scalpro lævandum; tùm ipsum recondendum est: ac si id manus facere non potest, vulsella, quali fabri utuntur, injicienda est, rectè se habenti capite, ab eâ parte quâ sima est, ut ea parte quâ gibba est, emineus os in suam sedem compellat. Si id majus est, membranulisque cingitur, sinere oportet eas sub medicamentis resolvi; idque os, ubi jam nudatum est, abscindere; quod maturiùs scilicet faciendum est. Potest quoque eâ ratione et os coire, et vulnus sanescere; illud suo tempore, hoc prout se habet. Nonnunquàm etiam in magno vulnere evenit, ut fragmenta quædam velut emoriantur, neque cum cæteris coëant: quod hìc quoque ex modo fluentis humoris colligitur; quò magis necessarium est sæpiùs ulcus resolvere atque nutrire. Sequitur verò, ut id os per se post aliquot dies excidat: ac quum jam misera antea conditio vulneris sit, tamen id interdum manû latiusque facies. Sæpè etiam, integrâ cute, os abrumpitur, protinùsque prurigo et dolor oritur. Quæolvere, si accidit, maturiùs

oportet, et fovere aquâ per æstatem frigidâ, per hie-
mem egelidâ; deindè ceratum myrteum imponere. In-
terdùm fractura quibusdam velut aculeis carnem vexat;
quo à prurigine et punctionibus cognito, aperire id me-
dicus, eosque aculeos præcidere necesse habet. Reliqua
verò curatio in utroque hoc casu eadem est quæ, ubi
ictus plagam protinùs intulit. Puro jam ulcere, cibus hìc
quoque utendum est carnem producentibus. Si brevius
adhuc membrum est, et ossa loco suo non sunt, paxillus
tenuis et quàm lævissimi generis inter ea demitti debet
sic, ut capite paulùm supra ulcus emineat, isque quo-
tidie plenior adigendus est, donec par id membrum
alteri fiat: tùm paxillus removendus, vulnusque sanan-
dum est. Cicatrix inducta fovenda frigidâ aquâ est, in
quâ myrtus, hederâ, aliæve similes verbenæ decoctæ
sint; illinendumque medicamentum quod siccet, et
magis etiam hìc quiescendum, donec id membrum con-
firmetur. Si quandò verò ossa non conferbuerunt, quia
sæpè mota sunt, sæpè soluta, in aperto deindè curatio
est; possunt enim coïre. Si vetustas occupavit, mem-
brum extendendum est, ut aliquid lædatur: ossa inter
se manu dimovenda, ut concurrendo exasperentur, et
ut, si quid pingue est, eradatur, totumque id quasi
recens fiat; magnâ tamen curâ habitâ, ne nervi mus-
culive lædantur. Tùm vino fovendum est, in quo ma-
licorium decoctum sit, imponendumque id ipsum ovi
albo mixtum: tertio die resolvendum, fovendumque
aquâ, in quâ verbenæ, de quibus supra dixi, decoctæ
sint: quinto die idem faciendum, ferulæque circum-
dandæ. Cætera et ante et post eadem faciendâ, quæ
suprà scripsi. Solent tamen interdùm transversa inter se
ossa confervere; eoque et brevius membrum et inde-
corum fit; et si capita acutiora sunt, assiduæ punctiones
sentiuntur: ob quam causam frangi rursùs ossa et di-

rimi debent. Id hoc modo fit. Calidâ aquâ multâ membrum id fovetur, et ex cerato liquido perfricatur intenditurque: et inter hæc medicus pertractans ossa, ut adhuc tenero callo, manibus ea diducit, compellitque id quod eminet, in suam sedem; et, si parùm valuit, ab eâ parte in quam os se inclinat, involutam lanâ regulam objicit: atque ita deligando assuescere iterum vetustæ sedi cogit. Nonnumquàm autem rectè quidem ossa cohæserunt, superincrevit verò nimius callus; ideòque locus intumuit. Quod ubi incidit, diù leniterque id membrum perfricandum est ex oleo et sale et nitro, multùmque aquâ calidâ salsâ fovendum, et imponendum malagma quod digerat, adstrictiùsque alligandum: oleribus quoque et prætereà vomitu utendum, per quæ cum carne callus quoque extenuatur. Confert quoque aliquid de sinapi cum ficu in alterum par membrum impositum, donec id paulùm erodat, eòque evocet materiam. Ubi his tumor extenuatus est, rursùs ad ordinem vitæ revertendum est.

SECT XI. Ac de fractis quidem ossibus hactenùs dictum sit. Moventur autem ea sedibus suis duobus modis: nam modò quæ juncta sunt inter se, dehiscunt, ut quùm latum scapularum os ab humero recedit, et in brachio radius à cubito, et in crure tibia à surâ; interdùm è saltu, calcis os à talo; quod rarò tamen fit: modò articuli suis sedibus excidunt. Antè de prioribus dicam. Quorum ubi aliquid incidit, protinùs is locus cavus est, depressusque digitus sinum invenit: deindè gravis inflammatio oritur, atque in talis præcipuè: siquidem febres quoque et caneros, et nervorum vel distentiones vel rigores qui caput scapulis annectunt, movere consuevit: quorum vitandorum causâ, facienda eadem sunt, quæ in ossibus mobilibus læsis. Ubi aliquid incidit, protinùs his locis proposita sunt, ut dolor

tumorque per ea tollantur : nam diducta hæc ossa nunquam rursus inter se junguntur, et ut aliquid decoris eo loco, sic nihil usus admittitur. Maxilla verò et vertebrae, omnesque articuli, quum validis nervis comprehendantur, excidunt aut vi expulsi, aut aliquo casu nervis vel ruptis vel infirmatis : faciliusque in pueris et adolescentulis quam in robustioribus. Hi quoque elabuntur in priorem et in posteriorem, in interiorem et exteriorem partem ; quidam omnibus modis, quidam certis. Sunt quoque quædam communia omnium signa ; quædam propria cujusque ; siquidem semper eâ parte tumor est in quam os prorumpit, eâ sinus à quâ recessit. Et hæc quidem in omnibus deprehenduntur, alia verò in singulis ; quæ, simul atque de quoque dicam, proponenda erunt. Sed ut excidere omnes articuli possunt, sic non omnes reponuntur. Caput enim, ubi excidit, nunquam compellitur, neque in spinâ vertebra ; neque ea maxilla quæ utrâque parte prolapsa, antequam reponeretur, inflammationem movit : rursus qui nervorum vitio prolapsi sunt, compulsi quoque in suas sedes, iterum excidunt : at quibus in pueritiâ exciderunt, neque repositi sunt, minus quam cæteri crescunt : omniumque quæ loco suo non sunt, caro emacrescit, magisque in proximo membro quam in ulteriore, ut puta, si humerus loco suo non est, major in eo ipso fit macies quam in brachio ; major in hoc quam in manu. Tum pro sedibus et pro casibus qui inciderunt, aut major aut minor usus ejus membri relinquitur, quòque in eo plus usus superest, eò minus id extenuatur. Quidquid autem loco suo motum est, ante inflammationem reponendum est : si illa occupavit, dum conquiescat, lacesandum non est : ubi finita est, tentandum est in his membris quæ id patiuntur. Multum autem eò confert et corporis et nervorum habitus :

nam si corpus tenue, si humidum est, si nervi infirmi, expeditius os reponitur: sed et primò facilius excidit, et postea minùs fideliter continetur. Quæ contraria his sunt, melius continent; sed id quod expulsum est, difficulter admittunt. Oportet autem ipsam inflammationem levare, super succidâ lanâ ex aceto impositâ: à cibo, si valentioris articuli casus est, triduo, interdum etiam quinque diebus abstinere; bibere aquam calidam, dum sitim finiat; curiosiusque hæc facere, his ossibus motis, quæ validis plenisque musculis continentur; si verò etiam febris accessit, multò magis: deindè, die quinto fovere ex aquâ calidâ; remotâque lanâ, ceratum imponere ex cyprino factum, nitro quoque adjecto, donec omnis inflammatio finiatur. Tunc infrictionem ei membro adhibere: cibus uti bonis, uti vino modicè; jamque ad usus quoque suos id membrum promovere: quia motus ut in dolore pestifer, sic aliàs saluberrimus corpori est. Hæc communia sunt, nunc de singulis dicam.

SECT. XII. Maxilla in priorem partem propellitur; sed modò alterâ parte, modò utrâque. Si alterâ, in contrariam partem ipsa mentumque inclinatur; dentes paribus non respondent, sed sub his qui secant, canini sunt: at si utrâque, totum mentum in anteriorem partem promovetur, inferioresque dentes longiùs quàm superiores excedunt, intentique super musculi apparent. Primo quoque tempore homo in sedili collocandus est sic, ut minister à posteriore parte caput ejus contineat; vel sic ut juxta parietem is sedeat, subjecto inter parietem et caput ejus scorteo pulvino duro, eoque caput per ministrum urgeatur, quo sit immobilius. Tùm medici digiti pollices linteolis vel fasciis, ne dilabantur, involuti, in os ejus conjiciendi; cæteri extrinsecùs admovendi sunt. Ubi vehementer maxilla apprehensa est, si unâ parte procidit, concutiendum mentum,

et ad guttur adducendum est : tunc simul et caput apprehendendum, et, excitato mento, maxilla in suam sedem compellenda, et os ejus comprimendum est sic, ut omnia penè uno momento fiant. Sin utrâque parte prolapsa est, eadem omnia facienda; sed æqualiter retrò maxilla agenda est. Reposito osse, si cum dolore oculorum et cervicis iste casus incidit, ex brachio sanguis mittendus est. Quùm omnibus verò quorum ossa mota sunt, primò liquidior cibus conveniat, tùm his præcipuè : adeò ut sermo quoque frequenti motu oris nervos lædat.

SECT. XIII. Caput duobus processibus in duos sinus summæ vertebræ demissis, super cervicem contineri in primâ parte proposui. Hi processus interdùm in posteriorem partem excidunt : quo fit, ut nervi sub occipitio extendantur, mentum pectori agglutinetur, neque bibere is, neque loqui possit, interdùm sine voluntate semen emittat; quibus celerrimè mors supervenit. Ponendum autem hoc esse credidi, non quo curatio ejus rei ulla sit; sed ut res indiciiis cognosceretur, et non putarent sibi medicum defuisse, si qui sic aliquem perdidissent.

SECT. XIV. Idem casus manet eos quorum in spinâ vertebræ exciderunt : id enim non potest fieri, nisi et medullâ quæ per medium, et duabus membranulis quæ per duos à lateribus processus feruntur, et nervis qui continent, ruptis. Excidunt autem eæ et in posteriorem partem, et in priorem, et supra septum transversum, et infra : in utramvis partem exciderint, à posteriore parte vel tumor vel sinus erit : si super septum id incidit, manus resolvuntur, vomitus aut distentio nervorum insequitur, spiritus difficulter movetur, dolor urget, et aures obtusæ sunt : si sub septo, femina resolvuntur, urina suppressitur, interdùm etiam sine vo-

luntate prorumpit. Ex ejusmodi casibus, ut tardiùs quàm ex capitis, sic tamen intra triduum homo moritur. Nam quod Hippocrates dixit, vertebrâ in exteriorem partem prolapsâ, pronum hominem collocandum esse et extendendum, tùm calce aliquem super ipsum debere subsistere, eamque intùs impellere; in his accipiendum est quæ paulùm excesserunt, non in his quæ toto loco motæ sunt. Nonnunquàm enim nervorum imbecillitas efficit, ut, quamvis non exciderit vertebra, paulùm tamen in priorem partem promineat. Id non jugulat: sed ab interiore parte ne contingit quidem posse: ab exteriori si propulsum est, plerumquè iterùm redit; nisi, quod admodùm rarum est, vis nervis restituta est.

SECT. XV. Humerus autem, modò in alam excidit, modò in partem priorem. Si in alam delapsus est, ei junctus cubitus recedit ab latere, sursùmque juxta ejusdem partis aurem cum humero porrigi non potest, longiusque altero id brachium est: si in priorem partem, summum quidem brachium extenditur, minùs tamen quàm naturaliter: difficiliùsque in priorem partem quàm in posteriorem cubitus porrigitur. Igitur si in alam humerus excidit, et vel puerile adhuc est corpus, vel molle certè et imbecillibus nervis intentum est, satis est collocare id in sedili, et ex duobus ministris alteri imperare, ut caput lati scapularum ossis leniter reducat, alteri ut brachium extendat; ipsum posteriore parte residentem humerum sub alâ ejus cogere, simulque et ille latum os, et alterâ manû brachium ejus ad latus impellere. At si vastius corpus, nervive robustiores sunt, necessária est spathula lignea, quæ et crassitudinem duorum digitorum habet, et longitudine ab alâ ad digitos pervenit; in quâ summâ capitulum est rotundum et leniter cavum, ut recipere

particulam aliquam ex capite humeri possit. In eâ bina foramina tribus locis sunt inter se spatio distantibus, inque ea lora mollia conjiciuntur. Ea spatha, fasciâ involuta, quò minùs tactu lædat, ad alam à brachio dirigitur sic, ut caput ejus summæ alæ subjiciatur: deindè loris suis ad brachium deligatur; uno loco paulùm infrà humeri caput, altero paulùm supra cubitum, tertio supra manum: cui rei protinùs intervalla quoque foraminum apta sunt. Sic brachium deligatum super scalæ gallinariæ gradum trajicitur, ita altæ, ut consistere homo ipse non possit; simulque in alteram partem corpus demittitur, in alteram brachium intenditur; eoque fit ut capite ligni caput humeri impulsus in suam sedem, modò cum sono, modò sine hoc, compellatur. Multas esse alias rationes scire facile est, uno Hippocrate lecto; sed non alia magis usu comprobata est. At si in priorem partem humerus excidit, supinus homo collocandus est, fasciâque aut habenâ media ala circumdanda est, capitaque ejus post caput hominis ministro tradenda, brachium alteri; præcipiendumque, ut ille habenam, hic brachium extendat. Deindè, medicus caput quidem hominis sinistra debet repellere, dextrâ verò cubitum cum humero attollere, et os in suam sedem compellere; faciliùsque id in hoc casu, quàm in priore revertitur. Reposito humero, lana alæ subjicienda est; si in interiore parte os fuit, ut ei opponatur; si in priore, ut tamen commodiùs deligetur. Tùm fascia primùm sub alâ obvoluta caput ejus debet comprehendere, deindè perpectus ad alteram alam, ab eâque ad scapulas, rursùs que ad ejusdem humeri caput tendere, sæpiùsque ad eandem rationem circumagi, donec benè id teneat. Vincitur hac ratione humerus commodiùs continetur; si adductus ad latus est, ad id quoque fasciâ deligatur.

SECT. XVI. In cubito autem tria coire ossa, hu-

meri, et radii, et cubiti ipsius, ex his quæ primâ parte hujus voluminis posita sunt, intelligi potuit. Si cubitus qui annexus humero est, ab hoc excidit, radius qui adjunctus est, interdum trahitur, interdum subsistit. In omnes verò quatuor partes excidere cubitus potest; sed, si in priorem prolapsus est, extensum brachium est, neque recurvatur; si in posteriorem, brachium curvum est, neque extenditur, breviusque altero est; interdum febrem vomitumque bilis movet: si in exteriorem interioremve, brachium porrectum est, sed paulum in eam partem à quâ os recessit, recurvatur. Quidquid incidit, reponendi ratio una est: neque in cubito tantum est, sed in omnibus quoque membris longis, quæ per articulum longâ testâ junguntur. Utrumque membrum in diversas partes extendere, donec spatium inter ossa liberum sit; tum id os quod excidit, ab eâ parte in quam prolapsus est, in contrariam impellere. Extendendi tamen alia atque alia genera sunt, prout nervi valent, aut ossa huc illucve se dederunt: ac modò manibus solis utendum est, modò quædam alia adhibenda. Ergo si in priorem partem cubitus prolapsus est, extendi per duos manibus, interdum etiam habenis adjectis, satis est: deindè rotundum aliquid à lacerti parte ponendum est, et super id repentè cubitus ad humerum impellendus est. At in aliis casibus commodissimum est eâdem ratione brachium extendere, quæ fracto humero suprâ posita est, et tum ossa reponere. Reliqua curatio eadem est, quæ in omnibus: celerius tamen et sæpius id resolvendum est, multoque magis aquâ calidâ fovendum, et diutius ex oleo et nitro ac sale perfricandum. In cubito enim celerius quàm in ullo alio articulo, sive extrâ remansit, sive intus revertit, callus

circumdatur, isque si per quietem increvit, flexus illius postea prohibet.

SECT. XVII. Manus quoque in omnes quatuor partes prolabitur. Si in posteriorem partem excidit, porrigi digiti non possunt; si in priorem, non inclinantur; si in alterutrum latus, manus in contrarium, id est, aut ad pollicem, aut ad minimum digitum convertitur. Reponi non difficillimè potest. Super durum locum et renitentem ex alterâ parte intendi manus, ex alterâ brachium debet sic, ut prona sit, si in posteriorem partem os excidit; supina, si in priorem; si in anteriorem exterioremve, in latus. Ubi satis nervi diducti sunt, si in alterutrum latus procidit, manibus in contrarium repellendum est. At his quæ in priorem posterioremve partem prolapsa sunt, super imponendum durum aliquid, idque suprâ prominens os manu urgendum est, per quod vis adjecta os facilius in suam sedem compellit.

SECT. XVIII. In palmâ quoque ossa interdum suis sedibus promoventur, modò in priorem partem, modò in posteriorem: in latus enim moveri, paribus ossibus oppositis, non possunt. Signum id solum est, quod omnium commune est; tumor ab eâ parte in quam os venit; sinus ab eâ à quâ recessit: sed sine intentione digito tantummodò benè pressum os, in suam sedem revertitur.

SECT. XIX. At in digitis totidem ferè casus, eademque signa sunt quæ in manibus: sed in his extendendis non æquè vi opus est, quùm et articuli breviores, et nervi minùs validi sint. Super mensam tantummodò intendi debent, qui vel in priorem, vel in posteriorem partem exciderunt; tùm jam palma compelli: at id quod in latus elapsum est, digitis medici restitui.

SECT. XX. Quùm de his dixerim, de iis quoque quæ

in cruribus sunt, videri possum dixisse : siquidem etiam in hoc casu quædam similitudo est femori et humero, tibiæ et cubito, pedi et manui. Quædam tamen separatim quoque de his dicenda sunt. Femur in omnes quatuor partes promovetur, sæpissimè in anteriorem, deindè in posteriorem, rarò admodum in priorem aut posteriorem. Si in anteriorem partem prolapsus est, crus longius altero et valgius est; extrà enim pes ultimus spectat: si in posteriorem, brevius varumque fit, et pes intùs inclinatur; calx ingressu terram non contingit, sed planta ima; meliùsque id crus superius corpus quàm in priore casu fert, minùsque baculo eget. Si in priorem, crus extensum est, implicarique non potest, alteri cruri ad calcem par est: sed ima planta minùs in priorem partem inclinatur, dolorque in hoc casu præcipuus est, et maximè urina supprimitur. Ubi cum dolore inflammatio quievit, commodè ingrediuntur, rectusque eorum pes est. Si in posteriorem, extendi non potest crus, breviusque est; ubi constitit, calx quoque terram non contingit. Magnum autem femori periculum est, ne vel difficulter reponatur, vel repositum rursùs excidat. Quidam semper iterùm excidere contendunt; sed Hippocrates et Diocles, et Philotimus, et Nileus, et Heraclides Tarentinus, clari admodum auctores, ex toto se restituisse memoriæ prodiderunt: neque tot genera machinamentorum ad extendendum in hoc casu femur, Hippocrates, Andreas, Nileus, Nymphodorus, Protarchus, Heraclides, faber quoque quidam, reperissent, si id frustrà esset. Sed ut hæc falsa opinio est, sic illud verum est: quòd ibi valentissimi nervi musculique sint, si suum robur habent, vix admittere: si non habent, repositum non continere. Tentandum igitur est, et si tenerius membrum est, satis est habenam alteram ab inguine, alteram à genu

intendi : si validius , meliùs adducent qui easdem habenas ad valida bacula deligarint : quùmque eorum fustium imas partes oppositæ moræ objecerint , superioresque ad se utrâque manu traxerint. Etiamnum valentius intenditur membrum super scamnum , cui ab utrâque parte axes sunt ad quos habenæ illæ deligantur , qui ut in torcularibus conversi , rumpere quoque , si quis perseveraverit , non solùm extendere nervos , sed et musculos possunt. Collocandus autem homo super id scamnum est , aut pronus , aut supinus , aut in latus sic , ut semper ea pars superior sit in quam os prolapsus est , ea etiam inferior , à quâ recessit. Nervis extensis , si in priorem partem os venit , rotundum aliquid super inguen ponendum , subitoque super id genu adducendum est eodem modo , eâdemque de causâ quâ idem in brachio fit ; protinùsque , si complicari femur potest , intùs est. In cæteris verò casibus , ubi ossa per vim paulùm inter se recesserunt , medicus debet id quod eminet , retrò cogere , minister contrà indè coxam propellere. Reposito osse , nihil aliud novi curatio requirit , quàm ut diutiùs is in lecto detineatur , ne si motum adhuc nervis laxioribus femur fuerit , rursùs erumpat.

SECT. XXI. Genu verò et in exteriorem , et in interiorem , et in posteriorem partem excidere notissimum est : in priorem non prolabi plerique scripserunt ; potestque id vero proximum esse , quùm indè opposita patella , ipsa quoque caput tibiæ contineat. Meges tamen eum cui id in priorem partem excidisset , à se curatum esse memoriæ prodidit. In his casibus intendi nervi rationibus iisdem quas in femore retuli , possunt. Et id quidem quod in posteriorem partem excidit , eodem modo , rotundo aliquo super poplitem imposito , adductoque eo crure , reconditur. Cætera verò mani-

bus simul, dùm ossa in diversas partes compelluntur.

SECT. XXII. Talus in omnes partes prolabitur. Ubi in interiorem partem excidit, ima pars pedis in exteriorem partem convertitur; ubi huic contrarius casus, contrarium etiam signum exstat: si in priorem partem erumpit, à posteriore latus nervus durus et intentus est, simusque is pes est: si in posteriorem, calx penè conditur, planta major fit. Reponitur autem is quoque per manus, priùs in diversa pede et crure diductis. Et in hoc quoque casu diutiùs in lectulo perseverandum est, ne is talus qui totum corpus sustinet, parùm confirmatis nervis, ferendo oneri cedat: rursùsque prorumpat. Calceamentis quoque humilioribus primo tempore utendum, ne vinctura talum ipsum lædat.

SECT. XXIII. Plantæ ossa iisdem modis quibus in manu, prodeunt, iisdemque reconduntur. Fascia tantummodò calcem quoque debet comprehendere, ne quùm mediam plantam imumque ejus vinciri necesse est, liber talus in medio relictus, materiam pleniorē recipiat, ideòque suppuret.

SECT. XXIV. In digitis nihil ultrà fieri debet quàm quod in his qui sunt in manu, positum est: potest tamen conditus articulus medius aut summus canaliculo aliquo contineri.

SECT. XXV. Hæc facienda sunt in his casibus, ubi sine vulnere ossa exciderunt. Hic quoque et ingens periculum est; et eò gravius, quò majus membrum est, quòve validioribus nervis aut musculis continetur. Ideòque in humeris femoribusque metus mortis est: at si reposita ossa sunt, spes nulla est; non repositis autem, nonnullum periculum est: eòque major in utroque timor est, quò propius vulnus articulo est. Hippocrates nihil tutò reponi posse, præter digitos, et plantas, et

manus, dixit; atque in his quoque diligenter esse agendum, ne præcipitentur ægri. Quidam brachia quoque et crura reposuerunt; et ne cancri distentionesque nervorum orirentur, sub quibus in ejusmodi casu fieret mors matura, sanguinem ex brachio miserunt. Verùm ne digitus quidem, in quo minimum, ut malum, sic etiam periculum est, reponi debet, aut in inflammatione, aut postea, quùm jam vetus res est. Si reposito quoque osse, nervi distenduntur, rursus id protinus expellendum est. Omne autem membrum quod cum vulnere loco motum, neque repositum est, sic jacere convenit, ut maximè cubantem juvat: tantùm ne moveatur, neve dependeat. In omni quoque tali morbo magnum ex longâ fame præsidium est; deinde ex curatione eâdem quæ proposita est, ubi ossibus fractis vulnus accessit. Si nudum os eminent, impedimento semper futurum est: ideò quod excedit, abscindendum est, imponendaque super arida linamenta sunt, et medicamenta non pingua; donec quæ sola esse in ejusmodi re sanitas potest, veniat: nam et debilitas sequitur, et tenuis cicatrix inducitur, quæ necesse est faciliè noxæ postea pateat.

INDEX SECTIONUM

CELSI MEDICINÆ.

LIBER I.

PRÆFATIO.

- SECT. I. Quemadmodum sanos agere conveniat.
II. Quæ imbecillis servanda sint.
III. Observationes quædam, prout res novæ incidunt, et corporum genera, et sexus, et ætates, et tempora anni sunt.
IV. De his, qui aliqua parte corporis laborant, et primum de his, quibus caput infirmum est.
V. De his, qui lippitudine, gravedine, destillatione, tonsillisque laborant.
VI. Ad solutam alvum remedia.
VII. Remedia ad coli dolorem.
VIII. Quæ agenda sint stomacho laborantibus.
IX. Quid observandum sit dolore nervorum laborantibus.
X. Observatio in pestilentia.

LIBER II.

- SECT. I. Quæ anni tempora, quæ tempestatum genera, que partes ætatis, qualia corpora vel tuta, vel morbis opportuna sint, et quod valetudinis genus in quoque timeri possit.
II. De signis adversæ valetudinis futuræ.

- III. Quæ bona in ægrotantibus signa sint.
- IV. Mala signa ægrotantium.
- V. De signis longæ valetudinis.
- VI. De indiciis mortis.
- VII. De notis, quas aliquis in singulis morborum generibus habere possit.
- VIII. Quæ notæ in quoque morbi genere vel spem vel pericula ostendant.
- IX. De morborum curationibus.
- X. De sanguinis detractone per venas.
- XI. De sanguinis detractone per cucurbitulas.
- XII. De dejectione.
- XIII. De vomitu.
- XIV. De frictione.
- XV. De gestatione.
- XVI. De abstinencia.
- XVII. De sudore.
- XVIII. Qui cibi potionesque, aut valentis aut mediæ aut imbecillæ materiæ sint.
- XIX. Quæ natura ac proprietas cujusque rei sit, quâ vescimur.
- XX. De his, quæ boni succi sunt.
- XXI. De his, quæ mali succi sunt.
- XXII. Quæ res lenes, quæve acres sint.
- XXIII. De his, quæ crassiorem, quæve tenuiorem pituitam faciunt.
- XXIV. De his, quæ stomacho idonea sunt.
- XXV. Quæ res alienæ stomacho sint.
- XXVI. De his, quæ inflant.
- XXVII. De his, quæ calefaciunt, aut refrigerant.
- XXVIII. De his, quæ intus facile corrumpuntur.
- XXIX. De his, quæ alvum movent.
- XXX. De his, quæ alvum adstringunt.
- XXXI. De his, quæ urinam movent.

XXXII. De his, quæ ad somnum apta sunt.

XXXIII. De his, quæ materiam evocant.

LIBER III.

SECT. I. De morborum generibus.

II. Quomodo morbi cognoscantur, et an iucrescant, an minuantur; et qua ratione ab initio, qui languere incipit, curari debeat.

III. De febrium generibus.

IV. De curationum diversis generibus.

V. De febrium speciebus, et singularum curationibus: et primo, quando cibus febricitantibus dandus sit.

VI. Quando potiones febricitantibus dari expediat.

VII. Quomodo pestilentes febres curari debeant.

VIII. Curatio semitertianæ febris, quæ ἡμιτριταῖος dicitur.

IX. Curatio lentarum febrium.

X. Remedia in febribus ad capitis dolorem, et præcordiorum inflammationem, et ariditatem et scabritiem linguæ.

XI. Remedia contra frigus, quod febrem præcedit.

XII. Curatio horroris in febribus.

XIII. Curatio quotidianæ febris.

XIV. Curatio tertianæ febris.

XV. Curatio quartanæ febris.

XVI. Curatio duarum quartanarum.

XVII. Curatio quotidianæ febris, quæ ex quartana facta sit.

XVIII. De tribus insanie generibus: et primo, de ejus curatione quæ a Græcis φρενίτις dicitur.

- XIX. De cardiacis.
- XX. De lethargicis.
- XXI. De hydropicis.
- XXII. De tabe, et ejus speciebus.
- XXIII. De comitiali morbo.
- XXIV. De regio morbo.
- XXV. De elephantia.
- XXVI. De attonitis.
- XXVII. De resolutione nervorum.

LIBER IV.

- SECT. I. De humani corporis interioribus sedibus.
- II. De curationibus morborum, qui nascuntur a capite.
- III. De cervicis morbis.
- IV. De faucium morbis : et primum, de angina.
- V. De stomachi morbis.
- VI. De laterum doloribus.
- VII. De viscerum morbis : et primò, de pulmone.
- VIII. De hepaticis.
- IX. De lienosis.
- X. De renum morbis.
- XI. De intestinorum morbis : et primo, de cholera.
- XII. De cœliaco, ventriculi morbo.
- XIII. De tenuioris intestini morbo.
- XIV. De morbo intestini plenioris.
- XV. De torminibus.
- XVI. De lævitate intestinorum.
- XVII. De lumbricis alvum occupantibus.
- XVIII. De tenesmo.
- XIX. De ventris fluxu.
- XX. De vulvæ morbo.
- XXI. De seminis nimia ex naturalibus profusione.

- XXII. De coxarum morbis.
XXIII. De genuum dolore.
XXIV. De-manuum et pedum articularumque
vitiis.
XXV. De refectione convalescentium a morbo.

LIBER V.

- SECT. I. De simplicibus facultatibus quarumcumque rerum, et quibus medicamenta sunt : et primo, de his quæ sanguinem supprimunt.
- II. Quæ vulnus glutinent.
III. Quæ concoquant, et moveant pus.
IV. Quæ aperiant vulnera.
V. Quæ purgent.
VI. Quæ rodant.
VII. Quæ exedant corpus.
VIII. Quæ adurant.
IX. Quæ crustas ulceribus inducant.
X. Quæ crustas ulceribus resolvant.
XI. Quæ discutiant ea, quæ in aliqua parte corporis coierunt.
XII. Quæ evocent, et educant.
XIII. Quæ exasperata lævent.
XIV. Quæ carnem nutriant, et ulcus impleant.
XV. Quæ molliant.
XVI. Quæ cutem purgent.
XVII. De mixturis simplicium rerum; et de ratione ponderum.
XVIII. De malagmatis.
XIX. De emplastris.
XX. De pastillis.
XXI. De pessis.
XXII. De medicamentis, quibus aridis utimur.

- XXIII. De antidotis, et quibus malis opitulentur.
XXIV. De acopis.
XXV. De catapotiiis.
XXVI. De quinque generibus noxarum corporis.
XXVII. De vulneribus, quæ per morsus inferuntur, eorumque curationibus.
XXVIII. De interioribus ulceribus, quæ, aliquâ corporum parte corruptâ nascuntur.

LIBER VI.

- SECT. I. De vitiis singularum corporis partium.
II. De porrigine.
III. De sycosi.
IV. De areis.
V. De varis, et lenticulis, et ephelide.
VI. De oculorum morbis: et primo, de his qui lenibus medicamentis curantur.
VII. De aurium morbis.
VIII. De narium morbis.
IX. De dentium dolore.
X. De tonsillis.
XI. De oris ulceribus.
XII. De linguæ ulceribus.
XIII. De parulidibus et ulceribus gingivarum.
XIV. De uvæ morbo.
XV. De cancro oris.
XVI. De parotidibus.
XVII. De umbilico prominente.
XVIII. De obscænarum partium vitiis.
XIX. De digitorum ulceribus.

LIBER VII.

PRÆFATIO. De Chirurgica, et qui in eâ claruerint, et qualis esse Chirurgus debeat, et quid hoc in libro describatur.

SECT. I. De luxatis.

II. De his, quæ per se intumescunt, quomodo incidenda et curanda sint.

III. De bonis malisve signis suppurationum.

IV. De fistulis.

V. De telis e corpore extrahendis.

VI. De gangliis, et meliceride, et atheromate, et steatomate, capitis tuberculis.

VII. De oculorum vitiis, quæ scalpello et manu curantur.

VIII. De aurium morbis, qui manu et scalpello curantur.

IX. Curta in auribus, labrisque ac naribus, quomodo sarciri et curari possint,

X. De polypo.

XI. De ozæna.

XII. De oris vitiis, quæ manu et ferro curantur.

XIII. De cervicis vitiis.

XIV. De umbilici vitiis.

XV. Quomodo aqua hydropicis emittatur.

XVI. De ventre ictu perforato, et intestinis vulneratis.

XVII. De interiore membrana abdominis rupta.

XVIII. De testiculorum natura et morbis.

XIX. De testiculorum curationibus communibus: et primo, de incisione inguinis, vel scroti.

XX. De intestini in scrotum devoluti curatione.

XXI. De omenti in scrotum prelapsi curatione.


XXII. De ramicis curatione.

- XXIII. De carne, quæ inter tunicas testiculorum
concrevit, et de nervo indurato.
- XXIV. De ramice inguinis.
- XXV. Ad tegendam glandem colis, si nuda est.
- XXVI. De urinæ reddendæ difficultate et cura-
tione.
- XXVII. De cancro qui, incisâ vesicâ, nascitur.
- XXVIII. Si naturalia feminarum non admittunt
concubitum, quomodo curari conveniat.
- XXIX. Qua ratione partus emortuus ex utero
excutiatur.
- XXX. De ani vitiis.
- XXXI. De varicibus.
- XXXII. De digitis cohærentibus, et curvatis.
- XXXIII. De gangræna.

LIBER VIII.

- SECT. I. De positu et figura ossium totius humani cor-
poris.
- II. Ossa vitiata et corrupta quibus signis cognos-
cantur, et qua ratione curentur.
- III. Quomodo os excidatur; et de modiolis, et
terebrâ, ferramentis ad id paratis.
- IV. De calvaria fracta.
- V. De naso fracto.
- VI. De auribus fractis.
- VII. De maxilla fracta, et quibusdam ad omnia
ossa pertinentibus.
- VIII. De jugulo fracto.
- IX. De costis fractis.
- X. De humerorum, brachiorum, femorum, cru-
rum, digitorum fractorum, vel evulsorum,
communibus curationibus.

- XI. De ossibus luxatis.
XII. De maxilla luxata.
XIII. De capite luxato.
XIV. De spina luxata,
XV. De humero luxato.
XVI. De cubito luxato.
XVII. De manu luxata.
XVIII. De palma luxata.
XIX. De digitis luxatis.
XX. De femore luxato.
XXI. De genu luxato.
XXII. De talo luxato.
XXIII. De planta luxata.
XXIV. De digitis luxatis.
XV. De his quæ, cum vulnere, loco moventur.
-



INDEX MORBORUM.

A.

Abcessus minuti.	237
Abdominis membrana rupta.	331
Abstinentia curationis initium.	74
— Duo genera.	<i>idem</i>
Accessiones, in febribus attentè considerandæ.	96
Acetum, in ore retentum prodest æstuantibus, in balneo.	27
Acopa varia.	203
Ἀποχρῶδων.	243
Ægri quam minimè exasperandi tristibus notitiis.	98
Æsculapius auctor vetustissimus.	7
Ætas periculosior hieme.	27
Ætas media tutissima.	38
Αἰγὶλῶψ.	310
Alvus-quæ astringant eam, 30 et 83, quæ solvant, 30 et 84, quid requirat cita.	33
Angina.	148
Antidota varia.	201
Ani morbi.	290
— Vitia manu curanda.	258
— Lapsus quid requirat.	293
Aqua frigida infusa quibus prosit.	25
— Intercus quandò minimè terribilis.	56
Arearum duo genera.	251
Articulorum vitia quandò solvi possunt.	57
— Quibus familiaria, quo modò curanda.	177
Ἀσθμα.	149

Aspide (ab) percussus quid faciat.	228
Autumnus periculosissimus.	37
Aurium morbi.	272
— Quam curationem poscant.	273
— Cartilago rupta quomodo sananda.	381

B.

Balneum fervens fatigatis, non idoneum.	25
— Quomodo fatigati levare debeant.	26
— Quomodo exusti in sole.	<i>idem</i>
— Ejus usus duplex.	75
Brachium fractum quid requirat.	390
Βρογχονήλη, quomodo sanetur.	326

C.

Calculosi quibus indiciis cognoscuntur	345
— Eorum curatio.	<i>idem</i>
Calculus arenosus.	349
— Ejus curatio, in feminis.	350
Calefacientia corpus.	30
Calor quæ adjuvet.	35
— Quid faciat nimius.	<i>idem</i>
Calvaria percussa, quid requirat.	374
— Variæ curationes.	376
Cancer.	288
— Ejus indicia et curatio.	353
— Naturalium in feminis.	355
Capitis varia tubercula.	305
Capitis mala.	250
Caput grave quid nuntiet.	49
Caput infirmum.	32
Carbunculus.	230

Catapotia varia.	203
Cathartica varia.	181
Causæ morborum abditæ.	3
— Evidentes.	10
Cerebri vulnerati notitiæ.	209
Χαλάζια	308
Chironium ulcus.	235
Chirurgo necessariæ qualitates.	296
Cholera, quid sit, quo modò sanetur.	163
Cibus, quis ejus modus.	24
— Ordo.	<i>idem</i>
Ciborum varia genera.	77
— Variæ qualitates.	80
Clavus.	244
Coïtus primus solvit morbos infantiles.	41
Colis inflammatio.	285
Colis vitia et curatio.	343
Collyria varia.	256
Comitialis morbus quomodò sanandus.	130
Concubitus quomodò, quandò habendus.	22
Condyloma.	291
Conjecturalis ars medicina.	48
Cordis percussi notæ.	209
Corpora quæ rodant, exedant.	182
— Adurant.	183
Corpus, quid habilissimum.	38
Costarum fractarum curatio.	385
Coxarum dolores.	176
Crudum ructans, quid facere debeat.	23
Crus fractum quid poscat.	391
Crustas, quid inducat, resolvat.	183
Cubitus fractus.	391
— Delapsus quid velit.	401
Cucurbitularum duo sunt genera.	67

Curatio morborum.	63
Cutem quid purget.	184
Cutis in vulnere dura, periculosa; tenuis, commo- dissima.	217

D.

Dejectio, quandò movenda.	29
— Quid agendum antè.	<i>idem</i>
Dejectio, quomodò provocatur.	68
Dejectiones instantes.	49
Delirium a capite vulnerato.	54
Democritus, medicinæ peritus.	
Dentium dolores, quam curationem exigant.	277
Διάφραγμα	15
Diætetica, ex tribus medicinæ partibus difficillima.	12
Dies impares.	94
Digitorum ulcera.	293
Digitorum vitia quomodò recidenda.	361
— Prolapsi quomodò reducendi.	402
Discussientia medicamenta.	183
Destillatio frequens tabem timendam testatur.	49
Dolor articulorum.	50
— A partu vehemens.	<i>idem</i>
— Circa tempora et frontem.	<i>idem</i>
Dolor pulmonis.	54
Dolores capitis quid submoveat.	57
— In febre continenti mortiferi.	58
— Subiti in sano homine quid denuntient.	60
Δυσεντερία, quid sit, quo modò sanetur.	168

E.

Ἐγξανθίς.	309
Ἐνδοός.	166

INDEX.

Ἐλεφαντίασιν, quid denuntiet, quid sanet.	421
Empirici, qui fuerint.	133
Emplastrorum usus et nomina.	9
Ἐμπροσθότονος.	192
Ἡπατικόν, quid denuntiet, quid sanet.	146
Ephelis.	160
Ἐπινυκτίς.	252
Erasistratus, quid de hydropisi putaverit.	245
Ἐρυσίπελας.	125
— Duo genera, quomodò curanda.	219
Exercitationes, quæ commodæ.	220
— Quis earum finis esse debeat.	23
— Quæ rectè sequantur.	24
Extenuantia corpus.	<i>idem</i>
	27

F.

Fascia lintea, ad vulnus deligandum aptissima.	215
Fatigati, quæ debeat esse eorum diætetica.	25
— Is potio frigida inutilis.	26
Fatigato quotidianum cubile tutissimum est.	<i>idem</i>
Faucium exulceratio.	150
Febris in partu.	61
Febrium variarum signa.	90
— Diversæ curationes.	91
Femur promotum quomodò reponatur.	403
Fistulæ quandò secandæ.	300
— Quid de eis Sostratus.	301
Fistularum plura genera.	239
Fracturarum communia remedia.	388 et 392
Frictio, quandò, quò, quandiù, fieri debeat.	70
Frigus quibus inimicum.	35
Frigus in febribus.	107
Furunculus.	236

G.

Gangrena quando et quomodo recidenda.	361
Γάγγραινα.	221
— Quomodo curanda.	221
Genu prolapsum quomodo reponendum	404
Genuum dolores.	177
Gestatio, quibus morbis necessaria.	74
Gestationis Asclepiades auctor.	71
— Plura genera.	73

H.

Hæmorroïdes.	229
Hiems salubris.	37
Horror in febribus.	108
Humectantia corpus.	30
Humeri fracti curatio.	389
— Delapsi curatio.	399
Hydropisis quomodo curanda.	122

I.

Incidere corpora mortuorum nefarium	11
— Vivorum.	<i>Ide m</i>
Indicia certa mortis.	48
Infibulandi ratio.	344
Inflationem, quæ legumina afferant.	83
Insania febricitantium.	113
Insaniam quid tollat.	57
Integrum corpus quibus signis cognoscatur.	23
Intestina elapsa quomodo reponenda.	329
Intestinorum lævitas.	169

INDEX.

Intestinorum lævitas quando periculosa.	423
— Quænam ejus signa.	61
Imbecillitas.	<i>Idem.</i>
Imbecilli quæ debeat esse agendi ratio.	118
— Ex aliquâ corporis parte.	22
Impetiginis quatuor species.	32
Implentia corpus.	247
	27

J.

Jecinoris vulnerati notæ.	289
Jejuno, magis nocens jejuni serpentis morsus.	228
Jugulum fractum quomodo curandum.	383

K.

Καρκίνωμα.	231
Κατασταγµὸς κεφαλαῖος.	144
Κεφάλαιον quid denuntiet.	141
Κύριον.	242
Κοιλιακὸς νόσος.	165
Χόλον Dolens quid requirat.	34
Κονδύλωματα, durata quomodo curanda.	359
Κριθή.	307
Κωλιακὸν ἄλγηµα.	166

L.

Labra fissa quomodo sananda,	325
Λαγώφθαλμος.	313
Lenticulæ.	252
Lethargus-quomodo curandus.	120
Lienis magnus.	52

Lienis inflatio.	161
Lienis icti notæ.	209
Linguae resolutio.	144
Linguae ulcera.	282
Linguae membrana infantibus quomodo subse- canda.	325
Lippitudo.	253
Longum morbum optare quando utile.	45
Lotiones , ab Asclepiade vituperatæ : quibus in morbis adhibendæ.	69
Lumbrici quomodo fugandi.	170

M.

Malagmata.	105
— Quomodo misceantur, eorum usus et nomina.	186
Manus prolapsa quid requirat.	402
Maxilla fracta quid requirat.	382
— mota sedibus suis quomodo reducatur.	397
Medici-primi philosophi.	8
Medicina-ejus origo.	7
— In tres partes dividitur.	8
— Rationalis.	9
Medullæ discissæ, notæ.	210
Menstrua deficientia.	50
Mixturæ variæ.	198
Mollientia.	184
Morbi ad iram deorum relati.	7
Morbi veris.	38
— Ætatis.	<i>Idem.</i>
— Autumni.	<i>Idem.</i>
— Hiemis.	39
— Infantium.	41
— Senectutis.	<i>Idem.</i>

INDEX.

	425
Morbos acutos quid denuntiet : quid sanet.	88
Morborum divisiones.	87
Morborum interiorum sedes.	138
Morbus Comitialis ægre finitur post annum quintum et vicesimum.	60
Morbus regius.	49
Morbi varii quomodo curandi.	224
Μυδρίασις.	268
Mulier gravida acuto morbo faciliè consumitur.	47
Μυρμήκια.	244

N.

Narium morbi quomodo curandi.	275
Narium carunculæ.	276
Narium os et cartilago fracta quid poscant.	380
Naturales actiones corporis; de his variæ opiniones.	10
Naturalium partium morbos quid afferat, quid sanet.	175
Nervi dolentes objiciendi labori et frigori.	35
Nervorum resolutio quomodo curanda.	134
Nervorum tremor, quomodo sanandus.	
Notæ quæ in morbis spem aut periculum ostendunt	55

O.

Obesi sæpe subito moriuntur.	41
Observationes in diæticam ex novis rebus, corporum generibus, sexu, ætatibus, etc.	24 et 25
Oculorum resolutio.	267
Oculorum imbecillitas.	268
Ὅπισθότονος.	146
Ora, quid aperiat in corporibus.	181
Ora venarum, fundentia sanguinem quomodo tollenda.	359

Oris ulcera.	280
Ossium, positus, figuræ, nomina.	363
— Vitia.	370
— Curatio.	371
Ossa suis sedibus mota quomodo curanda.	395
Ὄζαινα quid sanaret non inventum.	222

P.

Palmæ ossa promota, quo modo reducenda.	402
Palpebræ cohærentes.	310
Papularum duo genera.	247
Παρωτίδες.	285
Παρουλίδαι.	282
Partus eliditur fusâ alvo.	52
Partes naturales.	331
— Earum vitia.	362
— Remedia.	334
Pastillorum facultates, usus et nomina.	197
Pedis ossa prolapsa quomodo reponenda.	405
Περιπνευµονία.	159
Pestilentiâ imminente quî vivendum.	36
Phrenesis febricitantium.	113
Φθειρίασις.	361
Φίµωσις.	343
Φύγεθλον.	237
Φῦμα.	236
Φύματα.	188
Pituita.	317
Pituitam, quæ crassiorem faciant.	81
Πλευρίτις.	157
Polypum quomodo extirpandum.	322

INDEX.

Polypus.	427
Porrigo.	276
Potionum varia genera.	250
Potiones quandiù ministranda in febribus.	79
Præcordiorum dolor.	99
Processus lapsos quid denuntiet.	49
Πρόπτωσης.	398
Pulmonis icti notæ.	258
Punctio quomodo facienda.	209
Pus.	328
Pus quid concoquat et moveat.	210
Pustularum plura genera.	181
	245

R.

Ramex quomôdò curandus.	341
Regius morbus.	132
Remissiones in febribus attentè considerandæ.	96
Renum affectio.	163
Renum percussorum notæ.	209

S.

Sacer ignis.	233
Sanguis, quæ nuntiat ejus profluvium.	49
Sanguinis color et habitus quid denuntient.	67
Sanguinis exspuitio.	152
Sanguinis missio.	63
— Non omnibus bona.	64
— Quibus in morbis adhibenda.	<i>idem</i>
— Quâ ex parte fieri debeat.	66

— Quomodò supprimenda.	67
Sanguinis profusio suppressa.	48
Sanguinem, quid supprimat.	181
Sanus homo, qui agere debeat.	22
Sanies.	210
Scabiem, quid denuntiet; quid sanet.	246
Sugillata.	296
Septi transversi, percussi notæ.	210
Signa adversæ valetudinis.	41
— Quæ bona in ægrotantibus,	42
— Quæ mala.	43
— Mortis instantis.	46
Signa instantis insanix.	53
Signa quæ in variis morbis spem, aut pericula ostendunt.	55
Signa singulorum morborum.	49
Somno, quid aptum.	85
Spasmus, a frigore.	38
Σπασμὸς κυνικὸς, quo modò sanetur.	143
Spinæ fractæ curatio.	387
Sputa quæ mala.	58
Σταφύλωμα.	314
Stomachus laborans quî reficiatur.	34
— Infirnum, quæ indicent,	<i>idem</i>
Stomacho quæ sint aptissima.	82
— Aliena.	<i>idem</i>
Stomachi percussi nota.	210
Stomachi exulceratio.	155
Struma.	235
Succi boni.	80
— Mali.	82
— Lenes.	<i>idem</i>
Σύχωσις.	251
Sudor duobus modis elicitur.	75

INDEX.

429

Sudor frigidus, in acutâ febre pestiferus.	47
Suffusio.	315
Suppurationes quæ pessimæ.	59
Suppurationis signa.	54
— Quum oculis non patet.	55

T.

Tabes quomodò sanauda.	126
Talus prolapsus quid requirat.	405
Τεινεσμός.	171
Tela quomodò extrahenda.	302
Τέτανος.	146
Tetanus a frigore.	38
Tempestates quæ optimæ, quæ pessimæ.	37
Tempus anni. Quæ sint observanda vere, æstate, autumno, hyeme.	32
Θηρίωμα.	232
Tonsillæ inflammatae	279
— Induratae.	324
Tormina quandò non periculosa.	57
Tubercula callosa.	214
Tussis.	151

U.

Υδροφοβία.	225
Ulcera, cum citò esse desierunt quid timendum.	52
Ulceris in vulvâ signa.	51
Umbilici vitia.	326
— Quid denuntiet, quid sanet.	327
Uinctio exercitationem rectè sequitur.	24
Uinctio, frictionis omninò dispar.	72
Unguis.	388

Ὑπόχυσις.	267
Urina, quæ species ejus et signa.	48
Urina, quæ signa dare possit in morbis.	51
Urinæ retentio.	344
Urinam quid moveat.	85
Uvæ inflammatio.	283
— Amputatio.	324

V.

Valetudinis adversæ instantis signa.	37
Varicum curatio.	360
Varos curare pene ineptum.	252
Venenorum variorum varia remedia.	229
Venæ fallaces in febre.	99
Venti qui salubres.	38
Venus secundum anni tempora.	31
Ver saluberrimum.	37
Veratrum album, comitali morbo oppressis, insa-	
nientibus quoque bonum.	71
Vermes aurium.	273
Vertebras delapsas, quid denuntiet.	398
Victûs ratio secundum ætates.	30
Vitiliginis tres species.	248
Vomitus ab Asclepiade rejectus.	28
— Quando utilis.	<i>idem</i>
— Ne sit quotidianus.	29
— Quibus juvetur.	<i>idem</i>
— Quid post vomitum agendum.	<i>idem</i>
— Biliosis necessarius.	70
Vomitum quid denuntiet.	48
Vulnera quid glutinet.	181
Vulnera varia, quas curationes poscant.	207
Vulvæ percussæ notæ.	209

INDEX.


Vulvæ morbi.	431
Vesicæ vulneratæ, notæ.	174
	210

Υ.

Υδροκέφαλον.	142
--------------	-----







Efficiamus est medici, ut
tuto, ut celeriter, ut ju-
vande curet. Lib. 3. Sect. 4.

Ruber, tumor cum calore
et dolore, Lib. 3. Sect. 10.



